

# Fihirana FFPM

*Entrez dans ses portes avec des louanges, Dans ses parvis avec des cantiques !  
Célébrez-le, bénissez son nom !  
Psaumes 100:4*

## **1 - Andriananahary masina indrindra!**

1. Andriananahary masina indrindra!  
Ny anjelin'ao izay mitoetra Amin'ao  
Mifamaly hoe : Masina indrindra  
Andriananahary, Telo Izay Iray.
2. Andriananahary masina indrindra!  
Na tsy hita aza izao ny voninahitrao!  
Masina indrindra Hianao irery.  
Andriananahary, Telo Izay Iray.
3. Zava-manana aina samy mankalaza  
Sady manambara Anao Izay Tompony  
izao;  
Hianao irery no mitahy azy,  
Andriananahary, Telo Izay Iray.
4. Andriananahary feno hatsarana!  
He ny fitahiana izay mpanomponao.  
Tsara dia tsara ny omenao azy  
Andriananahary, Telo Izay Iray.
5. Andriananahary masina indrindra!  
Izahay mpanomponao ta-hankalaza  
Anao;  
Feno fahendrena, feno fiantrana,  
Andriananahary, Telo Izay Iray.

## **2 - Misaora an'i Zanahary**

1. Misaora an'i Zanahary  
'Zao olona tontolo izao;  
Dia mankalaza Azy,  
Fa anton'izao rehetra izao
2. Izay zavatra nomeny  
Mahafaly, mahaso;,  
Toy ny andro fararano,  
Toy ny andro mipoaka.
3. Dia ampitomboy ny sainay

Hahalala ny teninao,  
Hahafantatra marina  
Izay sitraky ny fonao.

## **3 - Isaorana anie Andriamanitsika**

1. Isaorana anie Andriamanitsika  
Fa fitahiam-be Omeny ho antsika  
Hatreo ambohoka  
Ka mandraka antitra,  
Isika henika  
Ny soan'ny lanitra
2. Tsy mety tapitra na lany ny haren'ny,  
Tsy hita faritra ny sisa izay homeny;  
Fanahy sambatra  
Sy fo miadana  
No efa santatra  
Izay ananana.
3. Ny Ray sy Zanaka sy ny Fanahy koa,  
Derain'ny masina ho Tompo iray tokoa;  
Andriamanitray  
Be fahasoavana  
No anateranay  
Izay fisaorana.

## **4 - Mamy ny fitianao**

1. Mamy ny fitianao,  
Ry Jehovah Tomponay!  
Foinao ny Zanakao,  
Ho Mpanavotra anay.  
Tsy mba misy tokenay  
Afatsy ny Zanakao.  
Ka misaotra Anao izahay  
Noho ny fitianao.
2. Mamy ny fitianao,  
Mahafaly fo tokoa;  
Izahay avelanao  
Mba hibe-baka avokoa.  
Lasa lavitra izahay,  
Nefa notadiavinao;

Efa ratsy izahay,  
Nefa tsy nafoinao.

3. Mamy ny fitiana,  
Izay andraisanao anay  
HOnina ao an-dapanao  
Raha ho faty izahay  
Noho ny ratsy izay natao,  
Loza no anjaranay,  
Nefa namboaranao  
Paradisa izahay.

4. Mamy re, ry Tomponay!  
Izao fitiana izao,  
Ka indreto izahay  
Avy mba hisaotra Anao.  
Raiso re izao saotra izao,  
Fa fanati-tsitraro;  
Tsy mba mendrika ho Anao,  
Nefa vokatry ny fo.

## **5 - Jehovah, Ray an-danitra**

1. Jehovah, Ray an-danitra,  
Mpamelona anay  
Tsinjovy ny mpanomponao,  
Tsarovy izahay.

2. Jehovah, Ray mamindra fo!  
Henoy ny hatakay;  
Ekeo sy raso ho Anao  
Ny dera entinay.

3. Jehovah, Ray mahari-po!  
Vonoy ny helokay;  
Diovy ny fanahinay,  
Velomy izahay.

4. Jehovah Ray! Ny antranao  
No itokianay;  
Ambara-pahafatinay  
Hisaoranay Hianao.

## **6 - Avia, miondreha**

1. Avia, miondreha,  
Ry vazan-tany ô!  
Fa lehibe Jehovah,  
Sy masina tokoa;  
Miankohofa tsara,  
Manatona Azy 'zao  
Haneho fanajana  
ILay Mpanao anao.

2. Andriananahary,  
Manaiky izahay  
Fa Aminao ny hery  
Tsy hay toherina.  
Tsy misy maharara  
Ny tiana hatao,  
Fa Hianao Mpitondra  
Izao rehetra izao.

3. Re any lavitra any  
Izao ny herinao,  
Ka isam-bazan-tany  
Hiondrika Aminao;  
Mpanjaka sy Mpitsara  
Mahery Hianao;  
Miadana ny tany  
Miankina aminao.

## **7 - Misaora an'Andriamanitra**

1. Misaora an'Andriamanitra  
Izay nanao ny lanitra.  
Namorona ny tany koa  
Sy 'zay rehetra mahaso

2. Derao ny voninahiny,  
Ankalazao ny heriny,  
Jereo ny fitiavany  
Tsy tambonao tononina.

3. Dia avy izahay izao,  
Ry Tompo be fitia ô!  
Miondrika eo imasonao  
Midera ny Anaranao.

4. Isaorana mandrakizay  
Hianao, Andriamanitray!  
Ny haja be indrindra izao  
Atolotray mpanomponao.

## **8 - Dera, Laza, Hery, Haja**

1. Dera, Laza, Hery, Haja,  
Ho an'Andriamanitra  
Tompon'aina, Zanahary,  
Rain'ny voninahitra,  
Izy no mpanao antsika,  
Sady ivelomana;  
Fototr'aina, foto-tsoa,  
Izy ivavahana.  
Hihira isika hoe : Haleloia!  
Dera ho an'Andriamanitra  
:,:Dia Haleloia! Haleloia! :,:

2. Ray Tsitoha, tsy miova,  
Tia sy mamindra fo,  
Mahaso isan'andro,  
Izy no isaorana;  
Vatolampy tsy mifindra,  
Token'olombelona;  
Fiarova-mahavonjy,  
Izy itokiana  
Hihira isika hoe : Haleloia!  
Dera ho an'Andriamanitra  
:,:Dia Haleloia! Haleloia! :,:

## **9 - Ry Tompo Zanaharinay!**

1. Ry Tompo Zanaharinay!  
Manati-tsaotra izahay,  
F'efa novelominao,  
Ka tratr'izao maraina izao.

2. Ny aizina efa lasa izao,  
mazava no naposakao;  
Levony koa ny otanay,  
Ka hazavao ny hevitrany.

3. Ny asanay hatao anio  
Atrehonao ka mba tahio,  
Hatao ho voninahitrao,  
Handrasanay ny antranao

4. Derainay Hianao, ry Ray!  
Derainay Jeso Tomponay,  
Derainay ny Fanahy koa,  
Derainay fa mpanisy soa.

## **10 - Ry Tomponay Tsitoha ô!**

1. Ry Tomponay Tsitoha ô!  
Mpanao izao tontolo izao,  
Ankalazainay Hianao  
Fa lehibe ny herinao,

2. Ny hiran'ny anjelinao  
Manerana ny lanitra,  
Manehoeho fatratra  
Ny hobin'ny voaavotra;

3. Fa masina, fa masina,  
Fa masina i Jehovah!  
Ka heniky ny lazanao  
Ny tany sy ny lanitrao.

4. Ireo mpitory irakao  
Mihoby eo anilanao,  
Nahefa fanompoana,  
Mihira ny fisaorana

5. Izao olonao rehetra izao  
Dia mino sy manaiky Anao  
Ho Ray Tsy miova sady to,  
Mahery ny mpamindra fo.

6. Ny Zanakao nirahinao  
Sy ny Fanahy Masinao  
Isaoranay Anao, ry Ray,  
Fa foto-pamonjena anay!

7. Ry Kristy ô, Mpanjakanay  
Mitovy hery amin-dRay,

Ny fitiavanao anay  
No nisoloanao anay.

8. Ny lozam-pahafatesana  
Novanao ho fiainana,  
Izany no hiainanay  
Na eto na rahatrizay.

9. Ao an-kavananao Rainao ao  
No itoeranao izao,  
Fa mbola hidina indray  
Hitsena sy handray anay.

10. Ka faly naiditra  
Ho mponina ao an-danitra  
Izahay izay navotanao,  
Hiombon-dova aminao.

11. Tario lâlana izahay,  
Vimbinanao ny dianay,  
Ka isan-andro vaky izao  
Hambaranay ny lazanao.

12. Vonjeonao, ry Tompo ô!  
Vonoy ny ratsy ao am-po,  
Ka hasoavy izahay  
Ambara-pahafatinay.

13. Fa lehibe ny antranao,  
Mahery koa Hianao,  
Ka dia matoky izahay  
Ry Tompo Zanaharinay.

## **11 - Endrey ny voninahitrao**

1. Endrey ny voninahitrao,  
Ry Ray Tsitoha ô!  
Endrey ny fiandriananao,  
Hajainay eram-po!

2. Ny herinao, ny andronao,  
Dia mandrakizay!  
Ny lanitra mitsaoka Anao  
Ry Andriamanitray!

3. Ny tavanao mamiratra  
Ny fahamasinanao  
Sy hery tapitr'ohatra,  
Ny fahendrenao soa.

4. Endrey, mahatahotra aho izao  
Ry Tompo masina ô!  
Mangovitra eo imasonao  
Sao dia lavinao

5. Na dia ambony Hianao,  
Dia nidina amiko  
Nitondra fihavanana,  
Ka dia mba tiako.

6. Koa aiza re no misy ray,  
Mitovy aminao;  
Mikarakara tsara anay  
Izay natsanganao

7. O, mahagaga Hianao,  
Ry Tompo tia anay,  
Ny fonay dia hatoky Anao  
Ambara-podinay.

## **12 - Jehovah ô, derainay Hianao!**

1. Jehovah ô, derainay Hianao!  
Ankalazainay ny Anaranao!  
::Izao rehetra izao manaja Anao,  
Fa Rainay ho mandrakizay ::;

2. Mpanjakanay sy Tompo masina  
Omenay eram-po ny hasina  
::Izao rehetra izao mihoby Anao,  
Fa Rainay ho mandrakizay ::;

3. Ry Masina manerinerina,  
Jehovah be fitia sy marina!  
::Izao rehetra izao misaotra Anao,  
Fa Rainay ho mandrakizay ::;

4. Manerana izao tontolo izao

Ny laza sy ny voninahitrao  
:,:Izao rehetra izao hanoa Anao,  
Fa Rainay ho mandrakizay :,:

5. Andriananahary masina ô  
Tanteraka ny fiandriananao  
:,:Izao rehetra izao mitsaoka Anao,  
Fa Rainay ho mandrakizay :,:

### **13 - Misaora ny Mpahary**

1. Misaora ny Mpahary,  
Tsarovinao ny asany!  
Misaora ny Mpahary,  
Derao ny soa vitany!  
Ny helokao rehetra  
Dia voavelany,  
Fa tsy mba misy fetra Ny fitiavany,  
Ny Zanany nafoiny  
Mba ho Mpamonjinao,  
Ka hianao nantsoiny  
Handray ny aim-baovao.

2. Ny toky izay nomeny  
Sy ny fahasoavana,  
Maharitra ireny,  
Tsy manam-pahataperana;  
Avelany tokoa  
Ny hatezerany,  
Ka tsy mba hahavao  
Antsika olony,  
Fa Izy mahalala  
Ny toetsika aty,  
Ka tena Ray mandala  
Antsika zanany.

3. He, toy ny voninkazo  
Ny ain'ny olombelona,  
Tsy ela dia malazo  
Ka tena mora levona,  
Fa Jeso manan-kery  
Hamoha fasana,  
Tsy hisy izay ho very  
Ny olo-masina;

Isi ka vovotany  
No namboariny  
Hiombom-panjakana  
Sy laza aminy.

4. Misaora ny Mpahary,  
Ry tany sy ry lanitra !  
Ry zava-boahary,  
Derao, Andriamanitra !  
Ry irany mahery  
Manao ny sitrany,  
Ry zanany izay very,  
Kaneffa hitany,  
Misaora Azy ary,  
Fa heniky ny soa,  
Misaora ny Mpahary,  
O, ry fanahiko !

### **14 - O, ry tany rehetra avia izao**

1. O, ry tany rehetra, avia izao  
Hidera ny Tompo Mpanavotra anao  
Ny Tompo miantso antsika hankao  
Anatrehany mba hohasoaviny ao:

Fiv : Dera, laza, anie, Voninahi-dehibe,  
Ho Anao, ry Tomponay Tsitoha o!  
Amen.

2. He, Jehovah miantra antsika izao  
Ka dia manolotra antsika indray  
Ny endriny mbamin'ny aina vaovao;  
Eny, Izy manaiky tokoa ho Ray  
Dera, laza, sns...

3. Asandrato ny feo hihoby hoe:  
Isaorana mandrakizay Hianao  
Ry Tompo mahery, Izay manome  
Ho anay olom-bery ny aina vaovao:  
Dera, laza, sns...

## 15 - Avia hankalaza

1. Avia hankalaza  
Ny Tompo lehibe;  
Fa feno hery, haja  
Jehovah Marina e  
Andeha mitambara,  
Ry vazan-tany o!  
Miankohofa tsara  
Hanaja Azy izao!

2. Ry Tomponay Tsitoha,  
Indreto izahay,  
Manondrika ny loha,  
Midera Anao, ry Ray,  
Ny fonay sy ny hery,  
Fanahy, saina koa,  
Omena Anao irery,  
Ka anjakao tokoa.

3. Mpanjaka tena hendry  
Hianao, ry Tomponay  
Ka tena mahakendry  
Izay hahasoa anay;  
Na misy toa mangidy  
Ny fitondranao, soa,  
Ny saina sy safidy  
Manaiky anao tokoa.

4. Manerana ny tany  
Izao, ny lazanao,  
Ka be tsy hita lany  
Ny voninahitrao;  
Koa hira fiderana  
Ventesinay izao:  
Haleloia, Hosana!  
Mba raiso ho Anao.

## 16 - Avia, ry vazantany ô!

1. Avia, ry vazantany ô!  
Sy mponina ao an-danitra  
Miraissa feo ka mihirà

Ny fanavotan-dehibe,  
:::Zay amonjena marobe  
Dia vita re ka miderà:::

2. Avia, ry fiangonana ô!  
Mba asandrato re ny feo  
Hidera ny Mpanavotra;  
Na aty an'efitra aza izao,  
::: Hirao am-pandehana  
Ny hira soan'i Ziona :::

3. Avia, ry voavonjy ô!  
Ka mifalia avokoa,  
Fa afa-doza hianareo;  
Miraissa feo ka mihirà  
::: Derao, derao fa mendrika  
Ilay nanavotra anareo :::

4. Avia, ry olom-bery ô!  
Izay mandre ny teny soa  
Hoe: "Manatona Ahy 'zao";  
Anio ny Tompo mba fidio  
::: Ny fitiavany valio;  
Ny fiderany koa hirao :::

## 17 - Haja sy voninahitra

1. Haja sy voninahitra  
Omena an'Andriamanitra,  
Fa Izy ihany no mahefa  
:::Izay s it raky ny font'::::

2. Masina, tsy azo haratsiana;  
Mahery, tsy azo resena;  
Marina, tsy azo laingaina;  
Hendry tsy azo fitahina

3. Ny am-po toy ny am-bava;  
Ny maizina toy ny mazava;  
Ny takona toy ny miseho;  
::: Tsy misy àry tsy hitany:::

4. Tsy miova ny fombany;  
Lehibe ka tsy oharina;

Tia, tsy azo arovana;  
:: Miantra tsy azo ferana ::

5.Saotra amam-bavaka atao  
Dera sy laza ho azy;  
Izy no ivavahana,  
:: Fa anton'izao tontolo izao ::

## **18 - Ny feonay rehetra izao**

1. Ny feonay rehetra izao  
Dia entinay midera Anao,  
Ry Andriananaharinay!  
Na ambany aza izahay,,  
:: Dia tianao,::  
Ry Andriananaharinay!

2. Ny andronay rehetra izao  
Dia entinay manoà Anao,  
Ry Tompo sy Mpanjakanay!  
Satria izao dia fantatray  
:: Fa tianao ::  
Ry Tompo sy Mpanjakanay!

3.Ny hevitrany rehetra izao  
Dia enti-mankalaza Anao!  
Ry Tompo Mpanasoa anay!  
Mpitahy ny fanahinay,  
:: Fa tianao,::  
Ry Tompo Mpanasoa anay!

4. Ny herinany rehetra izao  
No iasanay ho Anao,  
Ry Aronay sy Tanjakay!  
Miezaka tokoa izahay  
:: Fa tianao ::  
Ry Aronay sy Tanjakay!

5. Rehefa alainao izahay,  
Ka tapitra ny andronay,  
Hamantana any aminao  
Izahay ary an-danitrao,  
:: Fa tianao ::

Hamantana any Aminao.

## **19 - Misaotra Anao zahay izao**

1. Misaotra Anao zahay izao  
Jehovah Ray!  
Fa efa notohizanao  
Ny andronay,  
Ka tonga aty an-tranonao,  
Indray zahay.

2. Misaotra Anao 'zahay izao,  
Ry Mpanome!  
Ny soa avy aminao  
Tsy lany re,  
Fa isan-andro misy vao,  
Ka miro be.

3. Misaotra Anao'zahay izao,  
Ry Rainay soa!  
Ny helokay navelanao,  
Nefa iza moa  
No mahalaza izay natao?  
Fa be tokoa.

4. Misaotra Anao'zahay izao,  
Ry mora fo!  
Ny mafy tsy sakananao  
Tsy mba hanjo,  
Fa be ny fanirianao  
Anay hadio.

5. Misaotra Anao'zahay izao,  
Ry Tomponay!  
Ao aminao an-danitrao  
Honenanay,  
Fa misy fitsaharana ao  
Mandrakizay.

## **20 - Tsaroanay tokoa izao**



1. Tsaroanay tokoa izao  
Ny soa be noraisinay,  
Tsy tapaka avy taminao  
Ry Andriananaharinay.

2. Ny lasa itodihana  
Dia mampiseho avokoa  
Ny tanam-pitiavana  
Miahy sady manasoa.

3. He! Koa 'ty andronay ity,  
Izay diavinay izao,  
Dia voahodidina ery  
Ny fitahiana aminao.

4. Dia tokinay tokoa izay  
Fa mbola ho arovanao  
Anio, ampitso, rahatrizay,  
Izay miankina Aminao.

5. Ka dia mba velomy re  
Aty anatinay ny fo  
Hahay misaotra Anao anie,  
Ry Rainay be famindram-po!

## **21 - Derao Andriamanitra**

1. Derao Andriamanitra,  
Ry vazan-tany efatra,  
Fa Izy no mamindra fo  
Ka mety manome ny zo,  
Naniraka ny Zanany,  
Hanavotra ny olony  
Ny sandriny tsy toha re,  
Fa manan-kery lehibe.  
Malaza ny Anarany,  
Fa lehibe ny asany.

2. Ny zavatra rehetra e,  
Ny ranomasin-dehibe,  
Ireo tendrombohitra,  
Ny saha feno ahitra,  
Ny hazo sy ny vorona

Ny vato sy ny zavona,  
Ny voninkazo manitra,  
Ny endriky ny lanitra  
Dia samy tsy mijanona  
Midera ny Mpamorona.

3. Ry olona navotana,  
Mba mitsangàna faingana,  
Ka miderà ny Tomponao,  
Izay nanavotra anao,  
Fa he, ny voninahiny  
Manerana ny taniny.  
Tendreo ny valihanao  
Ka miventesa hira vao:  
Ry voavonjy ô, derao  
Ny Ray Mpamorona anao!

## **22 - Ry Rainay Izay namorona**

1. Ry Rainay Izay namorona  
Izao rehetra Izao,  
Ny hita sy ny takona  
Dia asan-tananao.

2. Ny volana aman-kintana,  
Ny biby marobe.  
Ny ala maitso mavana,  
Hitsaoka Anao anie.

3. Ny tany sy ny lanitra,  
Ny ranomasina,  
Ireo tendrombohitra  
Manolo-kasina.

4. Ny ory sy ny mpanana  
Dia fototra iray,  
Fa samy asan-tanana  
Nataonao Tomponay

5. Dia saotra no atolotray  
Anao, ka raisonao,  
Fa fanomezan-ko anay  
Ny asan-tànananao.

## 23 - Tsy misy zava-mahasoa

1. Tsy misy zava-mahasoa,  
Andriamanitra ô!  
'Zay tsy nataonao ho anay  
Mba hifalianay.

2. Tsy misy singan'ahitra,  
Na ravin-kazo koa  
Izay tsy amantaranay  
Fa hendry Hianao.

3. Ny kintana mazava ery  
Maneho avokoa  
Fa sitrakao hanafaka  
Ny aizina aminay.

4. Izay rehetra tazanay  
Dia voninahitrao;  
Izay rehetra takona  
Milaza izany koa.

5. Ny tany sy ny lanitra  
Nataon'ny herinao  
Dia azo ianarana  
Ny famindramponao.

## 24 - Ny lanitra ao ambony ao

1. Ny lanitra ao ambony ao,  
::: Andriamanitra ô! :::  
Izay rehetra vitanao  
Dia mahagaga anay. (in-3)

2. Ny volana aman-kintana,  
::: Ny masoandro koa :::  
Ny tany aman-danitra.  
Mitory avokoa. (in-3)

3. Ny andro aman'alina  
::: Milaza aminay :::  
Fa hendry Andriamanitra,  
Jehovah Tomponay.

4. Ny tenanay, fanahy koa,  
::: Dia avy taminao, :::  
Ka mampiseho tsara koa  
Ny voninahitrao. (in-3)

5. Izay rehetra vitanao  
::: Aty sy any koa :::  
Miara-mankalaza Anao,  
Fa Tompony tokoa. (in-3)

## 25 - Andriamanitra hendry

1. Andriamanitra hendry  
::: Loharanon-tsaina :::  
::: manolo-pahendrena  
'Zay manaiky Azy:::

2. Andriamanitra mahay  
::: Iza rehetra izao :::  
Ka Izy no akana saina  
Hahahendry antsika :::

3. Ary isika mila saina  
::: Hanitsy antsika, :::  
::: Amin'ny fianarana  
Hanarahana Azy :::

4. Izy no ihavian'  
::: Ny soa rehetra :::  
::: Hiainana mandrakizay,  
Ka Izy no omen-tsaotra :::

## 26 - Jehovah tsy mba manadino

1. Jehovah tsy mba manadino  
Ny mpanompony manoa,  
Fa hotsarovany ireo mino  
Nofidiny ho Azy koa.  
Manerinerina ambony  
Ny fiandrianany;  
Kaneffa kosa re ny fony  
Mitsinjo izay ambany.

2. Izaho dia ravoravo

Ka midera Azy izao;  
Fahasoavanao, ry Avo,  
No namonjy hatrizao,  
Fahavokisan'ny fanahy  
Ary fisandratana  
No hotantaninao ho ahy:  
Ny foko mankalaza.

3. O, mifalia, ry Israely,  
Fa vonjen'ny sandriny;  
Mba matokia dia hahery,  
Antsoy ny Anarany:  
Mpanomponao ity mitalaho,  
Ka henoy ny hatako,  
O, ry Mahery, inty aho!  
Ny sitrakao ekeko.

## **27 - Fitiavana tokoa**

1. Fitiavana tokoa  
Re, ny Ray an-danitra,  
Fa manolo-java-tsoa  
Tena mahasambatra,  
Ho antsika izay mpanota,  
Ory, osa, rera-po.  
Izy masina sy tò,  
Ta-hanaisotra ny ota  
Noho ny fanavotam-be  
Vitan'i Jesosy, e!

2. Tsy ho very, ry mahantra  
Sy miferin'aina izao,  
Fa ny Ray Izay feno antra,  
Aoka mba hinoanao.  
Sambatra ny voavela  
Heloka tokoa re,  
Fa jesosy manome  
Fanavaozam-po sy lela,  
Hira fideram-baovao  
No ho re an-dalanao.

3. O, ry Rainay be fitia  
Mba ampio izahay  
Tsy ho kivy tsy hania

Ao am-pandehananay,  
Fa handroso mba hankany  
Aminao an-danitra.  
Ry Andriamanitra,  
Be loza aty an-tany  
Fa ny ranomasonay  
Faohinao, rahatrizay.

## **28 - Zanahary tsy mba tia**

1. Zanahary tsy mba tia,  
Ny fahaverezanao,  
Izy Rainao be fitia,  
Tsy mba mahafoy anao.  
Ny famoizam-po ario,  
Fa jesosy itokio  
Mba hatoninao anio  
Ilay be Fahasoavana.!

2. Izy dia nitady ela,  
Vao nahita anao izao,  
Mifalia, tsy hoela  
Dia hody ianao.  
He, ry ondry saiky very,  
Ory, osa, feno fery,  
Ny mpamonjy manan-kery,  
Hahasitrana anao!

3. Ny ao, an-danitra mifaly,  
Raha misy miova fo  
Ary any ny anjely  
Miramirana avokoa.  
Fo marary dia tsaboiny,  
Ahihim-po vonoiny,  
Fiadanana lazainy;  
Sambatra isika re!

## **29 - Ry foko, mitsangàna izao**

1. Ry foko, mitsangàna izao  
Ka miderà ny Tomponao,  
Andriamanintsika.  
Nasehony ny heriny,  
Ny fasana levoniny

Tsy hahatàna antsika.  
Derao! Hobio!  
Haleloia sy hosana, Fanjakana,  
Azy Tompom-pahefana.

2. He! Vitanao Mpanavotra  
Ny lova mahasambatra:  
Ny fasana resenao.  
Mahazo toky fatratra,  
Ny mitomany sasatra:  
Ny lanitra vohanao.  
Jeso Kristy  
'Zay nitsangana maraina  
Tompon'aina:  
Andro Paka Arahabaina.

3. Derao ny voninahiny!  
Ankalazao ny heriny,  
Fa resy re Satana.  
Ry tany sy ry lanitra,  
Derao Andriamanitra  
Akaro ny Hosana.  
Raiso, Tompo,  
Raisonao ny voninahitra  
Aman-dera:  
Ho anao, ry Zanak'ondry.

### **30 - Paradisako, ry Jeso**

1. Paradisako, ry Jeso,  
Fifaliako Hianao;  
Lanitry ny foko eto  
Sy Edenako vaovao!

Fiv : Paradisa soan'ny foko  
Eto an-tany Hianao;  
Fanaperan-tsoako,  
Ao an-danitra vaovao!

2. Volafotsy, volamena,  
Vatsoako Hianao.  
Zava-tsoako sy harena  
Miafina ao an-danitra ao  
Paradisa sns...

3. Zo sy hajako tokoa  
Hianao, Mpanavotro,  
Haingo sarobidy koa,  
Satro-boninahitro.  
Paradisa sns...

4. Zavatra rehetra ho ahy  
Hianao, ry Jeso tia;  
Fiainan'ny fanahy,  
Fiadanako doria.  
Paradisa sns...

### **31 - Misaotra Anao, izahay ry Ray**

1. Misaotra Anao, izahay ry Ray,  
Fa sitrakao homena ho anay  
Ny Zanakao Malalanao,  
'Lay Tokanao, no he natolotrao.  
Atolotray ny saotranay,  
O! raisonao anie Jehovah Ray.

2. Misaotra Anao, Jesosinay,  
Ny fitiavanao tsarovanay:  
Nalatsakao ny rànao soa  
Hanavotra aina ny mpanota voa;  
Atolotray ny saotranay,  
Ka raisonao e, ry Jesosinay.

3. Misaotra Anao, Fanahy koa,  
Mamelona sy monina ao am-po,  
Havaozy ao anaty ao  
Ho tonga lapanao madio sy vao.  
Atolotray ny saotranay  
Ka raiso, ry Fanahy tokinay.

### **32 - Misaotra Anao Izhay**

1. Misaotra Anao Izhay,  
Jehovah Tompo ô!  
Fa efa naharay  
Ny soa taminao.  
Ka lalandava no  
Hisaoranay Anao

Ho eo am-bavanay  
Tokoa ny Teninao.

2. Fa reharenanay  
Sy famonjena koa  
Ny Tompo tia anay,  
Tsy manam-paharoa.  
Ny fandresena soa,  
Ny fiononam-po  
Dia avy taminao  
Ka hery manavao.

3. Ny olo-mino Anao  
Sy ireo mpanomponao  
Na velona na maty,  
Dia misaotra Anao.  
Ka sambatra tokoa  
Fa manana Anao  
'Zahay, ry reharenan'!  
Ny fanahy ô!

### **33 - Tompo ô, tsy takatray**

1. Tompo ô, tsy takatray  
Ny hasoan'ny antranao;  
Zava-mahagaga anay  
Ny fitiavanao.  
He, mpanota izahay  
Nefa hasoavin'ny;  
Avotr'aina azonay;  
Misaotra no atao.

2. Tompo ô, Mpanjakanay  
Fatratra ny herinao  
Ts'isy zavatra izay  
Mahasakana Anao!  
Nefa mora fo Hianao  
Fa mandefitra aminay,  
Koa dia misaotra Anao  
Fa afaka izahay.

3. Tompo Andriamanitray,  
Avy izahay izao  
Raiso ny fiainanay;

Anao, ka anjakao.  
Tompo ô, tsy takatray  
Ny hasoan'ny antranao;  
Zava-mahagaga anay  
Ny fitiavanao.

### **34 - Tompo ô, Tsitoha**

1. Tompo ô, Tsitoha,  
Zanaharinay  
Asan-tananao re  
'Zao rehetra izao  
Mahagaga indrindra  
Ny fahaizanao  
Entinao mitondra  
sy miasa ao.

2. Hianao, Jehovah  
Ao mandrakizay,  
Na miovaova  
'zao rehetra izao,  
Mahagaga indrindra  
Ny fitiavanao  
Tsy mba mety miova,  
Na mandao anay.

3. Ray niandohana  
Fony fahizay;  
Mbola hiafarana  
Koa rahotrizay.  
Raiso moramora  
Re ny zanakao,  
Raha tonga ny ora  
Hiantsoanao.

### **35 - Isaoranay, ry Ray**

1. Isaoranay, ry Ray,  
Ny fitiavanao;  
Fa indro, azonay  
::: Ny taom-baovao :::  
Ry Tompo ô! Ambeno  
'Zao fifalionaizao  
Ka aoka re ho feno

Ny hasoavanao.

2. Ny taona vao lasa  
Nipaoka olon-tsoa  
Ireny mba nikasa  
:: Mba ho tafita koa ::  
Ny fitondrana anefa  
Afeninao, ry Ray!  
Ka nony miantefa  
Vao sina izahay.

3. Fanahy ô, avia  
Hitari-dalana e!  
Mandroso izao ny dia,  
Hamaky rano be  
Ny herinao tsy lefty  
No tanjaky ny fo;  
Ka ampy mba ho fefy,  
Raha avy ny manjo.

4. Itoero, Jeso tia,  
Ny sambonay re!  
Na tony na maria,  
:: 'Ty ranomasim-be ::  
Raha Hianao no hita  
Tsy fefika izahay  
Ambara-piampita  
Ary an-tratran-dRay.

### **36 - Moa ho haiko tantaraina ny hasoavanao**

1. Moa ho haiko tantaraina ny  
hasoavanao?  
Mifamatra tamin'aina ny fitiavanao  
Ny vahoaka sesehena  
'Zay nahazo famonjena  
no hider'Illy Mpamonjy soa.

Fiv : :: Jeso no derao ::  
'Zay nataony ambarao  
Jeso no derao.

2. Fiadanana nafoin'i jeso Tomponay,

F'efa tonga ny fotoana,  
Sitraky ny Ray  
Olom-bery nozahany  
Ny fatorany vahany  
Hajambana koa nalany Tsy ho ao.  
Jeso no derao, sns...

3. Hoderaina lalandava Ny Anaranao,  
Fa ny aizina nisava  
Eo imasonao;  
Na tsy tian'ny sasany aza  
Ny Anaranao malaza,  
'Zaho koa hankalaza Azy re  
Jeso no derao, sns...

### **37 - Mihainoa ry Ziona, ô!**

1. Mihainoa ry Ziona, ô!  
Avy ny Mpanjakanao!  
Re hatrany lavitra,  
Fa hobin'ny olona,  
Mifalia hianao,  
Indro Izy, ka tsenao!

2. Indro Ilay miakatra  
Mila tsy ho fantatra  
Ho Mpanjaka marina,  
Fa mietry lalina;  
Izy no Mpanjakanao,  
Ry Ziona ka derao!

3. Mandrosoa, Tompo ô!  
Mba hanjaka amiko;  
Faly re ny olonao  
Raha tonga Hianao  
O, hosana, Tomponay!  
Ry Ilay nandrasanay!

### **38 - He, hosana!**

He, hosana!  
Isaoran'anie ny Mesia,  
Izay nalefan'ny Tompo,

Ka hosana no asandratray.  
Ilay nirahinao ry Tompo  
No derainay,  
Ka hosana no asandratray!

### **39 - Faingàna, ry Mpanjaka!**

1. Faingàna, ry Mpanjaka!  
Handray ny lovanao;  
Faingàna re mba haka  
Ny tany ho Anao;  
Avia hampifaly  
Ny malahelo fo;  
Afaho ny mijaly  
Sy azon'ny manjo.

2. Avia, fa misento  
Aty ny olonao;  
Ny fanjakana ento,  
Fa Tompo Hianao.  
Tsy hisy hitomany  
Eo anatrehanao.  
Hiadana ny tany  
Izay alehanao.

3. Ny tendrombohitra avo  
Ny lohasaha koa  
Ho tonga ravoravo  
Sy tretrika avokoa;  
Ny be tsy haka an-kery  
Ny kely afa-po  
Tsy hisy izay ho very,  
Tsy hisy izay hanjo.

4. Mpanjaka sy Mpiaro  
Mahery Hianao  
Ny firenena maro  
Hitoky Aminao  
Ho avy lalandava  
Izao rehetra izao  
Hitondra harem-bevava  
Ho eo an-tongotrao.

5. Faingàna, ry Mpamonjy,

Ry Tompo be fitia,  
Ny olonao tra-bonjy  
Miantso hoe : Avia  
Anao ny fiderana  
Anao ny laza be,  
Anao ny fanjakana  
Sy arahaba e !

### **40 - Tonga ny fahazavan'i Ziona**

1. Tonga ny fahazavan'i Ziona  
Ravo ny tany  
'Zay maizina teo  
Tapitra koa ny fidradradradrana  
Ary ny tany miadana izao.

2. Tonga ny fahazavan'i Ziona  
Efa nandrasana izay ela izay,  
Izao dia tapitra ny fanompoana,  
Ka ampodina ny babo indray.

3. He, misy rano izay miboiboika  
Any an-efitra maina sy lao,  
Feno ny hobiny ny lohasaha,  
Manakoako ny hira vaovao.

4. Indro ny tany sy nosy rehetra  
Dia mankalaza ny Tompo izao,  
Ny fanjakany dia tsy manam-petra  
Miravoravo ny tany vaovao.

### **41 - Indro Jeso mandondòna eo ambaravaram-po**

1. Indro Jeso mandondòna  
Eo ambaravaram-po,  
Injao ny feony mifona  
Mba haneho indrafo,  
Aoka Izy hovohàna,  
Fa mitondra famelana  
Hampahery sy hitana  
Ny fanahinao sy fo.

2. Efa novidiny lafo



Mba ho afaka hianao;  
Izy hiara-misakafo  
Sy hifaly aminao;  
Fahasoavana zaraina,  
Lova ampanantenaina,  
Iray ny vatsy, iray ny aina,  
Ndrey, ny hasambaranao

## **42 - Vohay ny varavaram-po**

1. Vohay ny varavaram-po  
Ilay Mpanjaka manan-jo.  
Mpamonjy izao tontolo izao  
No tonga hanasoa anao!

2. Ny teny fanasana atao  
Mitondra tena aim-baovao,  
Ny fahoriana manjo  
Afahan'ny famindrampo.

3. Mba mihainoa, maneke,  
Fa sambatra izay mandre,  
Ka anjakan'ny Tompo to,  
Izay feno antra, mora fo.

4. Ny andron'aina mitatao  
No mahafaly fo izao,  
Mamiratra sy manome  
Fanantenana lehibe.

5. Ny vavahady mba vohay  
Finaritra izay mandray,  
Fa tonga Ilay Mpanjaka soa  
Hanao ny asany tokoa.

6. Sokafanay ny fo izao,  
Ry Jeso, mba hidiranao,  
Ny fahasoavana anie  
Hanananay harena be.

7. Atolotray, ry Tompo ô,  
Mba hahatamana Anao ny fo  
Ny famonjena vitanao  
No iankinanay izao.

## **43 - Manenoa, ry farara**

1. Manenoa, ry farara!  
Horohoroy, ry tany  
Ka miantsoa ny maty,  
Fa akaiky ny Mpitsara;  
:: Indro Kristy::  
Avy amin-drahona!

2. Ny feony no hampifoha  
Ny any am-pasana;  
Ny teniny no hamory  
Ny velona rehetra;  
::Samy handray::  
Ny valin'ny nataony.

3. Ny tsy mino hilazany:  
"Mialà voaozona,  
Mandehana, mitoera  
Ao amin'ny maizina"  
:: Ry mpanota::  
Any ny anjaranao.

4. Fa ny mino hilazany:  
"Avia, notahina,  
Mandrosoa, mankanesa  
Ho amin'ny mazava"  
::Io, ry mpino::  
Indro ! ny anjaranao.

## **44 - Indro Jeso, mba vohay**

1. Indro Jeso, mba vohay;  
Mba vohay !  
Avy ho sakaizanay  
Ka vohay !  
Lay Malala fahizay  
Sady sitraky ny Ray,  
Tonga ho anao indray,  
Ka vohay !

2. Indro Jeso, mba vohay;  
Mba vohay !



Tompo tia ka mba hajao;  
Mba vohay !  
Honina aminao ety,  
Ho sakaiza hatrery,  
Ho anao mandrakizay;  
Ka vohay !

3. Indro Jeso, mba vohay;  
Mba vohay !  
Mbola tia ka mba vohay  
Ka vohay !  
Tena tia ka tsy mandao,  
Raha ela sao dia lao;  
Moa holavinao izao ?  
Mba vohay !

4. Eo am-baravaranao;  
Mba vohay !  
Tsy manao an-ditra izao;  
Ka vohay !  
He ! Mandàna mora re,  
Na dia Tompo lehibe,  
Efa niandry ela be;  
Ka vohay !

#### **45 - He, tonga ho antsika ny Tompo mora fo**

1. He, tonga ho antsika  
Ny Tompo mora fo  
Mpamonjy, havantsika,  
Ilay mamindra fo  
Andeha mba hifaly  
Isika ry zareo  
Nahazo Mpampifaly,  
Ka manandrata feo!

2. Hajao ny Tompontosika  
Mpanjaka lehibe,  
Andriamanintsika,  
Mpanala rofy be;  
Avia mba hidera,  
Ry mino tsara fo!  
Avia manatera

Ny saotra ao am-po,

3. Ry Tompo, Zanahary!  
Mihira izahay,  
Fa teny mahafaly  
No tonga ho anay;  
Ny andro famonjena  
No andro sitrakay;  
Fanahy manatena  
No ifalianay.

4. Ry Tomponay! Mandraisa  
Ny haja entinay;  
Tsy volamena anefa,  
fa saotra aterinay;  
Ry Jeso Tompo soa!  
Isaoranay Hianao,  
Fa lehibe tokoa  
Ny fitiavanao.

#### **46 - O! ry Mpanefa ny toky rehetra**

1. O! ry Mpanefa ny toky rehetra,  
Moa ho ela vao tonga ny fetra?  
Tena andrasanay ny fihavianao:  
:,: Aza ela, re! :,:

2. He! Izahay, fa vahiny mandalo  
Indro manenjika ny fahavalo;  
Koa henoy re ny senton'ny olonao:  
:,: Aza ela, re! :,:

3. He! Ny voavotrao dia miandry,  
Na izahay na ireo nodimandry;  
Tompo, tsinjovy ny fasan'ny olonao:  
:,: Aza ela, re! :,:

4. Ary ny zavatra eto an-tany  
Samy miara-misento ihany,  
Ka manantena ny mba hihavianao:  
:,: Aza ela, re! :,:

5. Mbola ho ela va Ilay antenaina?  
Tsia, fa akaiky izao ny maraina;

Koa andrandrao sy antsoy ny Tompo  
hoe:

∴ Aza ela, re !∴

6. "Tsy mba ho ela, fa faingana Aho,  
Ary hanafaka ny mitalaho".

"Eny, avia, faingàna, ry Tompo ô!"

∴ Aza ela, re !∴

#### **47 - Ry Ziona, mihainoa**

1. Ry Ziona, mihainoa!  
Injay feo mafy mampifoha  
Ny ampakarina izao.  
Mbola alim-be ihany,  
Fa ny fotoana no lany,  
Ka avy ny malalanao.  
Antsoiny hianao,  
Alao ny jironao  
Ka velomy;  
Dia miaingà hivoaka,  
Hitsena ny Mpampakatra!

2. He, Ziona ravoravo,  
Fa reny izao ny antso avo,  
Ka velona ny hobiny:  
Indro, avy Kristy Tompo.  
Hanafaka anay mpanompo,  
Halainy hampakariny.  
He, faly re ny fo!  
Avia, Tompo ô!  
O, hosana!  
Mihaingo izao hitsena Anao,  
Ry Kristy, ny malalanao!

3. Hira, hoby, fiderana  
Asandratray mba hitsenana  
Anao, Jesosy Tompo ô!  
Tsy mba misy mitomany,  
Fa mirana izay mankany  
Am-pampakaram-badinao  
Mahafinaritra  
Ny hiran-danitra!  
Haleloia!

Ilaozanay ny trano lay,  
Miakatra ny dianay.

#### **48 - Hevero ry mpanota ô ny andro fitsarana**

1. Hevero ry mpanota ô,  
Ny andro fitsarana!  
Hiverina ny Tomponao  
Hamaly fahotana;  
Ny lanitra hahorana,  
Ny tany dia hodorana,  
Fa avy Ilay Mahery.

2. Trompetra no ho velona  
Hotsofin'ny anjely;  
Hisokatra ny fasana,  
Hivory izay niely;  
Ny maty dia hatsangana,  
Isika koa hakarina  
Hanatrika ny Tompo.

3. Ny boky hovelarina,  
Fa io no manambara  
Ny asa izay mifaina,  
Handraisana anjara  
Ka aza mba mihevitra  
Hahazo mihodivitra,  
Fa fantatry ny Tompo.

4. Ry Tompo ô! Hazoninay  
Ny tenim-panekena,  
Ka mba arovy izahay  
Hitana famonjena:  
Ny ranao sy ny Fanahinao  
No tokenay raha avy izao  
Ny andro fitsarana.

#### **49 - Mba jereo ny Tompontosika avy ao an-danitra**

1. Mba jereo ny Tompontosika  
Avy ao an-danitra  
Indre avy amin-kery

Ao amin'ny rahona .  
:,: Haleloia ! :,:  
Ambarao ny heriny.

2. ' Zay rehetra fahavalo  
Efa resiny tokoa;  
Mifalia, ry anjely!  
Mihobia, ry olona!  
:,: Haleloia ! :,:  
Ambarao ny lazany.

3. Fony mbola teto Izy,  
Satro-tsilo nentiny;  
'Zao ny satro-bolamena  
Mendrika ny lohany;  
:,: Haleloia ! :,:  
Ambarao ny derany.

4. Voaesoa mafy Izy.  
Be ny fahoriany  
Fa izao, asandratra Izy  
Ambarao ny hajany!  
Ao amin'ny rahona.  
:,: Haleloia ! :,:  
He, ny voninahiny !

## **50 - Mifohaza ry matory fa re ny feon'ny Mpamory**

1. Mifohaza, ry matory,  
Fa re ny feon'ny Mpamory  
Miantso izao tontolo izao,  
Miaingà, ry vovontany,  
Fa he! Jesosy avy any,  
An-danitra hitsara anao.  
Ry mbola velona!  
Ry ao am-pasana!  
Mitsangàna!  
Miandrandra ny lanitra,  
Fa ny aty dia tapitra!

2. Kristy Tompo avy any,  
Ka dia mangovitra ny tany  
Fa be ny voninahiny

Na ny ratsy na ny tsara  
Hanatrika Ilay Mpitsara,  
Miandry ny anjarany,  
Zarainy roa izao  
Ny tafavory ao;  
Ka ny tsara  
Horausiny ao aminy,  
Ny ratsy dia ariany.

3. Jeso ô! izahay mifaly,  
Na dia be ny mampijaly  
Sy mahaketraka aty:  
Hianao mahay manova  
Ny fahorianay ho lova  
Mahafinaritra ery.  
Ry fasa-maizina ô!  
Ry fahavaloko!  
Aiza moa  
Ny herinao, ny sabatrao?  
Jesosy no Mpandresy izao

## **51 - Raha tonga anio ny Tompo**

1. Raha tonga anio ny Tompo,  
Amin-kery lehibe,  
Ka arahin'ny mpanompo  
Sy anjely maro be ;

Fiv : Moa ho faly hianao  
Ka hidera ny Mpamonjy  
Izay nanavotra aina anao?

2. He! ho simba sy ho rava  
Izao rehetra àry izao.  
Ka hifankahita tava  
Ny atao sy ny Mpanao.  
Moa ho faly hianao, sns...

3. Maso maro no hijery  
Ilay nijaly fahizay,  
Fa ny mino Azy ihany  
No ho faly rahatrizay :  
Moa ho faly hianao, sns...

4. Rehefa tonga re ny Tompo  
Mba hitsara izay natao.  
Hitomany ny tsy mino,  
Fa hanatrika Azy ao :  
Moa ho faly hianao, sns...

5. O! avia re, ry Tompo!  
Mba hanjaka aminay,  
Hahatonga anay mpanompo  
Hiara-paly aminao :  
O! Avia, ô! avia,  
Fa ny olonao rehetra  
Dia maniry indrindra Anao

## **52 - Efa akaiky Jeso Tompo**

1. Efa akaiky Jeso TOMpo  
Ilay Mpamonjinao,  
Indro, tamy Kristy Tompo,  
Avy ho anao;

Fiv : Dia tano mafy tsara  
Izay anananao;  
Lova soa, tsara fara,  
Indro, ho anao.

2. Efa akaiky ny Mpamonjy  
Ta-handray anao;  
Jeso Kristy mahavonjy  
No sakaizanao  
Dia tano mafy tsara, sns...

3. Efa akaiky ny Mpitsara,  
Izay hitsara anao;  
Jeso Kristy raiso tsara  
Mba ho havanao :  
Dia tano mafy tsara, sns...

4. Aza mba mangataka andro  
Hibebahanao;  
He, mazava anio ny andro  
Mba hidiranao :  
Dia tano mafy tsara, sns...

## **53 - Miposaka ny vonjy**

1. Miposaka ny vonjy,  
Endrey ny hafaliana!  
Jesosy ny mpamonjy,  
Andriam-piadanana,  
Ilay Zanaky ny Avo  
Dia nidina taty  
Hahatonga antsika lavo  
Ho zanaka ary,  
Manangana olom-bery  
Handova lanitra,  
Ka dera, laza hery  
Ho an'Andriamanitra!

## **54 - Jeso Mpamonjy, Ilay Tompon'ny aina**

1. Jeso Mpamonjy, Ilay Tompon'ny  
aina, no hita  
Nidina teto an-tany hamonjy antsika :  
O, mba derao!  
Izy Mpanavotra anao,  
Ka mifalia, ry mino!

2. Indro ny tenin'anjely milaza ny soa!  
Teraka Jeso Mpamonjy antsika tokoa:  
O, mba derao!  
Tonga ny andro vaovao  
Andron'ny Filazantsara

3. Dia iventesonao hira vaovao re,  
izany!  
Tonga Jesosy hamonjy izay mitomany:  
I, mba derao!  
Afaka isika izao!  
Izy Mpisolo antsika!

4. Tonga ny Tompon'ny tompo hisolo  
ny ory,  
Kamifohaza, ry olona mbola matory:  
O mba derao :  
Amin'ny feo vaovao,

Jeso, Ilay Tompo mahery!

## **55 - Ny andron'ny fahasoavana**

1. Ny andron'ny fahasoavana  
Miposaka ho antsika,  
Manerana izao tontolo izao,  
Ny tarany efa hita,  
Ka ravo ny olombelona,  
Fa lasa ny alintsika.

2. Niova tery ny alina,  
Fa teraka ny Mpamonjy,  
Mamiratra re ny lanitra,  
Miseho izao ny vonjy,  
Ka lasa tokoa ny aizina,  
Mihoby ny voavonjy.

3. Na dia ho nahay nihira re  
Ny hazo an-ala rehetra,  
Ka afa-mikalo ny ravina  
Hidera ny Avo Indrindra  
Tsy ampy ho fanandratana  
Ny Tompon'ny ain-drehetra.

4. Ny feon'ny olonao izao  
Misandratra, ry Jehovah,  
Hidera ny fitiavanao  
Sy ny indrafonao soa  
Niaro ny fiangonanao  
Hatramin'ny fahagola.

5. Ho any an-tenindrazanay  
Izahay re, ry Ray Tsitoha,  
Ka hiditra ao an-tranon-dRay  
Nomanin' Ilay Mpialoha;  
Ny olonao dia ho tafaray  
Hidera Anao tokoa!

## **56 - Manatona Anao izao**

1. Manatona Anao izao,  
Ry Jeso, ny madinikao,  
Ampandrosy ny dianay,

Fa ta-hahita Anao izahay.

2. Hidera ny Anaranao  
No zava-tianay hatao;  
Miravoravo izahay,  
Fa teraka ny Tomponay.

3. Ny lanitra nilaozanao,  
Hanavotra ny olonao,  
Ho zanak'Andriamanitra  
Hifaly ao an-danitra

4. Tsy takatray heverina  
Ny fitiavan-dalina,  
Izay nitiavanao anay,  
Ka dia misaotra Anao izahay.

5. Tariho, Tompo, izahay,  
Ambinonao ny dianay,  
FA samy ta-handray Anao  
Izahay mivory eto izao.

6. O, ry Sakaiza mainay,  
Mba te-ho olonao izahay  
Hipetraka eo anilanao,  
Fa mamy ny fitiana.

7. Raha manana Anao izahay,  
Tsy hisy hatahoranay,  
Fa zaza voamarikao  
Ho isan'ny arovana.

8. Raha ao an-danitra vaovao,  
Izahay sy ny anjelinao  
Hisaotra sy hidera Anao  
Manatrika ny tavana

## **57 - Iza Noely mamy izao**

1. Iza Noely mamy izao  
No ihobiantsika  
Fa noresen'ny aim-baovao  
Ny fahafatesantsika:  
Ny Zanak'Andriamanitra,

Izay Tompom-boninahitra,  
Nandao ny lapan-dRainy  
Nateraka ho olona  
Antsika sombin'ny ainy.

2. Velomy ny fisaorana,  
Na kely monja aza,  
Ka aoka izay navotana  
Hiara-hankalaza  
Ny Zanak'Andriamanitra  
Niala tao an-danitra  
Hanafaka alahelo;  
Ry voavonjy ô! derao  
Jesosy Ilay Mpanjakanao  
He, gaina izao ny helo!

3. Izao Andriamanitra  
Dia faly, amintsika:  
Jesosy, Tompon-danitra.  
No tonga namantsika;  
Ho re hatrany lavitra  
Fa foin'Andriamanitra  
Ilay sitraky ny finy  
Hitondra fahoriana,  
Hiara-pijaliana  
Ho solon'ny mpikomy

4. Na dia tratry ny manjo,  
Izay mampiferin'aina,  
Izaho tsy hamoy fo,  
Fa manan-kantenaina;  
Jesosy dia Zokiko,  
Ka tsy hohadinoiko,  
Fa Izy tia ahy;  
Ny tenim-piadanany  
No hery anohanany  
Ny foko, izay manahy.

5. Haleloia, fa tapitra  
Ny fahoriantika!  
Derao Andriamanitra,  
Izay efa tia antsika  
O, ry fanahiko, derao  
Jesosy, Izay Mpamonjinao,

Harena tsy ho lany.  
Haleloia, haleloia!  
Fa azo ny Mpanavotra,  
Anao ny fanjakany!

## **58 - Alina masina**

1. Alina masina,  
Tonga ny Mpanavotra;  
Indro teraka ao Bethlehema  
Ny Mpanjakan'i Jerosalema,  
:: Izay mpamonjy anao ::

2. Alina masina,  
Ny anjely midina  
Ka miara-mihoby hoe :  
Indro ny fiadanam-be,  
:: Jeso teraka izao ::

3. Alina masina,  
Nisehon'ny Zanaka;  
Ny mazava niposaka,  
Ka ny tahotra afaka;  
:: Mifalia izao ::

## **59 - O! Mihobia, fa teraka**

1. O! mihobia, fa teraka  
Jesosy Tompo, Zanaka,  
Mesia nantenaina,  
Mpamonjy sitraky ny Ray  
Ho avotra mandrakizay,  
Ka mendri-koderaina!  
Rena izao  
Ny anjely mampiely  
Teny soa :  
Kristy teraka tokoa!

2. He ! Tonga ny Mpanavotra  
Hanafaka ny tahotra  
Mamatotra ny tany,  
Mitondra fiadanana,  
Ka tena mampihavana  
Ny lanitra aman-tany

Indro tonga  
Ny Mpamonjy mahavonjy  
Ny mpanota,  
Ka manaisotra ny ota.

3. Omeo voninahitra  
Ny Ray, Andriamanitra,  
Izay Tompom-pamonjena!  
Ny Zanaka no raisonao,  
Fa fananganana anao,  
Ny lova dia homena.  
Amen, Amen!  
Teny soa mamy koa,  
Isika lavo  
Tonga zanaky ny Avo!

## **60 - He, faly ny fanahiko**

1. He, faly ny fanahiko,  
Fa avy Ilay Malalako,  
Dia Jeso tonga zaza,  
Ka mety ho Mpamonjiko,  
Na dia tsy mendrika aza  
Izaho, ry Jesosy ô!  
:,: Raiso ho Anao! :,:

2. Ry Jeso Zazakely ô,  
Iriko mafy Hianao,  
Avia re, ry Zaza,  
Ny foko itoeranao  
Na dia ratsy aza  
Ka tsy mba mendrika Anao,  
:,: Ry Jesosy ô! :,:

3. Endrey ny fitiavanao,  
Ry Ray, namoy ny Zanakao;  
Izahay, izay fahavalo  
Ka ivesaran-keloka,  
Avelanao hivalo  
Ka hiditra ao an-danitra.  
:,: Enga ka ho ao! :,:

4. Endrey ny fifaliana  
Tsy tratry ny fisainana

Ataon'ireo anjely  
Manerana ny lanitra!  
Fa any ny Noely  
Hitohy tsy ho tapitra,  
:,: Enga ka ho ao! :,:

## **61 - Tany Betlehema fahiny**

1. Tany Betlehema fahiny  
Nisy Zaza teraka;  
Tonga toy ny mpivahiny,  
Nefa tena Zanaka.  
Izy no Jesosinao,  
Ka mba raiso ho anao!

2. Ao ny lapa feno haja.  
Nisy Azy fahizay;  
Saotra, dera, aman-daza  
Teo anatrehan-dRay,  
Izany no nilaozany  
Hamonjeny ny aty.

3. Zaza tsy nanota Izy,  
Nefa Zaza toa anao,  
Koa raisonao, rankizy,  
Mba ho tena havanao;  
Ary mba arahonao  
Izay fanaony hitanao

4. Raha hianao tomany,  
Izy hampangina anao,  
Izy koa hampahamamy  
Izay fifaliano:  
Matokia hianao.  
Izy no Sakaizanao!

5. Nefa mba henoy, ry Zaza:  
Ao an-danitra Izy izao.  
Fa ho avy indray hitsara  
An'izao tontolo izao:  
Koa mba fidiona  
Izy ho Mpamonjinao!

## **62 - He, teraka any Betlehema**



1. He, teraka any Betlehema,  
Ao Betlehema,  
Ny Tompon'i Jerosalema,  
:,: Haleloia! :,:;

2. Ny vilona :,: nandriany :,:  
Nihoby ny anjeliny,  
:,: Haleloia! :,:;

3. Ny magy dia :,: nanatitra :,:  
Ny miora sy ny hanitra,  
:,: Haleloia! :,:;

4. Voaisotra :,: ny helokao :,:  
Fa tonga ny Mpanavotrao,  
:,: Haleloia! :,:;

5. Isika dia :,: noraisiny :,:  
Hiombon-dova aminy,  
:,: Haleloia! :,:;

6. Isika koa :,: hianatra :,:  
Ny fideran'ny lanitra,  
:,: Haleloia! :,:;

7. Isika ao :,: an-danitra :,:  
Ho velona finaritra,  
:,: Haleloia! :,:;

8. Ho naman'ny :,: anjelinao :,:  
Izahay, ry Jeso Tompo ô!  
:,: Haleloia! :,:;

9. Hidera ny :,: Anaranao :,:  
Manatrika ny tavanao,  
:,: Haleloia! :,:;

## **63 - Tany finaritra**

1. Tany finaritra,  
Tarafin-danitra,  
Mirana ny mpivahiny ao  
Injao fihobiana

Am-pandehana  
Mankany ny Paradisa izao.

2. Andro mihelina  
Tao-mitsingerina  
ifandimbiasan'ny olona  
Tsy lefy hanitra  
Ny soan'ny lanitra  
Mamelon-kira velona.

3. Teny naely  
Hiran'anjely:  
"O! mifalia, ry reraka!  
Fa fiadanana  
No andehana:  
Fa ny Mpamonjy teraka!"

## **64 - Injany, hiran-danitra**

1. Injany hiran-danitra  
Misasak'alina;  
Lokanga volamena e,  
Tendren'ny masina!  
Ny tany dia nangina re,  
Nandre ny hira vao;  
Ho an'ny olona anie  
Ny fiadanana.

2. Ny hiran'ny anjely re  
Tsy mba mitsahatra,  
Ary ambony rahona,  
Ireo masina  
Mitendry ny lokangany  
Am-pihobiana!  
Ho an'ny olona anie  
Ny fiadanana!

3. O! ry mivesatra entana,  
Ry malahelo ô!  
Mba andrandrao ny lanitra,  
Henoy ny hira vao!  
Ny hiran'ny anjely re  
Dia mampiadam-po.  
O! mitsahara hianao



Hihaino azy izao!

4. Ny andron' olombelona,  
He fandalovana!  
Kanefa hisy tany vao  
Izay haharitra.  
Endrey ny fiadanana  
Ary rahatrizay!  
Ny hiran'ny anjely re  
Hiredona indray!

### **65 - Ry Betlehema kely ô!**

1. Ry Betlehema kely ô!  
Sondrian-tory ve?  
Kanefa injay miseho ao  
Ny hazavana be.  
Ny toky sy ny tahotra  
Mihaona ankehitriony,  
Fa Kristy Mpanavotra  
No teraka anio

2. Ry kintana maraina ô!  
Fitarik'andro soa,  
Toria fa tonga aty izao  
Ilay Mpanjaka soa!  
Ka he! ny voninahitra  
Ho an'Andriamanitra!  
Fiadanana tsy tapitra  
Ho an'ny olona!

3. Endrey, mangina fatratra  
Ny fampidinana  
Ny fitahian-danitra  
Am-pon'ny olona!  
Tsy misy tabataba re,  
Na horakoraka.  
Kanefa Kristy tonga anie  
Am-po mangoraka!

4. Rankizy hendry sy madio  
Tsarovy Kristy izao  
Fa Izy tonga aty anio  
Mba ho monjinao.

Na misy aza ny manjo,  
Izao Noely izao  
No saina fatratra ao am-po  
Hampionona anao!

5. Ry Zaza Masina sy soa,  
Ry Zanak'i Maria,  
Ry Tomponay, Mpamonjy koa,  
Midina re aty.  
Ny feon'ny lanitra no re,  
Indray Noely izay,  
Nitondra teny soa hoe:  
Hianao no Avotray!

### **66 - Ry olona ô, avia!**

1. Ry olona ô, avia!  
Ry tany, mifalia!  
Mbahenoy ny teninay:  
Teraka ny Tomponay,  
Ao an-tranon'omby ao.  
Andeha, mitsaoka Azy izao;  
Teraka ny Tompo!  
Teraka Jeso!

2. Ry olona ô, avia!  
Ry tany mifalia!  
Mba henoy, ry havanay!  
Misy Zaza hitanay  
Zanak' Andriamanitra  
Hamoha indray ny lanitra  
Teraka ny Tompo!  
Teraka Jeso!

3. Ry Kristiana ô, hobio,  
Fa afaka hianao anio;  
Resy izao ny rafinao,  
Afaka ota hianao,  
Fahasoavan-dehibe  
No ho anjaranao anie:  
Teraka ny Tompo!  
Teraka Jeso!

### **67 - Avia, ry mino!**

1. Avia, ry mino!  
Hifaly sy hihoby,  
Avia, avia hankany Betlehema;  
Teraka Jeso,  
Tompon'ny anjely;

Fiv : Avia hitsaoka Azy (in-3)  
Izay Tomponao!

2. Tompon'ny tompo,  
Andriananahary,  
Nefa mba zana-behivavy koa;  
Zanak'i Maria,  
Nefa Zanahary;  
Avia hitsaoka Azy sns...

3. Derao, ry anjely,  
Mihobia mafy,  
Ry mponina an-danitra  
ao ambony ao!  
Dera sy laza  
Atolory Azy;  
Avia hitsaoka Azy sns...

4. He, arahaba,  
Tonga aty an-tany  
Ny Tompo, Mpamonjy sy  
Mpanjaka koa,  
Tenin'ny Rainy  
Voatafy nofo,  
Avia hitsaoka Azy sns...

## **68 - Re tokoa ny feon'anjely**

1. Re tokoa ny feon'anjely  
Irak' Andriamanitra;  
He! Ny teny mahafaly  
Avy ao an-danitra.  
Entiny ny teny tsara  
Ho ety an-tany izao  
Voninahitra aman-dera,  
Tompo no omena Anao (in-3)  
Voninahitra aman-dera,

Tompo no omena Anao.

2. Terak' any Betlehema  
'Lay Mpanjaka manan-jo,  
Ka misatro-diadema,  
Voninahy-tsy ho lo.  
Misy 'zao ety an-tany  
Fihavanana tokoa,  
Hafalian-tsy ho lany,  
Fitahia-mahasoa. (in-3)  
Hafalian-tsy ho lany,  
Fitahia-mahasoa

3. Be ny lazanao, ry Tompo!  
Tsara ny Anaranao,  
Zovy re no tsy hanompo?  
Iza no handà Anao?  
Hasina sy arahaba,  
No aterina aminao;  
Fanjakana tsy ho rava,  
Ry mpanjaka no Anao! (in-3)  
Fanjakana tsy ho rava,  
Ry Mpanjaka Anao!

## **69 - Zaza Masina sy soa**

1. Zaza Masina sy soa,  
Nefa ory Hianao,  
Ka nanetry tena koa,  
Sy nandao ny lapanao.

2. Teraka ory sy nahantra,  
Trano tsy nandrianao,  
Fa tsy nisy 'zay niantra,  
Be ny fahorianao.

3. Fihinanam-bilon'omby  
No natao fandrianao,  
Fa ny trano be tsy omby,  
Nisy olo-marô tao.

4. Nofonosin-damban-jaza,  
Tonga zazabodo re,  
Nefa Tompo manan-daza

Sy Mpanjaka lehibe.

5. Efa halan'olo-marò,  
Nefa kosa tiako;  
Dia avia, ry Mpamonjy!  
Honina ato amiko.

## **70 - Iza moa io Zazakely**

1. Iza moa io Zazakely  
::: Ao Betlehema :::  
Ankalazain'ny anjely  
Misasaka alim-be?  
Injao! Mihira avokoa  
Ny mponina ao an-danitra,  
Ka iza re io Zaza soa?  
Moa Zanak' Andriamanitra?

Fiv : Io no Mpanjaka voatendry,  
Sady mahery no hendry,  
::: Zanak'Andriamanitsika,  
Koa hobio sy ifalio. :::

2. Izy no Jeso Mpanjaka,  
::: Ka mihobia! :::  
Izy mamory sy maka,  
Avia, mihobia.  
Omeo voninahitra,  
Ka mitehafa tanana;  
Hobio ry tendrombohitra  
Sy lohasaha mavana!  
Io no Mpanjaka voatendry sns...

3. Izy no Tompo nahary,  
::: Ka maneke :::  
Zanaky ny Zanahary,  
Ka dia maneke.  
Ry hazo ao an'ala ô!  
Samia re manandra-peo;  
Ry voninkazo tsara ô!  
Atero fofo-manitra :  
Io no Mpanjaka voatendry sns...

4. Efitra sy tany foana!

::: O! mihirà; :::  
Lemaka ary havoana!  
Falia, mihirà;  
Ry ranomasin-dehibe,  
Ry voron-kely tsara feo!  
Izao rehetra marobe!  
Avia mankalaza re;  
Io no Mpanjaka voatendry sns...

## **71 - Mihainoa! Mihainoa!**

1. Mihainoa! Mihainoa!  
Ny feon'anjely sambatra,  
Milaza fa vao teraka  
Ny Zanak'Andriamanitra,  
Mihainoa izao!

2. Mifalia! Mifalia!  
Ry zanak'olombelona,  
Fa tonga Ilay Mpanavotra  
Antsika izay nifatotra,  
Mifaly izao!

3. Mba omeo! Mba omeo!  
Ny fonao fa angatahiny;  
Ny tenany natolony  
Anao izay malalany;  
Mba omeo izao!

4. Matokia! Matokia!  
Ka manaraha Azy izao;  
Ilay Mpamonjy be fitia  
Nanetry tena ho anao;  
Matokia izao!

## **72 - Teraka Jesosy Tomponay**

1. Teraka Jesosy Tomponay.  
Taitra ny olona fahizay.  
Nisy anjely nihira teo,  
Mahafinaritra, tsara feo.  
Sady milaza soa aminay.  
Dia hihira anio izahay

Fiv : Taona fahasambaranay,  
Volana fifalianay.  
Andro firavoravoana Anao  
Jesosy, Zanak' Masina ô!

2. Teraka Jesosy be fitia,  
Indro kintana tonga teo,  
Avy hanoro ny Zaza soa:  
Faly ny Magy, fa Io tokoa,  
Io no Mpanjaka mandrakizay  
Dia nanaja androtr'izay.  
Taona fahasambaranay, sns...

3. Teraka Jesosy Zaza soa,  
Zaza Malalan'ny Ray tokoa.  
Tonga hamonjy io Zaza io,  
Teraka ao Betlehema anio;  
Ento 'zahay, Fanahy, hankao.  
Andronay mahafaly izao  
Taona fahasambaranay, sns...

4. Sambatra manana Anao ho. Ray,  
Faly sy ravo tokoa izahay;  
Jesosy Tompo nirahinao,  
Tonga ho nofo ny Zanakao,  
Teraka ho Mpanavotra anay  
Avy hifaly eto 'zahay:  
Taona fahasambaranay, sns...

### **73 - Indro Zazakely zanak'i Maria**

1. Indro Zazakely  
Zanak'i Maria,  
Tompon'ny anjely,  
Nefa nankaty,  
Io no Zazalahy,  
Zanaky ny Ray.  
Tonga mba hitahy:  
Izy no anay.

Fiv : Mihirà, ry tany,  
Sy ny mponina eo.  
Hafalian-tsy lany,

Manandrata feo!  
Jeso no deraina,  
Fa Mpanjaka soa;  
He! Ny fanjakany  
Lehibe tokoa.

2. Zaza nantenaina  
Fony ela be,  
Sady Tompon'aina  
Manan-kery be,  
Mihirà, ry tany!  
Eny, mifalia:  
Hoy ny mpaminany,  
Izy no Mesia:  
Mihirà, ry tany, sns...

3. Jeso Zaza hendry,  
Masina sy to,  
Tompo voatendry,  
Mpanadio ny fo,  
Aoka mba hijery  
Zao tontolo izao,  
Zaza manan-kery,  
Indro, mba hajao:  
Mihirà, ry tany, sns...

### **74 - Tany Betlehema fahiny**

1. Tany Betlehema fahiny,  
Tao an-tranon'omby re;  
Nisy Zazakely soa,  
Tampofoan-dreniny,  
Jeso Kristy Zaza io,  
Zanak'i Maria madio.

2. Nahafoy ny Rainy Izy  
Sy nandao ny lanitra,  
Tsy nandà ny trano ratsy,  
Nefa Andriamanitra:  
Toe-pahantrana re  
An'ny Tompo lehibe.

3. Fony Izy mbola Zaza  
Dia nanaiky sy nanoa,

Ary tia reny Izy,  
Sy nanetry tena koa,  
Zaza Kristiana e!  
Manaraha Azy re!

4. Ka ho hitantsika Izy  
Noho ny fitiavany:  
Fa 'Lay Zazakely tsara  
No mba Tompon-danitra,  
Ka isika zanany  
Dia hankany aminy.

5. Nefa tsy mba tranon'omby.  
Itoerany izao,  
Fa nankao an-danitra Izy.  
Sy mitafy laza ao;  
Ka ho sambatra any koa  
Tahaka Azy ny zaza soa.

## **75 - Andro malaza sady soa tokoa**

1. Andro malaza sady soa tokoa  
'Lay andro 'zay nisehoan'i Jeso:  
'Zay nantenain'ny mpaminany koa  
Mba hampiseho fihavanana,

Fiv : Mifalia sy mihobia mafy,  
Efa tonga ny Mpanavotrafo;  
Avia, ka miderà,  
Derao io Zaza io,  
;,: Hobio, hobio,  
Fa Tompotsika io.:,;

2. Anjely maro no nihoby tao;  
Mpiandry ondry nitsaoko Azy koa.  
Ny olon-kendry koa nanasina Azy,  
Andeha mba hankalaza Azy izao:  
Mifalia, sns...

3. Dera sy haja no atolotray  
Anao, ry Jeso 'zay teraka anie:  
Ka mba mandraisa ny fanatitray  
Ho zava-mani-pofona tokoa:  
Mifalia, sns...

## **76 - Miderà anio, ry mino**

1. Miderà anio, ry mino,  
Ny Mpanavotra anareo!  
Manandrata feo hidera  
An'i Kristy, Tompo soa;  
Zanaky ny vehivavy,  
Nefa Andriananahary,  
Teraka ho olona  
Mba hanavotra anareo:  
Teraka any Betlehema  
'Lay Mpanavotra anareo.

2. Taitra ny mpiandry ondry,  
Ary koa nivadi-po,  
Tamin'ny anjely maro  
Tonga tany aminy.  
Fa isika tsy ho taitra,  
Fa ho faly sy ho ravo,  
Sitraky ny Tompo soa  
Nidina ka nankaty:  
Teraka any Betlehema  
Jeso Kristy, Tompo soa.

3. Aza taitra, matokia,  
Manatòna, mihainoa.  
Mazotoa, ka avia,  
Maneke ny Tompo soa.  
Arahaba, Tomponay ô!  
Tompom-pihavananay,  
Teraka ho Tomponay;  
Tompon'ny fiainanay;  
Arahaba, Tomponay!  
Ry Mpanavo-dehibe!

## **77 - Tonga indray re ny Noely**

1. Tonga indray re ny Noely,  
Andro tsara sady soa,  
Jeso Tompon'ny Anjely,  
Nefa nietry tena koa.  
Indro tonga Zazakely  
Ho sakaizanay tokoa,

Sy hamory 'zay miely  
Hody amin-dRainy koa.

2. He! Ny fonay ravoravo,  
Ry Noely maminay,  
Fa ny Zanaky ny Avo  
No nomeny ho anay.  
Mba hanarina ny lavo  
Sady ho fiainanay;  
Feno sy mitafotafo  
'Zany hasambaranay.

3. O! ry androm-pamonjena,  
Arahaba, hianao!  
Olo-marosesehena  
No mifaly aminao.  
Avy koa mba hitsena  
'Lay Mpamonjy soa 'zahay  
Ka ny fonay no homena  
An'i Kristy Havanay.

### **78 - Be ny voninahitrao Jeso Kristy Tompo**

1. Be ny voninahitrao  
Jeso Kristy Tompo!  
Lanitra nonenanao,  
Maro no hanompo.  
Be ny mahasambatra,  
Faly re ny fonao;  
Nanam-boninahitra  
Tao an-dapan-dRainao

2. Fa ny voninahitra  
Efa nialanao;  
Ny haren' ny lanitra  
Tsy mba nojerenao.  
Teraka ho olona  
Hianao nahery,  
Ka avy mba hanavotra  
Ny mpanota very.

3. Eny, tonga Hianao  
Honina amin-tany,

'Hahazoan'ny olonao  
Soa tsy ho iany.  
Saroitra ny lalanao,  
Be ny zava-mafy,  
Loza no nanjo Anao.  
Maro no nandrafy

4. Saotra no aterinay,  
Vavaka aman-dera;  
Ravo ny fanahinay,  
Ka avy mba hihira,  
Vitanao ny asanao  
Namonjena aina,  
Ka indro ny Anaranao  
Velona ao an-tsaina.

### **79 - Sambasamba Zanahary**

Sambasamba Zanahary  
:::Tamin'ny nampidinanao  
Ny Zanakao malalanao  
Mba hisolo ny helokay :::

### **80 - He ny hoby ao an-danitra**

1. He, ny hoby ao an-danitra  
Fa Mpamonjy re no teraka  
Io no Zanak'Andriamanitra  
'Lay tanteraka

Fiv : Mifalia (O! mifalia)  
Mihobia (Sy mihobia)  
Fa tonga ho anao ny Tompo tia  
Ka mba hirao (Ka mba hirao)  
sy lazao (sy koa lazao)  
Ny famonjena azonao.

2. Zava-mahagaga fatratra  
Ny fitiavan' Andriamanitra:  
Ny mpanota tafasaraka  
Tonga sambatra:  
Mifalia, sns...

3. O! ry tany izay asandratra  
Ka vangian'ny Tompon-danitra  
Inona ary no atolotra  
Ny Mpanavotra  
Mifalia, sns...

### **81 - Tao an-tsahan'i Betlehema**

1. Tao an-tsahan'i Betlehema  
Reo mpiandry ondry re,  
Novangian'ny serafima  
Sy anjely marobe.

Fiv ::,; Voninahitra ho an'  
Andriamanitra::,  
Amin'ny avo.

2. Njay ny hiran'ny anjely,  
'Zay niredona tokoa;  
Indro tonga Imanoely,  
Zaza masina sy soa.  
Voninahitra, sns...

3. Nofo notafin'ny Teny,  
Lanitra nilaozany;  
'Ndao isika izao hankany,  
Be tokoa ny lazany.  
Voninahitra, sns...

4. Voninahitra ao ambony  
Ho an'Andriamanitra;  
Ka ny hira no redony  
Solon-java-manitra.  
Voninahitra, sns...

### **82 - He, Zaza mahasambatra**

He, Zaza mahasambatra  
No omena ho antsika;  
Virjina no niteraka  
Ilay Andriantsika,  
Izay Zanak'Andriamanitra  
Nandao ny voninahitra  
Hanavotra ny very;

ka saotra no aterinay,  
Ry Jeso Kristy Tomponay,  
Mpamonjy manan-kery'

### **83 - Ry Jeso ô! Hianao no mahavonjy**

1. Ry Jeso ô! Hianao no mahavonjy  
Izay rehetra hiankina aminao;  
Tonga taty hitady sy hamonjy  
Izay mpanota very Hianao.

Fiv : He! Ry mpanota very aty!  
::,; O! mankanesa ho any aminy::,

2. Na dia Zana-janahary aza,  
Na dia Tompo aza Hianao,  
Tsy mba nitandro hery aman-data  
Fa tonga olono ory Hianao.  
He! Ry mpanota, sns...

3. Tamin'ny dianoana nanaovan-tsoa,  
Tsy nahalala sasatra Hianao;  
Fa Hianao tsy nanana tokoa  
'Zay nametrahanao ny lohanao.  
He! Ry mpanota, sns...

4. Dia nolatsaina sy nalam-baraka  
Sy novonoin'olon-dozabe,  
Ka dia maty Hianao Mpanjaka  
Ho fanavotana olo-marobe.  
He! Ry mpanota, sns...

5. Ny fasanao nambenan'ny mahery,  
Nefa tsy ela tao ny Tomponay  
Velona indray hamonjy olom-bery,  
Velon-kanao fifonan-ko anay.  
He! Ry mpanota, sns...

### **84 - He ! Be ny hasoavana**

1. He ! Be ny hasoavana.  
Fa tonga ny fotoana,



Ka Kristy Tompo teraka  
Hamonjy sy hanavotra.

2. Ny fahotan'ny olona  
Dia lova tamin-drazana;  
Isika trany avokoa,  
Ka very re ny aina soa.

3. Inty ny Zaza Masina e,  
Izay neken'ny Rainy hoe:  
"Ny Zanako Malalako,  
'Zay mamiko sy sitrako.

4. Ny dera eran-danitra  
Omeo an'Andriamanitra,  
'Zay nahafoy ny Zanany  
Hanavotra ny olony.

## **85 - Avelao isika izay te ho tia**

1. Avelao isika  
Izay te ho tia  
Ny Mpanavotra antsika,  
Hanaraka Azy.

2. Aoka ho fantantsika  
Ny fitiavany  
Sy ny anton'ny asany  
Hiderantsika Azy.

3. Be ny fiantrany,  
Nijery ny ory,  
Tratran-dRainy nialany  
Ho teraka olona.

4. Be ny fiantrany,  
Nijaly ka maty  
Hamonjeny ny mpanota,  
Ka Izy hisaorana.

## **86 - Jereo ny Mpamonjy, izay miakatra**

1. Jereo ny Mpamonjy,

Izay miakatra  
Ho ao jerosalema  
Hanao ny avotra;  
Na dia be ny ratsy  
Mikendry Azy ao,  
Ny mba hamonjy azy  
No tiany hatao.

2. Tsy biby manan-daza  
No nitaingenany,  
Tsy ny hitady laza  
No nihaviany;  
Kaneffa manan-kery  
Handresy ho anao;  
Ny ratrany irery  
No aina ho anao.

3. Ilay voasatro-tsilo  
Noho ny helokao  
Dia mety sy maniry  
Mba ho Mpanjakanao.  
Ny rany sarobidy  
Omeny ho anao,  
Ny lanitra nihidy  
Misokatra aminao.

4. Ampio mba ho haiko  
Hatolotra Anao,  
Jesosy ô, ny aiko  
Ho voninahitrao;  
Velariko ny foko  
Eo anoloanao,  
Tsy misy tsy ho foiko  
Mba hodiovinao.

5. Hosana ! Ry Mpamonjy,  
Hiraiko ho Anao,  
Fa mamin'ny tra-bonjy  
Ny fiderana Anao.  
Hosana! Tompo tsara!  
Soava dia izao!  
Handresy ny devoly  
No anton-dianao.



## 87 - Nitomany ny Mpamonjy

1. Nitomany ny Mpamonjy,  
Fa tsy nety ho trabonjy  
Israely olony.

2. Izy dia nanambara  
Taminy ny teny tsara  
Feno fitiavana.

3. Ka ny jamba, kilemaina,  
Moana sy very saina  
Dia nositrany.

4. He, ny soa efa vira,  
Nefa nody tsy nahita  
Ny ankamaroany.

5. Ary, lotika ny fony,  
Koa halany ny Ony  
Feno rano velona.

6. Ry Mpamonjiko malala !  
Aoka aho hahalala  
Ny fitomaniana.

7. Ary hahalala koa  
Fa ny soa mahavao  
Raha tsy horaisina.

## 88 - 'Lay ora tao Getsemane

1. 'Lay ora tao Getsemane  
Tsy mba hadino re,  
Raha Hianao no tsembo-drà,  
Ry Tompon'avotra.

Fiv : ;;;Tsahiviko;;;  
Ny fahorianao.  
Raha tsinjoko ny ady be,  
Ilay tao Getsemane.

2. Nafoin-dRay irery tao.  
Nilaozan-kavana.

Handraisana anay indray  
Ho zanaky ny Ray.  
::: Tsahiviko, sns...

3. Nandroso mba hijaly tao,  
Ry Tompo, Hianao;  
Fadiranovana sy maty  
Hanavotra anay.  
::: Tsahiviko, sns...

4. Fa vinitra Jehovah Ray  
Noho ny ditranay;  
Ninianay nolavina  
Ny didy masina.  
::: Tsahiviko, sns...

5. Ka Hianao nasiana  
Ho solo-voina;  
Ny dinitrao, ry Tomponay,  
Dia valin'otanay.  
::: Tsahiviko, sns...

6. Fa sitrakao, ho afaka  
Ny olo-meloka;  
Endrey ny fitiavana  
Anay navotanao!  
::: Tsahiviko, sns...

7. Raha mila hangatsia-po  
Izaho, Tompo ô,  
Mba ampisaino ahy re  
Ny tao Getsemane  
::: Tsahiviko, sns...

## 89 - He mijaly ny Mpamonjy

1. He mijaly ny Mpamonjy  
Ao Getsemane izao,  
Ô ry te ho voavonjy,  
Manaraha Azy ao!  
Indro, ny Mpanavotra,  
Fa miady ho anao.

2. Ory ao ny Tompon'aina,

Mafy re ny adiny,  
Ka misento mitaraina,  
Tot' ny ra ny dininy.  
Ry mpanota, mijere,  
Mihevera ka hendre!

3. Indro tonga ny anjely  
Mba hampahatanjaka  
An'i jeso, Izay mijaly  
Amim-panaintainana.  
Ry Mpamonjy tia ô,  
Mamindrà fo amiko!

### 90 - Tsy haiko ny milaza re

1. Tsy haiko ny milaza re,  
'Lay fahorianao!  
Irery tao Getsemane,  
Ry Tompo masina ô!  
Tarihona ny saiko e!  
Ho ao Getsemane,  
Hahita ny fitiavanao  
Izao tontolo 'zao.

Fiv : Fitiavana ahy re,  
Ry Tompo masina ô!  
No niaretanao,  
Izao, mangidy izao!

2. Nangorohoro mafy re  
Ny fonao, Jeso tia!  
Ny tsembokao 'zay nitete,  
Nanjary toy ny ra!  
Endrey ny fahorianao  
Nangotraka tokoa!  
Tsy maintsy nosotroinao  
Ilay kapoaka tao!  
Fitiavana, sns...

3. Ho ahy re, ho ahy re,  
No niaretanao  
Irery tao Getsemane,  
Jeso malala ô!  
Sintoninao ny foko e

Ho ao Getsemane,  
Hahita izay niaretanao,  
Ho tena tia Anao;  
Fitiavana, sns...

### 91 - O! Fitiavan-dalina

1. O! fitiavan-dalina  
Nasehona ilay alina  
Izay namadihana Anao,  
Ry Jeso, fototr'aim-baovao.

2. Mangoraka ery ny fo,  
Sy ory ny fanahiko,  
Raha mba tsaroako izao  
Ny loza izay nanjo Anao.

3. Fadiranovana Hianao,  
Nangotraka ny adinao;  
Ny dinitrao nanjary ra  
Noho ny fahoriana.

4. Izany no niaretanao  
Noho ny fitiavanao,  
Ka nentinao ny heloko  
Izay tokony ho nentiko.

5. Namita faneke-baovao  
Ho famonjena Hianao,  
Nasiana kase izay  
Maharitra mandrakizay.

6. Misaotra Anao, ry Tompo ô!  
Fa ravo ny fanahiko  
Handray ny fanomezanao  
Eo amin'ny latabatrao.

7. Ny teninao inoako,  
Ka raisiko ho ao am-po:  
Ny zava-tsoa atolotrao  
Dia ranao sy ny tenanao.

8. Ry Jeso, amboarinao

Ny fonay ho fonenanao,  
Ka Hianao ho tianay  
Izao sy ho mandrakizay.

## **92 - Ry voasatro-tsilo, ry voakapoka**

1. Ry voasatro-tsilo,  
Ry voakapoka!  
Indrisy be ny loza  
Manafotra Anao!  
Nitsaohan'ny anjely  
Fahiny Hianao,  
Fa henatra sy latsa  
Anjaranao izao.

2. Atolotro, ry Jeso  
Ny foko ho Anao,  
Hiaraka hitondra  
Ny fahorianao.  
Raha henatra sy loza  
No ho anjarako,  
Dia Hianao, Mpamonjy,  
No ifaliako.

3. Tsarovy aho, Tompo,  
Raha tratry ny manjo!  
Tsy mendrika aho nefa  
Mba amindraonao fo!  
Ny ratranao no misy  
Fanasitranana,  
Ny ranao ahitana  
Ny fiadanana.

## **93 - Nampalahelo mafy re**

1. Nampalahelo mafy re  
Ny fahorian-dehibe,  
'Zay niaretanao.  
Nalaim-baraka Hianao,  
Niaritra ka tsy nandao  
Lay asa masinao.

2. Ny henatra aman-tahotra  
Mangeja anay voavotra,

Fa diso izahay.  
Avia, Tompo, mamonje,  
Meteza izao maneke  
Hanavotra indray.

3. Ampio ny olonao, Jeso,  
Hahay handray Anao am-po  
Fa mila vonjy izao.  
Monena hanatanjaka  
Ny ory sy ny reraka,  
Izay manantena Anao.

## **94 - Golgota no jereo**

1. Golgota no jereo:  
Ao ny hazo fijaliana,  
Indro re, mihantona eo  
Jeso, sady harabina,  
Moa mba fantatrao, ry fo,  
Ny fitiavan'i Jesosy ?  
'Zay nandefitra tokoa,  
Ary koa ninia ho resy

2. Famonjena ho anao  
No netezany hihafy,  
Ka hijaly toy izao  
Sy hiaritra ny mafy.  
He, ny rany nitete  
Vokatry ny fanomboana;  
Vetivety foana re  
Dia ho faty ao ny Tompo.

3. Mitsangàna, miaingà,  
Ndeha mankany Gologota:  
Ao no latsaka ny ra  
Hamonjena ny mpanota  
Io no hany mahadio,  
Antoka tsy hay ravàna;  
Eny, samy afak'io  
'Zay rehetra fahotàna.

## **95 - Ny hazo nijalianao ry Jeso Tomponay**

1. Ny hazo nijalianao,  
Ry Jeso Tomponay;  
Maneho ny fitianao,  
Dia iankinanay. (in-3)  
Maneho ny fitianao,

2. Mitazana ny masonay,  
Mangoraka ny fo;  
Na meloka aza izahay,  
Ny teninao ho to. (in-3)  
Na meloka aza izahay.

3. Ny avotr'aina vitanao  
No itokianay;  
Ny entanay voaesotrao,  
Ka afaka izahay. (in-3)  
Ny entanay voaesotrao.

4. Ny hazo nihomboanao  
Dia voninahitray;  
Ny nanalam-baraka Anao  
No isandratanay! (in-3)  
Ny nanalam-baraka Anao

## **96 - Ilay havoana natao hoe: Kalvary**

1. Ilay havoana  
Natao hoe: Kalvary  
No tany namonoana  
Ny Tompo jesy;

Fiv : O! tsarovy re!  
Maty ory tao  
Jeso Tompo lehibe  
Hanavotra anao.

2. Jereo ny Tomponao,  
Tazananao iry,  
Ka andrandrao ny masonao,  
Fa io no Kalvary:  
O! tsarovy re! sns...

3. Hevero Kalvary,  
Fa tao ny Tomponao;

Tsarovinao ny nentiny  
Mba hamonjena anao:  
O! tsarovy re! sns...

4. Tsinjovy Kalvary.  
Fa Jeso Tomponao  
Nijaly tany raha tety.  
Ka maty Izy tao.  
O! tsarovy re! sns...

## **97 - 'Lay fonao tia tao Gologota**

1. 'Lay fonao tia tao Gologota  
No velona ao an-tsaiko izao,  
Ny fonao 'zay mitady mpanota  
No voaratra indrindra tao.  
Ry fo malala, nihafy loatra,  
Lavitra ny mpangoraka Anao

2. Indro! Ny lefona koa mamely,  
Ka notrobarana Hianao!  
He! Malahelo ireo anjely,  
Fa naharary re ny fonao!  
Io no fitia tsy misy toa azy.  
Zaran'izao rehetra izao :,

3. Efa hisoka ny antoandro,  
Menatra izao tontolo izao;  
Tsy ela intsony dia maizina andro  
Kalary 'zay nihantonanao!  
Fa izaho tsy mba hangatakaandro  
Hampiantrano ny tenanao

4. Tsy sasatra na valaka koa,  
Ny fonao tia, ry Tompo ô,  
Menatra izao ity foko tsy soa  
Tsy hahavaly tokoa Anao;  
Nefa ampio aho hanaiky,  
Hanatontosa 'zay sitrakao

## **98 - Indro ny Tompo Jesosy, jereo**

1. Indro ny Tompo Jesosy, jereo,  
Tena nihafy tokoa!

He! Fa nivesatra eso, jereo,  
Mba hamonjena anao;

Fiv : Indro Jeso, jereo,:  
Izy izao dia mihevitra anao.  
Indro Jeso, jereo.

2. Indro ny Tompo Jesosy, jereo,  
Efa voahombo tokoa!  
He! Fa nijaly tsy meloka teo,  
Mba hamonjena anao;  
Indro jeso, sns...

3. Indro ny lefo-mandoza, jereo,  
Nenti-namely ny Tompo!  
He! Fa ny rany nirotsaka teo,  
Mba hamonjena anao;  
Indro jeso, sns...

### **99 - Ry fitiavan'i Jesosy**

1. Ry fitiavan'i Jesosy  
'Zay voahombo ho anay,  
Ony be sy mahavonjy,  
Aoka ho lasanao 'zahay.

Fiv : Tompo, Zanakondry tsara  
Ampy re ilay ranao,  
Tsy helohin'ny Mpitsara,  
Zay mpanota afakao.::

2. Fa misento ny fanahy  
'Zay ety an-tany 'zao;  
Malahelo sy manahy,  
Sao voan'izay natao:  
Tompo, Zanakondry, sns...

3. Ny mpanota dia ho very,  
Raha tsy mba miova izao;  
Fa hahazo tena hery,  
Raha mino tsara Anao:  
Tompo, Zanakondry, sns...

4. Enga anie ka mba hiely

Ho an'izao tontolo izao  
Ilehy ony mahafaly  
Manadio sy manavao  
Tompo, Zanakondry, sns...

### **100 - Moa mba efa nisy va fahoriana toy izao?**

1. Moa mba efa nisy va,  
Fahoriana toy izao?  
Jeso 'Lay Mpanisy soa,  
Tompo sy Mpanjaka koa,  
Entina tsy meloka,  
Entina any Kalvary.

2. He, ny lanivoany  
Voatsindi-on-defona!  
Tongotra aman-tanany  
Voafantsika avokoa.  
Eny, fa ny ainy koa,  
Foiny tany Kalvary.

3. Mafy 'zay ,ry Jeso ô!  
Mafy nefa zakanao;  
Ny fitiavanao anay!  
No niaretanao izay!  
Menatra aho, Jeso ô,  
Raha hadino Kalvary.

4. Taomy aho, Jeso ô!  
Mba ho any Kalvary;  
Ka ny foko tsy madio  
Mba diovinao anio,  
Ento aho Jeso ô!  
Ento any Kalvary.

### **101 - Ny hazo fijaliana**

1. Ny hazo fijaliana,  
Ry Jeso Tomponay  
Dia tena fahoriana  
Fa tianao 'zahay.

2. Ny hazo fijaliana

Dia manambara izao  
Fa be ny fahoriana  
Nihatra taminao.

3. Ny hazo fijaliana  
No mampiseo koa  
Fa tokony hariana  
Ny ota mahavoa.

4. Isaoranay dia isaoranay  
Hianao ry Tomponay,  
Fa be ny fitiavana  
Nataonao taminay.

### **102 - Reharehako ny hazo**

1. Reharehako ny hazo  
Nijalian'i Kristy;  
Manda fiarovana avo  
lalofako aty.

2. Azon-doza maro aho,  
Tery koa ny lalana;  
Tsy ilaozan'i Jesosy  
Mpanome fiadanana.

3. Raha lany re ny andro  
Mampiadana indray.  
Tsy hadinoko ny hazo  
Nentin'ny Mpamonjinay.

4. Ny anjara aty an-tany  
Tsy mba mahavesatra  
Noho ny hazo fijalianao,  
Hazo mahasambatra. Amen.

### **103 - Ny hazo fijaliana**

1. Ny hazo fijaliana  
Tsy maintsy hotsarovana !  
Henoy re fanahiko,  
Ny tenin'ny Mpamonjiko.

2. Ny teny voalohany

Mihevitra ny rafiny :  
"Mba mamelà ny helony,  
Fa jamba ny fanahiny !"

3. Izao koa Jesosy ô !  
Dia jamba sady ratsy fo;  
Ka mba jereo sy iantrao,  
fa te-ho tonga olonao.

4. Ilay meloka tanilany  
Naniry mba horaisiny,  
Nomeny toky tsara io :  
"Ho any any Paradisa anio"

5. Raha avy ny anjarako  
Ka tapitra ny androko,  
Mba raiso aho, Tompo ô,  
Ho any paradisanao.

6. Dia hitany ny reniny  
Tomany teo akaikiny,  
Toy ny tsindron-defona  
Ka feno fisentoana.

7. Dia Jaona no natolony  
Ho zanany ho solony.  
"Mba raisonao, ry Jaona ô  
Ho reninao ny reniko !"

8. Tsarovy aho Tompo ô !  
Raha ao am-pahoriako  
Iraho ny mpianatrao  
Hanampy ny mpanomponao !

9. Ny teniny fahaefatra  
No tena mampangovitra;  
Niantso izy hoe : "Ry Ray,  
Nahoana Aho no afoy ?"

10. Izao no dia nandaozana  
Anao tam-pahoriana;  
Hahafaka ny tahotro,  
Raha tonga ny fotoako.

11. Ny otako izay nentiny  
Nahory ny fanahiny,  
Ka nitarainany hoe :  
"Mangetaheta Aho re !"

12. Mangidy, ry Jesosy ô,  
Ny loza niaretanao,  
Ka aoka mba ho mamiko  
Ny avotra, izay vitanao !

13. Hoy izy indra : "Tanteraka :"  
He ! Teny mahasambatra,  
Tanteraka ny asany,  
Voavotra ny olony.

14. Ny teny farany indray  
Nilaza ny rahatrizay :  
"Atolotro ny aiko izao,  
Ry Ray, ho eo an-tanananao !"

15. Izany dia mamiko  
Hiorina ao anatiko,  
Ka teny hotononiko  
Eo amim-pahafatesako !

#### **104 - Raha mijery ny hazo**

1. Raha mijery ny hazo  
Nijalian'i Jesosy  
Tsy misy izay malaza  
Na izay mirehareha.

2. Aza miavonavona,  
Fa indro ny Mpananvotra;  
Ny dian'ny Jesosy Kristy  
No arahina isan'andro.

3. Indro ny rany mandeha,  
Voahombo ny tanany  
Nijaly, ka dia maty  
Nisolo olo-meloka.

4. Raha ahy 'zao tany 'zao  
Sy ny aminy rehetra,

Tsy ho azoko havaly  
Ny fitiavan'ny Jeso.

5. ny foko homeko Azy,  
Fanahiko atolotro;  
Tsy mba mendrika Azy 'zany,  
Fa Jeso no mety mandray.

#### **105 - Tsinjovy ilay havoana**

1. Tsinjovy ilay havoana,  
Ary Jerosalema,  
Fa io no Golgota  
Mba tadidio, ange !  
Fa tao nivesatra ota  
Ny Tompo masina;  
Nijaly sy nolavina,  
Ka novonoina.

2. Tsy takatra heverina  
Ny entan-dehibe,  
Izay nentin'ny Mpisolo  
Ka diniho, re !  
Fa nentiny daholo  
Ny heloka natao :  
Fa tonga Izy hanavao  
Izao tontolo izao.

3. Ny helotsika koa izao  
Dia nivesarany,  
Ka manaraha Azy,  
Mba ho mpianany,  
Raha tao Golgota izy,  
Ny rany nitete,  
Ka vita ho antsika re,  
Ny vonjy lehibe.

#### **106 - Indro ny fitiavana nijaly**

1. Indro, ny fitiavana nijaly  
Teo amin'ny hazo fijaliana;  
Ary ny ratsy nivonona hifaly  
Handresy ny Zanakalahy Tokana.



2. Indro, Ny Fitiavana mahery  
Nitondra ny heloky ny olony;  
Izy niady hanafaka ny very,  
Ny ainy no avotra ka natolony.

3. Izay nijaly mafy tao Golgota,  
Voahombo ny tongotra aman-tanany;  
Izy nisolo antsika izay mpanota,  
Ka fadiranovana ny fanahiny.

4. Ô, ry Mpamonjy, mba hazony aho  
Hijery ny Hazo fijalianao !  
Olona meloka aho ka hafao  
Hialoka amin'ny fitiavanao.

### **107 - Maniry mafy aho**

1. Maniry mafy aho, ry Jeso Tompo ô,  
Hialoka eo ambany hazo fijalianao.  
Tsy misy toeran-kafa re 'zay tena  
mamiko;  
Ny hazo fijalianao no fiarovako.

2. Ny Hazo-fijalianao no itazanako  
Ny tenanao izay nijaly mba ho avotro;  
Ka dia kotsan-dranomasom-pitiavana  
Ny tavako, ry Tompo ô! Fa afa-keloka.

3. Am-pototry ny hazo izay nijalianao  
No itoerako ho hazavain'ny tavanao,  
Ataoko fatiatoka ny zava-mora lo,  
Ny hazo-fijalianao no tombon-dahiko.

### **108 - Ny hazo fijalianao**

1. Ny hazo fijalianao,  
Ry Jeso Tompo maminay,  
Dia an'izao tontolo izao,  
Ka famonjena ho anay.

2. Mivelatra eo ka hitanay  
Izany fitiavana;  
Ka ampianaro izahay  
Ho be fitia toa Anao.

3. He! Latsaka eo ho avotray  
Ny ranao masina sy soa  
Ka mba sasao re izahay  
Ho olona madio tokoa.

4. Voatolotra eo mba ho anay  
Ny famonjena vitanao;  
Ka mba tariho izahay  
Handray ny fasoavanao.

5. Mamiratra eo ka tazany  
Ny lanitra fonenanao;  
Ka mba tantano izahay  
Ho mendrika mponina ao.

6. 'Ndrey, tena mahafinaritra  
Ny miara-monina amina;  
Ka ampio izahay hiaritra  
Ny hazo fijalianao.

### **109 - Nahafoy ny aiko Aho**

1. Nahafoy ny aiko Aho  
Hanavotako anao.  
Ka nalatsako ny rako,  
Nisoloako anao.  
He! ny aiko no nomeko  
Ry mpanota very e!  
Aiza izay afoinao re  
Mba ho Ahy Tomponao?

2. Lapan-dRaiko ao ambony,  
Voninahi-dehibe,  
No nilaozako hamonjy  
Sy hanafa-doza anao,  
'Zay voafitaky satana  
Sy nozoin-doza be;  
Aiza izay afoinao re  
Mba ho Ahy Tomponao?

3. Soa be sy mahagaga  
No natolotro anao,  
Famonjena tsy vidina,



Famelana ny otanao.  
Fitiavan-tsy voafetra,  
Lova ao an-danitra ao!  
Aiza izay afoinao re,  
Mba ho Ahy Tomponao?

4. Indro Tompo! Fa omeko  
Ho Anao ny tenako,  
Ka tsy misy izay tsy foiko  
'zay rehetra tianao;  
Eso, latsa, tsy ahoako,  
Fa ny ho mpanomponao  
No ho zavatra kendreko,  
Raiso re ny zanakao.

### **110 - Nomeko ho anao**

1. Nomeko ho anao,  
Ny rako masina,  
Hanavotra anao,  
Izay tsy marina!  
::: Ka dia mba inona izao  
No ahy taminao! :::

2. Nafoko ho anao  
Ny zava-tsoa be,  
Mba hanatonanao  
Ny Raiko lehibe.  
::: Ka dia mba inona, sns :::

3. Izaho Tomponao  
Nijaly mafy re,  
Hanafaka anao  
Mpanota lehibe:  
::: Ka dia mba inona, sns :::

4. Ny vonjy lehibe  
Nataoko ho anao,  
Ny rako nitete  
Hanadio anao;  
::: Ka dia mba inona, sns :::

5. Jesosy Tompo ô!  
Izao no teniko;

Atolotro ho Anao  
Ny aiko sy ny fo;  
::: Izany no isaorako  
Anao Mpamoniko :::

6. Ny foko raisonao,  
Oneno hatrety,  
Ataovy lapanao  
Na eto na ary;  
::: Dia tano aho, Tompo ô!  
Mba ho fanananao :::

### **111 - Indro ny Mpamonjy**

1. Indro ny Mpamonjy,  
Mpanavotra antsika,  
Izy no manontany hoe:  
"Tianao va Aho?"

2. Izaho no Mpamonjy  
Sy Mpisolo anao;  
Ny rako manontany hoe:  
"Tianao va Aho?"

3. Ny fitiavako  
Tsy mety miova,  
Ka mbola manontany hoe:  
"Tianao va Aho?"

4. Ry Jesio Tompoko!  
Malahelo 'zahay,  
Ny fitiavanay Anao  
Mbola tsy toy inona.

5. Aezezo ao am-po  
Ny fitiavanao,  
Hahazaoanay mamaly:  
"Tianay Hianao."

### **112 - Tsy ny hahazo zavatra**

1. Tsy ny hahazo zavatra  
Ary an-danitra  
No itiavako Anao

Ry Andriamanitra.

2. Tsy noho ny atahorako  
Ny fijaliana,  
Fa noho ny fitiavana,  
No itiavako.

3. Voahombo, voalefona,  
Voalatsa Hianao:  
Nahinjitra ny tãnanao  
Tambony hazo teo.

4. Izaho no niaretanao  
Ny fijaliana;  
Ny ranao nanavotana ahy  
Izay fahavalonao.

5. Ka moa tsy fitiavana  
Havaliko Anao?  
Ny foko no atolotro  
Anao, ry Tompo ô!

6. Ry Jeso Kristy masina ô!  
Deraiko Hianao,  
Fa Hianao Mpanjakako  
Sy Andrimanitra!

### **113 - Jeso, Zanahary!**

1. Jeso, Zanahary!  
Masina sy tò,  
Nanome ny ainao  
Noho ny olonao.

2. Tsy niaro loza  
Tamin-tenanao,  
Fa mba tonga ory  
Noho ny olonao.

3. Nentinao ny rtsy,  
Soa nolavinao,  
Lapa nialanao,  
Noho ny olonao.

4. Jeso Tomponay ô!  
Tompo Masinao,  
Manomeza soa  
Ny mpanomponao!

5. Mamelà ny ota;  
Manova ny fo;  
Diovy ny maloto;  
Aoka ho olonao.

6. Tompo ô, Tsitoha,  
Vatolampinay!  
Saotra aman-dera  
Raiso ho Anao!

### **114 - Jeso no niala aina**

1. Jeso no niala aina  
Hanavotany anao;  
:: Iza re no tsy hanaiky  
Azy izao? ::

2. Fa ny lapany ambony  
Nialany fahizay,  
:: Hamonjeny olom-bery  
Very tokoa. ::

3. Fa izay manatona Azy  
Ka mibebaka ao am-po  
:: Tsy ariany akory  
Ka matokia. ::

4. Mba avia, ry havanay ô!  
Maneke ny Tomponao,  
:: Maneke ny Tompon'aina  
Ho Tomponao. ::

5. Iantrao, ry Tomponay ô!  
Ny mialoka amina;  
:: Raisonao 'zahay mpanota  
Ho olonao. ::

### **115 - Jeso Tompo lehibe**

1. Jeso Tompo lehibe  
Iraky ny Rainy,  
Nolatsain'ny marobe,  
Tsy mba nohajainy:

Fiv : Jeso tia, Jeso tia,  
Maty voahombo;  
Maty tao Kalvary,  
Maty re ny Tompo.

2. Ory loatra fahizay,  
Zanak'ondry mora;  
Maty mba ho solonay,  
Sady voakora:  
Jeso tia, sns...

3. Nalahelo, be nanjo,  
Nefa tsy nanota,  
Fa nijaly sitrapo  
Tany Golgota:  
Jeso tia, sns...

4. Jeso no Mpanojy tia,  
Nahafoy ny ainy  
Mba hamory 'zay mania  
Hody amin-dRainy:  
Jeso tia, sns...

### **116 - Miaingà, ry fo ny saina**

1. Miaingà, ry fo ny saina,  
Mba ho any Golgota,  
Maty tao ny Tompon'aina,  
Vita tao ny avotra,  
Ry mahantra, ry mania,  
Sady raiki-tahotra,  
Ny Mpamonjy be fitia  
Hahitanao avotra.

2. Fa ny ainao, ry Mpamonjy  
Nisoloanao anay,  
Hahazoanay ny vonjy  
Sy hahafa-trosa anay,  
Vatofantsika ny aiko

Hianao, Mpamonjy ô!  
Ravoravo izao ny saiko,  
Afakao ny heloko.

3. Ny manjo aty an-tany  
Tsy mba hatahorako;  
Fa izaho diaho any  
Amin'ny Mpanavotro,  
Tombon-dahiko tokoa  
Ny fahafatesana,  
Hahatrarako ny soa,  
Dia ny fiainana.

### **117 - O, ry Zanak'ondry!**

1. O, ry Zanak'ondry!  
He Hianao nijaly,  
Ory voahombo,  
Anefa tsy namaly;  
Ny helokay nalainao,  
Ka maty re ny ainao.  
Mba iantrao izahay, ry Jeso!

3. O, ry Zanak'ondry!  
He Hianao nijaly,  
Ory voahombo,  
Anefa tsy namaly;  
Ny helokay nalainao,  
Ka maty re ny ainao.  
Mba iantrao izahay, ry Jeso!  
Ampiadanonao izahay, re!

### **118 - Mba jereo ny zanakondry**

1. Mba jereo ny zanakondry  
Voahombo sady ory,  
Nefa Tompo masina.  
He! Ny Rainy tsy namaly,  
Raha ny zanany nijaly  
Tamim-panaitainana.

2. He, ny Marina nijaly!  
Mba hahazako mifaly,  
Izay no niaretany,

O! ry foko mangovita,  
Manatona mba hahita  
Ny fahafatesany.

3. Eny, ry Mpamonjy tsara,  
Mba meteza hanambara  
Ny harem-pitiavananao;  
Dia hafanao ny foko,  
Mba hahazako hanompo  
Sy hanaraka Anao!

4. Aoko aho hitomany  
Raha mievitra izany  
Fahoriana nentinao,  
Azoko ny famonjena;  
O! ry foko manenena  
Noho ny ratsy vitanao.

5. Tompo, manampia ahy  
Mba harisika am-panahy,  
Hanompoako Anao,  
Raha mbola aty an-tany  
Aza afoy mba tohany  
Tsy hisaraka aminao.

### **119 - Hianao ry Tompon'aiko**

1. Hianao ry Tompon'aiko,  
Maty noho ny otako;  
Tsy mba takatry ny saiko,  
Izany fijalianao,  
Nefa sitrakao nijaly,  
Hahazoako mifaly,  
Ry Jesosy, Hianao  
No isaorako izao.

2. Safotry ny fandatsana  
Hianao, Mpanavotra,  
Handovako fanjakana  
Feno voninahitra.  
Voaratra, voaeso,  
Ary voasatro-tsilo  
Noho ny hadisoako,  
Koa dia isaorako.

3. Tianao izahay mpanota  
Helokay no nentinao;  
Resinao ny tambin'ota,  
Izahay nafahanao;  
Voaloanao ny trosa,  
Izahay mpanota kosa  
Tonga olom-potsinao,  
Ka derainay Hianao.

### **120 - Ry mino ô, avia re!**

1. Ry mino ô, avia re!  
Hiara mankalaza  
Ilay mpanjaka lehibe,  
Fa tena mahagaga  
Sy sarobidy anie  
Ny fahasoavan-dehibe  
Nomeny antsika.

2. Tsy asa soa vitako  
No tokiko anefa,  
Fa ny Andrimanitra  
No tsy nisalasala  
Hanafaka ny otako,  
Nomeny mba ho avotro  
Ny Zanany malala.

3. Jesosy faly eram-po  
Hamonjy ahy very,  
Ka azoko ny indrafo,  
Izay vitan'Izy irery,  
Izaho tena afa-po,  
Tsy misy atahorako,  
Izaho tsy ho very.

4. Jesosy Kristy Tompo ô!  
Izaho ta-hamaly  
Ny teny fiantsonao:  
"Mba manatona Ahy!  
Izaho dia ho anao,  
Ho Ahy kosa hianao."  
Ka manampia ahy.

5. Ny ranao soa nitete  
No nanadio ahy  
Ny ainao sarobidy re  
No nanavotana ahy.  
Mba hitokiako anie  
Ny famonjena lehibe  
Natolotrao ahy.

6. Isaorana eram-po anie  
Ny Tompo Zanahary,  
Fa Izy efa nanome  
Ny Zanany nijaly,  
Ka ny devoly loza be,  
Ny ota sy ny heloka  
Ho resy sy ho faty.

### **121 - Ry Jesosy, ampombay**

1. Ry Jesosy, ampombay  
Fiadanana maharo  
Fo sy saina izahay  
Ka mba ampahafantaro,  
Ra ny holatrao jerena,  
Fa Anao ny fandresena.

2. Ry Mpandresy, ambarao  
Aminay ny vokatr'ady;  
Famonjena aim-baovao  
No andramanay sahady;  
Raha ny tafika miseho,  
Fiadanam-po omeo!

### **122 - Hitako izao, sakaiza**

1. Hitako izao, sakaiza,  
Ny fahasambarana,  
Ka ny foko, faly, ravo,  
Manam-piadanana  
Teo am-pototry ny hazo  
Nijalian'ny Tompoko,  
Teo aho no nahazo  
Famelana heloka.

2. He! Ny indrafo niriko

Efa azoko tokoa,  
Ka jesosy no fidiko,  
Fa Izy fototry ny soa,  
He! Ny rany sarobidy  
Nanadio ny otako:  
Izaho efa voavidy,  
Lanitra no lovako.

3. Tena soa mahagaga  
Izao nomenao ahy izao,  
Fa izaho izay mpanota  
Dia nohavaninao;  
Ka izaho dia hidera  
Izato fitiavanao,  
Ary koa hanambara,  
Jeso ô! Ny herinao.

4. Ry Mpamonjy ô! Mba raiso  
Izao fisaorako izao;  
Ka izay rehetra ahy  
Dia atolotro Anao,  
Raha tonga re ny fetra  
Hialoka sasatra,  
Ento aho hitoetra  
Eo anilanao ary.

### **123 - Velona Jesosy**

1. Velona Jesosy,  
Nitsangana tokoa;  
Ny kristiana marobe  
mihoby sy mihira hoe:  
Dera ho Anao, ry Mpandresy!

2. Velona Jesosy,  
Ny helo dia resy,  
Tanteraka ny avotra,  
Ka afaka ny heloka:  
Dera ho Anao, ry Mpandresy!

3. Velona Jesosy,  
Ka velona isika,  
Hiara-monina aminy,  
Hohazavain'ny tavany:

Dera ho Anao, ry Mpnadresy!

## 124 - Nitsangana ny Tompo

Nitsangana ny Tompo,  
Neken'ny Ray ny avotra,  
Ka ravo ny mpanompo,  
Misokatra ny lanitra!  
Tompom-pandresena,  
Nandrava fasana,  
Andriam-pamonjena,  
Tolory hasina!  
Jesosy no Mpanjaka  
Amboninahitra,  
Hiarahako mizaka  
Ny zon'ny lanitra.

## 125 - Indro, Jeso velona

1. Indro, Jeso velona,  
Afaka ny olom-bery,  
Rava re ny fasana,  
Dia nivoaka ilay Mahery;  
Ka ny horohoron-tany  
Dia nahatò izany.

2. Resinao ny rafinay,  
Ry Jesosy manan-kery,  
Ka mpandresy izahay,  
Voavonjinao ny very,  
Matinao ny helok'ota,  
Velona izahay mpanota.

## 126 - Endrey izato fahasambarana

1. Endrey izato fahasambarana:  
Jesosy dia velona indray  
Ny foko mandre fitsaharana,  
Noho izay natsangan'ny Ray  
Tsy any am-pasana intsony,  
Fa hitako velona koa;  
:,: Ilay Tompon'ny hery ambony,  
Mamiratra sy mananjo. :,:;

2. He, velona Izy! Hafarany  
Izaho izao hampandre  
Ireo izay tia ny Anarany  
Ny fampiononana be.  
Anjely no mendri-kilaza;  
Izaho, mpanompo tsy soa,  
:,: Nirahin'ny Tompo malaza,  
Ka ravo sy tretrika koa! :,:;

3. Endrey izato fahasambarana!  
Fa velona mandrakizay  
Ny Tompo izay nifankazarana,  
Ka faly ny foko indray!  
Ny fasana izay nampisaona  
No fampiononana koa,  
:,: Fa tao izahay tafahaona  
Ka ravo dia ravo ny fo! :,:;

## 127 - Tahaka ny masoandro miseho

1. Tahaka ny masoandro miseho,  
Sady mamiratra tsara izao;  
Toy ny heriny izay mahaleo,  
Na dia takon'ny rahona tao.  
Tahaka izany Jesosy Mpamonjy  
Izy nitsangana velona indray  
Ry olombelona izay voavonjy,  
Mba miderà Azy mandrakizay.

2. Saotra aman-dera sy laza sy hery  
Aoka ho Azy hatramin'izao,  
Izy nanafaka ny olom-bery,  
Indro ny fasana vaky sy lao,  
Izy nanafaka ny vavahady,  
Aiza, ry fahafatesana ô!  
Aiza ny herinao sahy miady  
Amin'ny mino sy amin'ny to ?

3. Jesosy Mpamonjy ô! Mba hasoavy  
Ka mba arovy ny mino Anao,  
Ka ny fanahinao aoka ho avy  
Mba hanazava ny fonay izao;  
Ary tantano izahay tsy hania,

Fa Hianao no mpiaro anay!  
O! ry Mpamonjy anay, mba avia,  
Ka mba vonjeo, fa miandry izahay.

4. Jeso, izahay te-hisaotra tokoa  
Noho ny soa nomenao anay:  
Teraka teto nitondra soa,  
Dia ny fiainana mandrakizay.  
Saotra omenay anao Izay nijaly,  
Nefa natsangan'ny Rainao indray,  
Rahatrizay izahay dia hifaly  
Any an-danitra mandrakizay!

### **128 - Efa velona ny Tompo**

1. Efa velona ny Tompo  
Fa nitsangana tokoa;  
Resiny ny fahavalo,  
'Lay mpihaza aina soa;  
:: Velona ny Tomponao,  
Resiny ny rafinao. ::

2. Matokia, ry mpanota,  
An'i jeso Avotrao,  
Fa ny ota nahadiso  
Afaka tokoa izao;  
:: Velona ny Tomponao,  
Afany ny helokao. ::

3. Eny, fa nitsangana ela  
Jeso Kristy Tomponao,  
Ka namoha vavahady  
Any mba hidiranao;  
:: Velona ny Tomponao,  
Ka efa nialoha anao. ::

### **129 - Any naraina**

1. Any naraina  
:: Ilay Avotr'aina. ::  
Natsangan-dRay.  
Resy ny ota,  
:: ka ny mpanota, ::  
Mihoby indray.

Any naraina...

2. Hira hiraina  
:: Ny Tompon'aina ::  
Isaoranay;  
Ory ny fony  
:: mba hampitony ::  
Ny sentonay.  
Hira hiraina...

3. Faly ny very,  
:: tsy manan-kery ::  
Ny helokay;  
Jesosy Tompo  
:: dia mampanompo ::  
Ny rafinay.  
Faly ny very...

4. Hisy maraina  
:: ny Tompon'aina ::  
Ho avy indray;  
Izy hizara  
:: ny lova tsara ::  
Homena anay.  
Hisy maraina...

### **130 - Hobio, ry olombelona!**

1. Hobio, ry olombelona!  
Jesosy dia velona,  
Ny fasana dia rava;  
Misokatra ny lanitra,  
Ny aizina sy tahotra,  
Dia resin'ny mazava,  
Jeso Kristy  
No deraina sy hajaina.  
Fa Mpamonjy,  
Tompon'aina mahavonjy.

2. He! Misy làlana indray  
Ho ao an-danitra, izay  
Miandry ao, ambony;  
Fa vitan'ny Mpanavotra  
Ny vonjy mahasambatra,



Ka sitraky ny fony  
Handray izay  
Mitomany, mba ho any  
Amin-dRainy;  
Fa izany dia hainy.

### **131 - Tonga ny andro malaza**

1. Tonga ny andro malaza, izay mahafaly.  
Indro, nandresy jesosy ilay vao nijaly;  
Velona indray Izy, natsangan'ny Ray,  
Aoka isika hifaly!

2. Efa nahery Jesosy, Ka resy Satana;  
Menatra mafy ireo fahavalo nitana  
Ka mba zahao: rava ny fasana izao,  
Raya, fa tsy nahatàna!

3. Helo sy fahafatesana, resy tokoa,  
Ary ny tambin'ota dia efa naloa;  
Jeso, Izay maty ka velona indray,  
Tompon'aina tokoa!

4. Mba mihobia, ry olona mino rehetra;  
An'i jesosy ny hery izay tsy voafetra;  
Izy nanao lalana tsara vaovao;  
Resy ny ratsy rehetra.

5. Faly isika fa manana fanatenana,  
Mbola hiantso Jesosy hoe: "Mitsangànal"  
Amin'izay, velona mandrakizay,  
Ny nodimandry tra-bonjy.

### **132 - Indro fa velona**

1. Indro fa velona  
Jesosy Tompon'aina;  
Foana ny fasana,  
Resy izao Satana.  
Iza indray no hitomany,  
Raha mahare izany?  
Ry foko sasatra,  
Manahy fatratra,

Heveronao izao  
Ho afaka ny sentonao.

2. Indro fa velona  
Jesosy Tompon'aina;  
Izy nitsangana;  
Ravo ny fo sy saina.  
Jeso Tompo nolatsaina  
Tonga loharanon'aina.  
Ry havana andrandrao  
Ny lanitra izao:  
Jesosy velona,  
Ka azo ny fiainana.

### **133 - Efa namangy ny olony**

1. Efa namangy ny olony  
Jeso Izay Tompon'ny aina.  
Lasa ny alina maizina,  
:: Tonga indray ny maraina::

2. Maty ny Tompo, nalevina,  
Nidina nita ny ony,  
Nefa nitsangana velona,  
:: Koa tsy maty intsony ::

3. Ory ny fon'ny sakaizany,  
Aiza Ilay nantenaina?  
Hitany nefa tsy fantany,  
:: Jeso, Izay Tompon'ny aina ::

4. Teniny tsy mba mivadika  
Amin'ny olony ory,  
Tonga ny Tompo nitsidika  
:: Ireo mpianany vory ::

5. Tonga ny taom-pamangiana,  
Tondraka ny famonjena,  
Velona ny fihobiana,  
:: Aina vaovao no nomena ::

6. Teraka ny fifaliana,  
Tonga ny Filazantsara,  
Andron'ny fitomaniana



::: Mody ho Pasaka tsara :::

### **134 - Mifaly tokoa ny foko izao**

1. Mifaly tokoa ny foko izao,  
Fa misy manambara  
Ny Filazantsara.

::: 0, mba raisonao! :::

2. Nitsangana Jeso, Haleloia re!  
Henoy teny soa,  
Ka dia minoa  
::: Fa marina e! :::

3. He! Rava ny fasana, ka mijere,  
Fa efa niala  
Ny Tompo malala,  
::: Fa velona e! :::

4. Ny fahafatesana resy tokoa,  
Ka tsy mba mijaly  
Ny mino fa faly  
::: Sy tretrika am-po :::

5. Misaotra, midera Anao izahay,  
Ry Jeso Mpamonjy,  
Fa vita ny vonjy  
::: Ho mandrakizay :::

6. Haleloia! Tsara ny Pasaka e!  
Ny Tompon'ny aina  
Izao hoderaina,  
::: Haleloia re! :::

### **135 - Foana ny fasanao**

1. Foana ny fasanao,  
Jeso Tompon'aina!  
Tò tokoa ny teninao  
Ka notontosaina.

2. Foana ny fasanao,  
Tompo manan-kery,  
Gaga teo ny rafinao,

Resy'lay mahery.

3. Foana ny fasanao,  
Fa efa novohana!  
Maito ny fatoranao,  
Tsy mba nahatana.

4. Foana ny fasanao,  
Zanaky ny Avo!  
Aina no nasehonao.  
Zava-maharavo.

### **136 - Ry Jeso Tompon'aina!**

1. Ry Jeso Tompon'aina!  
Nalevina Hianao,  
Kanefa, he, deraina,  
Fa velona ao izao.

2. Ny fasana nivoha  
Noho ny herinao,  
Fa tsy mba nahatoha  
Ny voninahitrao.

3. Ireo miaramila  
Nahery sy nahay  
Dia tsy mba nahatana  
Anao Mpanjakanay.

4. Nitsangana tokoa  
Ho tena santatray  
Hianao, ry Tompo soa  
Sy Kapiteninay!

### **137 - Vita izao ny fandresena**

1. Vita izao ny fandresena  
Haleloia, haleloia  
Azo koc ny famonjena,  
Haleloia;  
Resy re ny fasana  
Sy ny fahafatesana  
Fahavalo farany,  
Fa Jeso nitsangana,

Tonga fanafahana;  
Haleloia (in-3)

2. To izao izay nambara:  
Haleloia, haleloia  
Fa ny fatotra nivaha:  
Haleloia.  
Foana ny fasana.  
Jeso re nitsangana  
Tamin-kery lehibe  
Ka torio ry mino e!  
Eran-tany mba ho re:  
Haleloia (in-3)

3. Dia venteso ny hosana:  
Haleloia, haleloia  
Aoka tsy hihambahamba:  
Haleloia.  
Fa efa velona tokoa  
Lay Mpamonjy tsy mba roa  
Zay nisolo voina anao;  
Izy no nisantatra  
Ny fiainan-tsambatra:  
Haleloia (in-3)

### **138 - Ty no andro maharavo**

1. Ty no andro maharavo,  
Ora fifalianay;  
Lay Mpanarina ny lavo,  
No niady ho anay.  
:,: Haleloia, haleloia!  
Ho Anao Mpanjakanay.:,:

2. Azonao ny fandresena,  
Ry Mpamonjy velona!  
Vitanao ny famonjena.  
Tafatsangana Hianao.  
:,: Haleloia, haleloia!  
Ho Anao Mpanjakanay.:,:

3. Resinao ny fahotana:  
Voavoha ny fasanao;  
Torotoro re Satana;

Afaka ny olonao,  
:,: Haleloia, haleloia!  
Ho Anao Mpanjakanay.:,:

4. Ry Mpandresy fandozana!  
Raisonao ny hajanay;  
Ry Mpamonjy! Mitantàna,  
Tano ho Anao 'Zahay.  
:,: Haleloia, haleloia!  
Ho Anao Mpanjakanay.:,:

### **139 - He! Vita re ny ady izao!**

1. He! Vita re ny ady izao!  
Ny ota efa resy re,  
Ny feo mifaly no atao.  
Haleloia!

2. Fahafatesana no tao,  
Fa Kristy naharesy izao  
Ny fandreseny no derao,  
Haleloia!

3. Ny andro nijaliana e!  
Nisolo fifaliam-be,  
Ka mihirà izay mandre:  
Haleloia!

4. Ny gadra voatapany,  
Ny efitra efa ravany;  
Ka miderà ny heriny:  
Haleloia!

5. Ry Tompo ô! Ny fiainanao,  
Mamelona ny olonao,  
Ka hoderaina Hianao,  
Haleloia!

### **140 - Haleloia, Haleloia!**

1. Haleloia, Haleloia!  
Miderà ny Tomponao.  
Manandrata feo hidera  
an'i Jeso Kristy 'zao.

Fa nijaly mafy lzy,  
Sady voavono koa.  
Nefa indro, velona Izy  
Ao an-danitra tokoa.

2. Eny, velona ny Tompo  
Mba ho santatsika koa,  
Ka ho velona ny mino  
Sy hitsangana tokoa:  
Dia handray ny lova soa,  
Satro-bolamena koa.  
Ka hidera ny Mparnonjy  
Sy ho sambatra avokoa.

3. Haleloia, haleloia,  
Haja, hery, saotra anie  
No hatolotra ny Tompo,  
'Zay Mpandresy lehibe;  
Hoderaina lalandava  
Fa mpanjaka manan-jo:  
Haleloia, haleloia,  
Hoderaina eram-po.

#### **141 - Efa resy izao na dia ny fasana aza**

1. Efa resy izao  
na dia ny fasana aza,  
Ka asandrato re  
ny hira sy ny feo,  
Jesosy nampikoy  
Lay rafy 'zay nandoza,  
Ry fahafatesana ô!  
Aiza moa ny herinao?

2. Lasa ilay tahotrao,  
ry foko 'zay malemy,  
Fa torotoro 'zao  
ny fahavalonao,  
Tsy nahatohitra  
ny sandrin'i Jesosy;  
Ry fahafatesana ô!  
Aiza moa ny herinao?

3. Efa lasa tokoa  
ny ozona rehetra,  
Nasehon'i Jeso,  
miharihary izao,  
Ny fitiavany  
izay tsy misy fetra.  
Ry fahafatesana ô!  
Aiza moa ny herinao?

4. Kristy no santatra:  
ny lalana mankany  
Ho ao an-tranon-dRay,  
mivoha tsara izao.  
Ny fifaliana  
manerana ny tany.  
Ry fahafatesana ô!  
Aiza moa ny herinao?

5. Kristy no fiainana:  
izay matahotra Azy  
Omeny tanjaka,  
fanahy, fo vaovao.  
Ka ataony velona,  
mpandresy tahaka Azy,  
Ry fahafatesana ô!  
Aiza moa ny herinao?

#### **142 - Tafatsangana tokoa**

1. Tafatsangana tokoa,  
Haleloia!  
Jeso Kristy Tompo soa,  
Haleloia!  
Maty nefa velona,  
Haleloia!  
Mihirà ry olona,  
Haleloia!

2. Foana ny fasana,  
Haleloia!  
Indro, Jeso velona,  
Haleloia!  
Toky tsy mamitaka,  
Haleloia!

Mihirà ry olona,  
Haleloia!

3. Andro lehibe tokoa,  
Haleloia!  
Andro fihobiana,  
Haleloia!  
Afaka ny tahotra,  
Haleloia!  
Mihirà ry olona,  
Haleloia!

4. Haja, laza, aterinay,  
Haleloia!  
Jeso ô! Mpanjakanay,  
Haleloia!  
Raiso re ny saotranay,  
Haleloia!  
Raiso koa ny tenanay,  
Haleloia!

### **143 - Vita izao ny fandresena**

1. Vita izao ny fandresena,  
Haleloia!  
Jeso Kristy no hobina,  
Haleloia!  
Azo re ny famonjena,  
Haleloia!  
Verinay tary Edena,  
Haleloia!

2. Ka izao dia arahabaina,  
Haleloia!  
'Lay Mpanjakanay hajaina,  
Haleloia!  
Ka na zovy mitaraina,  
Haleloia!  
Misy vonjy azo maina,  
Haleloia!

3. Betlehema niandohana,  
Haleloia!  
Kalvary niafarana,

Haleloia!  
Fasana tsy nahatana,  
Haleloia!  
Toro teo 'lay menarana,  
Haleloia!

4. Saro-bidy re ny rany!  
Haleloia!  
Ny fitiavany tsy lany,  
Haleloia!  
Ny fatoranay vahany,  
Haleloia!  
Ka hobionareo, ry tany,  
Haleloia!

### **144 - O! Avia mba hidera**

1. O! avia, mba hidera,  
Andro Jobily anio;  
Ka faingàna, manatera,  
Saotra, laza, ka hobio.  
Indro tonga ny anjely,  
Ka ny vato mikodia,  
Tantaraina mba hiely  
Velona (in-3) ny Tomponao.

2. Ifalio ny famonjena,  
Andro Jobily anic;  
Afaka ny firenena,  
Voavonjy androtr'io.  
Gaga teo ny mpanakora  
Sy ny rafy marobe,  
Ka miaiky moramora:  
Velona (in-3) ny Tomponao.

3. Mba venteso re ny hira,  
Andro Jobily anio;  
Resy ny mpaniratsira,  
Ka ny tahotrao ario.  
He! Ny fasana efa foana,  
Tsy nahazona Azy tao,  
Tsy naharitra hateloana:  
Velona (in-3) ny Tomponao.

4. Efa resy 'zao Satana,  
Andro Jobily anio;  
Ny fatoranao vahana,  
Ka hobio sy ifalio!  
Lay Mparnonjy nolatsaina,  
Velona ho avotrao,  
Io no mendrika hoderaina:  
Velona (in-3) ny Tomponao.

#### **145 - Efa velona tokoa**

1. Efa velona tokoa  
Hianao, ry Tomponay!  
Ka ny herinao tsy toha,  
No manjaka hatrizay;  
Fa ny fasana, ny ota,  
Noresenao avokoa,  
∴ Zay no tokinay mpanota,  
Tanjakay sy hery koo.∴∴

2. Efa velona tokoa,  
Hianao, ry Tomponay!  
Lasa nanamboatra koa,  
Fitoerana ho anay;  
Tany tsy mba misy ota.  
Tsy hidiran'ny manjo.  
∴ Tany soa sy madio,  
Maharavoravo fo.∴∴

3. Efa velona tokoa,  
Hianao, ry Tomponay!  
Ka misolo vava koa  
Sy mifona ho anay;  
Ny Fanahinao Omena,  
Mba hitari-dalana;  
∴ He! Ny sentonay dia renao,  
jeso tena Havana.∴∴

4. Efa velona tokoa,  
Hianao, ry Tomponay!  
Ary mbola ho avy koa;  
Avy mba handray anay,  
Maminay, ry Tompo tsara!  
Hiara-monina aminao;

∴∴ Eny, tena manan-jara  
Zay mby eo akaikinao.∴∴

#### **146 - Anao ny dera, ry Zanakany ny Ray**

1. Anao ny dera,  
ry Zanakany ny Ray,  
Anao ny fandresena,  
ry Mpanjakanay.  
Ny fasana nivoha  
noho ny herinao,  
Ny Anaranao Tsitoha  
tsy voatana tao.

Fiv : Anao ny dera,  
ry Zanakany ny Ray,  
Anao ny fandresena,  
ry Mpanjakanay.

2. Hianao nandresy,  
lao re ny fasana;  
Ny fanjakan'ny ota  
koa ho lasana.  
Ny herin'ny Satana, vato nikodia,  
Ny Anaranao nandresy  
haharitra doria,  
Anao ny dera, sns...

3. He, ravo aho:  
Izy no santatra  
Izaho koa hifoha,  
mba ho sambatra.  
Ny fandresen'i Jeso,  
lovako tokoa,  
Ny Anarany Tsitoha  
hanangana ahy koa.  
Anao ny dera, sns...

#### **147 - Lasa ny Mpanavotsika**

1. Lasa ny Mpanavotsika,  
Ao an-danitra ary,  
Mba hanoman-trano tsara,

Hitoerantsika ao.  
::: Mifalia,:::  
Ho tafiditra ao tokoa.

2. Lasa ny Mpisorontsika  
Ao an-danitra ary  
Ho Mpisolo vava koa  
Ho an'olo-marobe.  
::: Matokia,:::  
Tsy ho very Hianao.

3. Lasa ny Mpanjakantsika  
Ao an-danitra ary,  
Mba handray ny fanjakana  
Mety ho anjarany.  
::: Mihobia,:::  
Asandrato re ny feo.

### **148 - Ry varavaran-danitra ô!**

1. Ry varavaran-danitra ô!  
Ampandrosoy ny Tomponao,  
Fa fandresena lehibe,  
No efa vitany taty.

2. Moa iza izao Mpanjaka izao?  
Mpandresy iza re izao?  
Ny lazany manerana  
Ny tany sy ny lanitra.

3. Io no Kristy Mparnonjy soa  
Nisolo olo-meloka,  
Ka satro-boninahitra  
No mendrika ny lohany.

4. Anjaranao, ry foko ô!  
Hanompo sy hanaraka  
'Lay Kapiteny lehibe  
Nialoha ao an-danitra ao.

5. Ry Kristy ô! Mpanavotray!  
Irinay mba ho hita koo  
Izany voninahitrao  
Sy ny fiandriananao.

6. Raha tapitra ny andronay,  
Vohay ny varavaranao,  
Ny trano namboarinao  
Honenanay mandrakizay.

### **149 - Efa lasa Jeso Tompo**

1. Efa lasa Jeso Tompo,  
Hanamboatra izao  
Fitoera-mahafaly  
Iza re no tsy hankao?

Fiv : Fa ao ankoatr'i Jordana,  
Ao an-danitra ao ambony  
Misy fitsarahan-tsara  
Ho an'ny madio.

2. Tany tsy idiran'ota,  
Tany masina sy soa,  
Ka izay rehetra hankany  
Dia ho masina avokoa:  
Fa ao, sns...

3. Fa izay matoky tena,  
Ny tsy mety mino koa,  
Tsy avelany hankany,  
Fa ho laviny tokoa:  
Fa ao, sns...

4. Ny mandao, ny fomba ratsy  
Ny mahazo fo vaovao,  
Ny navotan'i Jesosy,  
Dia izy no hankao:  
Fa ao, sns...

5. Ry mpanota saiky very!  
Mibebaha re anio;  
Maniria hohonjena,  
Ka ny fahotana ario:  
Fa ao, sns...

### **150 - He! Tsara ny fonenanao**

1. He! Tsara ny fonenanao,  
Andriamanitra ô!  
Ziona tendrombohitrao,  
Tanàna masina;  
Ka iza no hiakatra ao?  
Izay Izay mahitsy fo,  
Izay madio tanana,  
Izay manao ny to.  
Ka mino ny Mpanavotra, (in-3)  
Ireo hiakatra ao.

2. Mba misandrata faingana,  
Ry varavarana!  
Hidiran'ny Mpanjakanay  
Be voninahitra.  
Moa iza izao Mpanjaka izao?  
Andriamanitra  
Mahery sy mandresy koa,  
Mpanjaka masina;  
He, Izy 'Lay Mpanjakanay (in-3)  
Be voninahitra.

3. Miantranoa, Tompo ô!  
Mba hifalianay;  
Voavoatra ny tranonao,  
Midira aminay;  
Jehovah no Mpanjakanay  
Mpanjaka tianay;  
Ny hery; voninahitra,  
Sy ny fisaorana,  
Anao tokoa, ry Tomponay! (in-3)  
Mandrakizay doria.

### **151 - Miakara, miakara**

1. Miakara, miakara  
Ry Mpanjaka lehibe !  
Vitanao ny famonjena  
'Zay nalehanao taty  
Mihobia, ry anjely !  
Ka derao ny Tomponao  
Voninahitra sy haja  
Atolory Azy izao !

2. Miakara, miakara  
Ry Mpandresy lehibe !  
Eso, latsa, fahoriana  
No anjaranao taty  
'Zao ny lanitra miandry  
Miandry hiverenanao  
Renao ao ny feo manako  
Feno fanajana Anao

3. Miakara, ry Mpamonjy !  
Ravo ny navotanao ;  
Izahay aty an-tany,  
Faly te-hidera Anao  
Raisoa ny fiderana  
'Zay atolotray izao  
Haleloia ! Haleloia !  
Ho Anao Mpanavotray !

### **152 - Niakatra ao an-danitra**

1. Niakatra ao :,: an-danitra :,:  
Ny Zanak'Andriamanitra  
:,: Haleloia ! :,:

2. Ka monina ao :,: an-danitra:,:  
Jesosy Tompon-danitra  
:,: Haleloia ! :,:

3. Iza zavatra :,: rehetra izao:,:  
Ry Jeso ô, hazoninao  
:,: Haleloia ! :,:

4. Isaoranay, :,: ry Tompo ô, :,:  
Ny herinao sy indrafo  
:,: Haleloia ! :,:

5. Fa ny devoly resinao :,: he resinao:,:  
Ny ratsy nofogoranao  
:,: Haleloia ! :,:

6. Ry tany sy :,: ry lanitra :,:  
Derao Andriamanitra !  
:,: Haleloia ! :,:



### 153 - Ao an-dapany, Jesosy

1. Ao an-dapany, Jesosy  
Dia derain'ny tapitrisa  
Fa ny lanitra sy tany  
Dia samy mankamamy  
:: Ilay Mpandresy mora fo ! ::

2. Jeso Tompo dia ho avy  
Ho Mpitsara aty an-tany  
Na ny ratsy na ny tsara  
Samy hanana anjara  
:: Valin'ny natao taty ! ::

3. Ry Mpiantra be fitia  
Iantrao izahay mania  
Raiso ho Anao, tahio,  
Hafanao, ampifalio,  
:: Ento any aminao ! ::

### 154 - Izao Jesosy Tompontsika

1. Izao Jesosy Tompontsika  
Dia nasandratry ny Ray  
Ao an-tsezam-panjakany :  
Izay rehetra nialany  
:: Voarainy indray ::

2. Tsy hadinony anefa  
Izay nilaozany taty  
Fa omeny ny Fanahy  
Mba hitondra sy hitahy  
:: Ny mpianany ::

3. Ao anilan-dRainy Izy  
Manam-boninahitra,  
Ka midera Azy any  
Izay rehetra anjakany  
:: Eran-danitra ::

4. Tompom-pitsarana Izy  
Samy mba hatsangany  
Na ny ratsy na ny tsara  
Ka homeny izay anjara

:: Valin'asany ::

5. He ! hohitantsika Izy  
Dia ny tena endriny  
Ka ny lova soa homena  
Izay nandray ny famonjena  
:: Voatendriny ::

### 155 - An-tsezam-panjakany

1. An-tsezam-panjakany  
Ambony kintana  
No lapan'i Jesosy  
Ilay nasandratra

2. Aty an-tany iva  
Anilam-pasana  
No ipetrahantsika  
Zoim-pahoriana

3. Kanefa mety ihany  
Ny monina aty  
Hiomana ho any  
An-danitra ary

4. Isika tsy kamboty  
Na dia nilaozany ;  
Nomeny ny Fanahy  
Ho solon-tenany

5. Ny fahoriantika  
Dia efa maivana  
Ny fahafantesantsiky  
Dia afa-tsindrona

6. Ny ain'ny Jeso Tompo  
Iainantsika aty  
Tsy ela dia hiseho  
Indray ny tenany

7. Ka hira no venteso  
Ry havany izao  
Ny senton'alahelo  
Mba atsaharonao !

## 156 - Jeso Mpanjaka tokana

1. Jeso Mpanjaka tokana  
Na aiza misy olona  
Ny fanjakany hanerana  
Ny tany sy ny lanitra

2. Vavaka sy fisaorana  
Hakarin'ny navotana  
Haharitra tsy tapitra  
Hanolo-boninahitra

3. Ny firenen-drehetra anie  
Hidera ny fitiavam-be  
Ny zaza aza hanatitra  
Ny hajam-boninahitra

4. Ny tany izay alehany  
Dia feno fitahiany  
Ny voagadra afaka  
Miadana ny reraka

5. Iza rehetra izao anie  
Hanatitra fisaoram-be  
Ho an'ny Tompo tokana  
Izay Mpanjakan-danitra

## 157 - Hobio, ry tra-bonjy

1. Hobio, ry tra-bonjy  
Fa indro ny Mpamonjy  
Miakatra indray  
Tsinjovy Izy any  
Mandray ny fanjakany  
Ao an-kavanan-dRay

2. Ny hiran'ny anjely  
Manako sy miely  
Ary an-danitra ;  
Injay, ny Ray Tsitoha  
Miarahaba koa  
Mandray ny Zanaka

3. O, miangà, ry foko  
Fa aza mitoloko  
Aty an-tany izao ;  
Miandrandra, jereo  
Ilay voahombo teo !  
Tsitoha Izy ao

4. Naharitra ny mafy  
Niady sy nihafy  
Ny Tomponao taty  
Tahafonao izany,  
Fa he ! ny fanjakany  
Miandry anao ery

## 158 - Raha afaka entana aho aty

1. Raha afaka entana aho aty  
Ka tody any an-danitra ary  
Ny hanakaiky Ilay Tompo tia  
No hifaliako mandrakizay

Fiv : Satriko re ny hanome  
Saotra tokoa eran'ny fo  
An'Ilay maty fa velona indray  
Hatrehiko ao anilan'ny Ray

2. 'Ndrey ny haren'izao antrany izao  
Izay handovako ilay tany vaovao !  
Fa ny hahita ny tavany ao  
No hiadanako mandrakizay  
Satriko re, sns...

3. Hava-malala hihaonako ao,  
Hobin-tra-bonjy hiaraha-manao  
Mamy indrindra anefa izao ;  
Kristy hatrehiko mandrakizay  
Satriko re, sns...

## 159 - Satrohy voninahitra

1. Satrohy voninahitra  
Anjely masina ô !  
Ilay voasatro-tsilo teo  
Dia Jeso, Jeso, Jeso

Tompo tokana !

2. Ry afa-pahoriana,  
Izay ao an-dapany !  
Nombany tao an-dalana,  
Ka saotra, laza, hery,  
Aoka ho Azy re !

3. Taranaky ny lavo ô,  
Izay natsangany  
Ekeo Izy eram-po  
Ka saotra, laza, hery,  
Aoka ho Azy re !

4. Ry firenena marobe  
Ambany lanitra  
Miankohofa maneke  
Fa Jeso, Jeso, Jeso  
No Mpanjaka re !

### **160 - Kristy Mpanjaka**

1. Kristy Mpanjaka  
Mendrika hoderaina  
Izy no mitàna  
Antsika ho velona aina  
Derao, derao  
Ilay Mpanjakanao !

2. Kristy Mpanjaka  
Mendrika ho hajaina  
Izy no mifona  
Ho antsika novonjena  
Hajao, hajao  
Ilay Mpanjakanao !

3. Kristy Mpanjaka  
Mendrika ny hibiana  
Izy no hitsena  
Ny olo-notahiana  
Hobio, hobio  
Ilay Mpanjakanao !

### **161 - Mivelatra eo imasiko**

1. Mivelatra eo imasiko,  
Ny fiandrianan-dehibe  
Itoeran'ny Mpamonjiko,  
Dia Jeso 'Lay nandresy re!  
Fa niakatr'Izy ka nandao  
'Ty tany fandalovana,  
Mpanjaka ao an-dapany  
Ka feno voninahitra.

2. Anjely no manotrana  
Arahin'olo-masina:  
Ireo dia mandohalika  
Am-panajana fatratra.  
Ny Tompo eo afovoany,  
Mamiratra ny tavany,  
Ka feno hasambarana  
Izay mahazo taratra.

3. Kanefa tsy mipetraka  
Ho endriky ny lanitra  
'Lay Zanak'Andriamanitra  
Fa miasa tsy mijanona.  
Renaovany ny fifonany  
Ho an'ny Fiangonany  
'Zay novidiny tamin-dRà,  
Ka tiany hampakarina?

4. Ekeo, ry Fiangonana ô !  
'Lay hany Mpanalàlana,  
'Zay mandohaliko amin-dRay,  
Ka mitomany ho anao!  
Ry Tompo, aza sasatra,  
Ifony lalandava e!  
'Zahay izay navotanao,  
Fa te-hankao an-danitra.

### **162 - Amen, Jeso no Mpifehy**

1. Amen, Jeso no Mpifehy,  
Amen, ny Fanahiny.  
Amen, Amen, re, ny teny  
Mbamin'ny fandraisany,  
Amen, ny batisany.

Amen, ny fiainany.

2. Amen, Jeso no Mpanjaka,  
Amen, ny Anarany,  
Amen, Jeso tonga maka  
Ahy ho anjarany,  
Amen, Amen ary to  
Izy, Izay inoako.

3. Amen, ny fanantenana,  
Zavatra maharitra;  
Amen re, ny fifindrana  
Raha mankao an-danitra!  
Amen, ny fiadanana,  
Amen, ny fiainana.

4. Aoka isika hihira Amen,  
Amen ho mandrakizay!  
Jeso, mba valio Amen,  
Dia ho faly izahay;  
Amen no ho hiranay  
Raha mby Aminao izahay.

### **163 - He Jesosy Tokintsika**

1. He, Jesosy Tokintsika  
Tompon'ny fiainana,  
Tonga eto amintsika  
Olon-kovangiana,  
Izy no hitory teny  
Soa, mahavelona,  
Fa ny ainy no nomeny,  
Mba ho solo-voina.

2. Andrandraonao ka andraso  
Ny Mazava lehibe!  
Dia Ilay tsy hita maso,  
Mpanazava, Mpanome;  
Fa ny ainao dia ho very,  
Raha tsy arahinao  
Ilay Mpanjaka manan-kery  
Izay nanavotra anao.

3 Eto afovoantsika

Ilay Mazava tokana;  
Sambatra izay mahita  
Azy, fa ho velona.  
Ry Jesosy, iresaho  
Izahay mpianatrao,  
Hafanao sy hatanjaho  
Ny finoanay Anao.

### **164 - Jesosy irery ihany**

1. Jesosy irery ihany;  
Filazantsara soa  
Nentin'ireo mpanompo,  
Torina aminao.  
Maizina avokoa  
Izao rehetr'izao  
Nefa he ny mazava  
Naposaka aminao.

2. Jesosy irery ihany  
No ivavahana.  
Ny Anarany irery  
no fanavotana.  
Ny olona rehetra  
no handohalika  
Ety an-tany ka ha-  
trany an-danitra.

3. Jesosy tsy miova  
omaly sy anio.  
Ary mandrakizay fa  
tsy mba mamitaka;  
Mifona ho antsika  
Eo an-kavanan-dRay.  
**JESOSY IRERY IHANY**  
Re no isaorana!

### **165 - Haleloia, Midera, Asandrato**

1. Haleloia! Midera!  
:,: Asandrato, re ny feo :,:  
Miderà ny Ray Tsitoha  
:,: 'zay Mpamorona anareo :,:

Fa Mpanjaka manan-jo  
Haleloia! Haleloia!

2. Haleloia! Mihirà  
:,: Lehibe sy masina :,:  
'Lay Mpahary anareo.  
:,: Ao ny ranomasina :,:  
Sy ny biby marobe  
'Ndray mihoby: Haleloia!

3. Haleloia! Mifalia!  
:,: 'Lay Mpamonjy be fitia :,:  
Sy Mpanavotra anareo.  
:,: O, ry olom-bery ô :,:  
Manatòna, mihobia!  
Haleloia! Haleloia!

4. Raiso re, ry Tompo ô!  
:,: Ny mpanota toa anay :,:  
'Zay miantoraka aminao.  
:,: Mba henoy ny vavakay :,:  
Ho fanatitra madio  
'Zay atolotray anio.

## **166 - Derao ny Tompo Lehibe**

1. Derao ny Tompo lehibe  
Nahary 'zao rehetra izao;  
Haleloia, Haleloia!  
Ny lanitra sy tany koa  
Samia midera avokoa  
Asandrato izao ny dera!  
Haleloia, Haleloia, Haleloia!

2. Ry fo voadion'ny ràny soa.  
Ankalazao ny Tompo tia  
Haleloia, Haleloia!  
Ry voavela heloka ô!  
Tsarovy re ny indrafo,  
Asandrato izao ny dera  
Haleloia, Haleloia, Haleloia!

3. Miraisa fo ka midera  
Fa izy niahy hatrizay,

Haleloia, Haleloia!  
Derao ny Ray sy Zanaka  
Sy ny Fanahy Masina  
Asandrato izao ny dera:  
Haleloia, Haleloia, Haleloia!  
Amena!

## **167 - Midera ny Anaranao**

1. Midera ny Anaranao  
'Zahay, ry Tompo ô!  
Ka hira no ventesinay  
Hoe: haja, saotra, hery,  
Mba raiso ho Anao.

2. He! Voahombo Hianao  
Nisolo heloka,  
Ka mendrika hanaovanay  
Hoe: haja, saotra, hery,  
Mba raiso ho Anao.

3. Endrey! Ny fitiavanao  
Endrey! Ny herinao,  
Tra-pamonjena izahay,  
Ka haja, saotra, hery  
Mba raiso ho Anao.

4. Raha tonga ao an-danitra  
'Zahay mpanomponao,  
Hitohy re ny hiranay  
Hoe: haja, saotra, hery.  
Mba raiso ho Anao

## **168 - Ry Jeso! Ny Anaranao**

1. Ry Jeso! Ny Anaranao  
Dia maminay tokoa;  
Mihira sy midera Anao  
'Zahay navotanao.

2. Tsy takatry ny hevitra  
Ny fitiavanao;  
Tsy tambonay tononina  
Ny hasoavanao.

3. Ny tsara eran-danitra  
Sy eran-tany koa,  
Tsy azo anoharana  
Ny fitahianao.

4. Ho toy ny loharanao e,  
Ny fonay olonao;  
Tsy hanam-pitsaharana e,  
Ny hiderana Anao!

### **169 - Ry Tompo Andriamanitra mpanao izao rehetra izao**

1. Ry Tompo Andriamanitra,  
Mpanao izao rehetra izao!  
Midera Anao ny lanitra,  
Ny tany koa mitsaoka Anao.

2. Hianao no Ray mandrakizay,  
Mpanao izao tontolo izao.  
Tongava re, ka mba tahio  
Ny vavakay atao anio.

3. Ry Kristy ô, Mpanavotra,  
Mpamonjy be fitia tokoa;  
Hianao no Zanaky ny Ray  
Ka mendrika haja, saotra koa,

4. Fanahy Masino ô, avia,  
Sasao ho voadio izahay  
Hanoa sy hanara-dia  
Ilay Mpamonjy Tomponay.

5. Anao ny voninahitra  
Sy dera tsy mitsahatra  
Ry Telo izay Iray, Tsitoha.  
Ray, Zanaka, Fanahy koa.

### **170 - Ry Jeso ny fitiavanao no ifalianay**

1. Ry Jeso, ny fitiavanao

No ifalianay,  
Fa voavono Hianao  
Hisolo voina anay.

Fiv : Mba raisonao re  
Ny saotra aterinay izao.  
Ho fanajana  
Anao Mpamonjy tia.

2. Mahery ny fitiavanao,  
Ka itokianay;  
Izay mikambana aminao  
Dia tsy hangaihay.  
Mba raisonao, sns...

3. Ambony ny fitiavanao,  
Ka tsy mba takatray;  
Kaneffa noho ny herinao,  
Hiezaka izahay.  
Mba raisonao, sns...

4. Hiezaka izahay, Jeso!  
Ka mba ho tia Anao,  
Ka tsy hatahotra eso-koa  
Noho ny aminao.  
Mba raisonao, sns...

### **171 - Jeso, Mpanjaka malaza**

1. Jeso, Mpanjaka malaza,  
No Tompo Mpanjakanay;  
Mahery sy tsara indrindra,  
Ka Izy no aronay.  
Mendrika hankalazaina  
Noho ny heriny;  
Eran-tany sy lanitra koa  
Ny zo aman-dazany.

Fiv : Ry Tompo Mpanjaka mahery ô !  
Mihainoa ! Mihainoa !  
Avy manaiky tokoa 'zahay  
Fa Tompon'ny hery rehetra Hianao,  
Tsy misy mihitsy ny toa Anao,

Tsy tratry ny saina ny herinao;  
Ny fiderana 'zay entinay, Raiso re !  
Ny haja atolotra Anao ety, Raiso izao !

2. Tompo, Mpandahatra hendry,  
Mpanao izao rehetra izao  
Ny zara sy tendry ataony  
Dia tsara sy mahaso;,  
Mendrika ny hoderaina  
Ny fandaharany;  
Atolory ho Azy ny saotra,  
Fa izy tadrinfin'io :  
Ry Tompo Mpanjaka mahery ô ! sns...

3. Tompo, Mpanjaka Tsitoha,  
Kaneffa be indrafo;  
Deraina eram-po erantsaina,  
Deraina mandrakizay ;  
He ! Ny mpanompo voavonjy  
Samy mihoby hoe :  
"Haleloia ho amin'ny Avo,  
Fa Jeso no Tomponay "  
Ry Tompo Mpanjaka mahery ô ! sns...

### **172 - Hoderaiko lalandava Jeso 'lay mpanavotro**

1. Hoderaiko lalandava  
Jeso 'Lay Mpanavotro  
Noho ny fitiavana ahy,  
Maty mba ho soloko.

Fiv : Hoderaiko, hoderako  
Fa ny rany masina  
Nentiny hanavotra ahy:  
Afaka ny heloko.

2. Holazaiko lalandava  
Ny tantara mamiko,  
Zay nitadiavana ahy  
Very noho ny heloko:  
Hoderaiko, sns...

3. Hohiraiko lalandava:

'Zao ny voninahiny,  
Fa ny fahafatesana aza  
Resy noho ny heriny:  
Hoderaiko, sns...

### **173 - Hosana no asandratray ho an'i Jesosy**

1. Hosana! (in-3)  
Hosana no asandratray  
Ho an'i Jesosy,  
Fa Izy no Mpanjakanay  
Sy Tompo tia koa;

Fiv : Hosana no atolotray  
Anao, ry Tomponay!  
:,: Ity no andro Jobily  
Ka hifalianay.:,:

2. Hosana! (in-3)  
Hosana ho Anao anie,  
Ry Kristy Tomponay!  
Fa avy Hianao tokoa  
Hanjaka aminay!  
Hosana, sns...

3. Hosana! (in-3)  
Hosana! Fa ho sambatra.  
Izay mpanomponao;  
Tsy hisy fahoriana  
Ety an-taninao!  
Hosana, sns...

4. Hosana! (in-3)  
Hosana! Fa miomana  
'Zahay vahoakanao  
Hitsena Anao Mpanjakanay  
Raha avy Hianao!  
Hosana, sns...

5. Hosana! (in-3)  
Hosana! Raisonao tokoa,  
Ry Tompo tianay,  
Ny dera, laza, saotra koa,



Izay aterinay!  
Hosana, sns...

### **174 - Fanahy Masina ô ny hevitrasy izao**

1. Fanahy Masina ô!  
Ny hevitrasy izao  
Ovay ho vao;  
Vonoy ny otanay,  
Diovinao 'zahay  
Ka ny fanahinay  
Onenonao.

2. Fanahy Masino ô!  
Tsinjovinao izao  
Ny olonao;  
Mpananatro ô! Ovay  
Ny eritreritrasy;  
Ny hadisoanay  
Esorinao.

3. Fanahy hendry ô!  
Jereo 'zahay izao!  
Ka hazavao;  
Adala izahay,  
Manio ny hevitrasy;  
Dia atoroy anay  
Ny lalanao.

4. Fanahy Masino ô!  
Mba aseho izao  
Ny antranao;  
Be tahotra izahay,  
Henoy ny hatakay,  
Ka ny fanahinay  
Ononinao.

### **175 - Avia, Fanahy ô, fanahy Masino ô**

1. Avia, Fanahy ô,  
Fanahy Masino ô!  
Midina eto aminay

Hitari-dalana.

2. Fa diso lâlana  
Ka ory izahay;  
Ny sainay dia maizina,  
Ny fonay ratsy koa.

3. Midina Hianao,  
Ry Mpanazava anay,  
Hanaisotra ny aizina  
Aty anatinay!

4. Avia Mpananatro ô!  
Mombà anay tokoa;  
Ampahatsiarovinao!  
Ny teny mahasoana,

5. Ry Mpampianatra ô!  
Ampionao izahay  
Ka aoka re ho marina  
Izay ianaranay!

6. Mitomoera aty  
Anatin'ny fonay;  
Izany indrindra Tompo ô,  
No angatahinay!

### **176 - Avia, Fanahy Masino ô, midina eto aminay**

1. Avia, Fanahy Masino ô!  
Midina eto aminay;  
Fenoy ny hasoavanao  
Ny fonay noforoninao.

2. Tongava, ry Mpananatro ô  
Nomen'Andriamanitra  
Ho loharano velona  
Hiboiboika ao am-po.

3. Sokafy ny fanahinay  
Hidiram-pitiavana;  
Ny tenanay malemy koa  
Ampaherezona anie.

4. Reseo ny fahavalonay  
Onòny koa ny tahotray.  
Tantano ao an-dalana  
Hahatrarany ny lanitra

5. Tahio mba hitiavanay  
Ny Ray sy Jeso Zanany,  
Sy hitokianay Anao  
Izay Fanahy Masina

### **177 - Ry Fanahy Mpanazava mitariha anay izao**

1. Ry Fanahy Mpanazava,  
Mitariha anay izao.  
Hianaranay ny teny  
Zay nampanoratinao;  
:: Dia hifaly.  
Izahay tarihinao::

2. Ry Fanahy Mpanazava!  
Maminay ny anatrao.  
Fa matanjaka sy hendry  
'Zay ampianarinao;  
:: Hatanjaho  
Izahay mpianatrao ::

3. Ry Fanahy Mpanazava!  
Aoka tsy hangia anay  
Ny angano sy tantara  
'Zay hamily dia anay!  
:: Mba sakano  
Tsy handavanay Anao ::

4. Ry Fanahy Mpanazava!  
Ny Baiboly taminao  
Dia fanilo sady toky  
Hanantonanay Anao  
:: Mba tsilovy  
'Zay miankina aminao ::

### **178 - Avia Fanahy ô, midina Hianao**

1. Avia Fanahy ô!  
Midina Hianao  
Hanova ny fo vatony  
Ho tonga fo vaovao.

2. Izay afafinay.  
Tondrahan-drano koa,  
Tsy mety misy vokatry  
Raha tsy ambininao.

3. Fenoy ny herinao  
Ny fon'ny olona  
Hamelona finoana  
Sy fitiavana

4. Fanahy Masina ô!  
Tahio ny asa atao.  
Ampandrosoy ao am-po  
Ny hasoavanao.

### **179 - Ny Fanahy Masina efa tonga tokoa**

1. Ny Fanahy Masina efa  
tonga tokoa.  
Mba homba ny mpitory  
ny Teny mahasoana.  
Koa mitsangana izao  
andeha ry mahery fo  
Hatramin'ny faran'ny tany  
torio ny Teny soa.

2. Voasaron'ny aizim-pito  
Ny Nosinao;  
Ny ody sy ny sampy no  
Notompoiny tao;  
Ny fahazarana koa,  
Nangeja mafy tokoa,  
Kanefa tonga ny mazava:  
Resy ny aizina ao.

3. Ry fanahy voatafy hery  
Ny Tompo anie

Ka efa miandry anao,  
Injay miteny hoe:  
"Angony, eny antsoy,  
Hanatona avokoa  
Ny firenena eran-tany  
Ho mpianatro tokoa".

4. Tompo tia ô,  
Ekeko ny antsonao;  
Hafoko ny hareko,  
Ny tenako izao,  
Ho vavolombelona,  
Hijoro, hanafika,  
Hitory sy hamafy koa:  
Tafio ny herinao.

### **180 - Ny Tompo, raha vao nanao veloma ny taty**

1. Ny Tompo, raha vao nanao  
Veloma ny taty,  
Namela ny Mpananatra  
Ho arony.

2. Dia tonga Izy hanome  
Ny hery mahasoana,  
Dia hery fanadiovana  
Ny fo tokoa.

3. Malemy ny fibitsiny,  
Kanefa mora re,  
Mahazo fiononana  
Izay mandre.

4. Tsinjovy, ry Fanahy ô!  
Ka iantrao izahay;  
Amboary ho tempolinao  
Ny tenanay.

### **181 - Fanahy Mpanazava**

1. Fanahy panazava,  
Ny foko hazavao,  
Maniry lalandava

Ny Pentekositrao.  
Ny aizina ao am-poko,  
Fongàny re ho lao;  
Ny foko mitoloko,  
Maniry indrindra Anao.

2. Fanahy Mpanadio,  
Ny foko mba sasao,  
Diovy re anio  
Ho ena lapanao;  
Ny hevitra misoko  
'Zay te-handroaka Anao,  
Dia ota te-hijoko,  
Esory sy fafao.

3. Fanahy, Mampahery  
'Zay reraka sy voa,  
Ny foko re dia tery  
Hianotoraka Aminao,  
Izay mandrebireby,  
Roahy re izao,  
Ny fo mitebiteby,  
Hiondana Aminao. Amena.

### **182 - Ny Pentekosta tonga izao**

1. Ny Pentekosta tonga izao;  
Fanahy o, ny jironao  
Velomy ao anatiko,  
Hahafantarako ny to.

2. Ampisehoy, Fanahy o!  
Fa Jeso no fiainako,  
Ka Izy dia lalana  
Ho amin'ny fiainana.

3. Dia mba tarihonao ny fo,  
Tohano ny fanahiko,  
Ampio ny finoako  
Hahita ny mpanavotro.

4. Fa Hianao, Fanahy o!  
Hanova ny fanahiko,  
Ka raiso sy diovinao

Ny foko ho fonenanao.

5. Ny hazo-fijaliana  
Anjara hivesarana,  
Fa Hianao, dy Heriko,  
Mba miaraha amiko.

6. Mba aseho ho fantatra  
Ny soa tsy ho tapitra,  
Ny satro-boninahitra  
Homen'Andriamanitra.

7. O, ry Fanahy Masina o!  
Ampaherezanao ny fo,  
Ka hazavao ny lalako,  
Raha avy ny hodiako.

### **183 - Midina, ry Fanahy ô!**

1. Midina, ry Fanahy o!  
Midira ao anaty fo,  
Ampio ny mihafy,  
Fa Hianao no Mpanome  
No to sy fahazavana be;  
Na vavanay sokafy,  
Izao hanao  
Saotra tsara hanambara  
Ny Mpamonjy,  
Fa satria voavonjy.

2. Ka raha re ny teninao,  
Dia mba avia, hazavao  
Ny hevitra ny teny;  
Mba ambaraonao aminay  
Ny fomban'ny Mpanavotray,  
Lazao ny famonjeny,  
Izahay, izay  
Vory eto, andrehetra  
Jiron'aina  
Hialan'ny aizin-tsaina.

3. Ny maizina onenanay  
Tsy mety afaka aminay,  
Ka tena mahavery,

Raha Hianao tsy tonga izao  
Mitondra filazam-baovao  
Sy toky mampahery,  
Ovay izahay,  
Hamasino ny te-hino,  
Ampidiro  
Eto aminay ny Jiro.

4. Mba hafanao re izahay,  
Amio hitiavanay  
Indrindra ny Mpamonjy,  
Ny rany mba ho avotray,  
Ny didiny harahinay,  
Hanananay ny vonjy,  
Jeso, Jeso  
No torio sy bitsiho  
Ao an-tsainay,  
Mba hamelona ny ainay.

### **184 - Fanahy Mpanazava anay!**

Fanahy Mpanazava anay!  
Midina eto aminay,  
Tarihonay ny sainay;  
Ny alahelonay savao,  
Ny toetray havaozinao,  
Velomy re ny ainay.  
Sento renao  
Mba valio ka tahio  
Ny mahantra  
Ry Fanahin'ny Mpiantra!

### **185 - O! Ry Fanahin'ny Ray ao ambony**

1. Ô! Ry Fanahin'ny Ray ao ambony,  
Andriamanitra mandrakizay,  
Aza avela hisaraka intsony,  
Ny olo-mino, fa aoka hiray;  
Taomy ho an'i Jesosy Mpamonjy,  
Ny mbola maizina, ka hazavao,  
Hahafantarany tsara ny vonjy,  
Dia ho faly ny mpino Anao.

2. Ô! Ry Mpiantoka ny famonjena,  
Azo ny antoka tsara izao;  
Tonga ny Iraka be fahendrena  
Mba hanambara ny sitraponao;  
Ka ny lelafo noraisin'ny mino  
Sy ny fiteniny tonga vaovao  
Dia nahagaga, ka tena nampino  
Olona maro hanaraka Anao.

3. Ry Mpampionona ô! Mba sitrano  
Fa voaratan'ny ota izahay;  
Ka izay ory mba ampiadano,  
Ny malahelo falio indray!  
O, mba ovaonao tokoa ny sainay,  
Taomy ka ampahareto ny fo;  
Ka raha ory arovy ny ainay  
Mba tsy hafoinay intsony ny to.

### **186 - Fanahy, Mpanavao anay**

1. Fanahy, Mpanavao anay,  
Simban'ny ota izahay,  
Ka amboarinao indray,  
Havaozy ny fanahinay.

2. Avia, ry Afo masina,  
Ny ratsy aoka ho levona;  
Ry loharano velona,  
Tondrahonao ny efitra.

3. Ny lohataonanao anie  
Mba hampaniry soa be  
Sy hampamony ho Anao  
Izao tany karankaina izao.

4. Ny efitra sy tany lao,  
Hi ho by sy hidera Anao,  
Fa olom-potsy no ho ao;  
Mpanompo teo fa afakao.

5. Ry lohataona maminay!  
Midina faingana aminay,  
Fanahy, Mpanavao anay,  
Niandry ela izahay!

### **187 - Ny lanitra sokafinao**

1. Ny lanitra sokafinao,  
Midina ry Mahery  
Ampisehoy ny sandrinao,  
Ry Tompo manan-kery,  
He manakora izao  
Ny fahavalonao,  
Ka maro no mandà  
Ny afo masina  
Narehitrao, ry Jeso.

2. O, ry Mpitia olona,  
Mpanjaka voaho m bo!  
Ny teninao dia velona,  
Mahery sy mitombo;  
Ampahafantarano  
Izao tontolo izao,  
Fa tsy mba foana  
Ny ranao masina  
Nalatsakao fahiny.

3. Mba ampiraiso hina re  
Ny olom-boafidy,  
Ka akambano mafy e,  
Fa lova sarobidy,  
Ny fitiavana  
Madio sy marina  
No aoka hanavao  
Ny fiangonanao

4. Ny Nosinay, nytranonay,  
Ny vava aman-tsainay,  
Dia mba samy havaozinao,  
Ry fototry ny ainay!  
Ampiononinao  
Ny manina Anao!  
Avia, ka mamonje,  
Avia, mampandrese  
Ny olonao mahantra!

## 188 - Ry Fanahin'aina

1. Ry Fanahin'aina,  
mpanazava saina,  
Mpampionompo,  
O, mba akekezo  
Ireto miambezo  
Hamindranao fo!  
Hazavao  
Ny olonao,  
Mba handraisanao tokoa  
Fanomezantsoa.

2. Mba ampivavaho,  
Hafanao re aho  
Hankalaza Anao!  
Hataka sy sento  
Asandratro, ento,  
Ka valionao!  
Anehoy  
Sy ampinoy  
Ny famindrampo mamonjy  
Izay te-ho tra-bonjy!

3. Ô mba amosahy  
Fahazavam-panahy  
Ny fisainanay,  
Ka ny fo tarafo,  
Andrehetso afo  
Ny fanahinay,  
Ka ombay  
Re izahay,  
Raha antsoinao hanambara  
Ny Filazantsara!

4. Ô ry Andon'aina!  
Tany karankaina  
Mba vontosinao!  
Dia ho vanom-boa,  
Hahavoka-tsoa  
Re ny volinao!  
Indrafo  
Sy teny to

No harena antenaina  
Hanavao ny aina.

5. Ô mba areheto  
Sy ampahareto  
Ny finoanay!  
Izahay afaho,  
Ampahatanjaho  
Ny fanahinay!  
Tompo ô!  
Miraiki-po  
Aminao ny olom-bery,  
Tonga manan-kery.

6. Raha mitoloko,  
Tano re ny foko  
Tsy handao Anao,  
ka tsilovy dia,  
Tsy haniaasia,  
Hahatody ao  
Aminao  
Ny zanakao,  
Ao ny lova andrandraina  
Fahasambaran'aina.

## 189 - Ô, ry Fanahy Masina ô

1. Ô, ry Fanahy Masina ô  
Mba midira ao anaty fo!  
Taomy ny mania  
Hody avokoa;  
Eny, mitahia,  
Manomeza soa  
Miantrà ry Tompo ô!

2. Ô, ry Mazava lehibe,  
Hazavao ny teny izay ho re!  
Asehoy Jesosy,  
Ambarao ny vonjy;  
lasao ny Nosy  
Mba ho voavonjy,  
Miantrà ry Tompo ô!

3. Ry Afom-pitiavana ô,

Mba levoninao ny lolom-po!  
Ampiraiso dia  
Ireto ondry vitsy  
Mba hifankatia  
Ho iray mihitsy Miantrà, ry Tompo ô!

4. Ry Mpampifaly tsara ô,  
Mba omeo toky re ny fo!  
Mba hanantenanay  
Fa ho voavonjy,  
Ary handrenesanay  
Noho ny Mpamonjy,  
Miantrà, ry Tompo ô!

### **190 - Ry Fanahy Mpanazava**

1. Ry Fanahy Mpanazava  
Miandrandra Anao zahay;  
Aza ela, fa tongava,  
Taomy ny fanahinay,  
Mba ho fantatray mazava  
Izay lazain'ny teninao:  
Areheto lalandava  
Ao am-po ny afonao.

2. Ry Jesosy! Mitenena  
Araka ny fombanao,  
Aminay izay manantena  
Mba handre ny feonao;  
Fo marary sy manahy  
Mba tsaboy sy iantrao,  
Ny te-hino, fa tsy sahy,  
Anehoy ny holatrao.

3. Rainay, Mpanome ny soa,  
Mba henoy ny hatakay,  
Ka ny tananao tsitoha  
larovinao anay;  
Ny tanora mba tahio,  
Ny vaventy hafanao,  
Mba ho hitanay anio  
Fa aty ny tenanao.

### **191 - Ny Teny sy Fanahinao**

1. Ny Teny sy Fanahinao,  
Ry Ray, mba avelao  
Handroso tsara, hanavao  
Izao tontolo izao,  
Mitombo, mihabe  
Ny ratsy izao, odre!  
Fa vitsy ny mpanomponao  
Izay ifalianao.

2. Vonjeo, ry Jesosy ô!  
Ny fiangonanao,  
Fa misy marobe izao  
Izay mody olonao.  
Anefa tsy manao  
Izay tena sitrakao.  
O, ry Mpanjaka lehibe!  
Mba mamonje anie.

3. Fanahy ô! Mba raisonao  
Izao vavakay izao;  
Ny fonay mba havaozinao,  
Ny maso hazavao,  
Hahafantaranay  
Izay alehanay,  
Mba hamoazanay  
Izao voa tianao.

### **192 - Andriananahary, aba Ray**

1. Andriananahary, aba Ray  
Izay, ianteheranay,  
Mba raiso re ny vavakay.  
Esory sy vonoy ny helokay,  
Vonjeo, re, izahay!

2. Ry Jeso Zanak'Andriamanitra,  
Mpitarika ho an-danitra  
Mpanolo-tsaina marina,  
Mpamonjy tia ka nolavina,  
Vonjeo, re, izahay!

3. Ry Mpampionona mandrakizay,  
Ampiomano izahay



Handray ny famindramponao,  
'Ndrao very amin'ny otanay izahay.  
Vonjeo, re, izahay!

### **193 - Tahio, re, ny teninao**

1. Tahio, re, ny teninao,  
Ankalazao ny Zanakao,  
Izay nasandratrao, ry Ray,  
Ho kiady sy ho aronay.

2. Ry Jeso ô! Mpanjakanay,  
Ampandreseo izahay;  
Ho menatra ny rafinao,  
Raha hitany ny herinao.

3. Ry Mpampionona anay,  
Ampikambano ho iray  
Ny sampam-piangonana,  
Hiray am-pitiavana.

### **194 - Andriananahary ô**

1. Andriananahary ô,  
Endrey ny voninahitrao!  
Ny tany sy ny lanitra  
Mamelatra ny lazanao.  
Ny asanao rehetra e!  
Ny famonjena lehibe,  
Mitari-dalana anay,  
Hidera ny Anaranao.

2. Ry Zanak'ondry Masina,  
Jesosy izay isaoranay!  
He, Hianao niantra anay,  
Ka nentinao ny otanay.  
Ny menarana resinao,  
Ny fasana vinakinao,  
Ka Hianao nanokatra  
Ny lanitra hidiranay.

3. Ô, ry Fanahy Masina,  
Izay mitarika anay  
Hanetry tena sy hanaiky

Fa mpanota izahay,  
Mitaona sy mananatra anay  
Handray ny avotra,  
Ka manamasina anay,  
Mba raiso ny fisaoranay.

4. Ny voavonjy mbamin'ny  
Anjely mankasitraka,  
Ny tany sy ny lanitra  
Mikambana hanandratra  
Anao, ry Ray sy Zanaka,  
Anao, Fanahy Masina,  
Izay maneho famonjena  
Feno fitiavana.

### **195 - Andriamanitra Ray**

1. Andriamanitra Ray  
loharanon'ny aina,  
Masina, masina, re,  
Hianao ka deraina,  
Fa manome fahasoavana be,  
Soa tsy tratra ny saina.

2. Ô, ry Jesosy Mpamonjy,  
Mpanjaka mahery,  
Tonga taty mba hampody  
ny zanaka very,  
Raiso izao ny fiderana Anao,  
Saotra aman-daza sy hery.

3. Ry Mpampionona ô,  
Mpanazava ny sainay,  
Mba ampinoy izahay,  
ka havaozy ny ainay.  
Mba hazavao ny manantena  
Anao;  
Raiso ny hira hirainay!

### **196 - Ry Rainay ao an-danitra ô**

1. Ry Rainay ao an-danitra ô  
Izay mendrika ho deraina,  
Mahery sy be indrafo,

Tsy takatry ny saina,  
Izahay dia tonga zanakao,  
Ka faly manana Anao:  
Mihoby sy miravo!

2. Izahay miondrika aminao,  
Midera Anao tokoa,  
Fa be ny fitiavanao,  
Ry Ray mpanisy soa;  
Anao izao rehetra izao,  
Ho vitanao izay tiana,  
Andriananahary.

3. Ry Jeso Kristy Tomponay  
Mpanjaka manan-kery,  
Izay any an-kavanana-dRay,  
Mpanavotra ny very,  
He, any no ifonanao  
Ho an'izay navotanao,  
Fa resinao ny ota.

4. Ny ranao no nalatsakao,  
Fanati-tsaro-bidy!  
Ny ainao no atohanao  
Ny olona mpiady.  
Na aty na ao an-danitra  
Jesosy Kristy tokana  
Ho avotra sy vonjy.

5. Ry Mpampianatra mahay,  
Fanahy Mpanazava,  
Ampianaro izahay  
Handroso lalandava,  
Tariho ny fanahinay,  
Honenanay rahatrizay  
Ary an-danitra Amen!

### **197 - Haleloia, deraina**

1. Haleloia, deraina  
Andriamanitray,  
Mpanjaka fototr'aina  
Mpikarakara anay  
Ny zavaboahary

Dia eo an-tananao,  
Ka tena lavorary  
Ny fandaharanao.

2. Haleloia, deraina  
Hiana, Mpamonjinay!  
Nijaly, noratrana,  
Ka maty solonay,  
Anefa naharesy  
Ny fahavalonay,  
Natsangana handresy  
Mba ho fiainanay.

3. Haleloia, deraina  
Hiana, Fanahy ô!  
Ny herinao, no aina  
Hamelona tokoa;  
Hiana mikarakara  
Ny fiangonanao,  
Manova manatsara  
Izao tontolo izao.

4. Haleloia, deraina  
Ny Telo Izay Iray!  
Hobina sy hiraina,  
Fa Andriamanitray,  
He, Tompo foto-tsoa  
lainanay aty,  
Ka ho izany koa  
Mandrakizay doria.

### **198 - Isaoranay Jehovah**

1. Isaoranay Jehovah,  
Fa Tompo lehibe  
Izay tsy mba manova  
Ny famindramponao,  
Miorina aminay izao  
Ny fiangona-masinao;  
Torina aminay  
Ny teny mampiray  
Ka ravoravo izao  
Izahay midera Anao.

2. Derao Jesosy Tompo,  
Izay Mpamonjinao,  
Hiraonao re, ry foko,  
Ny fitiavany.  
Haleloia, haleloia!  
Haleloia, haleloia!  
Jesosy avotray  
Dia Zanaky ny Ray,  
Ny ainy no voaray,  
Hisolo helokay!

3. Derainay, ry Fanahy  
Izao ny asanao,  
Tsy misy mampanahy,  
Izay tarihinao,  
Ka anjakao, re, ny fonay,  
Arovy ny fiangonanay,  
Velomy izahay,  
Ataovinao mahay  
Manoka-po izao  
Handray ny aim-baovao!

### **199 - Misaora! Misaora an'i jehovah**

1. Misaora! Misaora an'i Jehovah,  
Ry olona aty an-tany ô!  
Fa lehibe ny indrafony  
Ka maharitra mandrakizay.

2. Misaora! Misaora an'i Jesosy,  
Ry olona aty an-tany ô!  
Fa vitany ny famonjena,  
Ka misokatra ny lanitra.

3. Misaora! Misaora re ny Fanahy,  
Ry olona aty an-tany ô!  
Fa fahazavana no omeny  
Ary fanavaozana am-po.

### **200 - Rainay ô Masina!**

1. Rainay ô Masina!  
Tompon'ny lanitra,  
'Zay tia anay;

kiady sy mandanay  
Ho fiarovana,  
'Zay hitokianay  
Mandrakizay.

2. Jeso ô, Tomponay!  
Lalana marina  
Amin'ny Ray!  
Fahamarinana  
Ary fiainana  
Azonay aminao  
Ry Tomponay!

3. Fanahy Masina ô  
Irak'i Jesosy  
Tonga ety;  
Manazavà anay  
Amin'ny maizina.  
Ny hevi-dratsinay  
Esorinao!

4. Andriamanitra ô!  
Telo fa tokana,  
Tompo iray;  
Aza mandao anay,  
Ory sy reraka  
Noho ny heloka  
'Zay mambo anay.

5. Aza tsaroanao  
Ny hadisoanay,  
Ry Tompo ô!  
Fa mamelà anay  
Noho ny zanakao  
Ka manomeza anay  
Ny fo madio.

### **201 - Midina, Tomponay !**

1. Midina, Tomponay !  
Ampionao izahay  
Hidera Anao  
Ray soa tia anay,  
Hery sy tanjakay

Zany hotompoinay  
::: Mandrakizay :::

2. Avia, Jeso ô!  
Reseo ny rafinay  
Ho lavonao  
Arovy izahay  
Amin'ny herinao  
Ny fitarainanay  
::: Henoinao :::

3. Fanahy Masina ô!  
Tariho izahay  
Hanaiky 'zao  
Mahery Ianao  
Ny fonay anjakao  
Aza ilaozanao  
::: Mpananatra ô :::

4. Ry Telo 'zay Iray!  
Dera mandrakizay  
Omena Anao  
Ny voninahitrao  
Aoka ho hitanay  
Ka raisonao 'zahay  
::: Ho aminao :::

## **202 - Ry Ray malala ô!**

1. Ry Ray malala ô!  
Mba raisonao  
Ny haja entiko  
Hidera Anao  
Ny fitiavanao  
No mamiko izao  
Izaho dia Anao  
Ry Raiko ô!

2. Ry Jeso tia ô  
Mpanavotra,  
Ta-hankalaza Anao  
Ny vavako;  
Ny avo-dehibe  
Manafaka ahy e

Izaho dia Anao  
Ry Jeso ô!

3. Fanahy Masina ô!  
Mpananatra  
Mahiratra tokoa  
Ny masoko,  
Mazava re izao  
Ny lalako hankao;  
He! Fifaliam-be  
No ahy 'zao

## **203 - Ry Rainay be fitia**

1. Ry Rainay be fitia,  
Mpamelona anay!  
Tariho tsy hania  
Hazoninao 'zahay;  
Fa be ny fahavalo  
Mitady ny ainay  
Mamely tsy mimalo  
'Lay ratsy hatrizay.

2. Ry Zokinay malala!  
Ry Jeso havanay!  
Toroy mba hahalala  
Ny mety izahay  
Ny miaraka aminao re,  
Ry Jeso Tompo soa,  
No mahaso ny saina  
Ny fo, fanahy koa.

3. Fanahy Mpanazava  
Sy Mpanadio ny fo!  
Tomoera lalandava,  
Monena ao am-po  
Koa dia ampidino  
Ny hasoavanao  
Ovay sy hamasino  
Ny toetray izao

4. Ry Tompo be fiantra!  
Ry Telo Zay Iray!  
Ny tananao miantra

Atsory aminay  
Rehefa tapita andro  
Ka hody izahay  
Mba raiso re, ry Tompo!  
Mba raiso izahay

## **204 - Mamy ny fitianao**

1. Mamy ny fitianao  
Ry Jehovah Tompo ô!  
Nahafoy ny Zanakao  
Hanavotanao anay.

2. Maminay ny antranao,  
Ry Jeso Mpamonjy ô!  
Ta-hamonjy Hianao  
Sy hanafa-keloka

3. Mamy ny fitaomanao  
Ry Fanahy Masina ô!  
Ny fanahinay ovay  
Hankato ny anatrao

## **205 - Ny Teninao rehetra**

1. Ny teninao rehetra  
Ry Tompo tia anay;  
No tsy mba manam-petra  
Fa to mandrakizay;  
Ho levona avokoa,  
Izao rehetra izao,  
Haharitra tokoa  
Zao teninao izao.

2. Ny tenin'ny Baiboly  
No sabatra entinay  
Handresy ny devoly,  
'Lay fahavalonay;  
Raha misy mampahory,  
Ka osa izahay  
Ny teninao mahery  
Manjary tanjakay

3. Fa teny mamy koa

Ho an'ny mpankato  
Ka loharano soa  
Miboika ao am-po  
Ho fanomezan-toky  
Ny azon'ny manjo.  
Sy hani-mahavoky  
Mamelona ny fo

4. Fa teny mampisava  
Ny aizim-be aty.  
Fanilo manazava  
Ny dia ho ary  
Manolo-pahendrena,  
Mananatra ny fo,  
Milaza famonjena  
Sy lova tsy ho lo.

## **206 - Ny teny masinao Jehovah Tompo ô**

1. Ny teny masinao  
Jehovah Tompo ô !  
Nampanoratinao  
Ireo mpanomponao.  
Dia tiako ka tanako,  
Ho lova sy fananako

2. Ny teny masinao  
'Zay noteneninao  
Milaza amiko  
Ny hasoavanao  
Izay harena atolotrao  
Ho entiko hidera Anao.

3. Ny teny masinao  
Andriamanitraô !  
Maneho ny fitia  
Nataon'ny Zanakao,  
'Zay maty tany Kalvary  
Hamonjy ny mpanota ety.

4. Ny teny masinao  
No mampianatra  
Ny saiko tsy mahay

Mba hahafantatra  
Ny zavatra miafina  
'Zay momba ny hasoavanao

5. Ny teny masinao  
Dia tsy mba mety lo;  
Izay ambarany  
Tsy misy tsy ho to,  
Na levona aza ka tsy ao  
Izao rehetra ary 'zao

## 207 - Mamy ny teninao

1. Mamy ny teninao,  
Jehovah Masina !  
Sy to ny teninao,  
Tsy azo ovana;  
Ny lanitra ho levona;  
Fa tsy simba ny teninao.

2. Madio ny teninao  
Ka tsara indrindra,  
Dia fahendrena  
Ho an'ny adala;  
Mahafaka ny maizina  
Ka mitondra ny mazava

3. Soa ny teninao  
Mahatsara ny fo  
Fa ao no hitanay  
Misy Mpanavotra;  
Jeso, Loharanon'aina,  
Mahasasa ny meloka.

4. Irin'ny foko koa  
Ny teny masina  
Noho ny harena  
Na fananana be;  
Ny teninao no tanako,  
Ho lovako mandrakizay

## 208 - Ny teny masinao torina hatrizao

1. Ny teny masinao

Torina hatrizao;  
Maharitra tsy lo  
Mamabo izany fo,  
Fa marina ka tianay  
Hiainanay mandrakizay.

2. Ny teny masinao  
Mitondra hery vao,  
Mandrava ny manjo  
Ireo 'zay ory fo;  
Ka mendrika ho tanana  
Anaty, ho fanana

3. Ny teny masinao  
Dia tsy mba mankaleo;  
FA hery velona  
Mamelombelona;  
Ka satrinay ho re indray  
Ry Andriananaharinay.

4. Ny teny masinao  
No feo manorina;  
Ny teny masinao  
No feo manarina,  
Ka tianay hanenika  
Ny tany sy ny lanitra.

## 209 - Jesosy tena kiady

1. Jesosy tena kiady  
Sy reharenanay  
Namoha vavahady  
Ny tanindrazanay;  
Nampiditra ny teny  
Hampahalala anay  
Ny Ray ny fahendreny  
Mba hianaranay

2. Na betsaka mifofo  
Ny Baibolinay  
Mihaza sy milofo  
Moa ketraka izahay?  
Jesosy no Mpiaro  
Ka moa ve ho kivy ve?

Vao maika mihamaro  
Ny mpankasitraka e !

3. Mbola Izy no Filoha  
Mpitarika anay,  
Hitory ka hamoha  
Ireo namanay;  
Vahoaka an-tapitrisa  
no mbola hasondrotray,  
Hahita Paradisa  
Ho zanaky ny Ray

4. Ry Jeso, hatanjaho  
Ny fiangonana,  
Hijoro ho tena taho  
Mamoa mandrakizay.  
Hianao anie no sandry  
'Zay tena tanjakay,  
No sady hany andry  
'Zay hijoroanay

5. Jesosy soa malala !  
Tsy foinao Hianao  
Ny fonay dia handala  
'Ty lova taminao  
Fanahy ravoravo  
Noho ny teninao  
Ry Zanaky ny Avo,  
Izao misaotra Anao

## **210 - Zava-tsoa tokoa ny fitsipikao**

1. Zava-tsoa tokoa ny fitsipikao;  
Tompo Andriamanitra ô!  
Teny mahasoana, aina, hery koa  
Mba ho an'izay manoa.

Fiv :  
(Feo voalohany)  
Iravoanay  
Fa harena be  
(Feo faharoa)  
Soa tsy manam-paharoa  
Ny fitsipikao

Iravoanay fa harena be  
Sarobidy tsy hafoy  
Izany didinao  
(Feo rehetra)  
Famonjena ho an'izay mandre

2. Maizana izahay, kely fantatray,  
Nefa ao ny teninao:  
Jiro sy fanilon'ny tongotray  
Hankanesa Aminao  
Iravoanay sns...

3. Raha alaim-panahy itony zanakao  
Indro, ao ny teninao  
Sabatry ny fo, hanoheranay  
Ilay ratsy hatrizay  
Iravoanay sns...

4. Fifalianay, odi-tahotray  
Ny Baiboly taminao:  
Avy ny manjo, nefa kosa, Ray  
Ao tokoa ny tavanao  
Iravoanay sns...

5. Ry Jesosy ô, Mpampianatray!  
Maminay ny teninao;  
Taomy izahay, mba hahazanay  
Hankato ny didinao  
Iravoanay sns...

## **211 - Ilay Boky 'zay nodorana**

1. Ilay Boky 'zay nodorana,  
Dia may nefa tsy levona;  
Izay natao ho lavenona,  
Lasa vato fanorenana;  
Noheverina ho foana  
Kanjo mainka koa velona;  
'Lay nafenina, nalevina,  
No nisandratra nivelatra!  
Iza moa no hahasakana,  
Eny, Iza no hanohitra,  
Ilay teny voasoratra,  
Dia ny Tenin'Andriamanitra



Zao rehet'izao ho levona  
Fa ny Teny no haharitra.

2. Rasalama nolefonina,  
Nisy hafa koa nodorana.  
Hantsana no namarinana,  
Tora-bato: fahafatesana  
Dia tao ireo nampinomina,  
Noterena mba hiozona:  
Moa izany nampivadika  
Kristiana be finoana?  
Valin-teny voasoratra  
Nentiny nandresy lahatra:  
Feo tony, tava mirana,  
Feno hery, hasambarana:  
"Tsy mba misy hatahorako  
Afa-tsy Hianao ry Tompoko"

3. Ilay teny masina sy to  
Manambara ry Mpamonjiko  
Tena saro-bidy ao am-po,  
Ka vakiko sy iainako  
Fifaliako, fiarovako,  
Fahazavana ao an-dalako;  
Koa tanako ho lovako  
Sy isaorako ny Tompoko,  
Maty aho nefa velona,  
Fa Kristy no ahavelomako.  
Maty Izy nohomboana  
Noho ny fahotana vitako  
Nefa Izy dia nitsangana  
Santatry ny hitsanganako.

## **212 - Velona sy mahery**

1. Velona sy mahery,  
Ny Tenin'Andriamanitra  
Ka na dorana aza  
Dia tsy ho levona  
Ny Sekoly Alahady  
Dia mivelona aminy.

2. Sabatra roa lela  
maranitra, manindrona,

Mampisaraka aina  
Sy fanahy, tonona;  
Fantany avokoa  
Ny am-po miafina.

3. Hotsaraina isika,  
Ka ilay Teny Velona  
No hanavaka antsika  
Ary koa hanavotra,  
Koa minoa ny teny,  
Teny fahasoavana.

## **213 - Ry fanahy mangetaheta**

1. Ry fanahy mangetaheta  
Mila fitsaharana:  
Aza kivy, mahareta,  
Sentonao hifarana!  
Fa ny tenin'i Jehovah,  
Soa mangarangarana;  
Loharano tsy miova,  
Ao no hasambarana.

2. Ry tontolo mila vonjy,  
Te ho afa-patotra,  
Ao ny tenin'ny Mpamonjy  
Dia Kristy Mpanavotra!  
Teny velona sy mamy,  
Feno fananarana;  
Ho torina eran-tany,  
Fa fampihavanana.

3. Ry Mpanjakan'ny mpanjaka!  
Ao, tendreo ny lelako  
Mba hitory sy hizaka,  
Hamandre ny havako,  
Dia tahio ny teny ireny  
Tsy ho very hasina,  
Ka hamoa zato heny  
Ny Baiboly Masina.

## **214 - Finaritra, ry Tompo ô!**

1. Finaritra, ry Tompo ô!

Ny mankafy ny teninao  
Sy mankato ny didy.  
Ny helony esorinao,  
Ny sainy hohavaozinao.  
Ka afaka hifidy  
Ny lova sarobidy.

2. Ny teninao no rakitra  
Sy tokin'ny mpandefitra,  
Fa teny manan-kery.  
He ! Ao dia voasoratra  
Ny aminao Mpanavotra,  
Fa Hianao irery  
No avotry ny very

3. Ny teninao no vatsinay  
Manohana ny dianay  
Sakafo mahaso  
Sy ampy hivelomanay,  
Ka ao am-parany indray  
Ho azonay tokoa  
Ny lovan'ny mpanoa.

### **215 - Ny teny masina sy to**

1. Ny teny masina sy to  
Nampilazainao, Tompo ô!  
No manankery mahava  
Ny fahavalonao tokoa  
Ka dia itokianay  
Na aiza no alehanay.

2. Mitaona ny fanahinay  
Ny teninao Mpanavotray,  
Mananatra sy manambara  
Ny ratsy ary koa ny tsara;  
Mpilaza mahafatra-po  
Ny teninao, ry Tompo ô!

3. Ny teninao no sabatray  
Sy mpampionona anay;  
Ny teninao no mofon'aina  
Sy mpanazava fo syaina:  
Mpiaro sady tanjakay

Ny teninao, ry Tomponao!

4. Ampinganay ny teninao  
Ao amin'izao tontolo izao,  
Ka raha levona ny tany,  
Ny teny mbola ao ihany,  
Dia izy iankinanay  
Ho antoky ny avotray.

### **216 - Ny teninao ry Tompo ô**

1. Ny teninao ry Tompo ô,  
Dia ranon'aina soa  
Izay mahalonakany fo  
Mangetana tokoa,  
Jereo ny tanimbolinao,  
Fa tena mila io.  
Ho feno voa ho Anao  
Hatramin'ny anio.

2. Ny teninao dia sabatra  
Maranitra tokoa.  
Mitsara sy mamantatra  
Ny fonay sy ny voa,  
Hetseho izao tontolo izao  
Handray ny teninao,  
O, aseho ny herinao,  
Hamorona aim-baovao.

3. Ny teninao izay tokinay,  
Fanilon-dianay,  
Noraisinay ho lovanay  
Sy fifalianay,  
Ampianaro izahay  
Hanoa ny didinao,  
Ataovy izay hitiavanay  
Ny teny masinao.

### **217 - Ry Jesosy Tomponay!**

1. Ry Jesosy Tomponay!  
Indreto izahay mivory,  
Nefa tsy mahay mandray  
Izay ambaranao akory;

Ka iraho ny Fanahy  
Mba hanampy sy hitahy.

2. Maizin-tsaina izahay,  
Fa taranaka mpanota;  
Simba ny fanahinay,  
Tena voasaron'ota,  
Tompo tsara ô, tongava,  
Aposahy ny mazava.

3. Ry Mazava lehibe,  
Taominao ny fo malaina,  
Tairo mba hifoha re,  
Ka handray ny tenin'aina;  
Ny fivavakay valio,  
Ny ataonay mba tahio

### **218 - Mba miangavy, Tompo ô!**

1. Mba miangavy, Tompo ô!  
Iraho ny Fanahinao,  
Vangio ny mpanomponao  
Ampianaro izy izao!

2. Ampaladio ny sofinay  
Handraisanay ny teninao,  
Tendreo koa ny lelanay,  
Hahaizanay hidera Anao.

3. Hiely be ny lazanao  
Ambara-pahatonganao  
Hitsara izao tontolo izao,  
Hampody ny navotanao.

4. Fanahy, Zanaka sy Ray,  
Mba raiso ny fisaoranay;  
Ka raha hiala aty izahay,  
Hidera Anao rahatrizay.

### **219 - Ry Mpampianatra mahay**

1. Ry Mpampianatra mahay  
Fanahy Mpanazava,  
Ampianaro izahay

Handroso lalandava.  
Ny indrafon'ny Tomponay  
Velaro eo imasonay  
Ho fantatray mazava.

2. Mivory eto izahay  
Handre ny tenin'aina,  
Ka hazavao ho fantatray  
Ny hevitra lazaina;  
Ovay ny sainay sy ny fo  
Hamantatra sy hankato  
Ny tenin'ny Mpamonjy.

3. Raha hodimandry izahay,  
Ka tonga ny anjara,  
Bitsiho ao an-tsofinay  
No tokin'aina tsara:  
Ataovy mora hitanay  
Ny tavan'ny Mpanavotray,  
Izay hery mahavonjy.

### **220 - Ry Jeso Tompo, Avotray**

1. Ry Jeso Tompo, Avotray,  
Mitomoera aminay;  
Aidino ny Fanahinao,  
Tahio izahay izao.

2. Ny sitrakao mba ambarao  
Ho fantatray ny hevitrao;  
Ny fonay amboaronao  
Hahay handray ny teninao.

3. Ny vavanay hasinonao  
Hahaizanay hisaotra Anao.  
Fa be ny soa azonay  
Nomenao, ry Mpanavotray.

4. Rahatrizay ny olonao  
Hihoby sy hidera Anao,  
Fa masina, fa masina,  
Fa masina i Jehovah.

### **221 - Mivory eto izahay**

1. Mivory eto izahay.  
Jesosy Tompo ô!  
Avaia hanazava anay,  
::: Hinoanay Anao :::

2. Maniry mafy izahay  
Hihaona aminao:  
Omeo hosotroinay  
::: Ny rano velona :::

3. Ny mofon'aina mba zarao  
No anay, ry Tompo ô!  
Tahio re ny irakao,  
::: Ho voninahitrao :::

4. Ny fonay dia atolotray  
Anao Jesosy ô!  
Omeo hery izahay  
::: Hanao ny sitrakao :::

5. Raha tapitra ny andronay,  
Izay voafetranao,  
Dia ento mody izahay  
::: Ho any aminao :::

## **222 - Ry Lela afo Masina**

Ry Lela afo Masina  
Nilatsaka fahiny  
Tandohan'ny mpianatra  
Sy tao anaty fony,  
Miandry fatratra Anao  
Izahay mivory eto izao;  
Avia, ry Fanahy!  
Avia, ry Jesosy ô!  
Atreho ny mpianatrao  
Ho velona am-panahy.

## **223 - Mba avia, malakia**

1. Mba avia, malakia,  
Ry mangetaheta ô!  
Teny tsara no ambara,

Ka henoy erampo;  
Fa Jesosy ranon'aina  
No torina sy lazaina.

2. Ny Mpamonjy mahavonjy,  
Mahatonga soa be,  
Ka tsy maintsy ho tra-bonjy  
Izay manantona Azy re  
Ka henoinao ny teny  
Manambara ny omeny.

3. Mba tariho sy tahio  
Aho, ry Jesosy ô!  
Mba ho ahy ny Fanahy  
Hanazava ap am-po,  
Hampahery fo sy saina,  
Ka hamelona ny aina.

## **224 - Tafavory izahay ka manatona Anao**

1. Tafavory izahay ka manatona Anao,  
Zanahary nahary anay;  
Ka mba raiso izao  
Izahay zanakao;  
Aza lavina re, izahay!

2. Tafavory izahay ka miantso Anao,  
Ry Jesosy Mpamonjy anay;  
Mihainoa, Tompo ô!  
Mitenena izao,  
Fa mitady Anao izahay!

3. Tafavory izahay ka miandry Anao,  
Ry Fanahy Mpananatra anay;  
Aidino ilay  
Afonao fahizay,  
Areheto aty aminay.

## **225 - Aty an-tranonao izao**

1. Aty an-tranonao izao  
No iangonanay

Hitady soa aminao,  
Hahafaka ota anay,  
Handinika ny teninao,  
Izay mahavelona anay,  
Ka mba ambinonao.

2. Na vitsy aza eto izao,  
Na be no tonga aty,  
Dia aza mba lalovanao,  
Atreho izahay!  
Raha tonga eto Hianao  
Dia ampy izany ho anay:  
Ny fofonain'ny Tomponay  
No mahavelom-po.

3. Raha misy mangatsia-po,  
Mba hafanao, ry Ray;  
Iraho ny Fanahinao  
Hamelona anay,  
Hanetsika ny mafy fo  
Ho tonga mpino mankato  
Izay lazain'ny teninao  
Hataon'ny zanakao.

4. Izay rehetra tonga aty  
Ampirisihonao,  
Ka aoka samy hankafy  
Ny fanavotanao,  
Ny fonay mba sokafinao  
Handray ny fananaranao;  
Ao aminao ny hery be,  
Efao ny sitrakao.

5. Ambininao ny irakao  
Hitory teny izao;  
Tolorinao ny hevitrao,  
Ny fony hafanao;  
Sokafy re ny vavany,  
Tendreo koa ny lelany  
Hilaza tsara aminay  
Ny sitrakao, ry Ray.

## **226 - Tompo ô! Mba te hihaona**

Tompo ô! Mba te- hihaona,  
Aminao ny olonao,  
Ka Ny oran-dohataona,  
Ampombay ny teninao;  
Ny Fanahinao iraho,  
Aminay izay mitalaho  
:,: Mba vokiso zava-tsoa  
Ny mangetaheta Anao :,:

## **227 - Eto afovoanay**

1. Eto afovoanay  
Hianao, ry Tomposoa  
Ka tahio ny vavakay  
Mba ho maminao tokoa,  
Raisinao ny fideranay,  
Ka savao ny fahantranay.

2. Mitoera aminay  
Na hariva na maraina;  
Aza mahafoy anay  
Mandra-pialanay aina;  
Ka dera tsy ho lany  
Dia ho anao ihany.

## **228 - Tafangona aty indray**

Tafangona aty indray  
Ny fiangonanao, ry Ray,  
Ka dia mba tahio!  
Iraho ny Fanahinao  
Hitarika ny zanakao,  
Hivavaka anio,  
Anao izao:  
Saotra, laza, dera, haja,  
fa nomena  
Ho anay ny famonjena.

## **229 - Jesosy ô! Mba hasoavinao**

1. Jesosy ô!  
Mba hasoavinao  
Ny asanay, izay atombokay  
Amin'ny anaranao;

Ka mba ombay  
Fa satria sitrakao,  
Fa ny anaranao  
No anton'ny atao.  
Dia hotanterahinay  
Mba ho fifalianay  
Sy ho voninahitrao.

2. Jesosy ô!  
Derainay Hianao,  
Fa feno famonjena olona  
Ny Anara-masinao!  
Ny herinao  
Tompo ô! Manavao  
Izao tontolo izao  
Ny teny masinao  
Dia iankinanay;  
Hianao isaoranay  
Eto sy rahatrizay.

3. Jesosy ô!  
Ny fanorenana  
Iainanay sy hahafatesanay  
Dia ny Anaranao,  
Fa Izy no  
Manome toky be,  
Ka hitsangananay  
Ho velona indray;  
Dia mba horaisinao  
Izahay navotanao  
Amin'ny Anaranao.

### **230 - Mba trotroy ny olona ory**

1. Mba trotroy ny olona ory,  
Ry Jesosy Tompo ô!  
Tsy hirenireny saina,  
Fa handray ny teninao;  
::: Olona osa, olona osa  
Ento mora, Tompo ô! :::

2. Jeso, Tomponay Tsitoha!  
Taomy ny sakaizanay,  
Mba ho tonga mpino koa

Sy hiankina aminao,  
::: Mba tariho, mba tariho  
Izy ho mpanomponao :::

3. Faly izahay, Jesosy,  
Tratr'izao anio izao,  
Tafavory ka hihaino  
Ny Filanzantsaranao,  
::: Raisonao re, raisonao re  
Izao fisaoranay izao! :::

### **231 - Ry Tomponay Tsitoha**

1. Ry Tomponay Tsitoha,  
Ilay iray hatrizay,  
Avia, hampifoha,  
Ny fiangonanay,  
Atreho ny mpivory,  
Fa manantena Anao;  
Fohazy ny matory  
Handray ny teninao.

2. Iraho ny Fanahy  
Mba hanavao anay  
Ka homba sy hitahy  
Ny teny inoanay.  
Na lehibe na kely,  
Ampio sy hafanao  
Hazoto hampielly  
Aty ny lazanao

3. Ny asam-pamonjena  
Izay natombokao,  
Ambino tsy hihena,  
Tahio sy tontosao!  
Ny herin'i Satana  
Folahy hatrizao,  
Ho afa-pahotana  
Izahay navotanao.

4. Arovy ny finoana  
Izay naorinao;  
Vonoy ny hevi-poana  
Mandà ny teninao,

Izahay na be na vitsy,  
Hazôny tsy hania,  
Mba ho Anao mihitsy  
Mandrakizay doria.

### **232 - Ny alahady andronao**

1. Ny alahady andronao,  
Jesosy Tompo Masina ô!  
Fotoana nitsangananao  
Ka maminay mpianatrao.

2. Anio, mivory izahay,  
Tahaka ireo mpianatrao;  
Ka enga anie ho hitanay  
Ny hazavan'ny tavanao.

3. Omeo anay, omeo indray  
Ny herin'ny Fanahinao;  
Havaozy ao anatinay  
'Lay Pentekosta fahizay.

### **233 - O! Ray Malala, asehoy**

1. O! Ray Malala, asehoy  
Ny hasoavanao;  
Sasao ho afa-keloka  
Izahay ho zanakao:

Fiv : Ho mafy ny fiezakay  
Handia ny lalanao,  
Tsy hisy hijanonanay,  
Raha tsy an-tranonao.

2. O! Ray Malala, mba henoy  
Ny feonay zanakao;  
Tantano ao an-dalana  
Hankany aminao:  
Ho mafy, sns...

3. O! Ray Malala, hitanao  
Ny hasambaranay;  
Ny avotr'ain'ny Zanakao  
No itokianay:

Ho mafy, sns...

### **234 - Mahery Ianao**

1. Mahery Hianao,  
jehovah Tompo ô!  
Mombà anay mpanomponao,  
Ka miarova anay.

2. Mpanjaka Hianao  
Ry Zanahary ô!  
Avia, anjakao izao  
Ny ao anatinay.

3. Miaro Hianao,  
Andriamanitra ô!  
Hidera sy hisaotra Anao  
No iangonanay.

4. Miantra Hianao,  
Ry Tompo tia ô!  
Tongava aminay izao  
Mba hifalianay.

5. Ny fanomezan-tsoa  
'Zay maminay tokoa  
Dia jeso 'lay malalanao  
Nafoy ho Avotray.

6. Mba raisonao, ry Ray!  
Ny saotra entinay,  
Ny dera, laza, hery koa,  
Anao Mpanjaka soa.

### **235 - Tafavory izahay**

1. Tafavory izahay  
Eto anatrehanao,  
Ry jehovah Tomponay  
Mba hivavaka aminao.

2. Te-hianatra izahay  
Mba hanao ny sitrakao;  
Mihainoa ny vavakay,



Manampia anay izao.

3. Fa mangataka aminao  
Fanampiana izahay;  
Raha tsy ampianao,  
Dia ho diso izahay.

4. 'Zay rehetra anananay  
Entinay midera Anao,  
Aoka hazoto izahay  
Mba hanao ny sitrakao.

5. Aoka handroso izahay  
Mba hanompo tsara Anao  
Dia hifaly izahay  
Amin'ny fitianao.

### **236 - Avia, Tomponay! Atrehonao 'zahay**

1. Avia, Tomponay!  
Atrehonao 'zahay;  
Fiderana no atolotray  
Ho Anao, ry Tomponay;  
Tongava aty an-tranonay  
Handray ny dera atolotray:  
Avia, Tomponay!

2. Avia, Tomponay!  
Atrehonao 'zahay;  
Enga ka ho tonga olonao  
Zao 'zahay rehetra izao,  
Ny vavanay hidera Anao,  
Ny fonay mba diovinao;  
Avia, Tomponay!

3. Avia, Tomponay!  
Atrehonao 'zahay;  
Ampidino ny Fanahinao  
Ho àty an-tranonay;  
Ampionao koa ny olonao,  
Hilaza anio ny teninao:  
Avia, Tomponay!

4. Avia, Tomponay!  
Atrehonao 'zahay;  
Fiderana no atolotray  
Ho Anao, ry Avotray! ray!  
Mba raisonao, ny deranay,  
Efao, tokoa ny hatakey:  
Avia, Tomponay!

### **237 - Ry Jehovah Tomponay! Tafavory izahay**

1. Ry Jehovah Tomponay!  
Tafavory izahay;  
Avy hankalaza Anao,  
Izahay vahoakao.

2. Faly, ravo izahay  
Noho ny soa azonay;  
Tonga mba hisaotra Anao  
Izahay voavotrao.

3. Saotra tsara entinay,  
Hira no asandratray  
Mba ho Fiderana Anao,  
Rain'izao rehetra izao.  
Amena.

### **238 - Mivory eto izahay**

1. Mivory eto izahay  
Hiantso ny Anaranao;  
Jehovah Masina ô!  
Dia manomeza anay anio  
Ny soa avy aminao,  
Ho fitahiana.

2. Ny vavaka tononinay  
Miakatra any aminao,  
Mpamonjy tia anay!  
Mba raiso ao an-danitra  
Ho zava-mani-pofona  
Izay ho tianao.

3. Ny saotra izay aterinay

Mba raisonao, Jehovah ô,  
Andriamanitray!  
Ny vokatry ny molotray  
Dia aoka ho fanatitra  
Ankasitrahanao.

4. Ankehitriny, Tompo ô!  
Omeo ny Fanahinao  
Hitoetra aminay,  
Ho fanalana aizina,  
Sy fanoloran-kevitra  
Ho an'ny olonao.

### **239 - Ry Jeso! Vory izahay**

1. Ry Jeso! Vory izahay,  
Fa andronao anio.  
Dia avy mba hivavaka  
Aty an-tranonao.

2. Ka na aiza no aiza ny olonao  
No vory toy izao,  
Ny herinao mba aseho,  
Efao ny teninao.

3. Ny hira ikambananay  
Aty an-tranonao,  
Ekeo ho fanandratanana  
Ny voninahitrao.

4. Ny vavaka tononinay  
Eo anatrehanao,  
Mba raiso ho fanatitra  
Ankasitrahanao.

5. Ny teny fitarainana  
Ataon'ny ory koa  
Soloy fifaliana;  
Hisaoranay Anao.

6. Ny teninao halahatra  
Hambininao anie,  
Hamelom-pitiavana

Am-pon'izay mandre.

### **240 - Alahady, andro tsara,**

1. Alahady, andro tsara,  
Andro fitsaharanay,  
Nitsangananao, ry Tompo!  
Andronao, Mpanavotray.  
Eny, maminay ny andro,  
Andro fiangonanay,  
Hiderana Anao Mpamonjy,  
Sy ny voninahitrao.

2. Tovy aminay ny teny  
Izay nataonao fahizay,  
Tamin'ny Apositoly  
Fony vory toy izao:  
"Raha misy roa na telo  
Amin'ny Anarako  
Vory mba hiantso Ahy,  
Ao no hiangonako."

3. Mba soraty ao am-ponay,  
Tompo ô! Ny didinao,  
Hiasanay saina tsara  
Eto anatrehanao,  
Mba avia, ry Jeso Tompo!  
Tomoera aminay,  
Hitandremanay ny andro  
Izay natokana ho Anao.

### **241 - Ry Jeso ô! Midina**

1. Ry Jeso ô! Midina,  
Jereo 'zahay izao;  
Atreho sao variana,  
Ka tsy mahita Anao.  
Hazoninao ny saina,  
Hijery tsara Anao.  
Mba tsy ho very maina,  
'Zao fivoriana izao.

2. Ry Jeso! hamasino

Ny toe-piainanay,  
Ka dia ampidino  
Ny hery ho anay;  
Ny bitsika mangina  
Ataovinao izao,  
Hamelom-paniriana  
Hanao ny sitrakao.

3. Ry Jeso ô! Monena,  
Midira Hianao,  
Ny fonay manantena  
Handray Anao izao;  
Ka izay misalasala  
Ampaherezona,  
Dia taomy hahalala  
Ny fitiavanao.

4. Ny hatakay mangina  
Henoy ka mba valio,  
Koa dia mitenena  
Hianao ankehitrilo,  
Ry Jeso! Mpanazava  
Ny dianay aty,  
Omany lalandava  
Ny fonay ho ary.

#### **242 - Misaotra Anao 'zahay, ry Ray!**

1. Misaotra Anao izahay, ry Ray!  
Fa tsy nafenina anay,  
Izay tena sitrakao tokoa  
Mba hahazoanay ny soa.

2. Ka mitariha anay izao  
Handray ny toro-hevitrao  
Izay lazain'ny teninao  
Hanaovanay ny sitrakao.

3. Ampahirato izahay  
Hahaizanay mahita anio  
Ny zava-mahagaga anay  
Ao amin'ny lalànao soa.

4. Ampianaro izahay

Ho tia tokoa ny teninao,  
Ka hankatò ny didinao,  
Hanaiky hotapahinao.

S. Ny asan'ny Fanahinao  
Mba tanteraho aminay  
Hampiorina ao anatinay  
Izay lazain'ny teninao.

#### **243 - Mivory eto izahay, handre**

1. Mivory eto izahay,  
Handre ny teninao,  
izay hambara aminay  
Andriamanitra ô!

2. Tolory fahendrena, ka  
Ampio ny irakao,  
Izay hitory aminay  
Ny teninao izao.

3. Ny fon'izay mihaino koa  
Sokafy rahateo,  
Ho tia sy hirakitra  
Ny teny mahasoana.

#### **244 - Ry Jeso! Mba henoinao**

1. Ry Jeso! Mba henoinao  
Ny feonay mpanomponao,  
Izay mivavaka aminao  
Mitady fitahiana.

2. Vokiso ny fanahinay,  
Ny teninao no haninay,  
Hahaizanay mamahana  
Ny reraka ao an-dalana.

3. Ampaherezona izao  
Ny tana anay mpanomponao  
Hanohana ny olona  
Miraviravy tanana.

4. Omeo fo mazoto re!

Tolory fahendrena be;  
Tarihonao ny hevitrany;  
Tendreo koa ny molotray.

5. He! Tsinontsinona izahay,  
Malemy sady tsy mahay;  
Ka dia ampaherezonao  
Hanaovanay ny sitrakao.

### **245 - Ray ô! Asehoinao**

1. Ray ô! Asehoinao  
Aminay ny antranao,  
Raisonao ny zanakay,  
Atsangano ho Anao.

2. Zanak'Andriamanitra ô!  
Mba henoy ny hatakay,  
Trotroinao ny zanakay,  
Taomy ho mpanomponao.

3. Ry Fanahy Masina ô!  
Mitoera aminay,  
Indro re ny zanakay,  
Ampianaro, hazavao.

4. Ry Jehovah 'Zay Iray!  
Nefa Telo, dia ny Ray,  
Zanaka, Fanahy koa!  
Mba tahio ny zanakay.

### **246 - Zazakely entinay mba hatao batisa**

1. Zazakely entinay  
mba hatao batisa izao,  
Izy no atokanay  
Sy atolotray Anao.

2. Rano tsy mba mahasoana,  
Rano tsy mba mahadio;  
Ka tahionao izy 'zao,  
Jeso ô, be indrafo!

3. Ary ny Fanahinao  
Dia ataovy ao am-po  
Mba hitarika azy, sao  
Hisy loza izay hanjo.

4. Ry Jehovah be fitia!  
Ry Jesosy Tomponay!  
Ry Fanahy koa, avia  
Mba handray ny zanakay!

### **247 - Ry Tompo ô! Tsinjovinao**

1. Ry Tompo ô! Tsinjovinao  
Ny mila famonjena,  
Ka hatao batisa izao,  
Satria manantena  
Ny tany namboarinao,  
Ho an'izay mpianatrao  
Ho lovany tokoa.

2. Fa Hianao dia tsy mandà  
Ny ory sy mpanota,  
Izay nandatsahanao ny ra  
Hanaisotra ny ota;  
Ka tonga izahay izao,  
Mitady hodiovinao:  
Mba raisonao ny fonay.

3. Mifona, Tompo, izahay  
Izay efa voaisa  
Ho olonao, izay nandray  
Ny soan'ny batisa;  
Ampaherezonao ny fo,  
Mba tsy hafoinao ny to,  
Ambara-pahafaty!

### **248 - Nitondra ny zaza ny renny**

1. Nitondra ny zaza ny renny tao  
Salema,  
Mba hotahin'i Jeso Kristy be indrafo;  
Nolavin'ny mpianatra izy,  
Nefa hoy Jesosy hoe:  
"Avelao ny zaza hanatona izao"

2. Fa Ahy ny zaza ka tiako indrindra,  
Mpiandry zanak'ondry Aho, ka aza  
mandà;

Fa raha manatona Ahy izy,

Hotahiko tsara e:

"Avelao ny zaza hanatona izao"

3. Endrey, mahagaga ny fiantran'i  
Kristy,

Fa indro, zazakely aza asiany soa;

Avia, manatona Ilay Mpiandry

Zanak'ondry, ka

"Avelao ny zaza hanatona izao"

4. Ry Jesosy Tompo!

Mampanatona Anao re

Ny zazakely tafavory eto izao;

Izay mandrara mba raro,

Ho to anie ny teninao:

"Avelao ny zaza hanatona izao"

## **249 - Tompon'ny lanitra ô! Mba tahio**

1. Tompon'ny lanitra ô! Mba tahio

Izy izay ta-hanatona Anao,

Ka ta-handray ny batisa anio,

Sady maniry mba ho zanakao.

2. Ampifalio ny fony, izay ory

Sady miaiky ny ota natao,

Ary ny ratsy maniry fongory,

Ka mba omeo ny aina vaovao.

3. Izy manaiky hitana ny soa

Sady mandà ny devoly izao;

Aoka hiseho ho mpino tokoa

Amin'ny fomba sy asa vaovao.

4. Afon'ny lanitra ô! Mba avia,

Ka ateraho ny fony izao,

Ary tarihonao mba tsy hania,

Fa te-ho sambatra ao aminao.

5. Andriamanitra Ray be fitia,  
Taomy ny maro hanatona Anao,  
Ny Fiangonanao, ho be mpitia,  
Ho marobe ny ankohonanao'

## **250 - Atolotray hatao batisa**

1. Atolotray hatao batisa

Ny zanakay, Jesosy ô!

Irinay izy mba ho isan'ny

Zaza tezainao.

2. Izahay izao efa nifidy

Anao handray ny zanakay:

Ka raiso izy fa voavidy

Tamin'ny ranao koa.

3. Soraty izy mba handova

Ny lanitra fonenanao,

Ka ny fanahinao hanova

Ny fony ho Anao.

4. Tahio ny fahazazany

Ho fanorena-marina;

Ampianaro azy izany,

Mivavaka aminao.

5. Tantano izy mandra-pita,

Ho tonga ao an-danitra,

Ka aoka izy mba hahita

Anao an-dàlany.

6. Ka amin'ny fotoana feno,

Handaozany ity tany ity,

Omeo toky, iteneno:

"Ndeha hody, anaka."

## **251 - Ry Jeso Zana-Janahary**

1. Ry Jeso Zana-Janahary

Sy fototry ny aim-baovao!

Mba aniraho ny Fanahy

Izao madinikao izao

2. Ny fahafatesanao nandresy  
No aoka hiombonany  
Ny herinao tsy mety resy  
No mba ho fiarovany

3. Ka ny Anaranao hajaina  
Dia mba omeo ny zanakay  
Ka io no hialany aina  
Sy hitsanganany indray

4. Tantano izy tsy ho osa  
Raha lavitra ny diany  
Fa raha fohy ihany kosa  
Mba raiso ny fanahiny

### **252 - Mba avelao ny zaza**

1. Mba avelao ny zaza  
Hanatona Ahy re,  
Fa an'ny toa azy  
Ny fanjakan'ny Ray!  
Izany teny tsara  
No ifalianay,  
Ka dia tsy rarana  
Ny zazakelinay

2. Ao amin'ny batisa  
Trotrony izahay  
Ka tena voaisa  
Ho zanany indray  
Atsangany handova  
Ny fahasambarana  
Fiainan-tsy miova  
Sy fiadanana

3. Sakaizanay malaza  
Ry Jeso, Hianao.  
Finaritra ny zaza  
Miankina aminao  
Ampio, ry Mpamonjy  
Ny ondrikelinao  
Ho tonga voavonjy  
Ao anatrehanao

### **253 - Avia, ry Mpanavotra**

1. Avia, ry mpanavotra  
Tahio ny fandraisana  
Sakafo namboarinao  
Izao hatoninay izao

2. Ireo zava-masina  
Aroso mba hohanina  
Ho famelana heloka  
Ho aina sy ho tanjaka

3. Tsaroanay ny dianao  
Ny ra sy fijalianao  
Ny nisoloanao anay  
Ny nitsangananao indray

4. Ny tenanao natolotra,  
Ny ranao dia nalatsaka,  
Sakafo iombonany  
Ho tena sy fanahy iray

### **254 - Avia, ry mangetaheta ô**

1. Avia, ry mangetaheta ô!  
Ka aza dia mba mamoy fo  
Fa indro misy rano velona  
Izay omena mba hamelona  
Anao mahantra sy variana  
Ry zanakondry very làlana

2. Ny mofon'aina no atolony  
Anao manaiky mba ho olony  
Ny tenany no ho fihinana  
Mba hahazoana fiainana  
Kaneffa tsy mba hovidina anie  
Fa tena fanomezan-dehibe

3. Jesosy Tompo no nanolotra  
Ny rany masina ho avotra  
Izany raiso mba ho tanjaka  
Sy toky ho anao, ry reraka  
Ry mpivahiny sasatra ao am-po  
Avia re, ka manaràna fo!

## 255 - Ny ran'ny Zanakondry latsaka

1. Ny ran'ny Zanakondry latsaka  
Namelona ahy tany Golgota  
Ka io no tena vatofantsika  
Maharitra ny tafio-drivotra

2. Raha vaoratra noho ny otako  
Ka lany foana ny heriko  
Ny rany masina nalatsaka  
No nahitako fahasitranana

3. Izao hira vao izao no mamiko  
Ka tonga tsy misaraka amiko  
Ny ran'ny Zanakondry no mahay  
Manavotra ahy mba ho an'ny Ray

4. Raha ketraka sy kivy re ny fo,  
Velomiko indray ny hirako  
Ny amin'i Jesosy sy ny ra  
Ka afaka ery ny tahotra

## 256 - Mivoaka ao Golgota

1. Mivoaka ao Golgota  
Ilay renirano soa  
Iantsoana ny mpanota  
Ho any avokoa;  
Ny ratran'ny Mpamonjy  
No loharanon'io,  
Ka ony mahavonjy  
Sy tena mahadio.

2. Mamelona ny tany  
Ity ony soa ity,  
Izay rehetra ombany  
Miadana ery.  
Vahoaka an-tapitrisa  
Izay misotro ao  
Mahita Paradisa  
Sy fiainana vaovao.

3. Ny fo izay maratra

Ka entina mankeo,  
Ny ory sy mahantra  
Izay manatona eo  
Mahita fanafody,  
Ka sitrana avokoa,  
Ny ota sy ny rofy  
Dia afaka tokoa.

4. Fanahy be ahina,  
Avia misotro ao,  
Fa io no mampangina  
Ny alahelonao;  
Fanahy ô, hatòny  
Ity ony soa ity  
Fa io no mahatòny  
Ny faniriana aty.

5. Hianao, ry Tompon'aina!  
Isaoranay tokoa,  
Nanaiky horatraina  
Handefa ony soa.  
Ny ranao tao Golgota  
No iankinanay  
Fa mahadio ny ota,  
Mamelona aina anay.

## 257 - Ry Jesosy ô! indreto

1. Ry Jesosy ô! indreto  
Izahay nasainao eto  
Amin'ny latabatrao  
Mba talory mofon'aina  
O! omeo ranon'aina  
Dia ny ra aman-tenanao

2. O! ry Loharanon' aiko  
Tonga aho, fa ilaiko  
Hianao Mpamonjiko  
Raiso ka diovy aho  
Atafo izay mitalaho  
Ny sahamarinanao!

3. Ry mpiandry Tsara indrindra  
Taomy aho mba hifindra



Ao am-balan'ondrinao  
Mamonje ka matahia  
Ireto ondrinao mania  
Ento any aminao!

4. O! ry Fahazavan'ny saiko  
Sady tanjaky ny aiko  
Tonga aho, ka vonjeo  
Noana ka mitaraina  
Mba vokiso mofon'aina  
Rano velona omeo!

5. Indro, miankohoka aho  
Tompo ô! ka mitalaho  
Eto anatrehanao  
Aza mba manary ahy  
Izay misento sy manahy  
Mamelà ny heloko!

6. Ry mpisolo ny mpanota  
Izay nandoa ny tambin'ota  
Latsa-dra ny tenanao  
Raisiko am-panajana  
Fa nataonao fanasana  
Ireto zava-masinao

### **258 - Manaraka ny hafatrao**

1. Manaraka ny hafatrao  
Tafangona izahay  
Mba hahatsiarovanay  
Anao, ry Tomponay!

2. Tsy azo hadinoina  
Ny fahorianao  
Ny dinitrao izay toy ny ra  
Tsaroanay izao

3. Ny hazofijalianao  
Dia tazanay izao  
Ry Zanakondry masina ô!  
Tsaroanay Hianao

4. Nijaly mafy Hianao

Nisolo voina anay  
Raha mbola velona izahay  
Tsaroanay Hianao

5. Raha tapitra ny andronay  
Ka tonga Hianao  
Mba haka ny fanahinay  
Tsarovinao izahay

### **259 - Ny latabatrao ry Jeso!**

1. Ny latabatrao, ry Jeso!  
Dia atrehinay izao;  
Ny fanahinay vokiso  
Amin'ny fitiana.

2. Tsy nitady zo sy laza  
Hianao, ry Tomponay!  
Foinao ny aina aza  
Nanavotanao anay.

3. Jeso ô! ny ranao soa  
No nataonao avotray,  
Mba hanafaka avokoa  
Izay tsy mahadio anay.

4. Manomeza mofon'aina,  
Tompo ô! ho tanjakay;  
Mihainoa ny mitaraina  
Mamalia ny hatakay

5. Ny fanahinay ry Tompo!  
Raiso, fa atolotray;  
Faly izahay hanompo  
Sy hanao ny sitrakao.

### **260 - Ry Kristy ô! malalako**

1. Ry Kristy ô! malalako  
Sakafon'ny fanahiko  
Manaraka ny hafatrao  
Tsarovako ny tenanao

2. Mangorakoraka ny fo

Fa voavono Hianao  
Ka saotra no atolotray  
Anao, ry Ilay nalatsa-dra

3. Ny tenanao izay raisiko  
Fiainako vaovao tokoa  
Ny ranao izay sotroiko  
No manadio ny foko koa

4. Ry Kristy ô! ampitomboy  
Ny fitiavako Anao  
Ny toe-piainako fenoy  
Ny tena hamasinanao

5. Atolotro anio indray  
Mba ho Anao mandrakizay  
Ny tenako, ny ananako  
Ny heriko, ny asako

## **261 - Ankehitrio no isehoanao**

1. Ankehitrio no isehoanao  
Ry Jeso Tompo, izay malalanay!  
Ankehitrio no anandramanay  
Ny hafaliamben'ny lanitrao

2. Ampiomany ao am-po izahay  
Hampahadio ny eritreritray  
Hahatakarany ny avotrafo  
Izay nambaranao tao Kalvary

3. Eto no anoloranao anay  
Ny mofon'aina rano velona  
Eto no ialanay sasatra  
Amin'ny adinay sy rafinay

4. Ry Jeso ô! Miandry izahay  
Ny fihavian'ny voninahitrao  
Ho toy ny andro vao mipoaka  
Ho toy ny rano mahavelona

5. "Raiso ny Tenako" no teninao  
"Ary ny Rako ho fiainana"  
Am-pitiavana no andraisanay

Na dia tsy mendrika aza izahay

6. Mombà anay, ry Tompo tia ô!  
Aza miala amin'ny fonay  
Aoka ny tavanao hazava re  
Amin'ny lalana alehanay

## **262 - Indreto izahay**

1. Indreto izahay  
Ry Jeso ô!  
Manaraka izao  
Ny hafatrao  
Ny fahorianao  
Tsaroanay izao  
Fa fatratra tokoa  
Ny nentinao

2. Ny mofo haninay  
Ry Jeso ô!  
Milaza aminay  
Ny tenanao  
Ny fanavotanao  
Mahafaka anay  
Ka saotra re izao  
Atolotray

3. Misotro ny divay  
Izahay izao  
Hahatsiarovanay  
Ny antranao  
Ny ra nilatsaka  
No manadio anay  
Manafaka tokoa  
Ny olonao

4. Tarihona ny fo  
Ry Jeso ô!  
Ho tia sy hankatò  
Ny didinao  
Ka tsy ny sitrakay  
Fa ny Anao, Jeso  
No aoka ho maminay  
Ry Tompo ô!

## 263 - Mandrenesa ry sofina

1. Mandrenesa ry sofina  
Mifalia, ry fo  
Ny feon'ny Filazantsara  
Manatona anao

2. Ry olon'ota rehetra  
Ry ory sy noana  
Izay mameno ny kibony  
Amin-java-poana

3. Jehovah no mamboatra  
Izay mofon'aina  
Ho an'izay rehetra  
Mety hihinana

4. Kristy sy ny fitahiany  
Izany mofo izany  
Fa izy no mamelona  
Ny maty mosary

5. Avia, ry mosarena  
Ka manaràna fo  
Ny mofon'aina tsy lany  
Fa ampy ho anao!

## 264 - He! mahagaga anay

1. He! mahagaga anay  
Ny fitiavana  
Nasehonao, ry Jeso ô!  
Mba ho anay

2. Ny fijalianao  
Ilay tao Golgota  
Indrisy! lalina takoa  
Ny ngidiny

3. Na mafy aza izay  
Tsy nandosiranao  
Nataonao tsinontsinona

Ny tenanao

4. Ny fitiavanao  
Fa tsy ny fantsika  
No anton'ny nihantonanao  
Tao Golgota

5. Ny ra nalatsakao  
No vidin'ny ainay  
Ny fijaliana nentinao  
No avotray

6. Tsaroanay izao  
Derainay avokoa  
Ilay fitiavanao anay  
Ry Tompo soa!

## 265 - Ny fitiavanao

1. Ny fitiavanao  
No mahagaga anay  
Ry Zanak'Andriamanitra ô!  
Ry Jeso Tomponay!

2. Hanavotra aina anay  
No nijalianao  
Ka famonjena lehibe  
No azonay izao

3. Ny mofo sy divay  
Izay haninay izao  
Dia mampiseho aminay  
Ny fitiavanao

4. Avia, Jeso ô!  
Avia ankehitrio  
Ka ny fanahinay sasao  
Ho tsara sy madio

5. Mampaneke anay  
Hanao ny sitrakao  
Koa aoka tsy ho tianay

Izay tsy tianao

6. Monena aminay  
Ry Tompo be fitia!  
Ka aza ilaozanao izahay  
Mandrakizay doria

## **266 - Ry Jeso Tompo, Hianao**

1. Ry Jeso Tompo, Hianao  
Isaorako tokoa izao,  
Ny ranao sy ny tenanao  
No nihinanako izao.

2. Ry foko faly, ambarao  
Ny soa azonao izao;  
Jesosy monina ao am-po,  
Endrey ny hafaliako!

## **267 - He, ny andon'ny maraina**

1. He, ny andon'ny maraina  
Latsaka ao an-tsaha re  
Ka mamelona ny maina  
Izay maniry rano be!  
Ravoravo e, ny tany,  
Fa he, ny andro maina efa lany  
Ka mitsahatra ny fahantrany  
Manaroka ny hazo be!

2. Ny fanahy karankaina  
Misy rano velona  
Fa Jesosy andon'aina  
Manome fiainana  
Velona ny jentilisa  
Ny tany hay dia tonga Paradisa  
Marobe no efa voaisa  
Handray ny lova masina!

3. Misy lalana mizotra  
Izay mankao Ziona re  
Any no mitanjozotra  
Ny vahiny marobe  
Ka Ziona dia mivoha

Hidiran'ny navotan'ny Tsitoha  
Ao no ivorian'ny mifoha  
Fa an'ny Tompo lehibe

4. He, mikambana ny mino  
Amim-pifaliam-be  
Ka ny hobiny maneno  
Tahaka ny rano be!  
Ao mitovy avokoa  
Tsy misy tompo sy mpanompo koa  
Eny razana iray tokoa  
Ny mponina ao Ziona re!

## **268 - Jesosy no Mpiandry ny Fiangonanay**

1. Jesosy no Mpiandry  
Ny Fiangonanay  
Ny feon'Izy irery  
No feo fantatray  
Ka tsy mba vala maro  
Ny Fiangonanay  
Iray tsy hay zaraina  
Tapahin-Tompo iray

2. Iray no Vatolampy  
Izay iorenanay  
Iray no Fehizoro  
izay ikambananay  
Iray no Mofon'aina  
Fihinanay ety  
Iray no antenaina  
Ho azonay ary

3. Tabain'ny hevi-diso  
Kaneffa mbola iray  
Ny saina tsy mitovy  
Tsy mahazara anay  
Fisoko maromaro  
Kaneffa vala iray  
Ny Tompo no mpiaro  
Ny Fiangonanay

4. Ny teny samy hafa  
Ny fomba tsy miray  
Tsy misy maharava  
Ny fikambananay  
Ny fanenjehana aza  
Vao mainka mampiray  
Sy mahatsara laza  
Ny fiangonanay

5. Ry Jeso! hatanjaho  
Ny Fiangonanao  
Ny fony halalaho  
Mba hitoeranao  
Izay firaisan-tsaina  
Miseho hatrety  
Velomy hanana aina  
Hitohy hatrany

### **269 - He! tianay ny monina eto**

1. He! tianay ny monina eto  
Fa maminay ny valanao  
Tsy tianay fa mampisento  
Ny lavitra ny tranonao

Fiv : He! tianay ny monina eto  
Fa maminay ny valanao  
Tsy tianay, fa mampisento  
Ny lavitra ny tranonao

2. He! tianay, fa misy aina  
Ry Tomponay, ny valanao!  
Tsy tianay, fa tany maina  
Ny lavitra ny tranonao  
He! tianay, sns...

3. Fehezinao, Mpiandry tia!  
Milamina ny valanao  
Tsy misy tsy mifankatia  
Ny ondry izay tarihinao.  
He tianay, sns...

4. Ny fanimban'ny fahavalo  
Dia lavitra ny valanao

Mitazan-davitra mandalo  
Ny rafinao tsy tia Anao  
He! tianay, sns...

5. Ny fototra izay mahatsara  
Ny valanao ry Tomponay!  
Dia Hianao Mpiandry tsara  
No miara-monina aminay  
He! tianay, sns...

### **270 - Ry Tompo Izay nanangona**

1. Ry Tompo izay nanangona  
Anay ho vato velona!  
Hazony tsy handao Anao  
Ny vato voarafitrao  
Fa maro no mandronjina  
Handevona

2. Jesosy Fehizoro ô  
Mpifehy mora sady to!  
Tohano mafy izahay  
Mba tsy hirodana indray  
Fa indro ny mpisompatra  
Mandrirotra

3. Ry Vato fampiraisana!  
Tariho mba hikambana  
Ny vato voapaika re  
Ho tonga trano lehibe  
Tsy zakan'ny mpandevona  
Harodana

4. Ny Kristiana marobe  
Mba ampiraiso tsara re  
Hiray am-pitiavana  
Ho velona finoana  
Ka mba hiaraka hanao  
Ny asanao

### **271 - Mba mivavaha raha vao maraina**

1. Mba mivavaha raha vao maraina

Tsarovinao Ilay Mpanao anao  
Izay niaro ny fanahy sy aina  
Mba ho salama toy izao

Fiv : Tsarovy re ny Tomponao  
Izay Mpiaro anao

2. Rehefa tonga koa ny antoandro  
O! miambena tsara hianao  
Fa manangoly saina isan'andro  
Ilay devoly rafinao  
Tsarovy re, sns...

3. Raha alina mangina, ka hatory  
Tsarovy eo ny ota izay natao  
Ka dia afony mafy sy itsory  
Fandrao maningotra anao  
Tsarovy re, sns...

4. Na aiza na aiza hianao mitoetra  
Satana fahavali, ao tokoa  
Ka aza kivy na mba manjorettra  
Fa mivavaha tsy ho voa:  
Tsarovy re, sns...

## **272 - Faly izahay nandre**

1. Faly izahay nadre  
Havan-tia nanao hoe:  
"Miaraha aminay  
Trano soa halehanay"

2. Efa tonga izahay  
Mba hivavaka aminao  
Ry Jehovah Tomponay  
Mitahia ny olonao!

3. Miandrindra Anao izahay  
Ka ùangataka aminao  
Hanomezanao anay  
Soa avy aminao

4. Dia sambatra izahay  
Fa mitoky aminao

Ka ho tanterahinay  
Izay rehetra sitrakao

5. Hoderainay Hianao  
Andro amana alina  
Mbamin'ny Anaranao  
Foto-piadanana

## **273 - He! vokatra ny tany**

1. He! vokatra ny tany  
Jehovah Tompo ô!  
Fa be tsy mety lany  
Ny hasoavanao  
Ny andro fararano  
No ifalianay  
Voataona ao an-trano  
Ny vokatra azonay

Fiv : Soatra tsara entinay  
Ho Anao tokoa  
Ny olonao rehetra izao  
Mifaly avokoa

2. Ny tany tsy misaona  
Fa sambatra tokoa  
Tsy tapaka isan-tokoa  
Ny fanomezan-tsoa  
Endrey, nahazo maina  
Izao rehetra izao  
Ny zava-manana aina  
Mifaly aminao  
Saotra tsara, sns...

3. Tontosa izay nirina  
Nahazo izahay  
Fa misy taona zina  
Nataonao ho anay  
Tsy diso isan-taona  
Ny fitahiana  
Ny olonao mihaona  
Mba hankalaza Anao  
Saotra tsara, sns...

## 274 - Tao an-tany karankaina

1. Tao an-tany karankaina  
Nisy olo-marobe  
Tsy mba nampodina maina  
Tao Jesosy nanome

2. Na dia mofo kely aza  
Tonga nahavoky ireo  
Fa nitombo mahagaga  
Samy faly izy ireo

3. Fa ny herinao, ry Jeso  
Izay namonjy fahizay  
No miasa lalandava  
Hahavoky soa anay

4. Dia tahio ny fambolena  
Hahavokatra tokoa  
Miantrà ny firenena  
Tsy ho diso zava-tsoa

5. Na dia voky fatratra aza  
Mora reraka izahay  
Ao ambony ny mateza  
Iankinan'ny ainay

## 275 - Raisonao, ry Tompo soa

1. Raisonao, ry Tompo soa  
Ny fanatitray izao  
Hamasino avokoa  
Izay atolotray Anao

Fiv : :,: Raisonao re, ho Anao  
Ho fanati-tsitrakao! :,:

2. He, Anao, ry Tompo soa  
Izay rehetra anananay  
Ny harena, vola koa,  
Taminao, Jehovah Ray  
Raisonao re, sns...

3. Na dia kely aza, Tompo,

Ka tsy mendrika Anao  
Raisonao ho entina hanompo  
Sy hanao ny sitrakao  
Raisonao re, sns...

4. Indro, Tompo, raisonao koa  
Tena, fo, fanahinay  
Mba ho fiasana koa  
Eo an-tananao izahay  
Raisonao re, sns...

## 276 - Ry Jehovah, Ray Mpahary

1. Ry Jehovah, Ray Mpahary  
Sy Mpamelona anay  
Tsapanay fa tsy manary  
Hianao Mpitondra anay  
He, mandratsa-pitahiana  
Sesehena Hianao  
Ka dia feno fifaliana  
Izahay mpamonponao

2. Noteneninao ny tany  
Notarihinay izahay  
Ka nitobaka aoka izany  
Izao ny vokatray azonay  
Feno hika isan-taona  
Ny fitiavanao anay  
Ka aoreno tsy ho foana  
Tampo ô! ny asanay

3. O! mba raisonao re, ry Tompo  
Izao fanatitray izao  
Enga anie ka mba hitombo  
Handrosoan'ny hanitrao  
Raisonao koa sy hmasino  
Ny fonay hiasanao  
Ny fanahy ampidino  
Hampahery, hanavao

## 277 - Indro, Tompo, vory eto

1. Indro, Tompo, vory eto  
Anatrehanao izahay



Mba hanatitra ireto  
Vokatry ny asanay

Fiv : :,: Raiso re, raiso re!  
Ho fanati-tsitrakao :,:

2. Hianao no mampaniry  
Sy mampisy vokatra  
Izahay dia mpitahiry  
Fa Anao ny zavatra  
Raiso re, raiso re, sns...

3. Ary na tsy mendrika aza  
Aoka tsy holavinao  
Fa ho enti-mankalaza  
Ny Anaran-tsoanao  
Raiso re, raiso re, sns...

4. Raiso koa re, ry Tompo  
Ho anao ny tenanay  
Amboary ho mpanompo  
Mahafatra-po izahay  
Raiso re, raiso re, sns...

## **278 - Mba ampio, ry Tompo soa**

1. Mba ampio, ry Tompo soa  
Izahay navotanao  
Fa mikasa mba hanoa  
Sy hanaraka Anao

Fiv : Hitanao, fa kely hery  
Izahay mpanomponao  
Tsy mahefa raha irery  
Koa mba tarihonao

2. Izahay manolo-tena  
Mba hiasa ho Anao  
Ka maniry, manantena  
Fa hanampy Hianao  
Hitanao fa kely hery, sns...

3. Tianay hiara-dia  
Aminao, ry Tomponay

Ka tantano tsy hania  
Amin'ny alehanay  
Hitanao fa kely hery, sns...

## **279 - Raisonao, ry Tompo soa**

1. Raisonao, ry Tompo soa  
Izato asan-tananay  
Fa nomenao avokoa  
Izay rehetra anananay  
Simba izahay rehetra  
Sady very hatrizay  
Nefa soa tsy misy fetra  
No navalinao anay

2. Hianao nanetry tena  
Tsy nitandro henatra  
Be fiantra ka onena  
Ny tra-pahoriana  
Mba tsarovanay izany  
Koa dia tahafinay  
Nefa fiasana ihany  
Ao an-tananao izahay

3. Arosoy sy ampitaro  
Aminay ny teninao  
Hazavao ny olo-maroko  
Izay tsy mahalala Anao!  
Ny misaona mba vangio  
Ny kamboty inatrao  
Izahay izay taonga anio  
Mba ataovy irakao

4. Eny, ry Mpamonjy tsara  
Amboary izahay  
Mba ho tonga mpanambara  
Ny fitiana anay  
Ary dia mba tahio  
Izato fikambananay  
Hafanao, ampirisiho  
Hamasino izahay

## **280 - Ry Tompom-boninahitra**

1. Ry Tompom-boninahitra  
Jereonao izao  
Ireto izay milahatra  
Ho tena irakao  
Ny fanasana fatratra  
Omaninao izao  
Ilà-mpitondra hafatra  
Hamory izay hankao

2. Hitety sampan-dalana  
Sy vohitra izahay  
Hanetra fisakanana  
Sy ady mahamay  
Ka aoka hotafiana  
Ny fiadianao  
Fa tena fanafihana  
Izay hatao izao

3. O, re Fanahy Masina  
Monena aminay!  
Ka aoka ho tanasina  
Tokoa izahay  
Fihino tsy hihemotra  
Ataovy irakao  
Manefa zava-tsarotra  
Ho voninahitrao

4. Ry Tompom-boninahitra  
Ny voninahitrao  
No aoka mba hitaratra  
An-tavanay izao  
Ka raha ao an-danitra  
Fomena-masinao  
Dia mainka vao hamiratra  
Ho voninahitrao

### **281 - Vory eto izahay hihevitra ny asanao**

1. Vory eto izahay  
Hihevitra ny asanao  
Tompo, manatreha anay  
Ka aseho ny sitrakao  
Aoka Hianao no mba hitarik?anay

Ary ny Fanahinao hamelona aina anay

Fiv : Tompo, tahio izahay  
Mba ho voninahitrao ny asa vitanay

2. Hahavita inona  
Ny saina aman-kevitray?  
Tena tsinontsinona  
Ry Tompo ô Ny herinay  
Koa mba midina eto afovoanay  
Hanana aina masina ny fivorianay  
Tompo, tahio izahay, sns...

3. Hianao no nanome  
Ny asa hoheverinay  
Tena adidy lehibe  
No voatolotra anay  
Enga anie ny sitrakao irery no hatao!  
Aoka tsy ho vanona izay tsy sitrakao!  
Tompo, tahio izahay, sns...

4. Areheto aminay  
Ny afom-pitiavanao  
Mba hahaizanay miray  
Mitory ny anaranao  
Hahavory marobe hanatona Anao  
Hampamirapiratra ny voninahitrao!  
Tompo, tahio izahay, sns...

### **282 - Ry Jeso Tompo velona mpiandry sy mpamelona**

1. Ry Jeso, Tompo velona  
Mpiandry sy Mpamelona  
Ny Fiangona-masinao  
Atreho izahay izao

2. Indreto ( inty) mpanomponao vaovao  
Atokanay , ka raisonao  
Hanao ny raharahanao  
Hamahana ny ondrinao.

3. Ny tany no nakana anay  
Mihelina ny andronay

Ka vetivety izahay  
Dia hody vovoka indray

4. Ry Jeso ô, Mpitia anay  
Izay Mpanjaka hatrizay,  
Endrey ny voninahitrao,  
Manerana ny lapanao.

5. Ny deranao asandratra  
Hitohy tsy hitsahatra  
Hazava toy ny kintana  
Ny tsara fanompoana

6. Mba raiso ny mpanomponao  
Ka aoka hamboarinao  
Ho mpanambara Mankato  
Ny hafatrao, ry Tompo ô!

7. Omeo afo masina  
Ny vava mampionona;  
Ny sainao sy ny feonao  
Omeo ny mpanomponao

8. Raha misy tafio-drivotra,  
Tohano tsy hatahotra,  
Hahery sy hisakana  
Ny rafi-piangonana.

9. Ka mba ampirisihonao  
Hanaraka ny dianao;  
Tantano raha mbola aty,  
Handresy ka ho tonga ary

10. Mba mamindra fo aminy,  
Fa kely ny finoany ;  
Ny Ranao masina anie  
Hahafaka ny helony!

11. Ampio mba haharitra,  
Raha mbola aty an-efitra  
Raha avy ny hodiany,  
Mba hazavao ny làlany!

12. Raha tonga ny harivany,

Ka ao ny ady farany,  
Dia raiso ny mpanomponao  
Hiala sasatra aminao;

## **283 - Manan-jara ry Jesosy ny mpanomponao**

1. Manan-jara ry Jesosy !  
Ny mpanomponao,  
?Zay natokanao hitondra  
Ny Anaranao;  
Nofidiana ho mpitory  
Ny fitiavanao,  
Nitokiana ho mpamory  
Ny vahoakanao.

2. Iza no zara-fanompoako  
Voatendrinao,  
Ka ny mafy tsy ahoako  
Hahefako izao;  
Tsy hadosi-pahoriana  
Ny mpiasanao,  
Fa ny hazo fijaliana  
Lova taminao.

3. Na ho voky na ho noana  
Ny mpanomponao,  
Tsy handao ny fanompoana  
Nametrahanao;  
Sitrakao ny fiahafiana,  
Ka mba tiako koa;  
Zakanao ny tsi-fisiana,  
Ka zakaiko koa.

4. Tsy ahiko ny handany,  
Holanina koa,  
Fa famoizan-tsoa no hany  
Ahefana soa;  
Na ny saiko na ny aiko,  
Andro, vola koa,  
Tsy mba misy holalaiko,  
Foiko avokoa.

5. Nefa raha izaho irery

Tsy mahefa izao,  
Ka mangataka ny hery  
Eo an-tananao,  
Aoka ho feno ny Fanahy  
Ny mpanomponao  
Mba ho tena lehilahy ( vehivavy)  
Voahosotrao.

### **284 - Mangataka aminao ny olonao, ry Tompo**

1. Mangataka aminao ny olonao, ry Tompo  
Mba hitahiana ny havan-tianay.  
Izay atokanay hitondra sy hanompo  
Ny fiangonanao; henoy ny vavakay.

2. Tafio ny herinao, fa tsy mehefa irery,  
Fenoy hy hevitrao ho toy ny zanakao;  
Mpitady ny mania, mpikaroka ny very,  
Hitondra ireo ho tia ny valan'ondrinao.

3. Ny sainay hazavao hahazo fahendrena  
Hahayhitondra izao vahoaka be izao;  
Ampianaro koa mba tsy hatoky tena  
Tolory saina soa hiankina Aminao

4. Raha ory, aza afoy, tohano sy onony;  
Marary mba tsaboy, mahantra mba jereo;  
Apetraka aminao ny ainy sy ny fony,  
Ka mba tsinjovinao, arovy sy vonjeo.

### **285 - Mivory maro eto ?zahay navotanao**

1. Mivory maro eto  
?Zahay navotanao  
Ny saotranay no ento  
Ho voninahitrao.  
Mifaly sy mihoby  
Mandray ny irakao.

Ka eto ny mitoby  
Mangataka aminao.

2. Ry Kristy tena Andry  
Sy Vatolampinay!  
Ry Lohan?ny mpiandry  
Sy Tompo tokinay!  
Tohano mba hijoro  
Ity mpanomponao,  
Tinendry ho mpanoro,  
Mpilaza hafatrao.

3. Handray ny asa mafy,  
Koa aza ilaozanao;  
Hitory, ho mpamafy,  
Ka dia mba hazavao.  
Vokiso lalandava  
Ny saina tianao;  
Omeo ny andro lava  
Hanao ny asanao.

4. Tahio mba ho salama  
Hahefa ny Anao,  
Ho iraka mafana  
Ampian?ny herinao;  
Mandrava manda mafy  
Mba hampanjaka Anao,  
Koa aoka mba hihafy,  
Fa izay no sitrakao.

5. Ny fitaizam-panahy,  
Adidy lehibe,  
Ampio mba tsy hanahy  
Ny asa marobe;  
Ka dia tahio ny asa  
Hataony ho Anao;  
Ny fony no mikasa  
Hanoa ny didinao.

### **286 - Ry Jeso Mpitarika Hendry**

1. Ry Jeso Mpitarika Hendry!  
Tsinjovy ny olom-boatendry;  
Tolory ?zay hevitra Hendry

Handinika sy hahakendry  
Ry Tompo mpanjaka mahery;  
Vangio raha ory sy tery,  
Tohano raha mahatsiaro fery  
Vimbino ndrao saraka irery.

2. Raha miasa dia miasa ny saina,  
Kanefa ny tany no maina,  
Ka mila ho kivy ny aina,  
Tondray fandrao karankaina,  
Ny mpiasa izay voafidy  
Hamoa ny fo ?zay mihidy,  
Hitari-panahy saro-bidy,  
Tantano hanaraka didy.

### **287 - O! Miaingà izao, ry miaramila soa**

1. O! Miaingà izao, ry miaramila soa,  
Antsoin'ny Tomponao hiady hianao  
Ny fahavalo ao kanefa mandrosoa,  
::: Mahery re no momba anao :::

2. Izaon'ny tontolo izao izay feno fahotana  
No iantsoana anao mba hotafihinao;  
Indreo mihoraka ao ny fehin'i Satana,  
::: Jeso anefa momba anao :::

3. Ny aizim-be izay mandrakotra ny  
tany  
No iantsoana anao, ka ndeha mba savao;  
Ny Tompo no tafio, alao ny hazavany,  
::: Diovy izao tontolo izao :::

4. Ny fahoriam-be izay manarona eto  
No iantsoana anao, ka moa ve handà ?  
Ampiononinao ny ory sy misento,  
::: O! mazotoa, ka miaingà! :::

5. Na inona hanjo, mbola ao ny  
famondra;  
Hahery hianao! Izay no antenao;  
Ampiozinao tokoa izao ny fandresena,

::: Mahery ilay arahinao :::

6. O! Mahereza izao, ry miaramila soa!  
Ny hatrotrahanao iareto sy zakao,  
Jesosy no jereo, ka matokia tokoa,  
::: Fa Izy re no herinao :::

### **288 - Sambatra izay voafidy ho mpiasanao**

1. Sambatra izay voafidy  
Ho mpiasanao  
Ka hanohy ireo adidy  
?Zay natombokao,  
Ho mpitaiza ny fanahy  
Toy ny vitanao  
Ho mpiady tena sahy  
Tarikao Jeso.

2. Dia mpiasa tsy an-tery  
Ka mafana fo,  
Te-hanangona ondry very  
Marobe tokoa,  
Te-hitaona ny tanora  
Sy ny zaza koa,  
Tsy hifidy asa mora,  
Fa ho mpankato.

3. Hianao ry Jeso Tompo,  
No nampianatra  
Ny olonao mba hanompo  
Tsy mitsahatra  
Tsy handala ny talenta  
?zay natolotra;  
Fa aina re no fetra  
Entina manao.

4. Nefa tsy matoky tena  
Fa malemy moa,  
Ka dia mila fahendrena  
Mila hery koa;  
Ho mpiasa mahavita  
?Zay anjara ety,  
Mandra-pody ao am-pita

Aminao ary.

### **289 - Hitsangana izao ?zahay ry Tompo ô**

1. Hitsangana izao  
?Zahay, ry Tompo ô!  
Mba hanompoanay Anao  
Ampionao izahay.

2. Ny fahotana be,  
Izay vitanay taty,  
Dia ibebahanay izao  
Ka mamelà anay.

3. Ny tsy finoanay  
No nijanonanay  
Tsy nanatonanay Anao  
Izay ela be izay.

4. Sasao madio izahay  
Asio fo vaovao  
Ho ao anatinay izao  
Ry Jeso avotray!

5. Inoanay tokoa  
Fa maty Hianao,  
Hisolo olo-meloka  
No nijalianao.

6. Mba manampia anay  
Hiankina aminao  
Fa tokinay ny avotrao  
Natao tao Kalvary.

### **290 - Indreo fa mivory izao**

1. Indreo fa mivory izao  
Zatovo vonon-kanavao  
Ilay fanekena tsara;  
Mba raisonao, ry Rainay ô!  
Ny fitarainanay izao,  
Omeo toky tsara;  
Henoy, fenoy

Aim-panahy mba ho sahy lalandava  
Ho mpanaiky ny mazava.

2. Mandà ny ratsy izao,  
Manaiky fa ho zanakao  
Handia ny lalan?aina;  
Ry Ray ô mba tsarovinao  
Ireo voasoratrao  
Ao amim-bokin?aina;  
Tezao izao  
Tsy ho resy fa handresy,  
Ka omeo  
Azy hery mahaleo.

3. Natsanganao ho zanakao  
Sy ondry mba handrasanao,  
Ka tena sarobidy;  
Arovy re ny ondrinao  
Tantano ny malalanao,  
Ry Tompo izay nifidy  
Anay handray  
Lova soa tsy miova,  
Ka hazony  
Tsy handao Anao intsony!

### **290 - Indreo fa mivory izao**

1. Indreo fa mivory izao  
Zatovo vonon-kanavao  
Ilay fanekena tsara;  
Mba raisonao, ry Rainay ô!  
Ny fitarainanay izao,  
Omeo toky tsara;  
Henoy, fenoy  
Aim-panahy mba ho sahy lalandava  
Ho mpanaiky ny mazava.

2. Mandà ny ratsy izao,  
Manaiky fa ho zanakao  
Handia ny lalan?aina;  
Ry Ray ô mba tsarovinao  
Ireo voasoratrao  
Ao amim-bokin?aina;  
Tezao izao

Tsy ho resy fa handresy,  
Ka omeo  
Azy hery mahaleo.

3. Natsanganao ho zanakao  
Sy ondry mba handrasanao,  
Ka tena sarobidy;  
Arovy re ny ondrinao  
Tantano ny malalanao,  
Ry Tompo izay nifidy  
Anay handray  
Lova soa tsy miova,  
Ka hazony  
Tsy handao Anao intsony!

### **291 - Efa tonga zana-dRay Tsitoha hianao**

1. Efa tonga zana-dRay Tsitoha hianao,  
Ry tanora, tamin'ny batisa masina;  
Izany no tenin'ny Tompo

2. Koa aza manadino ny batisanao,  
Zava-tsoa sarobidy efa azona;  
Tamin'ny ranon'aina.

3. Famelana heloka sy fahasoavana  
Fanavaozana ny fo sy fiadanana;  
Samy nomen'ny Mpamonjy.

4. Dia arahonao Jesosy, fa  
Mpamonjinao;  
Aoka hahafaly Azy ny fiainanao;  
Tovy izay Sitrapony!

5. Mivavaha, miambena ao an-dalana!  
Misy fahavalo fetsy ta-hamitaka  
Ny ondrikelin'ny Tompo

6. Mahatoky ny Mpamonjy, aza kivy fo,  
Izy hampionona, raha avy ny manjo;  
Azy ny hery rehetra.

7. Ary raha tapitra ny andronao aty

Endrey ny fifalianao rehefa mby ary;  
Amin'ny Tompo Jesosy!

### **292 - Izahay natao batisa**

1. Izahay natao batisa,  
Voarain'ny Tomponay,  
Ary efa voaisa  
Mba ho zanaky ny Ray;  
Voavelany tokoa  
ny fahadisoanay  
Nefa mbola mora resy  
Mora simba izahay.

2. Na ny asa, na ny teny,  
Na ny hevitra ao am-po,  
Mbola tsy madio ireny,  
Ka diovy, Tompo ô!  
Mora aminay ny ratsy,  
Saroitra aminay ny to;  
Mba ampio tsy ho resy  
Izahay, ry Tompo ô!

3. Raha mbola aty an-tany  
Izahay izay zanakao,  
Mba ampio tsy ho lany  
Ny finoanay Anao.  
Ry Jesosy Tompo soa,  
Tano mafy izahay,  
Mba ho azonay tokoa  
Izay anjara lovanay.

### **293 - Izaho nentina nanatrika**

1. Izaho nentina nanatrika  
Ny Tompo sy ny fiangonana;  
Ny ray sy reny niantoka  
Hitaiza sy hitari-dalana.

2. Ka faly aho fa noraisina  
Natao batisa mbola zaza re,  
Nanaovam-panekena masina  
Ho zanaky ny Tompo lehibe.



## 294 - Ampio aho, Zanahary ô

1. Ampio aho, Zanahary ô,  
Hanaraka ny "eny" masina,  
Izay nataoko tamin'ao, ry To,  
Ka tsy mba hisy fivadihana.

2. Ry Tompoko, Izay nanomboka  
Ny asa tsara ao anatiko,  
Arovy aho ho tanteraka,  
Mba tsy ho faty ny finoako.

## 295 - Miorena mafy tsara

1. Miorena mafy tsara  
Amin'Ilay vatosoa  
Mandrosoa, mifahara,  
Mifikira mafy koa.  
He! Ny Tompo manambara  
Fa ho sambatra tokoa,  
Ka ho tsara miafara  
Ny mpanompo mahaso.

2. Raha misy fahoriana  
'Zay midona amin'ao,  
Raiso re ho fitahiana  
'Zay omen'ny Tomponao;  
Fa ny lalam-pijaliana  
'Zay alehanao izao  
Dia mamelom-paniriana  
Hitomboan'ny herinao.

3. Miadia ny ady tsara,  
Ho mpandresy hianao;  
Tontosay izay anjara  
Eo am-pelantananao;  
Jeso Tompo no mijery  
Sy mahita ny atao,  
Koa tsy mba hisy very  
'Zay rehetra vitanao.

4. Ry Jesosy! hantajaho  
'Ty mpanolo-tenanao,  
Miangavy, mitalaho,

Ka iteneno, Tompo ô!  
Aoka re ho tena taho  
'Zay mikambana amin'ao,  
Ka ny foko halalaho,  
Diovy ho Tempolinao.

## 296 - Ankehitriny, Jereo, ry Ray!

1. Ankehitriny,  
Jereo, ry Ray!  
Ny mpivahiny,  
Miampy indray;  
Ka manomeza hery  
Ny fiangonanao,  
Mba tsy hiasa irery  
Ny olonao.

2. Avia hitahy  
Ny olonao;  
Ka ny Fanahy  
Omeonao;  
Ho hery izay handrava  
Ny toetra ratsinay,  
Ho jiro hanazava  
Ny làlana.

3. Ry Tompo tia!  
Tarihona  
Hifankatia  
Ny olonao,  
Mba tsy ho rava intsony  
Ny fikambananay,  
Hamantana ao ambony  
Ny dianay.

## 297 - Ry havanay malala!

1. Ry havanay malala!  
Manolo-tena izao.  
Fotoana mahafaly  
Iraisan-tsika anio;  
:,: Faly 'zahay mandray anao :,:  
Hiara-manompo ny Ray,  
:,: Jeso anie mandray nao! :,:

Mba ho sakaizany tokoa.

2. Hajao ny fanekena,  
Adidinao efao.

Ataovy tsy terena  
Izay andraikitrao.

∴ Jereo Jeso ka matokia, ∴  
Fa Izy no hiahy anao.  
∴ Ka mandrosoa sy mifalia, ∴  
Hanefa izay anjaranao.

### **298 - Aina no fetra ry Tompo Mpanjaka**

1. Aina no fetra ry Tompo Mpanjaka,  
Aina no fetra anarahana anao,  
Ka ny faneva tsy maintsy ho zaka,  
Ny fanompoana tsy maintsy atao.

Fiv : Indreto izahay, hilanja faneva,  
Ilay hazo izay nanavotana anay;  
An-tsitraro no anoloranay tena,  
Ka tano mba ho Anao izahay.

2. Aina no fetra ho enti-manoa  
Ilay Zanak'ondry nisolo anay;  
Fandavan-tena sy fanaovan-tsoa  
No fianarana atolotra anay.  
Indreto izahay, hilanja faneva, sns...

3. Aina no fetra, ry Tompo malala!  
Aina no fetran'ny fitiavanay;  
Ka sanatria izay handao na hiala;  
Mandrakizay, ho Anao izahay.  
Indreto izahay, hilanja faneva, sns...

4. Aina no fetra, ny nofo anefa  
Mora mirona ho lavo indray,  
Ka manampia, ry Mpandresy mahefa!  
O! mba tantano, hazony izahay.  
Indreto izahay, hilanja faneva, sns...

5. Aina no fetra, ka ampio, ry Fanahy!  
Aina no fetra, vonjeo e, ry Ray!

Aina no fetra, izahay re no sahy;  
Aina no fetra, handresy izahay.  
Indreto izahay, hilanja faneva, sns...

### **299 - Tompo mahery Tsitoha**

1. Tompo mahery Tsitoha,  
Faly 'Zahay mahatsiaro,  
Fa Hianao Izay Loha,  
Efa niantso olo-marô,  
∴ Mba hitohizan'ny asa,  
Asa natomboka teto ∴

2. Raiso ny saotra aman-dera  
Noho ny zavatra vita,  
Fa Hianao nampahery  
Ny mpiasanao izay tafita.  
∴ Raiso fa Anao samy irery  
Ny fahefana sy hery. ∴

3. Dia hamasino ny asa  
Sy ny fiezahana mafy.  
Efa naaon'ylay mpiasa  
Tamin'ny fo sy ny hafy.  
∴ Ho voninahittrao, ry Tompo  
Zay niantso azy hanomo. ∴

4. Ary izahay izay mandova  
Sy ta-hanohy ny asa,  
Aoka ny toetra ho lova  
Horaisinay, enti-miasa.  
∴ Ho voninahitrao, ry Tompo  
'Zay efa niantso mpanompo. ∴

### **300 - Ny tany izay vangianao**

1. Ny tany izay vangianao,  
Ry Jeso Masoandronay,  
Tsy maintsy lasanao, Jeso,  
Mba hanjakoanao avokoa.

2. Ny vavaka sy dera koa  
Tsy manam-pitsaharana,  
Hiakatra aminao tokoa,

Hitady fiadanana.

3. Ireo olona voaforona,  
Dia ary ho Anao tokoa;  
Hohasoavinao ireo  
Hanjary masina avokoa.

4. Ny fo sy tany lasanao  
Ho feno fahasambarana,  
Ny loza hosakananao,  
Ny soa hampidinina.

5. Ny maty hovelominao  
Ny ratsy hohavaozina,  
Ny very hotadiavinao  
Ny diso, re, horaisina.

6. Ry vazan-tany efatra!  
Ry Nosy tanindrazanay!  
Mba raiso Ilay Mpanavotra  
Ho Tomponao madrakizay.

### **301 - He, sahanao, Mpamonjy ô!**

1. He, sahanao, Mpamonjy ô!  
Izao rehetra izao.  
Ka be izao ny vokatra ao,  
Fa vitsy ny mpanao.

2. Indreto, tonga izahay  
Hivavaka amina,  
Hanolotra ny tenanay  
Hiasa ho Anao.

3. Ny firenena marobe  
Sy nosy mba tahio,  
Indrindra fa ny Nosinay,  
Ry Tompo ô, ahio.

4. Vimbinonao ny irakao,  
Ny feony hamamio,  
Indrindra fa omeonao  
Ny zotom-po madio.

5. Tahio re ny olonao  
Hihaino sy hanoa,  
Mba hahitany amina  
Ny antra mahaso.

### **302 - Miandry ao ny Tomponao**

1. Miandry ao ny Tomponao,  
Samia manendry tena,  
Fa be ny asa izay atao;  
Atreho ny firenena!

Fiv : Topazo, maso kely  
Ny ondry izay mania  
Ilay zandry lasa niala,  
Ataovy hoe: modia!

2. Miandry ao ny namanao  
Moa ve tsy ho vonjena?  
Hatony re, dia ilazao;  
Kristy no famonjena.  
Topazo, sns...

3. Hevero e! ny Nosinao  
Ity Madagasikara!  
Mba efa aiza izy izao  
Ara-pilazantsara?  
Topazo, sns...

### **303 - O mandrosoa, ry mpanaraton?i Jeso**

1. O mandrosoa, ry mpanaraton?i Jeso,  
?Zay no baiko azontsika, ka  
mandrosoa :  
Jesosy Tompo no mibaiko mandrosoa :  
Raiso ka arotsahy ny haratonao.

Fiv : Miaingà, namako ô ! Jeso no mibaiko  
Mandrosoa, mandrosoa, mandrosoa  
tokoa  
Aza kivy koa, na dia tsy mahazo :  
Mandrosoa amin?ny lalina kokoa.

2. O mandrosoa, ry mpanaraton'i Jeso,  
Saina mora kivy aoka ho lavinao ;  
Fa ny mora kivy dia hanenina tokoa :  
Raiso ka arotsahy ny haratonao.  
Miaingà, namako ô, sns...

3. O mandrosoa, ry mpanaraton'i Jeso,  
Mbola ao ny hazandrano ho azonao  
Tsy azonao anio, ampitso mandrosoa,  
Raiso ka arotsahy ny haratonao.  
Miaingà, namako ô, sns...

4. Mba mitoera, Jeso ao antsambonay  
Mba ho renay lalandava ny teninao ;  
Ny baikonao, ry Tompo, no andrasanay  
Handrotsahanay izao ny haratonay.  
Miaingà, namako ô, sns...

### **304 - He, ali-maizim-pito e!**

1. He, ali-maizim-pito e!  
Sao very ao ny marobe,  
Satana no manjaka ao.  
Mivadi-po ny olona ao.

Fiv : Avia, ry Masoandronay,  
Mba hazavao ny taninay!

2. Fa ny mazava ho anay  
Ao aminao, Jehovah Ray!  
Mamirapiratra tokoa  
Ilay Fitarikandro soa.  
Avia, sns...

3. Ry Jeso Masoandronay!  
Miandry eto izahay;  
Mba misehoa Hianao,  
Fanilon'ny fanahy ô!  
Avia, sns...

4. Dia hazavao ny taninay,  
'Ndrao very eto izahay;  
Savao ny aizim-be izao  
Hizoranay hankaminao.

Avia, sns...

### **305 - O! miasà, sakaiza**

1. O! miasà, sakaiza,  
Jeso no herinao;  
Na misy mafy aza,  
Izy tsy handao.  
Dia matokia tokoa,  
Fa Jeso momba anao.  
Ka hisy voka-tsoa  
Hifalianao.

2. Maro ny andro lasa  
Izay tsy nanaovanao,  
Ka mbola be ny asa  
Izay tsy vitanao,  
Koa dia mitsangàna  
Hanao tokoa izao,  
Hahavitanao tsara  
Ny anjaranao.

3. Indro, fa mihariva,  
Fohy ny andronao;  
Moa tsy mba fantatrao va  
Ka tsy hitanao?  
Eny, fa manakaiky  
Jeso Mpitsara re,  
Ary efa 'mby akaiky  
Ny hodianao.

4. Rehefa tonga Jeso,  
Tompon'ny asanao,  
Ary hamaly soa  
Ny mpiasany.  
Mandrakizay doria  
No hifalianao,  
Raha mpanompo tsara  
Mahatoky e!

### **306 - Mamafaza voa, ka aza mba malaina**

1. Mamafaza voa, ka aza mba malaina,

Fa tsy fantatrao re izay ho vanona;  
Na amin'ny hariva, na amin'ny maraina,  
Mamafaza voa tsy mijanona.

Fiv : :,: Matokia re, matokia re,  
Hisy amboara ho anao anie!,::

2. Mamafaza voa amin'ny mahantra,  
Ka aza mba mifidy izay hasian-tsoa;  
Fa ny fo mazoto sady feno antra  
Dia homen'ny Tompo valisoa tokoa.  
Matokia re, sns...

3. Mamafaza voa amin'ny malemy,  
Ary mba ampio izay reraka ao am-po;  
Asehoy Jesosy loharanon-kery,  
Ao no anovozy izay ilain'ny fo:  
Matokia re, sns...

4. Miasà, sakaiza! milofosa tsara  
Dieny misy asa azonao atao;  
Matahora sao tsy vita ilay anjara  
Izay napetraky ny Tompo aminao.  
Matokia re, sns...

### **307 - Iza no hanompo an'i Jeso soa?**

1. Iza no hanompo an'i Jeso soa?  
Iza no hanaiky, mba ho Azy moa?  
He ny hatsarany! He ny antra be!  
Izy ta hamonjy ka meteza re.

Fiv : Jeso Tomponay ô! Indreto izahay,  
Avy mba hanaiky, ka mandraisa anay.

2. Iza re no mety, iza re lazao,  
Hanome ny fony mba ho Azy izao?  
He, miantso mafy Jeso Tompo tia:  
"Zay rehetra mety, ô! avia, avia!"  
Jeso Tomponay ô! sns...

3. Iza no mba sahy, sahy ao am-po  
Ho miaramila fehin'i Jeso?  
Iza no hiady ady tsara re,

Fa ny fahavalo dia marobe?  
Jeso Tamponay ô! sns...

4. Iza re no homba Azy ankehitrion  
Mba hamonjy ireny azon'ny manjo?  
Iza no hihafy sady hanome  
Andro, hery, saina? Mamalia e!  
Jeso Tomponay ô! sns...

5. Iza no hazoto mba hiasa moa?  
Iza no handroso mba ho hendry koa?  
Iza no hanaiky, iza re? lazao!  
Mba ho an'i Jeso izao anio izao:  
Jeso Tompanay ô! sns...

### **308 - O! miaingà, miasà izao**

1. O! miaingà, miasà izao,  
Irak'i Jesosy hianao;  
Ny masoandro miposaka ao  
Mba hanazava ny dianao.  
:,: Ka dia mazotoa ô:::

Fiv : O! miaingà, miasà, mitoria,  
Aza ho kivy, fa mba mihafia  
Dia mba lazao ny nataony taty,  
Mba hanazava ny maizina aty.

2. O! miaingà, miasà izao,  
Ka afafazo ny voanao  
Ho ao an-tany mahantra ao,  
Jeso Mpamonjy no aronao  
:,: Hitahy nyasanao:::  
O! miaingà, sns...

3. O! miaingà, miasà izao,  
Aoka hiezaka fatratra;  
Jeso hanambina anao aty  
Mandra-pahazo ny vokatra  
:,: Zay valin'ny asanao :,:  
O! miaingà, sns...

4. O! miaingà, miasà izao,  
Fa 'mby akaiky ny Tomponao

Mba hanome valisoa anao,  
Araka izay voa nafafinao.  
∴ Ka dia miasà izao∴  
O! miaingà, sns...

### **309 - Iza no hitantara ny Tompo Jesosy**

1. Iza no hitantara  
Ny Tompo Jesosy,  
Ilay nandao ny lapa  
Ka nidina taty ?  
Nitafy nofo Izy,  
Nanetry tena koa.  
Ka maty ho Mpisolo  
Izao rehetra izao:  
Iza no hitantara (in-3)  
Ny Tompo Jesosy?

2. Iza no hitantara  
Ny fitiavany ?  
Fa tia ny mpanato  
Mahantra, very koa;  
Ka izay manatona Azy  
Dia tsy hariany,  
Fa raisiny tokoa  
Mba ho sakaizany:  
Iza no hitantara (in-3)  
Ny fitiavany ?

3. Iza no hitantara  
Ny zava-marobe  
Izay raisin'ny voavonjy  
Amin'ny alalany?  
"Tsy mbola hita maso,  
Na ren'ny sofina,  
Na takatry ny saina"  
Ny hasoavany:  
Iza no hitantara (in-3)  
Ny hasoavany ?

4. Iza no hitantara  
Ny soa be ary  
He! Lova tsara fara

Hasolo ny aty;  
Any an-danitra any  
Be haravoana,  
Fa ao ny Tompo Jeso  
Izay hifaliana:  
Iza no hitantara (in-3)  
Ny soa be ary ?

### **310 - Misy maro ao an-tsaha mitaraina**

1. Misy maro ao an-tsaha mitaraina,  
Ka ento ny Jiro mba hankao,  
Tsy mba misy antoandro na maraina,  
Fa maizina re ny ao;  
Indro olo-marobe  
No maniry mafy hoe:  
Mba midina mankaty,  
Itondray Baiboly re  
Izy ireo fa ta-handre  
An'i Kristy Tompo soa.

Fiv : "Mandehana", hoy ny Tompo,  
"mandehana  
Ho amin'izao tontolo izao".  
Mitsangàna ary, eny, mitsangàna  
Fa izy no homba anao.

2. Mandehana mba hitarika ny jamba,  
Mba ampifalio ny ory fo;  
Ny mahantra ilazao fa misy lamba  
Tsy miova, tsy mety lo;  
Jeso Mofon'aina soa,  
Sady Ranon'aina koa,  
Asehoy ho hitany,  
Tena Andriamanitra,  
Tompo tao an-danitra,  
Ambarao ho fantany:  
"Mandehana", sns...

3. Mandehana hanatanjaka ny osa,  
Omeo toky re ny ketraka;  
Ny anjaranao, ataovy ho tontosa,  
Ka aza dia reraka,

Mandehana hianao,  
Ka vitao ny asanao,  
Fa ny tambinao ary,  
Mbola any ihany re  
ny handraisan-tamby be,  
Dia rehefa tsy ety;  
"Mandehana", sns...

### **311 - Miely lavitra any ny olo-marobe**

1. Miely lavitra any  
Ny olo-marobe;  
Koa lza no hankany;  
Hamonjy azy re,  
Hanorina sekoly,  
Hitory teny koa.  
Hamaky ny Baiboly,  
Milaza zava-tsoa?

2. Indreny olona ory  
Tsinjovy, ry zareo!  
Tsy misy ny mpitory,  
Ka moa hafoinareo ?  
Tsarovy Jeso Tampo  
Nandao ny lapa soa,  
Ka tonga mba hanompo,  
Nanolotra aina koa.

3. Ry Lohan'ny mpiandry!  
Tendreo ny irakao,  
Fa reraka ka mandry  
Ny ondrikelinao;  
Iraho ny mpitory  
Handeha ankehitrion,  
Ka tsy handà akory  
Hanao veloma anio.

4. Ny tia famonjena  
Miaramila soa;  
Izay manolo-tena  
No iraka tokoa;  
Na lavitra ny tany,  
Hanendry tena hoe:  
"Izaho no hankany,

Iraho aho e!"

### **312 - Mitoera, ry Jesosy!**

1. Mitoera, ry Jesosy!  
Ao an-tanimbolinao,  
Ka amboary 'zao ny voly  
Mba hitombo sy hamoa.  
Tomoera,  
Iasao ny Nosinay.

2. Mba onenonao ny lasy  
Itoeranay izao,  
Ka ovay ny Malagasy  
Mba ho tena zanakao.  
O! monena;  
Hazavao ny Nosinay.

3. Akekezo ireo mpania  
Tafaverina aminao,  
Ka tantano mba ho tia  
Ny miresaka aminao.  
O! tariho  
Ho Anao ny Nosinay.

4. Dia fohazy ny mpitory  
Mba hanao ny asanao,  
Ka hamoha ireo matory  
Mba handre ny sitrakao.  
Hamasino  
Ho anao ny Nosinay.

5. O! Jesosy feno antra!  
Dera, laza, ho Anao,  
Ny lohalika rehetra  
Handohalika aminao.  
Mitoera,  
Fa anao ny Nosinay.

### **313 - Miantrà ny firenena, ry Jesosy Tomponay !**

1. Miantrà ny firenena,  
Ry Jesosy Tomponay!



Ambarao ny famonjena  
Izay nataonao fahizay;  
Asehoinao ny hery  
Namonjenao marobe;  
∴ Ry Mpamonjy olorn-bery!  
Mamonje indray anie.∴

2. Mba heveronao ny Nosy  
Itoeranay izao;  
Iantraonao, ry Jesosy,  
Ny tsy mahalala Anao;  
Iantrao 'reo faritany  
Anjakan'ny aizim-be,  
∴ Mba ho tonga faingana any  
Ny mazava lehibe.∴

3. Be ny tany tsy voasa,  
Vitsy ny mpanomponao;  
Koa izahay mpiasa  
Ao an-tanimbolinao  
Mba omeo fo minia  
Hankatò ny teninao,  
∴ Ka aoka mba hikely aina  
Izahay hiasa ao.∴

4. Mankanesa, ry mpitory!  
Ao an-tany lavitra ao,  
Be tsy mahalala akory  
An'i Jeso Tomponao,  
He, ny fahantrany, indrisy!  
He, ny hadalan'ny ao!  
∴ Fa ny olona tsy misy  
Hampianatra azy izao.∴

5. Ny harena anomezo  
Sy ny fahendrena koa.  
Eny, Kristiana! Aelezo  
Izay rehetra mahaso;  
Mankanesa re 'zay tia  
Ny Mpamonjy lehibe;  
∴ Miantrà ka manampia  
Ny mahantra marobe.∴

**314 - Injany, misy feo!**

1. Injany, misy feo!  
Ka iza no tsy mandre?  
Ry Kristiana, raiso  
Adidy lehibe.  
Manerana ny tany  
Ny antso avo izao,  
Ho an'i Jeso Tompo  
Izao tontolo izao.  
Mihobia  
Sy mitoria.  
Ny teny mahafaly  
Izay voarainareo  
Izao no tena fetra;  
Ho an'i Jeso soa.  
Ny olona rehetra ho Azy  
Avokoa.

2. Tsy ho antsika irery  
Ny fahasoavam-be,  
Fa ho an'ny olom-bery  
Tsy an-kanavaka e!  
Ny fiantran'ny Tompo  
Tsy misy fetra, koa  
Lazaonareo mpanompo  
Lay fitiavan-tsoa.  
Miasà.  
Ka milazà  
Ny teny mampionona  
Mahafa-po;  
Voarainareo ny baiko:  
Ho an'i Jeso soa  
Ny olona rehetra ho Azy  
Avokoa.

3. Ny Tompo no milaza:  
"Andeha mitoria,"  
Ka na dia sarotra aza  
Ny asa, matokia;  
Fa tsy mandeha irery  
Izay mitondra soa,  
Fa omban'Ilay Mahery  
Ny irany tokoa,  
Ka sahia.

Dia mitoria  
Ny famonjena lehibe  
Voarainareo;  
Voatsangana ny saina:  
Ho an'I Jeso soa  
Ny olona rehetra ho Azy  
Avokoa.

#### 4. Ry Tompo sy Mpanjaka!

Ampio ny olonao  
Hanoa sy hanahaka  
Ka hankalazo Anao,  
Dia aoka hokendreny  
Izay katsahinao.  
Ka hahita famonjena  
Izao rehetra izao,  
Ry Tsitoha!  
Mba manehoa  
Ny hery mahagaga izay  
Anananao:  
Tongava mba hanjaka,  
Ka angony avokoa  
Ny olona navotanao,  
Ry Tompo soa!

### 315 - Ry Ziona, mitsangàna, ka mihazavà izao

1. Ry Ziona, mitsangàna,  
Ka mihazavà izao;  
Andrandrao ny fahazavana,  
Izay mipoaka aminao.

2. Maizina ny firenena,  
Amin-tany fantatrao,  
Fa tsy manam-pamonjena,  
Nefa ankohonanao.

3. Asandrato ny fanilo  
Hanazava lavitra,  
Mba ho marobe no hino  
An'Andriamanitra.

4. Atopazy re ny maso!

Marobe ny zanakao,  
Toy ny tany feno hazo  
Eo anatrehanao.

5. Ry Jesosy, hotahinao  
Anie ny lovanao;  
Olo-marò izay irinao,  
Taomy mora ho Anao.

### 316 - Maizina ny firenena

1. Maizina ny firenena,  
Koa diso lalana,  
Tsy mahita famonjena,  
Tia zava-poana;  
Endrey, ny haverezan-tsainy,  
Lany foana ny ainy.

2. Lehibe ny aizin'ota,  
Takona ny lalana  
Handosiran'ny mpanota  
Ny fahaverezana;  
Indrisy, very re ny aina!  
Injany ny feo mitaraina!

3. Mitsangàna izao, ry mino,  
Mandehàna faingana,  
Ento aminy ny jiro,  
Atoroy ny lalana;  
Hianao va tsy onena  
Ny tsy manam-pamonjana ?

4. Dia ento ny mazava  
Izay naseho taminao;  
Mazotoa hampisava  
Izany aizim-pito ao,  
Ka ny namanao mahantra  
Itorio ny Mpiantra.

5. Eny, tsara sy mahery  
Ny filazantsara re!  
Afaka ny olom-bery,  
Sambatra ny mahare  
Ka mitandrina tokoa

Izany teny mahasoa.

### **317 - O, ry Rain'ny fahazavana tsy milentika!**

1. O, ry Rain'ny fahazavana tsy milentika!  
Avy izahay mitondra ny fisaorana;  
Aloky ny fasanay no ipetrahanay,  
Nefa andro no nasolonao ny alinay.

2. Enga ka handroso tsara ny mazava e,  
Mba ho fantatray tokoa Ilay manao hoe:  
"Izaho no fahazavan'izao tontolo izao",  
Hanazava sy hanitsy izay alehanao.

3. Ny Fitarikandron'aina efa hita re,  
Manazava na ny kely na ny lehibe,  
Mahasoa, mahahendry, mahasambatra,  
Ka akory re ny andro izay hiposaka!

4. Mitsangàna, ry Ziona, ka mihazavà!  
Voninahitry ny Tompo no miposaka;  
Atopazy manodidina ny masonao,  
Ny haren'ny firenena tonga aminao.

### **318 - Mandrosoa, ry mpanarato**

1. Mandrosoa, ry mpanarato,  
Aza ketraka izao!  
Mandrosoa tsy miato,  
Jeso re no herinao.  
Ka ny jentilisa maro,  
Havana sy tapaka,  
Mba toroy ampahafantaro  
An'Ilay Mpanafaka!

2. Mandrosoa, ry mpanarato,  
Miezaha fatratra,  
Ka na iza hisahato,  
Aza mba matahotra.  
Notolorana adidy  
Hianao, ka miasà!  
Na ho mamy na mangidy,

Aza fay na mba mandà!

3. Mandrosoa, ry mpanarato,  
Ao an-drano lalina!  
Misy ve hitora-bato ?  
Anehoy fitiavana!  
Raha kivy ny mpanota  
Noho ny haratsiny,  
Ento any Gologota  
Amin'ny Mpamonjiny.

4. Mandrosoa re no baiko  
Izay mifehy ahy izao,  
Ka ny tena sy ny aiko  
Raiso, Tompo, ho Anao!  
He, afoiko manontolo  
Izay ananako izao,  
Ary raisonao daholo  
Mba ho voninahitrao!

### **319 - Mba iraho ny Fanahy ry Jesosy Tompo ô!**

1. Mba iraho ny Fanahy  
Ry Jesosy Tompo ô!  
Mba hanampy sy hitahy  
Ny mpiasa irakao.  
Tany mafy no asaina,  
Nefa kely izahay,  
Marobe no tsy misaina,  
Raha itorianay!  
Tanteraho re ny toky,  
Izay nomenao fahizay,  
Ka mombà anay mpitory  
Mandra-podimandrinay!

2. O, ry Masoandron'aina,  
Hazavao ny namanay,  
Mba fafazo andon'aina,  
Fa efa toy ny tany hay;  
Tapa-kazo no hajainy,  
Ka tsy fantany ny To:  
Feno aizina ny sainy,  
Efa momoka sy lo;

Ny sikidy mahavery  
No ataony solonao,  
Sampy vato, hazo kely  
No hajainy toa Anao.

3.vAverenonao ireny  
Mba ho tonga olonao;  
Tadiavo tsy ho very,  
Raiso re, fa lovanao!  
Entonao ny famonjena  
Ka ovay ny fony izao;  
Aoka hisy sesehena  
Ny hanaiky ho Anao!  
Dia hiova re ny tany  
Ka hanjary lonaka,  
Ary hisy voa mamy  
Izay ho tena vokatra.

4 . Aoka re mba tsy ho rava  
Ny mazava hitanay!  
Mba handraso lalandava  
Ny anjara-asanay.  
Mba ho dera aman-daza  
Ho Anao, ry Tomponay!  
Hatanjaho ny mpiasa,  
Dia tsy mba hety fay;  
Aoka re ny olo-mino  
Mba hamory ho Anao,  
Ka hitombo be ny mpino  
Hiandany Aminao.

### **320 - Manana fiorenana ny fiangonan'i Kristy**

1. Manana fiorenana  
Ny fiangonan'i Kristy;  
Ela, fa he, tsy levona  
Izy na maro na vitsy.  
Vavan'ny olo-masina  
Mety ho voatampina,  
Nefa tsy maty ny feo.

2. Ny fiangona-masina  
Trano tsy mety mikoa,

Izy no vato velona  
Rafitry ny Ray Tsitoha;  
Jeso no fehizorony,  
Isika mirafitra aminy,  
Monina ao ny Fanahy.

3. Nefa mba misy koa aty  
Trano nataon-tànantsika  
Ho voninahitr'i Kristy,  
Mendrika ho tiantika;  
Fa ao no andrenesana  
Ny tenin'Andriamanitra,  
Mamin'ny olona mino.

4. Ao ny batisa masina,  
Izay tena ranon'ny aina;  
Ao ny Mpihaino vavaka,  
Tokin'izay mitaraina;  
Ao koa ny fandraisana,  
Dia ny sakafo masina,  
Tena aman-dran'i Jesosy.

5. Enga ka mba ho fantatra  
Amin'ny tany rehetra  
Ny loharano velona  
Sady tsy mety ho ritra!  
Raha ny lakolosy velona,  
Faly izay mpivavaka,  
Fa manantena hihaona.

6. Raiso, ry Kristy, ho Anao  
Ny fideranay anio!  
Ampandrosoy ny teninao,  
Ny ondry very vorio  
Mandra-pikambany hiray,  
Amin'ny valanao indray,  
Fa Hianao no Mpiandry.

### **321 - Ry Jesosy Tomponay**

1. Ry Jesosy Tomponay  
Ravoravo izahay;  
Tonga izahay izao  
Mba hihaona aminao:

Indro misy tranonao  
Hitokananay izay.

2. Ka mangataka aminao  
Izahay, ry Tompo ô!  
Aoka mba horaisinao  
Izay nataonay ho Anao,  
Trano-fiangonana,  
Trano fivavahana.

3. Aoka mba ho fantatray  
Eto ny alehanay,  
Fa vahiny izahay,  
Ka ny tanindrazanay  
Dia any aminao,  
Koa mba tarihonao.

4. Aoka ny Anaranao  
Mba hohamasininao  
Aoka ny Fanahinao.  
Mba ho tonga hanavao  
Ny mpanota marobe,  
Dia ho voavonjy re!

5. Ka ny fiadananao  
Ampombay ny olonao,  
Hampikambana ny fo,  
Ka ho toy ny iray tamp-po,  
Mba hifankatiavanay  
Izao sy ho rahatrizay.

### **322 - Indro, Tompo, misy trano**

1. Indro, Tompo, misy trano  
Zay namboarinay ho Anao,  
Angatahanay tsodrano,  
Itokananay ho Anao.  
Tompo ô, mba hamasino  
Ho fihaonana aminao,  
Ho tempoly tian'ny mino,  
Fivavahana aminao.

2. Diovny Tompo, mba ho trano  
Zay hajaina ho Anao,

Ka omeo sy itokano  
Mba ho fiderana Anao  
Tompo Masina ô, idiro  
Mba ho mendrika Anao  
Ka aoka Hianao ho jiro  
Zay hamirapiratra ao.

3. Mba tahio ry Ray Mpitahy,  
Ho tempoly masinao,  
Ho Betelan'ny fanahy  
Vavahady ho amiano  
Itoero mba ho kianja  
Mahamanina ny fo,  
Mba ho trano mendri-kaja,  
Mampivavaka ny fo.

4. Mandrosoa ka midira  
Ho Mpanjaka tokana ao  
Ka ny vavaka sy hira  
Mba tahio ho sitrakao.  
Nefa tsy ny trano ihany  
No atolotray, ry Ray,  
Indro koa mba itokany  
Ho Anao ny tenanay.

### **323 - Vory ny mpanomponay**

1. Vory ny mpanomponay  
Eto anatrehanao.  
Ry Jeso Tomponay!  
He faly ny fonay,  
Faly, faly, faly,  
He! faly ny fonay,  
Vory maro toy izao.

2. Mba atrehonao izahay,  
Fa mitokana eto 'zao  
Ny trano ho Anao:  
He faly ny fonay,  
Faly, faly, faly,  
He! faly ny fonay,  
Vory maro toy izao.

3. Eto hitorianay

An'i Jeso Tomponay,  
Mpamonjy lehibe:  
He faly ny fonay,  
Faly, faly, faly,  
He! faly ny fonay,  
Vory maro toy izao.

4. Eto hanomezanao  
Tsara ny Fanahinao  
Mba hanadio ny fo:  
He faly ny fonay,  
Faly, faly, faly,  
He! faly ny fonay,  
Vory maro toy izao.

5. Eto no hanananao  
Laza saotra ho Anao;  
Ny maro mba vonjeo:  
He faly ny fonay,  
Faly, faly, faly,  
He! faly ny fonay,  
Vory maro toy izao.

6. Aoka re ny tranonay,  
Trano langonany,  
Mba ho templinao:  
He faly ny fonay,  
Faly, faly, faly,  
He! faly ny fonay,  
Vory maro toy izao.

### **324 - Ry Andriananaharinay**

1. Ry Andriananaharinay,  
Isaoranay ny Anaranao  
Nambininao ny tranonay  
Ka vita tsara ho Anao:  
::: Fenoy ny hamasinanao  
Ny tranonay ho tranonao :::

2. Ry Jeso! avy izahay  
Hitokana ny tranonao,  
Ny trano 'zay naorinay  
Ho voninahitrao anie:

::: Fenoy ny hamasinanao  
Ny tranonay ho tranonao :::

3. Avia, Fanahy Masina ô!  
Hitoetra eto aminay;  
Ny aizinay mba hazavao,  
Hanananay fo be fitia:  
::: Fenoy ny hamasinanao  
Ny tranonay ho tranonao :::

4. Mba raisonao ny deranay  
'Zay enti-mankalaza Anao;  
Ny trano itokananay  
Ekeo tokoa ho tranonao;  
::: Fenoy ny hamasinanao  
Ny tranonay ho tranonao :::

### **325 - Ry Jehovah Tomposoa**

1. Ry Jehovah Tomposoa  
Vory eto izahay,  
Ka mifaly avokoa,  
Raisonao ny vavakay!  
Andro fitokanan-trano,  
Fifaliam-be izao,  
Ampidino ny tsodrano  
Avy ao an-danitrao.

2. Ry Jesosy! Mandrosoa,  
Fa Anao ny tranonay,  
Hiderana Anao tokoa,  
Ka henoy ny hatakay!  
Nefa tsy vatan-trano  
No honenanao izao,  
Fa ny fo no itokano,  
Itoero, hafanao.

3. Ry Fanahy Mpanazava!  
Anjakao tokoa 'zahay,  
Dia hazava lalandava  
Ny fanahin-janakao;  
Ka fenoy fanahy mino  
Ho tempolinao tokoa,

Hatrizao dia hamasino  
Ka hitombo sy hanoa.

### 326 - Atreho ny mpanomponao

1. Atreho ny mpanomponao  
Izay mivory etoizao,  
Ka efa nametrahanao  
Adidy Masina hatao.

2. Hianao 'zay Tompon'ezaka  
Nifidy anay tsy mendrika,  
Ka efa nampirisika  
Handroso tsy hiherika.

3. 'Ndrisy mpanompo tsy manao  
'Zahay izay nofinidinao,  
Mpiasa tsy mba mahasoana,  
Tompo ô! Mifona aminao.

4. Na dia kely aza izao  
No azonay atolotra,  
Aoka re mba ho sitrakao  
Haroso ho fanatitra.

5. Dia saotra no omena Anao  
Ka raiso re, ry Tomponay,  
Ny fonay koa onenonao  
Sy anjakao mandrakizay.

### 327 - Isaoranay Anao

1. Isaoranay Anao  
Ry Tomponay Tsitoha,  
Ny nanomezanao  
Mpiasa mahasoana.  
Ka nony vao nandre  
Lay antso taminao  
Dia roso ka nandeha  
Nanao ny asanao.

2. Natokany ho Anao  
Ny taona maro be;  
Ilay fitiavanao,

Nataony reharena.  
Na nisy ny manjo,  
Tsy kivy re satria  
Hianao ilay ao am-po  
Nanao hoe: "Matokia"

3. Izay nataony anie  
Hambininao tokoa,  
Hitombo be dia be  
Hitera-boka-tsoa.  
Hianao 'Lay Tompo tia  
No angatahanay;  
Tongava, manampia  
'Zay vitany ho anay.

4. Ka mba tsinjovinao,  
Sikino hery indray  
Ity mpanomponao,  
Anio sy rahatrizay.  
'Lay teny taminao  
Ho aminy anie:  
Mpanompo sitrakao  
Satria nahefa be.

### 328 - Mba tahio Jeso ô!

1. Mba tahio Jeso ô!  
Hira, hataka sy teny;  
Mba tarihonao ny fo  
Hanarahanay ireny;  
Hianao no Tompon'aina,  
Sady mendrika hoderaina.

2. Izahay mpanomponao  
Hody ao an-tokantrano,  
Faly mAnao,  
Ka vimbino sy tantano;  
Aza avela ho irery  
Izahay, fandrao ho very.

3. Saotra no atolotray,  
Raha mbola aty an-tany;  
Ao an-danitra indray  
Dia dera tsy ho lany



Nohatao sy hohiraina  
Ho Anao, ry Tompon'aina.

### 329 - Saotra, dera, no homena

1. Saotra, dera, no homena  
Ho Anao Mpanavotray,  
Hianay nanetry tena  
Mba hanandratra anay  
Mba tariho, Tompo ô!  
Ny fanahy sy ny fo;  
Tianay ny hiaradia  
Aminao ka tsy hania.

2. Raha ory sy mijaly  
Eto aza izahay,  
Tsy ho kivy, fa hifaly  
Amin'ny anjaranay,  
No mba iankinanay,  
Ka inoanay homena  
Ho anay ny famonjena.

### 330 - Sambatra ny mankato

1. Sambatra ny mankato  
Izay lazain'ny Tompon'aina,  
Sy manaiky eram-po  
Fa hanolotra sy saina,  
Ka mitandrana ny didy  
Toy ny zava-tsarobidy.

2. Sambatra izay mandà  
Raha taomina hanota,  
Ka dia halatsa-dra  
Tsy mba mety resin'ota,  
Tsy ekeny ny mpanimba,  
Na ireo mpanazimba.

3. Sambatra ny olona  
Izay misaina ao am-pony  
Andro aman'alina  
Ny lazainao, ry Mpamonjy;  
Fa ataonao toy ny hazo  
Maitso tsara, tsy malazo.

### 331 - Mba soraty ao am-poko

Mba soraty ao am-poko,  
Jeso, ny Anaranao;  
Mba arovy tsy haloto  
Ny kasen'ny tananao.  
Hianao, Jesosy ô!  
No ho voninahitro;  
Hianao, ry voahombo,  
No Mpanjakako sy Tompo.

### 332 - Finaritra ny olonao,

1. Finaritra ny olonao,  
Jesosy Tompo ô,  
Fa manana ny aim-baovao,  
Ka ravo eram-po.  
Ny famonjena vitanao  
Dia efa voaray izao,  
Ny fifaliany aty  
Hitohy hatrany.

2. Izaho va, Jesosy ô,  
Mba isan'ny Anao?  
Ny solika fitaizako  
Moa misy va izao?  
Hevero, ry fanahiko,  
Ka aza mety afa-po  
Ambara-pahafantatrao  
Fa Jeso no anao.

### 333 - Hody, Tompo, izahay

1. Hody, Tompo, izahay,  
Miaraha aminay,  
Ka tahio ny teninao,  
Mba hamorona aim-baovao,  
Sao mivory foana  
Izahay mpiangona.

2. Marobe ny rafinay  
Ta-hamandrika anay;

Tompo, miarova anay,  
Sao dia very izahay;  
Mitoera aminay  
Ao an-tokantranonay.

3. Efa renay taminao  
Fa anay ny lanitrao,  
Efa namboarinao  
Mba ho an'ny olonao;  
Ka tariho, Tompo ô,  
Hody ao ny zanakao!

### **334 - Sambatra ny sofiko**

1. Sambatra ny sofiko  
Fa mandre ny teny  
Tenin'i Jesosiko,  
Tenim-pamonjeny.  
He! Izaho tiany  
Mba hiara-dia  
Sy hianatra aminy  
Ary tsy hania.

2. Sarotra ny lâlako  
Sady mampanahy,  
Nefa ny Mpamonjiko  
Mahatoky ahy;  
Vetivety foana  
Dia ho avy Izy  
Amim-boninahitra,  
Ka handray ny Azy.

### **335 - Hody izahay Zanahary!**

1. Hody izahay Zanahary!  
Tahio tsara izahay;  
Ampifalionao ny fonay  
Amin'ny fitianao;  
Ampifalio:,:  
'Zahay ety an-tany.

2. Mankasitraka Anao izahay  
Noho ny teny soa

Izay nampianaranao  
Saina hahasoa anay.  
Tomoera:,:  
Aminay isan-andro.

3. Raha ho faty izahay  
Ka handao ity tany  
Dia ampifalio izahay,  
Ento ho an-danitra,  
Dia faly:,:  
Izahay mandrakizay.

### **336 - Ampodio izahay, Jehovah**

1. Ampodio izahay, Jehovah  
Amin'ny fitianao;  
Na aiza na aiza no haleha,  
Aoka ho vimbininao:  
Ô! ambino:,:  
Izahay, mpanomponao.

2. Fa ny teny renay any  
Aoka ho tadidy koa,  
Ka mba hiasanay saina  
Hahazoanay ny soa  
Isan'andro :,:  
Izay hiainanay aty.

### **337 - Ry Jehovah, Tompo ô!**

1. Ry Jehovah, Tompo ô!  
Tompo masina sy to,  
Azonay ny teninao  
Mampandre ny antranao  
Aoka harahinay  
Ka ho masina aminay,  
Mba hanao ny sitrakao  
Izahay mpanomponao.:,:

2. Hody izahay izao  
Amin'ny Anaranao;  
Mitoera aminay  
Ao an-tokantranonay,  
Mba ho velona aminao

Izahay navotanao;  
Be ny fahavalonay,  
Ka arovy izahay:;

### **338 - Arovy aho, Tompo**

Arovy aho, Tompo,  
Atolotro izao  
Ny tenako hanompo,  
Sy hankalaza Anao.  
Omeo ahy hery  
Sy faharetam-po,  
Arovy tsy ho very  
Izay anjarako.

### **339 - Ry Jesosy mba ampio aho ho madio fo**

Ry Jesosy mba ampio aho ho madio fo,  
Raha mivily ahitsio hanarahako ny tà.  
Mba ampaherezo aho hanompoako  
Anao.  
Raha ory iresaho mba hifikitra aminao.

### **340 - Tompo ô, mba hasoavy**

Tompo ô, mba hasoavy  
Sy harovy izahay;  
Tompo ô, mba aposahy  
Aminay ny tavanao;  
Tompo, mitodiha anay,  
Dia hiadana izahay.  
Ray sy Zanaka, Fanahy,  
Mitahia anay, Amen!

### **341 - Tompo ô! ampitandremo**

1. Tompo ô! ampitandremo  
Izay lazainao izahay;  
Hazavao ka mba omeo  
Hery ny fanahinay;

Ka ny fo ampionony  
Tsy hitebiteby intsony;  
:,:Mba diovy ,hamasino  
Izahay , ry Tompo ô ! :,:;

2. Ka rehefa hodimandry  
Izahay,ry Tomponay,  
Tsy ho taitra,fa hiandry  
Ny handraisanao anay  
Ry Jesosy Tompon'aina,  
Hianao no antenaina,  
:,:Hianao no hanazava  
Ny hodianay ary:,:;

### **342 - Ny fahasoavan'i Jesosy Kristy**

Ny fahasoavan'i Jesosy Kristy  
Sy ny fitiavan'Andriamanitra  
Ary ny firaisana amin'ny  
Fanahy Masina  
Ho amintsika rehetra anie  
Amen!

### **343 - Ry Jeso Tompo soa**

Ry Jeso Tompo soa  
Ry Vatolampiko!  
Esory avokoa  
Ny hevi-dratsiko.  
Omeo ahy hery  
Arovy tsy ho very  
Ny ondry kelinao  
Mba hifalianao;  
Jesosy ô! henoy re, henoy!

### **344 - Fiadanana be**

Fiadanana be,  
Hasambarana re,  
No miandry antsika ao  
an-danitra e !  
Ka andeha handao  
Izao tontonlo izao  
Ka hitady tokoa ilay

Tany vaovao.  
Miangà hody ao  
Miangà hatrizao!  
Mba modia hianao(izao) -beso-  
Ao amin' i Jesosy -tenor-

### **345 - Mba tarihonao, ry Raiko**

Mba tarihonao, ry Raiko,  
Ny fanahy sy ny foko,  
:,:Mba ho any aminao! :,:  
Ô, ry Loharanon'aiko,  
Izao hiany no ilaiko,  
:,:Dia ny hahita Anao! :,:

### **346 - Ny teninao, Jehovah ô!**

1. Ny teninao, Jehovah ô!  
Voatory aminay  
Tahio tsy ho levona,  
Velominao anie!

2. Izay voatory tsy anay,  
Fa avy aminao,  
Ka dia ny fanambinanao  
No mba ilainay koa.

3. Fa tsy mba ampy ho anay  
Ny toriteninay  
Ka tsy ho tokinay ireo  
Raha tsy ambininao

4. Dia ampitoeronao izao  
Ho eto aminay  
Ny herin'ny Fanahinao  
Mba hahasoa anay

### **347 - Derao Andriamanitra**

Derao Andriamanitra,  
Fa Izy Loharanon-tsoa,  
Derao ny Tompo tokana,  
Ray, Zanaka, Fanahy koa

### **348 - Andriamanitra tahio ny mihaino**

1. Andriamanitra  
Tahio ny mihaino  
Ny tsy manao vava-poana  
Hahazo ny iriny.  
Andriamanitra  
Ho masoandrony;  
Ka ny Fanahy Masina  
Mpitari-dalana.

2. Ny Anaran'i Jeso  
No voninahiny;  
Ny hamarinan'i Kristy  
No fihaingoany.  
Tiavo Jesosy,  
Ry mino ny teny!  
Katsaho fihavanana,  
Ry tsy mino rehetra!

### **349 - Dera re, laza anie**

1. Dera re, laza anie!  
Ho an'Andriamanitra!

2. Aoka ny tany re,  
Mba hiadana anie!

3. Ary ny olony  
Aoka hankasitrahany!

### **350 - Hianao ry Ray no mibaiko**

1. Hianao ry Ray no mibaiko  
Hanaovanay ny asanao  
Ka ny handà dia zava-tsy haiko  
Na sarotra aza ny atao  
Ny fitoriana lalaina  
Natomboky ny mpianatrao  
Dia tsy azo atao very maina  
Fa he, tohizanay izao.

2. Fa mbola adidin'ny mazava  
Mitondra ny fanala izao,  
Hiainga, handeha hampisava  
Ny aizina ao an'ala ao.  
'Reo rahalahy sy rahavavy  
Dia be tsy mahalala Anao  
Koa indro, Tompo, aho, avy  
Hitory ny Anaranao.

3. Kanefa tsy ny eto ihany  
No anirahanao anay,  
Fa na ny any lavitra any  
Dia samy mbola adidinay.  
Hiezaka, hikely aina,  
Ho mafy koa ny teninao  
'Zay hany tena mofon'aina,  
Ho an'izao tontolo izao.

### **351 - Tsy hangina re ny hoby noho hianao ry Ziana**

1. Tsy hangina re ny hoby noho hianao  
ry Ziana;  
Fa miposaka aminao ny fahazavana  
soa;  
Ny fanilom-pamonjena, indro fa torina  
Hanazava ny olona tokoa,

Fiv : Mivoaha, asandrato, ny  
fanevasoanareo  
Tsenao re ny mpanjaka fa avy aminao  
Ny famonjeny sy ny lova izay atolony  
anao  
Satria hianao dia tsy foiny.

2. Voninahi'panjakana isaloranao,  
Sy anaram-baovao no iantsoana anao;  
Fampakaram-bady, fety, anaingàna  
anao,  
Mba ho an'i Kristy, Ilay Tomponao.  
Mivoaha, asandrato, sns...

3. O! Ry mpiambina tinendry eo  
ambony manda,

Aza avelanao hangina re ny feonao;  
Ka hijoro izao ny mino fa tsy hisy  
banga  
Eo an-tobin'i Jeso Tomponao.  
Mivoaha, asandrato, sns...

### **352 - Fantatrao va ny Mpamonjy**

1. Fantatrao va ny Mpamonjy,  
Ilay Tompon-danitra?  
Jeso, Kristy sy Mpanjaka,  
Zanak'Andriamanitra,  
Lay nandao ny lapan-dRainy  
Feno voninahitra  
Tompo tonga mba hanompo  
Noho ny fitiavana.

2. Eny, zava-mahagaga  
Fietrena lalina:  
Saro-bidy ka tsy foiny  
'Sika olombelona.  
'Lay Mpisorona Ambony  
'Zao no Jeso sorona,  
Ka manolotra ny ainy  
Mba ho fanavotana.

3. Ao ny lanitra mivoha  
Miantso anao hiakatra:  
Aoka tsy hiroa saina,  
Manapaha hevitra,  
He mitsotra moramora  
Mba handray ny tànany;  
Mitodiha: izao no ora,  
Maneke ho zanany

### **353 - Mba sainonao ange sao tsy mba fantatrao**

1. Mba sainonao ange,  
Sao tsy mba fantatrao,  
Ny zava-dehibe  
Nataoko ho anao:  
:,:Hevero ka lazao, lazao  
Izay mba vitanao.:,:

2. Ny lapako tary,  
Ny fahefako tao,  
Nilaozako taty  
Hanavotra aina anao:  
.:Hevero, ka lazao, lazao  
lzay mba foinao.:;

3. Heveronao ange,  
Ny nisoloana anao;  
Nangidy indrindra anie  
Ny nahazoana anao:  
.:Hevero, ka lazao, lazao  
lzay mba nentinao.:;

4. Endrey! Ny aiko koa  
Nomeko ho anao:  
Tsy misy zava-tsoa  
Tsy foiko ho anao:  
.:Hevero, ka lazao, lazao  
lzay mba taminao.:;

5. Ry Tompo be fitia!  
Endrey, 'ty vitanao;  
Izaho 'zay mpania  
Tsy mahavaly 'zao:  
.:Ny aiko no mba raisonao  
Hanao ny sitrakao.:;

### **354 - Ny Mpamonjy no mitady fihavanana aminao**

1. Ny Mpamonjy no mitady  
Fihavanana aminao  
Izy no manambitamby  
Hanatonanao izao;  
Sao manjary fandatsana  
Ny fifonana aminao,  
Ka ny mety mihavana  
Amin'ny Mpamonjy izao.

2. Dieny misy hafanana  
Ka mangoraka ny fo,  
Manatona ny Mpamonjy

Sao dia mangatsiaka indray.  
Izao no andro famonjena,  
Ka vonjeo sao neninao;  
Ry mpanota, miverena  
Izao ankehitriny izao.

3. Sao ity no toriteny  
Fara-fanasana anao;  
Sao anio no fotoana  
Fara-ahavelomananao;  
Ka aza mba misalasala,  
Sao manjary neninao,  
Raho tsy mety mahalala  
Izao fotoana mety izao.

4. Indrisy! be ny fahotako,  
Be ny ratsy vitako;  
Sao tsy raisin'ny Mpamonjy  
Ny mpanota tahaka izao?  
Miverena, fa ny rany  
Ampy hahadio anao;  
Manatona hosasany  
Izao ankehitriny izao.

### **355 - Ry namako mahantra, manaram-po izao**

1. Ry namako mahantra  
Manaram-po izao!  
Ny ota no mandratra,  
Sao simba hianao;  
Izay anao rehetra  
Ho lasa avokoa,  
Fa tsy mba misy fetra,  
Ho levona avokoa.

2. Ny Tompo be fiantra  
Mangora-po tokoa  
Mahita anao mahantra  
Fa tsy mahita soa;  
Natolony ny ainy  
Ho vidin'ny ainao,  
Nalatsany ny rany  
Mba hanadio anao.

3. Ny Tompo malahelo,  
Tsy foiny hianao,  
Ny feo mamelovelolo  
Mibitsika aminao;  
Onena anao ny fony  
Ka mitaraina hoe:  
Ny ota ajanony.  
Mba ajanony re!

### **356 - Ry mpanota! Mihevera**

1. Ry mpanota! Mihevera;  
Fa miantso Kristy izao;  
Izy ta-handray mpanota,  
Manatona hianao;  
:,: Mihainoa, mihainoa,  
Ka ario ny ditranao.:,:

2. Ry mpanota! Miverana  
Ao am-balan'i Jeso;  
Aza dia mirenireny,  
Sao iharan-doza izao:  
:,: O! modia, O! modia,  
Ialao ny ditranao.:,:

3. Ry mpanota! Manatona  
Dieny misy antso 'zao,  
Fa ho avy ny fotoana  
Mbola hanenenanao:  
:,: O! avia, O! avia,  
'Zao ankehitriny 'zao.:,:

4. Ry mpanota! Matokia,  
Tompo mora fo Jeso;  
Izy dia tena tia  
Izay mibebaka tokoa;  
:,: Matokia, matokia,  
Mibebaha re izao.:,:

5. Ry Sakaizan'ny mpanota,  
Ento aho ho Anao;  
He! Ny tenako rehetra  
No atolotro izao;

:,: Raisonao re, raisonao re  
Ho fanati-tsitrakao.:,:

### **357 - Efa tonga aty izao**

1. Efa tonga aty izao  
Teny fiainana :  
Raiso mba ho fiainanao,  
Teny ny fiainana.  
He ! ny teny tsara,  
Teny manan-kery :

Fiv : Tenin'ny Ray,  
Tsara tokoa,  
Teny fiainana.

2. Io no Filazantsara soa,  
Teny fiainana :  
Teny mamy indrindra koa,  
Teny fiainana.  
Raisonao ny teny,  
Teny soa nomeny :  
Tenin'ny Ray, sns...

3. Ry mpanota! Henoy izao,  
Teny fiainana;  
Fa fiainana ho anao,  
Teny fiainana.  
Kristy no nomena  
Mba ho famonjena:  
Tenin'ny Ray, sns...

### **358 - He! Ry namako mahantra**

1. He! Ry namako mahantra,  
Indro Jeso Tompo tia,  
Ilay Mpamonjy feno antra,  
No mitady ny mania,  
Olom-bery tsy mba foiny,  
Ka na diso aza re,  
:,: Mbola tiany sy antsoiny  
Hanam-pifaliam-be.:,:

2. He! Fa tsy mba misy fetra



Ny homena lova soa  
Fa ny olona rehetra  
Samy tiany avokoa;  
Nefa izay be hataka andro  
Dia hanenina tokoa;  
:,: Misy fetra ny fotoana  
Azo amindrana fo.:,:

3. Manatòna ankehitriny,  
Ry mpanota ory fo!  
Mba hesoriny ny tsiny  
Ka hadio indray ny fo;  
Fa ny ota hosasany  
Dia ho afaka avokoa,  
:,: Izany re no fikasany  
ka tsy maintsy to tokoa.:,:

4. Fa izay mandà ny teny  
Sy maditra, mafy fo,  
Hampangain'ny teny reny  
Fa tsy nety nankatò;  
Jeso Tompo no hitsara  
Sy hamaly ny natao,  
:,: Nefa kosa ny anjara  
Dia miankina aminao.:,:

### **359 - Tsy renao va ny feon'ny Ray?**

1. Tsy renao ve ny feon'ny Ray?  
Ry malahelo fo!  
Miantso hoe: "Avia, Avia,  
Modia hianao?"

2. Ny Rainao be fitiavana  
Hifaly aminao,  
Ka hanome malalaka,  
Raha hody hianao.

3. Na diso aza hianao,  
Mitebiteby koa,  
Ny Rainao ta-handray anao  
Ho sambatra tokoa.

4. Modia an-tranonao ary,

Mahantra hianao;  
Tsy misy zava-tsoa aty  
Hahafa-po anao.

5. Ny voro-damba izay anao  
Hesorina aminao,  
Ka lamba tsara sy madio  
No hitafianao.

6. Mba maneke ny teniny  
Ankehitriny izao,  
Fandrao dia hisy loza re  
Hihatra aminao.

### **360 - Mba hevero, ry mpanota!**

1. Mba hevero, ry mpanota!  
Ny nataon'ny Tomponao:  
Izy tsy mba manana ota  
Nefa tonga solonao;  
He! Ny lanitra nafoiny  
Mba hidinany taty;  
Olom-bery no antsoiny,  
Mba handavo ny ary.

2. Mba hevero, ry mpanota!  
Fa nijaly Jeso tia,  
Maty tany Golgota  
Mba hamory ny mania.  
Indro latsa-dra ny Tompo,  
Nefa tsy mba tsy mba diso re!  
Fa nisolo ny mpanompo  
'Zay nanohitra ela be.

3. Mba hevero, ry mpanota!  
Alatsaho ao am-po:  
Mahavery re ny ota  
Raha tsy voadio ny fo.  
Mangataha ankehitriny,  
Dia hodiovin'i Jeso,  
Fa izany no iriny  
Mba handrasanao ny soa.

4. Mba hevero, ry mpanota!

Ny fifonana aminao  
Hahafoizanao ny ota  
Tena fahavalona.  
Manatona hovanjena  
Sao hiharan-doza be!  
Manatona, fa homena  
Fifalian-dehibe.

5. Mba hevero, ry mpanota!  
Inona ary no hatao?  
Aza mety resin'ota,  
Tiavo Jeso Tomponao;  
Ny lalàny no araho,  
Sitrapony tontosay;  
Nefa Izy angataho  
Homba anao mandrakizay.

### **361 - Manatona, ry malala!**

1. Manatona, ry malala!  
An'i Jeso Tomponao;  
Raiso re ny famonjena,  
:,:Tsy ho faty hianao.:,:

2. Indro jeso, fa miandry  
Mba handray anao izao;  
Miverena, aza kivy,  
:,: Mazotoa, sy matokia.:,:

3. Aza mba mangataka andro,  
Sao, dia tratra hariva ety;  
Tahotra sy horohoro  
:,: Hampivadi-po anao.:,:

4. Ao ny tany soa homeny  
Mampifaly fo ery;  
Sady tsy mba misy ratsy,  
:,: Mandrosoa ho tonga ary.:,:

### **362 - Tsy fantatrao va Ilay namonjy anay?**

1. Tsy fantatrao va flat' namonjy anay?

Ry havako ory izao,  
Mitady anao Ilay namonjy anay,  
Maniry hamonjy anao;

Fiv : Mihainoa, ny hamonjy anao  
Manao hoe:"Manatona anio,  
Na dia be aza ny ratsy natao,  
Dia mety ho afaka izao."

2. Fa tonga taty Ilay namonjy anay,  
Ka nampijaliana tokoa;  
Ny rany izay namonjeny anay  
Hamono ny helokao koa:  
Mihainoa, sns...

3. Misento anao Ilay namonjy anay,  
Ry olo-mahantra aty!  
Tomany anao Ilay namonjy anay,  
Fandrao ho very ary:  
Mihainoa, sns...

4. Henoinao 'zao ny hamonjy anao,  
Hiadam-pinaritra am-po:  
Faingàna handray ny homeny anao,  
Dia lova tsy mety ho lo:  
Mihainoa, sns...

### **363 - Ry olo-mahantra**

1. Ry olo-mahantra,  
Mihainoa izao,  
Saino tsara ny teny  
Izay lazaina aminao;

Fiv : Ry olo-mahantra!  
Modia, modia!

2. Fa ela dia ela  
Hianao no nania,  
Tsy nahita ny tsara,  
Tsy nahazo ny soa:  
Ry olo-mahantra, sns...

3. Tsy misy mpiantra

Mba hitsinjo anao,  
Afa-tsy ny mpamonjy,  
Izay mitady anao:  
Ry olo-mahantra, sns...

4. Tsarovy ny Rainao  
Mahaleho anao,  
Ka miandry tokoa  
Hampandroso anao:  
Ry olo-mahantra, sns...

### **364 - Ry mpanota! Ry mpanota!**

1. Ry mpanota! Ry mpanota!  
Raiso Jeso Tomponao,  
Aza mba misalasala,  
Manatona Azy 'zao  
Ka ekeo ny feon'i Jeso  
'Zay nifona ho anao;  
Teo ambony hazo avo  
Maty Izy ho anao.

2. Indro Jeso, ry mpanota!  
Faly hohatoninao,  
Sady Tompo tsy mandatsa,  
Fa mamindra fo tokoa,  
Ka miteny moramora  
Ta-hamela heloka;  
Manatona, ry mpanota!  
Mba handray ny avotrao.

3. Ry mpanota! Ry mpanota!  
Misy vonjy ho anao,  
Ka toneo ny alahelo  
Mampahory fo anao;  
Aza mety resin'ota,  
Fa jereo ny Tomponao;  
Izy no handresy tsara  
'Zay miady aminao.

4. Hianao tsy manan-toky  
Ho mpamela heloka,  
Afa-tsy ny Tompo Jeso,

'Lay nanavotra aina anao;  
Ka aza mba misalasala,  
Ry mpanota very ô!  
Fa azonao ny lova tsara;  
Raiso jeso Tomponao.

### **365 - He! Ry mpanota ana, sasatra**

1. He! Ry mpanota ana, sasatra,  
Mitondra fahoriana lehibe;  
Jeso, Mpanavotra olo-meloka,  
No mahavonjy ny fanahinao,

Fiv : Matokia ny Mpamela helokao,  
Aza kivy, tsy ho faty hianao,  
:,:Matokia re:,:  
Matokia, Jeso tsy handao anao.

2. Indro ny fitiavan-dehibe!  
Ny ainy tsy nataony ho zavatra,  
Hamonjy ny mpanota meloka,  
Sy manana entana mavesatra:  
Matokia, sns...

3. Mba mahareta, Jeso aminao,  
Ny tanany mahery hiambina,  
Aza malaky resin-tahotra,  
Fa Izy tsy hiala aminao:  
Matokia, sns...

### **366 - Andeha ry hava-malala**

1. Andeha ry hava-malala!  
Andeha hiaraka izao,  
Hitady fonenana tsara  
Honenana mandrakizay,  
Ao amin'ny tanin'ny Tompo  
Ny fahasambarana be,  
Ny ota tsy miditra akory,  
Tsy misy ny loza manjo.

Fiv : Dia aoka hiaraka isika,

Ry hava-malala izao!  
Hitady fonenana tsara  
Honenana mandrakizay.

2. Ny trano dia maro tokoa,  
Mifaly ny mponina ao,  
Tanteraka soa ny aleha,  
Fitia omena ny ao;  
Miara-midera ny Tompo,  
Mpanavotrabe indrafo;  
Miara-mandova ny soa,  
Mitafy lamba madio:  
Dia aoka, sns...

3. Na ety ny lalana aza,  
Na maro ny zava-manjo,  
Dia aza matahotra akory,  
Mandroso no mety hatao;  
Anjely tsy tambo isaina  
Hirahin-kanampy anao;  
Mpanompon'ny Avo Indrindra  
Hitoby hiaro anao:  
Dia aoka, sns...

### **367 - Ry zanako mania!**

1. Ry zanako mania!  
Hanoinao izao.  
Izaho be fitia  
Mangora-po anao;  
Ry zanako! Modia,  
Sao maty hianao,  
Fa be ny bibidia;  
Modia re!

2. Ny zavatra ny tany  
Sao mahasimba anao  
Harena mety lany  
Tsy mahavonjy anao;  
Izaho irery ihany  
No hiadananao;  
Ka mbola manontany:  
Tsy hody va?

3. Mamiratra jerena  
Ny lalan-tsitrabo,  
Fa ankoso-bolamena,  
Mamitaka ny fo;  
Ny sitrapon'ny tena  
Mamery ny ainao,  
Ario ka miverena,  
Modia re!

4. Izaho Tompon'aina,  
Nijaly ho anao,  
Ka, he, nanolotra aina  
Mba hamonjena anao;  
Ny rako mitaraina,  
Modia hianao;  
Ka aza mba malaina,  
Modia re!

### **368 - Manatòna, ry mpanota**

1. Manatòna, ry mpanota  
Ory, jamba, very koa!  
Hianao simbàn'ny ota,  
Indro, ao ny Tompo soa;  
Ry tsy mendrika hovanjena,  
Misy 'zay miantra anao;  
Fifaliam-be homena,  
Famelana helokao.

2. Mba henoy ny teny tsara  
'Zay lazaina aminao,  
Sao very ny anjara  
Soa tadiavinao;  
Feno antra, manan-kery  
Jeso no mitaona anao;  
Ka ny mino tsy ho very  
Manatòna re izao.

3. Ny miato tsy mba tsara,  
Ny halainanao ario;  
Sao helohin'ny Mpitsara,  
Manatòna re anio;  
He! Miandry ny Mpamonjy,  
Mba faingàna hianao.

Raha te-ho voavonjy,  
Aza ela hianao.

### **369 - Faingàna, ry hava-malala**

1. Faingàna, ry hava-malala,  
Hatòny ny Tompo izao,  
Ny fo sy ny feo asandrato,  
Derao 'Lay nanvotra anao.  
Ny avotra sy ny famonjena,  
'Zay vitany tao Kalvary,  
No fanantenan'ny mpanota  
Hahazo fiainana ary.

2. He Izy mitondra irery  
Ny mafy, nisolo anao,  
Ka maty hamonjy ny very;  
Ny rany nandriaka tao.  
Niaritra latsa sy eso,  
Ny hombo sy ny lefona koa;  
Nivesatra ota Izy teto  
Hanananao fiainana soa.

3. Endrey! Ny fitiavan'i Jeso,  
Ry olo-mahantra, jereo!  
Nijaly hamonjy, hevero,  
Ny ota mahazo ekeo;  
Ekeo, fa ny fo mihamafy,  
Dia loza manenjika anao;  
Faingàna hamonjy ny ainao.  
Haharaoty ny andro 'zao.

4. Ny masom-panahy atopazo,  
Ny lanitra no andrandrao;  
Ny Tompo maniry hamonjy,  
Henoy, fa miantso anao,  
Fiangàna, ry hava-malala!  
Modia an-tranon'ny Ray;  
Miandry anao re ny lova,  
Fiainana mandrakizay.

### **370 - Mba henoy ny feon'i Jeso**

1. Mba henoy ny feon'i Jeso,

Ry mpanota very ô!  
Atsaharo re ny ota,  
'Zay mamery aina anao;  
Jeso Tompo no miantso,  
Aoka tsy ho lavinao;  
Dieny mbola re ny antso,  
Manatòna hianao.

2. 'Zao no tenin'ny Mpamonjy  
'Zay lazainy ainao:  
"Manatona Ahy, Vonjy  
Sy Mpamela helokao;  
Izaho, Tompo feno antra,  
Hanome anao ny soa,  
Ka ny helokao rehetra  
Dia ho afako tokoa."

3. "Izaho koa no vavahady  
Izay hidiranao izao,  
Sady Lalan-toratady  
Izay mankao an-danitra ao;  
Izaho dia Molon'aina  
Sady Ranon'aina koa;  
Tsy mba misy miala maina  
Izay rehetra tia tokoa."

4. "Indro, efa maty Aho  
Hanavotako anao;  
Moa tsy hatolotra Ahy  
Ny fanahinao izao?  
Ry mpanota! Mihevera,  
Aoka izay ny ditranao,  
Manatòna, manatòna  
Ahy, Jeso Avotrao."

### **371 - Mankanesa,ry mpanota**

Mankanesa,ry mpanota,  
Ory, jamba sy mahantra;  
Henoy Jeso miantso hoe:  
Mankanesa aty amiko,  
Feno antra manankery,  
Sady tia mba hamonjy  
Izay mino tsy ho very,

Hoy ny tenin' ny Mpamonjy,  
Raha miandry hihatsara  
Hianao izay manota,  
Dia tsy maintsy very anjara,  
Lova tsy mety miova,  
Tsy ny marina no anarina  
Haka izay ody aina,  
Fa ny meloka no antsoiny  
Handray an'i Kristy hovanjeny,  
Faingana, ry olom-bery,  
Anio no andro famonjena,  
Raiso Kristy 'zay mahavonjy  
Amin'ny fahaverezana.

### 372 - Ry tany ô, ry tany ô

1. Ry tany ô, ry tany ô!  
Ry tany ô, endre!  
Ny Tompo masina sy to  
Miantso mafy e!  
Mifohaza ry mpanota,  
Mivaloza faingana,  
Mba afoizonao ny ota,  
Raiso ny fiainana!

2. Manakatra ny lanitra  
Ny haratsiana;  
Jehovah dia vinitra,  
Fa Izy masina.  
Ry mpanota, mijanona  
Amin'ny alehanao!  
Miverena, manatòna  
Ny Mpamonjy, Avotrao.

3. Jehovah dia masina,  
Ka marina sy to,  
Kanefa manamarina  
Ny ta-hadio fo.  
Miovà ka manenena,  
Fa Andriamanitra  
Manome ny famonjena  
Noho ny Mpanavotra.

### 373 - Moa isaoranao ny Tompo

1. Moa isaoranao ny Tompo  
Noho ny nidinany,  
Tonga teto mba hanompo  
Sy handà ny tenany?  
Be no tsy mihevitra  
An'Ilay Mpanavotra,  
Ka mihambo ny ho tsara,  
Ka ho ratsy fiafara.

2. Tena marina tokoa  
Fa amin'ny finoana  
No andraisana ny soa,  
Dia ny fiainana;  
Nefa raha arianao  
Ny fiainana vaovao.  
Dia ho very ny anjara  
Izay omen'ny Tompo tsara.

3. Fa tsy mety tsy akory  
Ny fanaon'ny sasany,  
Izay sondriana matory,  
Tsy mitsapa farany!  
Sady tsy mba ta-handao  
Izao tontolo ratsy izao,  
Fa manompo Tompo roa  
Ka manary lova soa.

4. Efa tonga ny mazava,  
Moa mino hianao?  
Moa fantatrao fa rava  
Ny fiainan-dratsinao?  
Moa Jeso va izao  
No mitoetra aminao?  
Moa azonao tokoa  
Ny mazava mahaso?

5. Voatolotra tokoa  
Ny mazava ho anao,  
Raha lavinao ny soa  
Ka ny ratsy tianao,  
Dia very foana  
Ny fahasoavana,

Ary mbola raiki-trosa  
Hianao ka ho tra-doza,

6. Tsy mba tianao ho very,  
Ry Jesosy, izahay,  
Ry sakaizanay mahery,  
Manampia re anay,  
Aoka hialoha anay  
Hianao, Mpanavotray,  
Izahay hiara-dia  
Aminao ka tsy hania.

### **374 - Hevero, ry andevom-pahotana**

1. Hevero, ry andevom-pahotana,  
Ny halozan'ny fanampaanaa;  
Katsaho, re! Ilay manam-pahefana,  
Hanapaka ireo gadranao,  
Ho be ny fiadananao  
Raha olona miova fo tokoa hianao.

2. Hevero, fa miantra ny Mpanjaka  
Dia Jeso Kristy Ilay Mpanavotray,  
Fa be fitia Izy ka te-haka  
Anao ho Azy, hifalianao;  
Ny fo sy sainao ho vaovao  
Rehefa raisiny ho Azy hianao.

3. Hevero, fa ny fifalian'ota  
Ho faingan-dasa, tsy maharitra,  
Fa fijaliana no tambin'ota  
Ka mafy sady tsy mba tapitra  
Izay no andosironao  
Ry olona miova fo tokoa izao.

### **375 - Raha mangoraka ny fo**

1. Raha mangoraka ny fo  
Ao ny Ray be indrafo;  
He! Antsoiny hianao,  
Maa tsy hody va izao?

Fiv : :,: O! modia, O! modia,  
Fa miandry Kristy 'zao.:,::

2. Miverena ankehitrilo,  
Tsy ampitso, fa anio;  
Aza mba manary dia,  
Fa modia anio, modia  
O! modia sns...

3. Izay rehetra maminao  
Tsy hahafa-po anao:  
Jeso no anjara soa  
Hiadananao tokoa,  
O! modia sns...

4. Manatona, matokia,  
Mandrosoa, mifalia;  
Kristy no fiainanao  
Sady voninahitrao  
O! modia sns...

### **376 - Mpanota ory sy mahantra**

1. Mpanota ory sy mahantra,  
Henoy ny teny ho anao:  
Jesosy Tompo be fiantra  
Nisolo voina anao,  
Ka Izy feno indrafo  
Mitaona anao hiova fo.

2. Jesosy Tompo sy Mpamonjy  
Miantso ny anaranao;  
"Mpanota very, mila vonjy,  
Minoa Ahy hianao!  
Ny sainao aoka ho vaovao,  
Ny fomba ratsy ialao!"

3. Jesosy koa mampahery  
Ny sasatra ao an-dàlana;  
Ny rany soa manan-kery  
Hahafaka ny entana;  
Jesosy tsy mandroaka  
Ny ory izay manatona.

4. Ka itokionao ny teny  
Naloaky ny vavany!



Ny mino Azy hovanjeny  
Hanatrika ny tavany,  
Sakaizako mahantra ô!  
Ario ny famoizam-po,

### **377 - Tsy mba hisy tonga ary an-danitra**

1. Tsy mba hisy tonga ary an-danitra,  
Raha tsy mandrombaka tokoa;  
Ny mpiady tsara izay maharitra  
No handray anjara lovasoa.  
Ety ary tery ny vavahady ao,  
Kely sy mideza ny lalana mankao;  
Nefa aza kivy, ry havako izao,  
Fa izay malaina dia ho very.

2. Maro no mitady hisakana anao,  
Koa mba tohero, ry sakaiza;  
Mba reseo mafy ny fahavalonao,  
Fetsy izy ireo ka mahaiza.  
Izay rehetra mamin'izao tontolo izao  
Dia avelao fa mamandrika anao;  
Aoka mba Jesosy no hifalianao:  
Eny, hifalianao tokoa,

3. Satroboninahitra tsy ho azonao  
Raha tsy katsahinao tokoa;  
Fa hevero kosa ny fifalianao,  
Raha tonga ao an-dapa soa,  
Fa hahita maso ny Tompo hianao,  
Ka hifaly amin'Andriamanitrao,  
Koa miomàna re, ry sakaiza ô!  
Mba ho faly ao am-pitsarana,

4. He, ny tany soa tsy mba ho hitanao,  
Marina tokoa anie izany;  
Ka ny ao an-danitra tsy ho azonao.  
Raha fatra-pankafy ny tany;  
Raha tsy matoky ny Tompo hianao  
Dia helo afo no ho anjaranao.  
Koa miverena, fa ny Mpanavotrao  
Vonona handray anao mihitsy.

5. Dia miangavy, mangataka aminao;  
Mba modia, ry mpirenireny!  
Fa ny Tomponao ta-handray anao izao  
Hianao tsy sitrany ho very.  
Izy dia mananty ny tanany izao,  
Ka ny fonao simba mba atolorinao  
Hosoloan'i Jeso fo tsara sy vaovao:  
Izany mba hevero, ry sakaiza!

### **378 - Ho aiza, ho aiza izao hianao**

1. Ho aiza, ho aiza izao hianao,  
Ry havako izay mbola tia  
Ny fomban'ny nofo manimba anao?  
Avia, ry olo-mania!  
Henoy, fa miantso ny Tompo!

2. Ho aiza, ho aiza izao hianao,  
Ry havako mbola tamana  
Ao amin'izao fivelomana izao,  
Ka fatra-pikiry hitana  
Izay zavatra halan'ny Tompo?

3. Hevero fa tsy mba mahafaka anao,  
Ka tsy mba heken' ny Mpitsara  
Ny fahamarinana ao aminao;  
Ny an'i Jesosy no tsara,  
Ka dia katsaho ny azy!

4. Ekeo ny tenin'ny Tompo izao,  
Inoy ny toky nomeny,  
Ka dia ho hita ny làlam-baovao,  
Izay voatoron'ny teny:  
Jesosy no làlana tsara.

### **379 - Torotoro va ny fonao**

1. Torotoro va ny fonao,  
Ry mpanota re izao?  
Ka ifonanao tokoa  
Va ny hadisoanao?  
Hianao va mitomany  
Ka maniry mba ho any  
Amin'i Jeso, Izay nandany,

Re ny ainy ho anao?

2. Ny Fanahin'ny Mpamonjy  
Moa nangatahinao  
Hampandray anao ny vonjy  
Hahamasina anao?  
Moa fantatrao tokoa  
Fa ny rany mahasoana  
Dia avotra naloa  
Mba hahafa-trosa anao?

3. Maro no manaiky ihany  
Araka ny vavany,  
Fa hanoa ny Mpamonjy,  
Ka ho tena havany,  
Nefa kosa mbola tia  
Fomba ratsy, ka mania,  
Dia tsy handray fitia  
Raha ao am-parany.

4. Koa dia miangavy  
Aho, ry sakaizako,  
Mahereza mba hitady  
Fiadanana ao am-po,  
Mba hatony ny Mpamonjy,  
Angatahonao ny vonjy!  
Dia tsy maintsy ho tra-bonjy:  
Jeso no mamindra fo.

### **380 - Mba mifohaza re, henoy izao**

1. Mba mifohaza re, henoy izao  
Ny hafatra ataon'ny Tomponao,  
Ny Tompo, izay Mpanjaka manankery,  
Mikatsaka anao, ry olom-berry!

2. Dondòniny ny fo, ka hianao  
Mandrindrana ny varavaranao!  
Tandremo sao ho sasatra ny fony,  
Sao lasa Izy ka tsy avy intsony.

3. Fa indro Izy mbola aty izao  
Mitady hampiverina anao,  
Ka aza lavina ny Tompo tsara,

Sao hianao ho ratsy fialafara.

4. Faingàna àry, ka ampandrosoy  
Ilay Sakaiza izay nahafoy  
Ny ainy ho anao mpanota very,  
Tsy misy Mpamonjy afa-tsy lzy irery.

5. Ifony aminy ny helokao,  
Hariany ka tsy ho hitanao,  
Ka hianao, izay mendrika ho voa, .  
Hatsangany ho zana-dRay Tsitoha.

6. Ka raha renao ao anaty fo  
Ny fiadanana, izay mahatô  
Ny famelàna ny helokao rehetra,  
Dia aoka mba handrasanao ny fetra.

7. Akaiky re ny fahafahana,  
Ka mba zakao ny hatrotrahana,  
Ho avy faingana Jesosy Tompo  
Ka dia ho afaka ady ny mpanampo.

8. Rehefa hitanao ny Tomponao  
Dia afaka ny hasasaranao,  
Hijanona ny sento sy taraina  
Fa hobin-danitra no hohiraina.

### **381 - He ny fiantsoana**

1. He, ny fiantsoana  
Feno fitiavana,  
Teny masina sy to,  
Ho anao, ry ory fo.

2. Hoy Jesosy Tomponao  
"Manatona Ahy re,"  
"Ry miasa fatratra"  
"Sy mivesatra entana!"

3. "Fa Izaho hanome"  
"Fitsaharan-dehibe"  
"Sy fiainana vaovao"  
"Hahasambatra anao".

4. Ry Mpamonjy tsara ô!  
Saotra no atolotro;  
Ka ampio aho izao,  
Fa manaiky ho Anao.

### **382 - Ry olo-matory ô, mba mifohaza**

1. Ry olo-matory ô! Mba mifohaza,  
Fa indro Kristy  
Ilay Fahazavana Izay tena malaza,  
Dia tonga aty,  
Ka aza matory  
Fa mba atolory  
Ny fonao izao,  
Mba hanazavany anao.

2. Aty dia matevina sady mahana  
Ny zavona be;  
Ny sento, taraina sy fitomaniana  
Dia misy anie,  
Ry olo-mahantra,  
Jereo ny Mpiantra,  
Henoinao izao:  
Jesosy nanavotra anao!

3. Aty dia mangetana sady be ady,  
Ka maro no voa;  
Tsy tambo isaina ireo mitady  
Fiadanana am-po.  
Dia aza tomany,  
Fa eto ihany  
Ilay manome  
Ny fahasoavany be!

4. O, miandrandra ka jereo ao ambony,  
Fa atoandro izao,  
Falia toa zaza, tahafo ny fony,  
Ny Tompo derao,  
Na misy ny onja  
Sy ota mandoza,  
Dia mbola derao  
Jehovah Mpiaro anao!

5. O, mendrika hankalazaina Jehovah

Izay manome  
Ny làlana sy fahamarinana koa  
Sy fiainana be.  
Tsilovy, ry Kristy,  
Ny làla-mahitsy  
Izorako izao,  
Tantano re ny zanakao!

### **383 - O, ry mpanota aza mandà**

1. O, ry mpanota aza mandà,  
Jeso miantso ka miova;  
Mba manatona Azy izao,  
Izy hamonjy anao.

Fiv : He, mivoha izao ny lanitra,  
Ry mpirenireny lavitra;  
Indro Jesosy, Izy no ao,  
Aiza no hisy anao?

2. Be ahiahy va hianao  
No tsy mandroso faingana izao?  
Dia tapaho ny hevitrao,  
Ka miova hatrizao.  
He, mivoha, sns...

3. Mba miverena re hatrizao,  
Ka hararaoty ny andronao,  
Fa ny aty ho simba sy ho lao,  
Ka mba modia izao.  
He, mivoha, sns...

### **384 - Ry olom-bery, tsy ho very foana ny andronao**

1. Ry olom-bery, tsy ho very  
Foana ny andronao,  
Raha mby an-tsainao,  
Fa ny ainao, tsy fanananao.  
Ny hery misy, nefa indrisy,  
Resim-pahalainana!  
Aty an-tany, mora lany  
Ny fiainana.  
Mba mazotoa, ry havako,

Ka aoka hoheverinao  
Ny andro lasa, sao ny asa  
Tsy ho vitanao.

2. Ka manenena, miambena,  
Mivavaha hianao!  
Efao ny ady, ao ny kiady  
Voninahitrao.  
Mba ahitsio ankehitrilo  
Ny dia sisa hatrizao,  
Fa be ny simban'ny mpanimba  
Ka migadra izao.  
Sakaiza ô, fantaronao,  
Fa nijalian'ny Tomponao  
Ny fahotàna tsy ialàna,  
Ilalaovanao.

3. Dia mba ampio sy tahio  
Izahay, ry Tomponay,  
Fa mba hiady ka hitady  
Vonjy ho anay.  
Homenao soa ny manoa  
Amin'ny fotoanao.  
O, ry Mpanjaka, avia haka  
Ny malalanao.  
Ny olonao dia tà-hankao  
An-danitra fonenanao.  
Ry Jeso tia, mba avia  
Faingàna izao!

### **385 - Ny Mpamonjy be fitia**

1. Ny Mpamonjy be fitia  
No miantso hoe: Avia!  
Ry mahantra, raiso izao,  
Famonjena ho anao.

2. Hoy ny Tompo: Ry mpanota,  
Manatona, fa ny ota  
Voavela, anaka,  
Afaka ny heloka.

3. Teny mamy, re, izany,  
Faly ireo mitomany,

Ka araho hatrizao,  
Dia ho sambatra hianao.

4. Ry Jesosy, Izay Mpiantra,  
Izaho ory sy mahantra,  
Ka ampio aho izao,  
Fa Mpamonjy Hianao!

5. Efa azoko ny teny  
Ka hazoniko ireny;  
Hianao, Jesosy ô,  
Ampy hiankinako.

### **386 - He, Jesosy Tompo soa**

1. He, Jesosy Tompo soa  
No miantso mafy hoe:  
"Manatàna avokoa  
Ry mpanota marobe!  
Fa izay manatona Ahy  
Tsy mba horoahiko;  
Aza manana ahiahy,  
Raisonao ny teniko".

2. Aza mba misalasala  
Ka mihevitra hoe:  
Sao ny Tompo tsy hamela  
Ahy efa diso be.  
Tsia, tsia, ry mpanota,  
Matokia marina,  
Anenenonao ny ota,  
Jeso hanamarina.

3. He, ny rany saro-bidy  
No mahafa-keloka  
Ny mpanota voavidy  
Ka miaiky heloka.  
Eny, afaka ny revo  
Noho ny Mpanavotra,  
Ny devoly manandevo  
Efa resy lahatra.

4. Ny Mpamonjy mampifidy,  
Tsy manao an-keriny,

Ka antsika ny hifidy  
Sy handray ny teniny.  
Koa raha misy very,  
Dia tsy avy aminy;  
Ny manao ny mahavery  
Dia tsy mba maminy.

### **387 - Ampihetsehin'inona izao ireo vahoaka**

1. Ampihetsehin'inona  
izao ireo vahoaka,  
Ary iza no arahiny  
No dia samy maika ery?  
:,:Ry jamba ô, fantaronao,  
Jeso mandalo anao izao.:,:

2. Jesosy Iraky ny Ray  
Dia sady mety no mahay  
Manafaka ny rofinao  
Sy mampahiratra anao;  
:,:Koa mitsangàna hianao,  
Jeso mandalo anao izao.:,:

3. O, ry mivesatra entana,  
Hatony ny Mpanafaka!  
Ry zaza very hatrizay,  
Modia ao an-tranon-dRay.  
:,:Ry jamba ô, heveronao  
Jeso mandalo anao izao.:,:

4. Ny làlan-tsarotrao aty  
Tsy misy tsy nalehany,  
Ny rofy nositraniny,  
Ny maty novelominy.  
:,:Ny jamba faly nahare:  
Indro, Jesosy mandalo re!.:,:

5. Ny indrafony mbola injao,  
Mitety izao tontolo izao;  
Ny tranontsika alehany,  
Ny fo mihidy doniny.  
:,:Ampandrosy Izy hoe:  
Jeso ô, aza mandalo re!.:,:

6. Fa raha tsy ahoanao  
Izao fandalovany izao,  
Ka nony efa farany  
Vao tia ny hovangiany,  
:,:Indrisy! Tsy ho hitanao  
Jeso Izay efa nandalo tao.:,:

### **388 - Tsy maintsy hateraka indray hianao**

1. Tsy maintsy hateraka indray hianao  
Izay ta-handova  
Ny lanitra sy ny fiainam-baovao,  
Izay tsy miova  
Ny havan'ny Tompo ihany  
No tena hahazo izany.

2. Ny fo vatolampy esory izao,  
Fa tsy hohonjena;  
Katsaho ny fo feno aina vaovao  
Fa io no ekena  
Horisina any ambony,  
Ka tsy hitomany intsony.

3. Ny Tompo mitondra ny hery vaovao;  
Fanahy sy afo,  
Izay mampiova ny fonao izao  
Ho tonga fo nofo;  
Ny olona lasan-ko babo  
Ho afaka sady hiravo.

4. Ry Masina ô, ateraho indray  
Izay mitaraina,  
Velomy ny maty hifoha,  
Handray ilay tena aina;  
Mba raiso , ry Ray be fitia,  
Ny zanaka adala nania!

### **389 - Ny perla madio, ny perla vaovao**

1. Ny perla madio, ny perla vaovao  
No tonga hampanan-karenany very.  
Ny perla madio katsaho izao;

Ario ny ota, izay mahavery,  
Tapaho ny gadra, izay mahamay!  
Fa sao ho anjaranao mandrakizay.

2. Ny ota nataonao, ry havana e,  
Miteraka gadra, izay mahafaty;  
Kaneffa maro miezaka re,  
Hahazo ny voan'ny ota, ka maty!  
Reseo ny ota, reseo izao,  
Katsaho indrindra ny perla vaovao!

3. Avia, mpanota, faingàna izao,  
Faingàna ka dia hahazo hijery  
Ny perla madio, ny perla vaovao,  
Izay tonga hampanan-karena ny very.  
Ry Jeso, Izay perla madio vaovao,  
Avia hampanan-karena izao!

### **390 - He, Jesosy Tomponao**

1. He, Jesosy Tomponao  
Malahelo, mitomany,  
Fa izao tontolo izao  
Mbola mihomehy ihany,  
Ka ho ratsy fiafara,  
Fa manda ny Tompo tsara!

2. Indro, tevana no ao,  
Fa tsy hitan'ny mpanota,  
Izay mandihy faly izao  
Sy manaram-po manota.  
Ry adala, miverena,  
Sao ho very famonjena.

3. Mba heveronao izao  
Fa ny tenanao ho faty;  
Koa ny fifonanao  
Aza ataonao matimaty!  
He, ny Tompo mitomany!  
Sa tsy azonao izany?

4. Latsa-drano maso be  
Sy onena ny Mpamonjy;  
Koa mifohaza re

Manatona ho tra-bonjy;  
Fa Jesosy be fitia  
Mitomany ny mania.

### **391 - Mpanota ô, mba mihevera tsara**

1. Mpanota ô, mba mihevera tsara  
Fa mora tapitra ny andronao  
Hevero, fa ho avy ny Mpitsara  
Handinika ny raharahanao

2. Akaiky izao ny fararanon'aina  
Izay hijinjana izao tontolo izao  
Ka dia tsarovy, fa ny Tompon'aina  
Hanolotra izay ho anjaranao

3. Izay mamafy araka ny nofo  
Hijinja fanimbana lehibe  
Izay mamafy tsara amin-joto  
Homen'ny Tompo fitsaharam-be

4. Izany fitsaharana izany  
Dia vokatry ny ran'ny Tomponao  
Izay nalatsany taty an-tany  
Hamonjy sy hanavotra anao

5. Henoy ny Mpamonjy be fitia  
Izay voahombo noho ny helokao!  
Miantso mafy Izy hoe: Avia  
Handray ny lanitra ho lovanao

### **392 - O mba raiso izao, misy lovanao ao**

1. O, mba raiso izao,  
Misy lovanao ao,  
Indro! Jeso miandry anao!  
Fa ny helokao be  
Dia navelany e,  
Ka fiainana omeny anao;  
Novidiny hianao,  
Ka ekeo hatrizao  
Izay omen'i Jesosy anao.  
O, mba raiso izao,

Misy lovanao ao,  
Indro! Jeso miandry anao!

2. Moa hadinonao va  
Fa ny olo-mandà  
Ho tra-nenina rahatrizay?  
Izay ataonao aty  
Hotsaraina ary  
Ka tsy azo ovana indray.  
Ny Mpamonjy anao  
No hatony izao,  
Ary Izy hihaino anao.  
Moa hadinonao va  
Fa ny olo-mandà  
Ho tra-nenina rahatrizay?

3. Izao tontolo izao  
Dia mamitaka anao,  
Ka afoizo fandrao manindao.  
He, Jesosy nandao  
Izao tontolo izao  
Ary izy miantso anao.  
Izy tonga indray  
Ao an-dapan'ny Ray,  
Ka ho velona mandrakizay.  
Izao tontolo izao  
Dia mamitaka anao,  
Ka afoizo fandrao manindao.

### **393 - Misy havana ao ala-trano ao**

1. Misy havana ao ala-trano ao,  
Vohay! Vohay!  
Ka indro, Izy miandry ao,  
Vohay! Vohay!  
Ny lohany lenan'ny ando izao,  
Vohay! Vohay!  
Mangataka hampandrosoinao.  
Vohay! Vohay!

2. Mikasa hanao soa aminao,  
Vohay! Vohay!  
Maniry hamelona anao,

Vohay! Vohay!  
Ny rany nomeny ho avotrao,  
Vohay! Vohay!  
Ny fonao omeo ho Azy izao,  
Vohay! Vohay!

3. Ka Jeso Kristy no anarany,  
Vohay! Vohay!  
Ho hitanao ny hatsarany,  
Vohay! Vohay!  
Ho tiany mandrakizay hianao,  
Vohay! Vohay!  
Ka aoka ho raisinao Izy izao,  
Vohay! Vohay!

### **394 - O! avia ry mpanota**

1. O! avia, ry mpanota!  
O! avia hianao,  
Fa miandry Kristy Tompo,  
Mba handray anao izao:

Fiv : :.;Manatona, manatona,  
Manatona Azy 'zao:;..

2. O, avia, ry mahantra!  
Ho finaritra izao,  
Fa akaiky ny Mpiantra  
Hampifaly fo anao:  
Manatona, sns...

3. O, avia, ry malemy!  
Aza kivy hianao,  
Fa ny vavakao ho ren'i  
Jeso Kristy herinao:  
Manatona, sns...

4. O, avia sao ho very,  
Ditra mba esorinao;  
Ny mpamonjy no mijery  
Sady ta-handray anao:  
Manatona, sns...



## 395 - Modia, modia, ô, ry mpanota ô! 396 - Aizan'ny lanitra hianao

1. Modia, modia, ô, ry mpanota ô!  
Tsy mba hitsangana va  
Mba hiadananao?  
Tsy handosiranao va  
Izao fomba ratsy izao?  
Indro mitady anao  
Andriamanitra,  
::: Ka ta hampiditra anao  
Any an-danitra:::  
Moa tsy tianao va  
Ny mba ho velona?  
Koa dia aza manda  
Azy Mpamelona anao  
Jeso miantso anao,  
Ka mba henoinao,  
::: Raiso ny teniny izao,  
Mba hamonjena anao:::

Fiv : O, ry mpanota, miova  
:::Fa ho sambatra tokoa,  
Raha mody hianao:::

2. Modia, modia, ô, ry mpanota ô!  
Tsy mbola azonao va  
Ny fiantsoany?  
Sa hianao ta-handà  
Ny fitiavany?  
Mba mankanesa aty,  
Indro mivoha izao  
::: Tranon'ny Rainao ery,  
Ka mba idironao:::  
O, mba modia hianao,  
Sao dia ho neninao,  
Sao dia handatsa anao  
Ny fikirizanao;  
Koa katsaho izao  
Ny voninahitra  
::: Efa miandry anao  
Any an-danitra:::  
O, ry mpanota, sns...

1. Aizan'ny lanitra hianao,  
Ry zanak'olona ô?  
Moa mba efa miditra ao,  
Sa ao ivelany?  
  
2. Lapan'Andriamanitra ao,  
Koa tsy misy mankao  
Afa-tsy izay mandray fo vaovao:  
Olona masina.  
  
3. Any ny masina marobe  
Velona mandrakizay,  
Ka fiderana tsara no re  
Eran'ny lanitra.  
  
4. Tapitra irina izay tonga ao:  
Sambatra mandrakizay;  
Any ny Paradisa vaovao,  
Izay hiadanana.

5. Aizan'ny lanitra hianao,  
Ry zanak'olona ô?  
O, mba hevero izay toetrao  
Mbamin'ny asanao!

## 397 - Ry olona mbola tamana amin-dratsy

1. Ry olona mbola tamana amin-dratsy,  
Hevero ny loza hihatra aminao,  
Fa indro satana zay lohan'ny ratsy  
Mandefa tsipika hamono anao,  
Kanefa ny Tompo, Izay Zanahary,  
No tonga hamonjy, fa tsy manary;  
Avia, ry olo-mahantra, hihary  
Ny tena harena tsy mety ho lo.  
  
2. Jesosy mamoha anao, ry matory,  
Fa Izy maniry hitarika anao.  
Ilaozy ny ota, fa he, mampahory,  
Henoy ny feo miantso anao!

Jereo ilay kintana, Izay tsy ho rava,  
Fa indro ny aizina dia hisava,  
Araho Jesosy, fa tena mazava  
Izay hanazava tokoa anao.

3. Ny Tompo mamelona ny efa maty,  
Ka aoka hitsangana re hianao!  
Fadio tokoa izay mahafaty,  
Katsaho indrindra ny aina vaovao!  
Jesosy Mpamonjy no mba itafio,  
Ka dia tandremo fa lamba madio!  
Ry olo-mahantra, mba raiso anio  
Jesosy, Izay mahavonjy anao.

4. Jesosy Mpamonjy mitondra ny teny  
Izay hahavelona mandrakizay;  
Ka dia henoy ny toky nomeny,  
Ry olo-maniry ho amin'ny Ray!  
Faingàna tokoa, ry efa mifoha  
Fa indro ny lanitra efa mivoha,  
Ka faly indrindra ny Tompo Tsitoha  
Hitsena ny zanany velona indray.

### **398 - Iza no hiara-dia**

1. Iza no hiara-dia  
Ho ary an-danitra,  
Ka hanaiky sy ho tia  
An'Andriamanitra?  
Ry mikatsaka ny To,  
Atolorinao, ny fo;  
Izao tontolo izao, ario,  
Ka ny lanitra fidio.

2. Sao ho lany amin'ota  
Ny anjara andronao,  
Ka ny helo valin'ota  
No hanjary lovana;  
Miovà re hatrizao,  
Miverena hianao:  
Tadiavonao tokoa  
Ny Mpamonjy Tompo soa.

3. Mba avia, mianara  
Izay fitondrantena vao  
Mikeleza aina tsara,  
Ka reseho ny nofonao,  
Aza mba mamindra fo  
Amin-dratsy ao am-po,  
Fa ongoty avokoa  
Izay misakana ny soa.

4. Tsy mba misy lalan-kafa  
Hiakaranao, ho ao,  
Koa andeha manahafa  
Ny nataon'ny Tomponao.  
Tsy mba mahavonjy anie  
Ny fahaizan-dehibe;  
Raha ny nofo no hajaina,  
Dia ho very re ny aina.

5. Dia ny lanitra katsaho  
Ho anjara lovana;  
Ny Mpamonjy angataho  
Ho mpitarika anao,  
Fa izay mpianany  
Dia hotantanany,  
Iza no hiara-dia?  
Mitsangàna ka avia!

### **399 - Ny sento ajanony, ry malahelo ô!**

1. Ny sento ajanony,  
Ry malahelo ô!  
Ka aza misy intsony  
Izay hamoy fo!  
Fa indro ny Mpamonjy  
Dia ao anilanao,  
Ka tonga mba hamonjy  
Sy hitondra anao.

2. Jesosy no nitory  
Ny teny soa re,  
Ny rera-po sy ory  
Antsoiny mba handre;  
Minoa fa ny ota

Dia voavelany,  
Sakaizan'ny mpanota  
No anarany.

3. Miposaka ny taona  
Ankasitrahana,  
Ka be ny voataona  
Am-pitiavana.  
Hevero, ry mahantra,  
Izay anjaranao!  
Jesosy be fiantra  
No Mpamonjinao

#### **400 - Tompo Tsitoha, izahay mifona**

1. Tompo Tsitoha, izahay mifona  
Mba mihainoa, ô, mba manatona!  
Ka mamindra fo aminay mpanota,  
Hoafaka ota

2. Raha averina aminay mpanota  
Izay mendrikahoanay ho vali'ota,  
Dia ho anajaranay re ny hijaly,  
Fa tsy hifaly.

3. Indro izahay fa vovoka sy tany,  
Reraka, osa, sady mitomany,  
tratry ny mafy mampiferinaina,  
Ka mitaraina.

4. Noho Jesosy Zanaka malala,  
Izay nijaly solonay adala,  
Dia mba vonjeozahay mahantra,  
Ry be fiantra.

5. Ray be fitia, tokin'ny mahantra,  
Mba manampia anay, ry be fiantra,  
Fa miandrindra izahay mijery  
Anao irery!

#### **401 - Izaho nivily, ka simba ny fo**

1. Izaho nivily, ka simba ny fo,

Nafoko ny lalana tery.  
Izaho nanary ny soa sy to,  
Ka resin'ilay mahavery.

2. Ka nony adala sy mafy ny fo,  
Dia tonga ny filazantsara  
Naneho ny teny mazava sy to,  
Dia teny izay manambara:

3. Fa tonga ny Tompon'ny lanitra izao  
Hamonjy izay olom-bery;  
Modia anio, ry havako ô,  
Araho ny lalana tery.

4. Jesosy nijaly nisolo anao;  
Ny fony, ny ainy nijaly;  
Ario ny ratsy, fidio zay  
Ny soa izay mahafaly.

5. Izaho fahiny nahery nandà,  
Tsy nety nifidy ny soa,  
Fa noho ny hrin'ny afo sy rà,  
Nanaiky ny foko favoa.

6. Izaho izao dia tretrika am-po,  
Fa afaka tsara sy sahy  
Hiala amin-dratsy, hitady ny to,  
Ka mino fa Jeso no ahy

7. Ry Jeso Mpamonjy, arovy ny fo,  
Ahiko ny fandrika maro!  
Izaho mikasa ao anatin'ny fo  
Hanaraka Anao, ry Mpiaro.

#### **402 - Ory sady mitomany**

Ory sady mitomany  
Aho, ry Jesosy ô,  
Fa tsaroako izany  
Vestry ny heloko:  
Koa mba todihonao.  
Raiso ho Mpianatrao,  
Ny fanahiko sitrano,  
Atsaganonao ka tano!

### 403 - Ry Jeso Tompo tsara ô

Ry Jeso Tompo tsara ô!  
He, resy lahatra aho izao,  
Fa be ny ratsy vitako  
Mandifotra ny tenako.  
Milela-paladia re,  
Fa efa diso lehibe;  
Koseho tsy ho hitanao  
Ny mariky ny otako,  
Ampiasao ny indrafo  
Ka mamelà ny heloko!

### 404 - Ny fasika amoron'ny rano

1. Ny fasika amoron'ny rano  
Tsy tambo isaina, fa maro;  
Ny kintana an-danitra koa  
Tsy azo isaina avokoa.

2. Ny otako toraka izany,  
Ny isany tsy hita lany;  
Izaho nanary ny soa,  
Ka dia mahantra tokoa.

3. Indrisy, izaho nania,  
Ka very ny valim-pitia;  
Ny foko tsy mety mangina,  
Fa maro ny heloka ahina.

4. Izaho maniry hahazo  
Ny lova izay tsy halazo;  
Iriko ho tafafindra  
Ho amin'ny avo indradra

5. Ry Jeso Mpamonjy mahery,  
Variana aho fa very,  
Ka noho ny ranao madio,  
Ny heloko re mba ario.

### 405 - Jesosy Kristy Tompo ô

1. Jesosy Kristy Tompo ô!

Mba mamindrà fo e!  
Fa raha tsy hatoninao,  
Mahantra aho re!

2. Mifona sy mangataka  
Izaho, Tompo ô,  
Noho ny ranao latsaka,  
Vonoy ny heloko.

3. Ny famonjena vitanao,  
Tsy hain'ny hafa atao;  
Ny teny sy ny herinao  
Dia ampy hanavao.

4. Ho heriko ny indrafo  
Sy ny fitiavanao,  
Ka faly ny fanahiko,  
Fa velon-ko Anao.

5. Ny hazo-fijaliana  
Anjarako aty,  
Fa satro-pifaliana  
Ho azaoko ary.

### 406 - Menenina aho, Ray masina ô

1. Menenina aho, Ray masina ô!  
Fa simba ny tsirin'ny aina;  
Izay nambolena tanatin'ny fo  
Dia lanin'ny ota ka maina.

2. Indrisy ny fahadisoako, re!  
Fa maro tsy tambo isaina,  
Kanefa, ry Tompoko, mba mamonje  
Ity ory, izay mitarina!

3. Havaozy indray ny fanahiko izao  
Andrao lasa ho babon'ny helo;  
Ka ny fivalozako mba raisonao,  
Vonjeo ny fo malahelo!

### 407 - O, ry Raiko, Izay malala

1. O, ry Raiko, Izay malala

Tonga aho zanakao,  
Izay nania, fa adala,  
Ka mifona aminao.  
Mamela ny fahotako  
Teo anatrehanao;  
Ary ny fahadalako  
Aza mba tsarovanao!

2. He, izaho nanantena  
Izao fiainana izao,  
Ka nandà ny famonjena,  
Izay lazain'ny teninao;  
Kanjo hitako tokoa,  
Fa izao tontolo izao  
Ty mba mana-java-tso  
Hampiadana ny ao.

3. Enga aho, izay mahantra,  
Mba ho isan'ny Anao;  
Hianao no Ray Mpiantra,  
Miantrà ny zanakao,  
Ary noho ny Mpamony,  
Izay nanavotra ahy re,  
Raiso aho ho tra-bonjy,  
Ho Anao, ry Ray! Amen!

#### **408 - Jehovah, Ray mahari-po**

1. Jehovah, Ray mahari-po,  
Izay tia sy mamindra fo,  
O, mihainoa ny hatako;  
Mba mamindrà fo amiko.

2. Izaho izay mangataka  
Tsy azo hamarinina;  
Indrisy! be ny tsiniko:  
Mba mamindrà fo amiko.

3. Tsy tamboko isaina re  
Ny fahotako marobe,  
Ka be tokoa ny tahotra;  
Mba mamindrà fo amiko!

4. He! Misy hanatonako

Anao, Mpandray mpibebaka;  
Izaho diso fatratra:  
Mba mamindra fo amiko!

5. Fa Jeso no Anarana  
Izay entiko mangataka  
Ny hamelanao heloka:  
Mba mamindrà fo amiko!

6. Tsinjovy re ny zanakao  
Miverina aminao izao  
Ka mitaraina aminao:  
Mba mamindrà fo amiko!

7. O! mba jereo ka iantrao  
Izaho miandrindra Anao;  
Ny heloko vonoinao,  
Fa mampisaraka aminao.

#### **409 - Ry zaza mpiodina, mba miverena**

1. "Ry zaza mpiodina, mba miverena!"  
Antsoin'ny Ray.  
Isika hamaly am-po tsy terena:  
"Indreto izahay  
Miaiky fa ratsy  
Maratran'ny rafy,  
Sitrano izahay,  
Fa simba ny toetranay."

2. Indrisy, nanota ka mendrika ho faty  
Sy very izahay!  
Ny razanay dia nanompo ny maty  
Ka narahinay,  
Ry Ray ô, jereo  
Ka dia vonjeo,  
Mba ho zanakao  
Izahay mitanondrika izao".

3. "Sitraniko ny fihemoranareo,  
Ry zanako ô!  
Tsy ampanjomboniko aminareo  
Ny tavako ko."

Izany irinay  
Ho re ao am-ponay,  
Fa Ray Hianao  
Mampionona ny olonao.

#### **410 - Ry Jeso ô! Jereo**

1. Ry Jeso ô! Jereo  
'Ndrao maty, Ka vonjeo;  
Ry Kristy, Vonivatonay!  
Mba raiso izahay.  
Mahantra izahay.  
Ka ory ny fonay;  
Ry Tompo be fiantra ô!  
Mba miantrà anay.

2. Mpanavotra ô! Jereo,  
'Ndrao very, ka vonjeo;  
Ry Kristy, Orimbatonay!  
Avoty izahay.  
Mpanota izahay,  
Maloto ny fonay;  
Ry Zanak'Andriamanitra ô!  
Vonoy ny otanay.

3. Mpanjaka ô! Jereo  
'Ndrao lavo, ka vonjeo;  
Ry Kristy, Harambatonay!  
Arovy izahay.  
Malemy izahay;  
Ry Tomponay mahery ô!  
Tantano izahay.

#### **411 - Ry Zanahary Tomponay**

1. Ry Zanahary Tomponay,  
Mpanao izao rehetra izao!  
Tsinjovy re ny olonao,  
Ka miantrà ny lovanao.

2. Ry Tokinay sy Tanjakay!  
Mba mitalaho izahay;  
Tsarovy re ny zanakao,  
Ka mamelà ny helokay.

3. Ry Tomponay, Mpamonjy soa!  
Tariho izahay izao  
Hanompo sy hanoha Anao,  
Ho voninahitrao tokoa.

4. Rehefa hody izahay,  
Mba raiso ny fanahinay  
Handray ny hasambarana  
Atolotrao, Mpanavotray.

#### **412 - Jehovah Tompo ô!**

1. Jehovah Tompo ô!  
Indreto izahay  
Mifona aminao ;  
Fa be ny helokay :

Fiv : Henoy izao, ry Ray !  
Henoy ankehitrion,  
Henoy ny vavakay,  
Henoy ka mba valio.  
Ry Andriamanitray !  
Mijere !  
Jeso Kristy Tomponay !  
Mamonje !

2. Vonjeo, vonjeo, ry Ray !  
Vonjeo ho olonao;  
Mifona izahay,  
Isao ho zanakao :  
Henoy izao, sns...

3. Mpanota izahay,  
Mba mamelà anay;  
Maloto ny fonay,  
Sasao ho voadio :  
Henoy izao, sns...

4. Jereo ny Zanakao  
Misolo vava anay;  
Ilay Malalanao  
Mifona ho anay :  
Henoy izao, sns...

### 413 - Ry Mpamonjy, Tompo soa

1. Ry Mpamonjy, Tompo soa!

Avy izahay izao,  
Mba hanaiky sy hanoa,  
Ka hiverina aminao.  
Hianao no ranon' aina  
Mahavelona ny fo;  
Hianao no antenaina  
Mba hanala ny manjo.

2. Indreto izahay mpanota

Efa diso taminao,  
Mamonje sy manavota  
Ny fanahinay izao.  
Hianao no mahavonjy  
Izay miankina aminao;  
Koa raiso, ry Mpamonjy!  
Ny fifonanay izao.

3. Ry Jesosy be fitia!

Mba tantano izahay,  
Fa ho lavo sy hania  
Raha tsy hazoninao.  
Tsy mba misy mety very  
Eo am-pelatananao,  
Fa aminao no misy hery  
Mahatanjaka ny fo.

4. Tompo ô! mba tanteraho

Izay rehetra mahasoana,  
Ka ny otanay afaho,  
Fa manimba anay tokoa.  
Mampianara anay haniry  
Mba hanao ny sitrakao,  
Hahazoanay ny hery  
Eo am-pelatananao.

### 414 - Jeso, Vatolampinay

1. Jeso Vatolampiny !

O! arovy izahay,

Ka ny fonay mba sasao,  
Manafaha anay izao,  
Mba tsy hisy izay hanjo  
Olon-tsy mahitsy fo.

2. Tsy ny asa izay atao

Mahato ny didinao ;  
Tsy ny hazotoam-po  
No mahazo manadio ;  
Tsy ny ranomasonay  
No mahafa-trosa anay.

3. Tsinontsinona izahay,

Sady be ny helokay ;  
Ry Mpiaro lehibe,  
Jeso Tompo ! mamonje,  
Fa miankina aminao  
Izahay mpanomponao.

4. Tomoera aminay

Raha ho faty izahay,  
Ary hiakatra ao  
Mba hiseho aminao,  
Jeso Vatolampinay !  
O ! arovy izahay.

### 415 - Mifona aminao izahay

1. Mifona aminao izahay,

Andriamanitra ô!  
Mba mamelà ny helokay,  
.: Fa diso izahay. .:.

2. Mivavaka aminao izahay,

Ry Jeso Tompo ô !  
Avoty ny ranao izahay,  
.: Fa very izahay. .:.

3. Mangataka aminao izahay,

Fanahay Masina ô !  
Velomy ny fanahinay,  
.: Fa maty izahay. .:.



4. Jehovah ô! Izay iray,  
Kaneva Telo koa,  
Mba atokàny izahay,  
:,: Ho olonao tokoa. :,:

#### **416 - Mamindrà fo amiko**

(Maintimolaly)

1. Mamindrà fo amiko,  
Ry Jehovah Tompoko!  
Fa miantra hanao,  
Mamelà ny heloko.

2. Iza no mamindra fo  
Toa an' Andriamanitra?  
Iza no Mpanavotra  
Afa-tsy ny Zanany?

3. Jeso Kristy no mahay  
Mamonjy ny mpanota  
Izay miankina aminy  
Ka tsy mandoka tena.

4. Aza mahafoy ahy,  
Ry Jehovah Tompoko!  
Mamindrà fo amiko,  
Mamelà ny heloko.

#### **417 - Nandao Anao ela aho**

1. Nandao Anao ela aho, Raiko ô!  
Izao dia te-hody aho;  
Maniry hiankina an-tratranao,  
Izao dia te-hody aho.

Fiv : :,: Inty tamy aho,  
Raiko malala ô,  
Raiso ny tanako. :,:

2. Maniry hanana fiadanam-po,  
Izao dia te-hody aho,  
Sy mba hivesatra ny zioganao,  
Izao dia te-hody aho,

Inty tamy aho, sns...

3. Itambesaran'ny ota natao  
?Zao dia te-hody aho,  
Matoky anefa fa horaisinao  
?Zao dia dia te-hody aho.  
Inty tamy aho, sns...

4. Raha tsy mendrika ny ho zanakao,  
Izao dia te-hody aho,  
Ataovy isan'ny mpanomponao,  
Izao dia te-hody aho.  
Inty tamy aho, sns...

5. Indro fa tazako ny sandrinao,  
Izao dia te-hody aho,  
Mitsotra mba hisakambina re,  
Izao dia te-hody aho  
Inty tamy aho, sns...

#### **418 - Amorony fo madio**

1. Amorony fo madio  
Aho ry Jehovah ô!  
Ka havaozinao anio  
Ny fanahiko izao.  
Be ny ratsy vitako,  
Ka ny heloko sasao;  
Mamindrà fo amiko,  
Ry Jehovah Tompo ô!

2. Amorony fo madio  
Aho ry Jehovah ô!  
Ka diovy ankehitrilo  
Ny fiainako izao  
Simba ny fanahiko,  
Ka amboary ho vaovao;  
Aza esorina amiko  
Ny fanahy Masinao.

3. Amorony fo madio  
Aho, ry Jehovah ô!  
Ka ny foko ahitsio,  
Hamasino ho Anao.

Taminao dia taminao  
No Mba nanotàko, Ray;  
Ka ny heloko avelao,  
Ny fanahiko ovay.

4. Amorony fo madio  
Aho, ry Jehovah ô!  
Ka ny fo omeko anio,  
Raiso ho fanananao:  
Fo mangorakoraka  
Noho ny ratsy izay natao;  
Fo miaiky heloka,  
Ka mba raiso, Tompo ô!

#### **419 - Ry Raiko ô! Ry Raiko ô!**

1. Ry Raiko ô! Ry Raiko ô!  
Efa nanota teo imasonao  
Ity zanaka mahantranao;  
Ninia niala teo an-tranonao.  
Mangovitra ny feoko,  
Torovana ny foko,  
Kanefa tazako Hianao  
Ka mamelà, mamelà, Raiko ô!

2. Ry Raiko ô! Ry Raiko ô!  
Ho tanterahiko ny anjarako:  
Mandao ny làlako taloha.  
Izay nanalavitra ahy taminao  
Tratrariko ny eo aloha,  
Ilaozako ny lasa,  
Inoako ny famindramponao  
Ka mamelà, mamelà, Raiko ô!

3. Ry Raiko ô! Ry Raiko ô!  
Atsory amiko ny tananao  
Hamelona ny heriko  
Fa reraka aho, ka tantanonao,  
Ny fitiavanao, Ray ô!  
Fanilo sady toky  
Andraisako fiadanam-po,  
Ka mamelà, mamelà, Raiko ô!

4. Ry Raiko ô! Ry Raiko ô!  
Ho olom-baovao ity zanakao  
Raha tonga eo akaikinao  
Fa hosasan'i Jeso Tompo tia  
Tsy tapitra ny antranao,  
Fa manana amby ampy  
Dia manantena aho izao  
Ka mamelà, mamelà, Raiko ô!

#### **420 - Ry Raiko feno antra**

1. Ry Raiko feno antra,  
Inty aho fa ory;  
Mijaly sy mahantra,  
Ka tsy mahatraka akory.

Fiv : Jesosy no nilonjy,  
Ny ota vitanao;  
Ny rany mahavonjy,  
Nomeny ho anao.

2. Nandao ny tavanao,  
Nikaro-java-tsoa;  
Korana sy lalao,  
Sambo-drivotra avokoa,  
Jesosy no nilonjy, sns...

3. Izaho fahavalo  
Fa tsy narianao,  
Ny loza natakalo  
Hasambaram-baovao.  
Jesosy no nilonjy, sns...

4. Hanompo no iriko  
Fa zanaka nania,  
Ry hany itokiako  
Mba ho Tompoko doria.  
Jesosy no nilonjy, sns...

#### **421 - Andriamanitra ô, Ray Mpamindra fo**

1. Andriamanitra ô, Ray Mpamindra fo  
Avy mankalaza Anao tokoa izahay,

N'inon'inona midona, zavatra manko,  
Eo ambany elatrao matoky izahay.

Fiv : Mamindrà fo amiko,  
Andriamanitra ô!  
Avelao ny heloko Jeso  
Mpamonjy ô!  
Hazavao ny lalako Fanahy Masina ô!  
Fa izay no fahasambaran'ny fanahiko.

2. Jeso Kristy Tompo sy Zokinay,  
Miaraka Aminao afa-tahotra tokoa,  
Hetrahetra ny tany tsy hanimba anay,  
Izay mialoka Aminao ho ampoky ny  
soa.  
Mamindrà fo amiko, sns...

3. Ry Fanahy Masina Mpanavao,  
Hazavao re, ny ao am-poko miafina ao,  
Ka ny làlana ombako mba tarihonao  
Ny ota mahazatra mba levony koa ho  
lao.  
Mamindrà fo amiko, sns...

## **422 - Ry Andriananaharinay**

1. Ry Andriananaharinay!  
Ny hamasinanao.  
Dia tena lehibe tokoa.  
Raha te hahita Anao izahay,  
Tsy maintsy tsara fo.

2. Ny mason'ny anjelin'ao  
Mahita Anao tokoa,  
Ka tsy mba manjambena ireo  
Na dia mamirapiratra  
Ny hamasinanao.

3. Fa tsy nanota tamin'ao  
Akory izy irezo,  
Tsy meloka, tsy menatra,  
Ka misy hahazoany  
Hijery tsara anao.

4. Fa izahay, maloto fo,  
Raha te-hahita Anao,  
Tsy mana-mahamendrika,  
Fa zanak'olombelona;  
Ahoana no hatao?

5. Ry Andriananaharinay!  
Ny ran'ny zanakao;  
Ny asan'ny Fanahy koa,  
No zava-mahamendrika  
Anay hahita Anao.

## **423 - He! Maharavoravo**

1. He! Maharavoravo  
Jeso ny fitiavanao  
Izaho dia mpanota lavo.  
Nefa Jeso, nareninao

Fiv : Mamin'ny foko, loatra  
Ny fanavotana  
He! Ny foko tsy afa-manohy  
Jeso hihira ho Anao

2. Izaho mpanota adala  
No nanehoam-pitiavan-tsoa  
Ny heloko, Jeso malala,  
Navelanao tokoa tokoa.  
Mamin'ny foko, sns...

3. Endey ny hafaliako;  
Ny heloko navelanao,  
He: Maivana ny fahoriako  
Noho ny fanavotanao.  
Mamin'ny foko, sns...

## **424 - Tsaroako dia tsaroako**

1. Tsaroako dia tsaroako,  
Raiko ô! Raiko be fitia,  
Fa ny fahadisoako  
Nodiovin'ao satria  
Noho Jeso Mpamonjy soa  
Inty izaho fa afaka

He azoko tokoa, tokoa,  
Ny famelana heloka.

2. Ny aizim-pahotàna  
Raiko ô! Raiko be fitia,  
Misolo hazavana  
Mamiratra ery.  
Ny làlako mahitsy izao  
Mitory olona afaka  
Noho ny hery vaovao:  
Ny famelanao heloka.

3. Endrey, ny hafaliako  
Raiko ô, Raiko be fitia,  
Fa maivana ny diako  
Avy any Kalvary.  
Ny tahotaho-poko tao  
Tsy reko intsony, afaka;  
An-tanako tokoa izao  
Ny famelàna heloka.

4. Deraiko lalandava  
Raiko ô, Raiko be fitia  
Ny vavako hilaza  
Ny vitanao tety.  
Fa mbola misy marobe  
Maniry te-ho afaka,  
Ho azy ireny koa anie  
Ny famelàna heloka.

#### **425 - Ny ratsy efa tiako**

1. Ny ratsy efa tiako,  
Tsy tahotro, tsy henatro;  
Fa zava-bao no hitako,  
Te hijery izany aho.

2. Ao ny hazo fijaliana  
Ao ny Tompo efa maty;  
Izy no nijery ahy  
Tsy tezitra, fa niantra.

3. Hoy ny fijeriny ahy,  
"Hianao mamono ahy"

Dia hitako mahantra aho  
Ny heloko namono Azy.

4. Aiza no handosirako  
Ndrao hidiran-doza aho?  
Iza no hamonjy ahy,  
Feno ota, feno loto?

5. Nijery ahy indray Izy;  
"Avelako ny helokao"  
Fa ny ràko no manadio  
Hahazoanao fiainanana.

6. Maty Kristy, be ny ota  
Maty i Jeso! be fitia,  
Faly malahelo aho,  
Sambatra, manana ody aina.

#### **426 - Nanaton'Anao, Mpanavotra ô**

1. Nanatona Anao, Mpanavotra ô!  
Ny olo-mahantra fahiny.  
Ny rofiny be, ny senton'ny fo  
Naneho fa soa no niriny.  
Tsy nety ho sasatra Hianao,  
Tsy nisy nolavina akory,  
Fa samy nandray ny indrafonao,  
Ka ravo ny olona ory.

2. Manatona Anao, ry be indrafo,  
Ny olo-mahantra anio,  
Fa be siasia sy reraka am-po,  
Ka raisonao ankehitrilo!  
Ny maty omeo aina vaovao,  
Ny sasatra ampiadano,  
Ny masonay jamba mba hazavao.  
Ny rofin'ny fonay sitrano.

3. Ka rahatrizay hanatona Anao  
Ny tsy ho farofy intsony,  
Fa hisy ny Alahady vaovao,  
Ka sitrana tsara ny fony.  
Izay tany soa misy Anao  
No hisy ny olonao koa,

Hahita ny voninahitrao ao,  
Ry Zoky malala Tsitoha.

#### **427 - Ho vavolombelonao**

1. Ho vavolombelonao  
N'aiza n'aiza no aleha  
Izay no faniriana vao  
Sy hataoko rehareha.  
Ka raha asa no atao  
Inty tokoa fa vonona  
(ho vonona aho)  
Tsy hiala na handao,  
Tompo ô, iraho aho!

2. Ho vaolombelonao  
Eran-tany raha ilaina  
Toy ny loharano vao  
Izay mamelombelona aina.  
Hanasoa ny tany hay  
Efa mihamaina taho  
(mihamaina)  
Tompo ô, inty indray  
Alefaso, vonona aho.

3. Ho vavolombelonao  
Ao anaty fitsapana,  
Ka hijoro ho Anao,  
Na fefena, na raràna,  
Tsy hiahotra ny dia :  
Fa Hianao naniraka ahy  
(naniraka ahy)  
Tsy hiahotra aho satria  
Amiko Hianao Mpitahy.

#### **428 - Reko izao ry Tompo**

1. Reko izao ry Tompo izany antsonao,  
Miantso izany mpanompo mba ho  
irakao!  
Inty! Inty! sns...

Fiv : Inty! Inty! Inty aho Jeso!  
Inty! Inty! Iraho ho aho Jeso!  
Ekeko re ny ho miaramilanao  
Ho vonona hanao ny sitrakao, ka iraho!

2. O! Diovy Tompo izany molotro!  
Ka ny fo madio hanompo no atolotro.  
Inty! Inty! sns...

3. Tsy andeha irery, fa hiaraka Aminao!  
Ka dia mba omeo ny hery sy Fanahinao.  
Inty! Inty! sns...

4. Reko izao ny toky hoe : "Momba ahy  
Hianao"  
Ry Jesosy Tompo sy Zoky, vonona aho  
izao  
Inty! Inty! sns...

#### **429 - Inty ny olonao, Jeso Tompo ô**

1. Inty ny olonao, Jeso Tompo ô,  
Fa nandre ny antsoano  
He, maniry mba hotarihinao  
Ho akaikinao kokoa.  
Mba tariho aho, Jeso Tompo ô!  
Eo akaikinao kokoa,

Fiv : Mba tariho aho, Jeso Tompo ô!  
Mba ho olonao tokoa.

2. Tsy ny sitrako, fa ny sitrakao  
No iriko mba hatao,  
Fa navotanao ny mpanomponao  
Ka manaiky ho Anao.  
Mba tariho aho, sns...

3. Raha mitokana mba hivavaka,  
Ka miresaka Aminao,  
Velombelona ny fanahiko,  
Tafakambana Aminao.  
Mba tariho aho, sns...

4. Raha avy re izay hodiako,

Hody Aminao indray,  
Ao ny saiko vao tena afa-po  
Tonga ao an-tranon-dRay.  
Mba tariho aho, sns...

### **430 - Endrika sariaka**

1. Endrika sariaka no  
Anompoako Anao,  
Jehovah Ray  
Fa tapaka ny hevitra :  
Izaho dia olonao mandrakizay.  
He ny foko afa-jaly  
Tena ravo, sady falifaly,

Fiv : Ka endrika sariaka no  
Anompoako Anao Jehovah Ray.

2. Fa tsaroan'izany saiko,  
Mandra-maty ho tadidiko,  
Ny nanavotanao ny aiko,  
Ilay fanahy sarobidiko.  
Fa nomena fahendrena  
Izay ekena fany famonjena,  
Ka endrika sariaka sns...

3. Be ny zavatra mihatra  
Mampahory sy mandrerapo ;  
Kanefa ireny tsy handratra  
Ny arovanao, ry Ilay tsitoha  
Fa ny fony tena tony  
Tsy mba kivy, tsy mba taitra intsony  
Ka endrika sariaka sns...

4. Misy ve ny mampanahy  
Sy ny zava-manahirana ?  
He, tsy kivy ny fanahy  
Fa hijoro, ka ho mirana.  
Fa Jehovah, ray mahery  
Miandany sady koa mijery  
Ka endrika sariaka sns...

### **431 - Na be no mahareraka**

(Maintimolaly)  
1. Na be no mahareraka,  
Tsy mety kivy ny mino;  
Ny Tsitoha no heriny  
Ny lehibe no tohany.

2. Ny hani-mandrakariva  
Mofo avy an-danitra  
Ny sotroin' isan'andro  
Dia rano mahavelona.

3. Manda afo no arony  
Finoana no ampingany,  
Vavako no fofon'ainy,  
Odiaina no tànany.

4. Ho lavorary ny diany,  
Ho resy ny fahavalony.  
Dia sitraka no itany,  
Voninahitra no azony.

5. Mahereza ilay malala  
Aza ketraka hanompo,  
Lasa ny Mpitari-dàlana,  
Hanamboatra ho anao.

### **432 - Mandra-piavin'ny Tompo**

1. Mandra-piavin'ny Tompo mivavaha,  
Ny teny tsara nomeny tadidio :  
Ny adidinao , tontosay sy efao  
Mijery ny ataonao ry Ray.

Fiv : Raha mpanompo tsara hianao,  
He, ny Tompo faly aminao,  
Koa tanteraho ireo adidinao,  
Mba ho mpanompo mahasoà.

2. Mandra-piavin'ny Tompo miasà  
Ampitomboy ireo talenta azonao,  
Vola, fahaizana, aina, hery koa  
No anompoy ny Tompo Tsitoha.  
Raha mpanompo tsara hianao, sns...

3. Moa tianao va Ilay Mpamonjy  
Tompo soa  
Ny rany anie nanavotany anao !  
Ny hafany tanteraho sy hajao  
Valio ny fanavotany anao.  
Raha mpanompo tsara hianao, sns...

### **433 - Mba taominao ny fo izao**

1. Mba taominao ny fo izao,  
Ry Jeso be fitia  
Hanarahako Anao,  
Ka mba tsy hania.

2. Mba taominao ny fo izao,  
Hamoizako ny tany,  
Fa izao rehetra izao  
Dia mora lany.

3. Mba taominao ny fo izao  
Hanaraka ny dia,  
Izay nomban'ny olonao  
Tsy nantiasia.

4. Mba taominao ny fo izao,  
Hahaizako hifaly,  
Fa aty ny olonao  
Ory sy mijaly.

5. Mba taominao ny fo izao,  
Ho any amin-dRainao,  
Mba ho reko hatrizao  
Ny hafin'ny aino.

### **434 - Ny foko, ry Mpamonjy**

1. Ny foko, ry Mpamonjy,  
Atolotro Anao ;  
Maloto ka diovy,  
Mba ho fonenanao.  
Ny ranao, izay nalatsaka,  
No aoka mba hanafaka  
Izao fahotako be izao.

2. Ny fahoriam-poko  
Atolotro Anao,  
Fa he, mampitoloko,  
Manindry mafy ao ;  
O, ry nijaly an-tsitraro,  
Tohany ny fanahiko  
Mba tsy hamoy fo izao.

3. Ny fifaliam-poko  
Atolotro Anao,  
Arovy tsy aloto,  
Diovy ho Anao,  
Ampio ho tanteraka,  
Ho tonga ao an-danitra  
Hanatrika ny tavanao !

4. Ny tenako rehetra  
Atolotro Anao,  
Anao tsy misy fetra,  
Anao, re, hatrizao,  
Ka raiso ho fanananao  
Hanompo sy hanaja Anao,  
Ry Tompo sy Mpanjaka ô !

### **435 - Iza no hanoa ny Tompo lehibe ?**

1. Iza no hanoa ny Tompo lehibe ?  
Iza no hanaja Azy tsara re ?  
Iza no hitady olon-kafa koa,  
Mba hanaiky sy handray ny Tompo soa  
?  
Indreto, Jeso Tompo! izahay izao  
Avy mba hanompo, avy ho Anao

2. Tsy an-tery re no ilatsahana  
Toy ny olom-bery nadevozina;  
Ta-hanompo tsara izahay izao  
Ta-hamelkoa izay toherinao :  
Eny, Jeso Tompo! ta-hanao tokoa  
Izahay mpanompo izay nasian-tsoa.

3. Na dia ta-hanompo aza izahay,  
Be ny fahavalo iadianay;  
Izahay malemy feno tahotra,



Mba tsy horeseny, manampianay,  
Kapiteny sahy! entonao izao  
Mba hitomban-dahy ny mpiadinao.

4. Mafy re ny ady, maro be no voa,  
Misy tsy mahandry, be ny maty koa;  
Izahay mpanompo miandrindra Anao;  
Tompo izay tsy toha! mba herezonao :  
Tompo manan-kery! hatanjahonao  
Izahay, sao very ka afaka aminao.

### **436 - Ny foko, ry Jehovah ô!**

1. Ny foko, ry Jehovah ô!  
Mba ento ho Anao,  
Diovy ho fonenanao,  
Ho tsara sy vaovao.

2. Fanahin'Andriamanitra ô!  
Midina ato koa,  
Ovay ny saiko mba hadio  
Sy masina tokoa.

3. Ny aiko no navotanao,  
Ry Jeso be fitia!  
Mba hanompoako Anao,  
Ry Tompoko, avia!

4. Ry sofiko, mba mihainoa !  
Ry maso, mijere !  
Ry tongotra aman-tanako,  
Hajao ny Tompo e!

5. Ry tena sy fanahy koa!  
Avia hankatô  
Ny tenin'ny Mpanavotra,  
Izay masina sy tô

### **437 - Ry Jeso Kristy Tompo**

1. Ry Jeso Kristy Tompo,  
O! Ampio ny olonao!  
Ampianaro mba hanompo  
Sy hanao ny sitrakao;

Malemy aho re,  
Ka omeo ny herinao,  
Tsy hivily, tsy hania,  
Fa hanara-dia Anao.

Fiv : O! vonjeo, O! vonjeo,  
Ka tantano sy jereo;  
Aza afoy izahay,  
Fa Hianao no Avotray.

2. Ny foko mba diovy,  
Ry Mpamonjy lehibe!  
Ka ambeno sy arovy,  
Sao dia very aho re,  
Iriko indrindra koa  
Ny hitombo sy hamoa,  
Ka ny voka-tsoa rehetra  
Ho Anao, ry Jeso ô!  
O! vonjeo, O! vonjeo,  
sns...

3. Mba raisonao, ry Tompo!  
Ho anao tokoa izao  
Izay anananay rehetra,  
Ka anarano fo izao,  
Fa maty Hianao  
Noho ny fitiavanao,  
Ka tsy hanay hadinoina  
Ny fitiavanao anay :  
O! vonjeo, O! vonjeo,  
sns...

### **438 - Avia, Jehovah Tomponay**

1. Avia Jehovah Tomponay,  
Handray ny vavakay,  
Fa mitaraina izahay,  
Valio ny hatakay :

Fiv : :,: Avia :,: handray ny fonay,  
:,: Avia :,: ry Tomponay !

2. Savao ny alahelom-po  
Mba hifalianay ;

Na mafy aza ny manjo,  
Matoky izahay !  
sns...

3. Avia, ka taomy izahay,  
Ho tonga zanakao ;  
Mba averenonao indray,  
Fa te-ho olonao :  
sns...

4. Manolo-tena izahay  
Mba ho mpanomponao;  
Ny fonay no atolotray,  
Ka raiso ho Anao :  
sns...

5. Raha avy ny hodianay  
Ho any aminao,  
Mba raiso ny fanahinay  
Ho ao an-dapanao :  
sns...

#### **439 - Mba taomy aho e**

1. Mba taomy aho e,  
Ry Tompo ô !  
Ho tonga zanakao  
Madio am-po.  
Mba taomy aho e,  
Ho tia Anao tokoa !  
Ny fo atolotro  
Mba raisonao.

2. Tariho aho e,  
Ry Jeso ô !  
Aza ilaozanao,  
Fa be manjo.  
Trotroy an-tratranao  
Ny ondrikelinao  
Ka ento mody izao  
Ilay nania.

3. Diovv aho e,  
Fanahy ô !

Diniho sy hazavao  
Ny toetro.  
Diovv aho e,  
Ny fo ovay ho vao,  
Ka ny fanahiko  
Onenonao.

#### **440 - Ry Kristy ô, Mpanjakako!**

1. Ry Kristy ô, Mpanjakako!  
Ny foko ho Anao,  
Ny feoko hasandratro  
Hihira ho Anao.

2. Mba raiso ny fanahiko  
Hanao ny sitrakao;  
Ny tenako, ny heriko,  
Dia ento ho Anao.

3. Ny tongotro, ny tanako,  
Hiasa ho Anao;  
ny androko, ny volako,  
Omeke ho Anao.

4. Izaho dia tsy mendrika  
Anao, ry Tompo ô!  
Kanefa re, mba raisonao  
Ny foko ho Anao.

#### **441 - Raiso aho, Tompo ô**

1. Raiso aho, Tompo ô!  
Fa te ho mpanomponao;  
Raiso koa ny androko,  
Ka anarano fo izao.

2. Raiso re ny tanako  
Mba hanao ny asanao;  
Raiso koa ny tongotro  
Ho fanirakirakao.

3. Raiso ny fahaizako  
Ento mba hanaja Anao;  
Raiso koa ny volako

Ho Anao tokoa izao.

4. Raiso re ny vavako  
Hampiseho ny hafatrao;  
Raiso koa ny feoko  
Ho mpanandratra Anao.

5. Raiso ny fanahiko  
Diovy ho tempolinao;  
Raiso aho Tompo ô!  
Ho Anao mihitsy 'zao.

6. Ho Anao manokana,  
Ry Mpamonjy, Tompo soa!  
Ho Anao dia Anao tokoa,  
Ho Anao mandrakizay.

#### **442 - Endrey! 'ty fahotana**

1. Endrey! 'ty fahotana,  
Mamely ao am-po  
O! ady mampahana,  
Ka mafy ny manjo;

Fiv : :,: Vonjeo, ry Mpiantra!  
Izaho zanakao  
Fa tery sy mahantra,  
Miady lava izao. :,:

2. Ry Antoky ny aiko!  
'Zay mahafta-po,  
Ry toky antenaiko!  
'Zay tanjaky ny fo;  
Ny tena sy fanahy  
Apetraka aminao,  
Ka ataovy lehilahy  
Mpandresy toa Anao.  
sns...

3. Izaho no Mpamonjy,  
Ka matokia tokoa,  
Izaho mahavonjy,  
Koa antena ny soa;  
Ny sandriko mahery

No iankinonao,  
Hianao dia tsy ho very,  
Minoa hianao.  
sns...

4. Ry Tompo manan-kery!  
Ny fitiavanao  
Fitia feno hery,  
Ka raisiko izao;  
Ny dera aman-daza  
No mendrika ho Anao,  
Ny foko hankalaza,  
Ny voninahitrao.  
sns...

#### **443 - Raiso ho Anao ny foko**

1. Raiso ho Anao ny foko,  
Ry Jehovah Raiko ô!  
Mitoera aty am-poko  
Mba ho tompon-trano ao,  
:,: O, ry Raiko! O, ry Raiko!  
Mitoera ao izao :,:;

2. Raiso ho Anao ny foko,  
Ry Jesosy Tompo ô!  
Tsy mba vola, fa ny foko,  
No atolotro Anao:  
:,: Raiso, Tompo! Raiso, Tompo!  
Fa fanati-tsitraro. :,:;

3. Raiso ho Anao ny foko,  
Ry Fanahy Masina ô!  
Hazavao ny ao am-poko,  
Diovy ho tempolinao:  
:,: Indro, raiso ! Indro, raiso !  
Itokany ho Anao. :,:;

4. Tsy arindriko ny foko,  
Fa vohako ho Anao;  
Ka midira aty am-poko,  
Manjakà irery ao;  
:,: Eny, Tompo! Eny, Tompo!  
Raiso aho ho Anao. :,:;

## 444 - Ry Raiko feno antra

### 1. Ry Raiko feno antra!

Inty ny zanakao,  
Ny foko dia mahantra  
Raha lavitra aminao;  
Fa tany karankaina  
Izao tontolo izao  
Ka reraka ny aina  
Mihataka aminao.

Fiv : Ry Raiko feno antra!

Inty ny zanakao,  
Ny foko dia mahantra  
Raha lavitra aminao.

### 2. Nivezivezy aho

Nikaro-java-tsoa,  
Izay rehetra hita  
Nandramana avokoa;  
Nadany taona maro  
Nanaran-tsitrapo,  
Kaneffa tsy nahazo  
Izay mahafa-po.  
Ry Raiko feno antra!, sns...

### 3. Mamitaka mihitsy

Izao tontolo izao,  
Ny mamy dia mangidy,  
Izay tena soa tsy ao;  
Koa aza mba adalainy  
Intsony re, ny fo!  
Andeha mba ho hendry  
Hatramin'ny anio.  
Ry Raiko feno antra!, sns...

### 4. Ry Jeso, Mofon'aina

Sy ranon'aina koa!  
Hianao no mahatony  
Izay filan'ny fo;  
Hianao no mahavoky  
Hianao no manome

Izay irin'ny foko,  
Dia hasambaram-be  
Ry Raiko feno antra!, sns...

## 445 - Jeso mora fo indrindra

### 1. Jeso mora fo indrindra

Tsara sady mahaso,  
Tsy miova tsy mifindra,  
Tompo be fitia tokoa.  
Mba iriko ho toa Azy  
Tsy mba mety soso-po  
Ka hionona ny foko  
Raha avy ny manjo.

### 2. Jeso tia, nanetry tena

Sy nandefitra tokoa,  
Nefa tompo be harena  
Sy Mpanjaka foto-tsoa.  
Mba iriko ho toa Azy  
'Zay ninia ho ory koa;  
Ka ny sainy no fidiko,  
Fa fiainana tokoa.

### 3. He manolo-tena aho,

Ho Anao, ry Tompo soa!  
Ka ny heloko rehetra  
Mba sasaonao avokoa.  
Enga ka omenao ahy  
Fo madio sy vaovao,  
Mba hahaizako manefa  
'Zay rehetra sitrakao!

## 446 - Atolotro Anao ny tenako, ry Raiko

### 1. Atolotro Anao ny tenako, ry Raiko!

Fa Hianao no tena loharanon-tsoa;  
Izao tontolo 'zao manintona ny saiko  
Hihataka aminao, ho babony tokoa.

### 2. Atolotro Anao ny tenako, ry Raiko!

Ho eo an-tananao hosakambininao,  
Hohatanjahinao ny tena sy ny saiko,

Hisikina tokoa hiady ho Anao.

3. Atolotro Anao ny tenako, ry Raiko!  
Fa izany indrindra re no hetahetako;  
Ny ran'ny Zanakao mitory ao an-tsaiko  
Mba hanolorako Anao ny tenako

#### **447 - Hianao ry Kristy Tompo**

1. Hianao ry Kristy Tompo,  
No hasiniko izao,  
Avy aho fa mpanompo,  
Hiankohoka Aminao,  
Raiso re ny dera, saotra  
Tena mendrika ho Anao;  
He! Ny foko faly loatra,  
Faly mba hanaja Anao.

2. 'Zao no tena faniriako:  
Ny ho velona aminao,  
Ka hitoeranao ny foko,  
Fa tsy holalovanao;  
Eny, Tompo ô! Monena,  
Mba monena ao tokoa,  
'Zay no tena famonjena,  
'Zay no mahafatra-po.

3. Tsy ho orin-java-tsoa  
'Zay rehetra itoeranao,  
Tena sambatra tokoa,  
Raha ny fo no lapanao,  
Mandrosoa, fa vohako,  
Ho Anao ny foko 'zao  
Eny Tompo fa vohako  
Koa midira Hianao.

#### **448 - Ry Tompo ô! Tariho**

1. Ry Tompo ô! Tariho  
Ny ondrikelinao,  
Tantano sy vimbino  
Hanao ny sitrakao;  
Raha misy hafaliana,  
Dia taomy mba ho tia;

Raha sendra fahoriana,  
Sakano tsy hania.

Fiv : Ry Jeso ô tazano,  
Ny lalanay izao,  
Tariho sy tantano  
Ho ao, am-balanao;  
Anio dia mikasa  
Hanolo-tena koa  
Fa nenina ny lasa Hiezaka tokoa.

2. Anio ho hafaliako,  
Ny foko lasanao,  
Ny maminao no tiako,  
Hatao ny sitrakao.  
Ny androko rehetra,  
Atolotro Anao;  
Anao tsy misy fetra,  
Ka raiso, anjakao:  
Ry Jeso ô tazano, sns...

#### **449 - 'Njay reko Tompo ô!**

1. 'Njay reko Tompo ô!  
'Njay re ny feonao  
Miantso ahy Hianao  
hankany Kalvary;

Fiv : Tompo lehibe!  
Raiso aho e;  
Mba sasao ny ranao soa  
Izay tao Kalvary.

2. Malemy aho e,  
Ka mitaraina hoe:  
Vonjeo ny aiko Tompo ô!  
Vonjeo ny olonao:  
Tompo lehibe! Sns

3. Ny fiadanam-po  
Mandresy ny manjo;  
Esorinao ny tahotro,  
Ry Tompo ô vonjeo:  
Tompo lehibe! sns...

4. Mpanota tsy mandà,  
Ry Tompo! mamelà;  
Ny fahotako lehibe  
Ifonako tokoa:  
Tompo lehibe! sns...

5. Ny foko tsy madio  
Mba diovinao, anio;  
Maloto aho, Tompo ô!  
Sasao ho voadio:  
Tompo lehibe! sns...

6. Ny foko no sasao,  
Ka diovinao izao;  
Ny fahotako marobe  
Levony avokoa:  
Tompo lehibe! sns...

#### **450 - Jeso Kristy be fiantra**

1 .Jeso Kristy be fiantra!  
Mba jereo izahay  
Very amin'ota.

2.Hianao Mpiandrytsara,  
Raisonao, izahay  
Very toy ny ondry.

3. Fombanay ny tia ratsy,  
Mba ovay ho vaovao  
Ny fonay 'zay ratsy.

4.Zazabodo sy mahantra  
Izahay raha aty,  
Tsy mba manan-kery.

5.Hianao, no vatolampy,  
Tanjakay, Avotray,  
Hery sy Ampinga.

#### **451 - Tompo ô! Tsy takatry ny saiko**

1. Tompo ô! Tsy takatry ny saiko

Ny fitiavanao tsy nohajaiko  
Kanjo io no hany antenaiko  
Mba hamonjy ahy 'zao  
(hamonjy 'zao)

Fiv : (Feo 1)

Tompo ô voababonao  
Zanak'Andriamanitra  
Mamy re!

'Zany fitiavanao ry Jeso ô!  
(Feo 2)

Tompo ô dia resinao ny foko 'lay nanda  
Voababonao tokoa tokoa

Ka nasandratrao ho

zanak'Andriamanitra

Ho tarihinao an-danitra.

Mamy dia mamy re tsaroan'ny aiko  
'zao

Izany fitiavanao ry Jeso ô!

2. Ny fandavan-tenanao tsaroako,  
Fa fandavan-tena nahitako  
Ny fitiavanao izay inoako  
Fa mambomba ahy izao.  
(Mambomba izao)  
Tompo ô, sns...

3. Ry Jesosy, tsy mba misy haiko  
Afa-tsy manolotra ny aiko  
Eo an-tananao 'zay andrandraiko  
Hampijoro ahy izao  
(Hijoro izao)  
Tompo ô, sns...

#### **452 - Tompo ô! Ovay ny foko**

1. Tompo ô! Ovay ny foko  
Mba ho mora anarina  
Toy ny an'ny zazakely  
Tsotra sady marina,  
∴ Tsy mialona, tsy maditra,  
Fa manao ny sitrakao. ∴

2. Zaza, ka tsy te-hifidy

Izay homenao ahy anio,  
Ny ho azoko ampitso  
Dia ankinina aminao;  
:,: Koa tsy manahy aho,  
Fa efa niantohanao. :,:

3. Zaza, tsy maharo tena,  
Fa miankina amin-dray.  
Tsy mahery, tsy mba hendry,  
Ary tsy mahay mandeha;  
:,: Hianao no Raiko tia,  
Raiko be fahari-po. :,:

### **453 - Mihirà, ry mponina ao an-danitra**

1. Mihirà, ry mponina ao an-danitra,  
Tonga izao ny very fahizay,  
Ka ny Rainy faly sy finaritra  
mba handray ny zanany indray;

Fiv : Mihobia re ny lanitra,  
Ka derao Andriamanitra  
Eny mihobia, re, ry mino ô,  
Ka hirao ny fihiram-baovao!

2. Mihirà, ry mponina ao an-danitra,  
Fa ilay very dia hita izao,  
Voaray ho zanak'Andriamanitra,  
Efa tonga olona vaovao.  
Mihobia, re, sns...

3. Mihirà, ry mponina ao an-danitra  
Lehibe ny fifalianay,  
Ka derao izao Andriamanitra,  
Fa ny maty velona indray!  
Mihobia, re, sns...

### **454 - Veloma no apetrako**

1. Veloma no apetrako  
Fa tapaka ny hevitra,

Handao ny fahazarako,  
Fa Kristy no harahiko,

Fiv : Veloma hianao,  
Ry izao tontolo izao!  
Izaho tsy tamana aty,  
Veloma hianao!

2. Ny làlan'ota hitako  
Namono ny fanahiko,  
Fa he, ery mba tazako  
Ilay tany soa mamiko,  
Veloma, sns...

3. Mpanota ô, nahoana  
No tsy miaraka aminay?  
Fa mbola misy toerana  
Izay ho anao sy ho anay.  
Veloma, sns...

4. Veloma, fa ao aloha ao  
No tany izay honenako,  
Ka maika aho mba hankao  
Handray ny fitsaharako.  
Veloma, sns...

5. Jerosalema tazako,  
Ka velona ny hirako,  
Fa any no honenako  
Hidera ny Mpanjakako,  
Ho any aho izao,  
Ho any aho izao,  
Izaho tsy tamana aty,  
Ho any aho izao!

### **455 - Ny androm-pahasoavana**

1. Ny androm-pahasoavana  
Maneho zava-baovao;  
Mahazo fahasambarana  
Izao tontolo izao.  
Ravoravo ny efitra maina  
mbamin'ny tany karankaina;



He, torina ny teny soa,  
Ka dia afaka avokoa  
Ny olom-bery maniry ho velona.

2. Ka miandrandra ny lanitra  
Ny malahelo izao:  
Mihoby izy fa sambatra  
Nahazo aina vaovao.  
He, vahana ireo migadra,  
Afaka ny midradradradra,  
Mitsambikina ny mandringa,  
Faingana izy sady kinga,  
Ary mihoby ny lelan'ny moana.

3. Ny very no tadiavina  
Mba hody amin'ny Ray;  
Ny maty dia velomina  
Ka ravo mandrakizay.  
Izy dia mifady ny ota,  
Noho ny lova tsy ho tonta,  
Sady manaraka Azy Tompo,  
Izay voaeso sy voahombo,  
Ambara-podiny any an-danitra.

#### **456 - He, sambatra ny navelanao**

1. He, sambatra ny navelanao  
Ny helony, ry Jehovah!  
Ny otany voasaronao,  
Ka mba isaina koa;  
He, sambatra ny mahitsy fo,  
Fa azy ny lovasoa.

2. Ny fo nony nampanginiko,  
Ny heriko nihalany;  
Ny ota izay nafeniko  
No dia nahatonga izany,  
Ka ketraka ny fanahiko,  
Nisento sy nitomany.

3. Ny otako dia nambarako,  
Niantso ny Tompo aho,  
Niaiky ny fahadisoako,

Nivalo sy nitalaho,  
Ka dia nomeny indrafo,  
Mba ho afa-keloka aho.

4. Jehovah no fialofako  
Sy manda miaro ahy;  
Ny rano, na dia tondraka,  
Dia tsy hahatratra ahy;  
Ny hobin'ny afa-keloka  
No ampihirainao ahy.

5. Ry olon'Andriamanitra,  
Vonjeo ny andro soa,  
Ny otanao izay miafina,  
Itsorinao avokoa;  
Raha mita ilay ony maizina,  
Dia aronao ny Tsitoha.

#### **457 - Jeso hany iriko**

1. Jeso hany iriko,  
Loharanon'aiko,  
Sy sakaiza soa!  
Mamiko indrindra  
Ny ho tafafindra  
Any Aminao,  
Na dia toa takona,  
Hianao no ao an-tsaiko,  
Sady tohan'aiko.

2. Loza tsy misava,  
Sento lalandava  
No mitranga izao;  
Notrotoiny aho,  
Ka ny fahavalo  
Tsy mahazo ao.  
Na be aza ny manjo,  
Tsy ho kivy ny fanahy,  
Jeso mbola ahy.

3. Ny haren'ny tany,  
Na dia tsara ihany,  
Tsy ahoako;

Hianao irery  
Lova tsy ho very,  
Reharehako!  
Ka na fahoriam-be  
No mihatra amin'aiko,  
Hianao tsy foiko.

4. Raha ao am-poko  
Hianao, ry Tompo,  
Ka manjaka ao,  
Ireo ahiahy,  
Nahavalaka ahy,  
Dia afakao.  
Na mavesatra entana,  
Hianao no antenaiko  
Sady Tohan'aiko.

#### **458 - Tompo tia ô, midina**

1. Tompo tia ô, midina,  
Mitoera aminay,  
Ka fenoy fifaliana  
Ao anatin'ny fonay.  
Hianao, ry be fiantra,  
Tomponay Mpamindra fo,  
No Mpamangy ny mahantra,  
Ka midira ao am-po!

2. Aoka re ny fofon'ainao  
Hahavelona anay,  
Hanahafanay ny sainao  
Hampiadana anay.  
Ny fitiavanay ny ota  
Mba vonoy, ry Tomponay,  
Manafaha anay mpanota,  
Ry Andriamanitray!

3. Ny mpanomponao ampio  
Mba handraisany Anao,  
Aza afoy fa mba tahio,  
Aoka ho tempolinao,  
Hianao no hotompoinay,  
Ry Andriamanitra,

Hianao no hoderainay  
Hatrary an-danitra.

4. Tanteraho ao am-ponay  
Ny fiainana vaovao,  
Ny fanahy sy ny sainay  
Mba fenoy ny herinao.  
Amboary sy havaozy  
Isan'andro izahay  
Mandra-pahatonga any  
Aminao mandrakizay.

#### **459 - Jeso Loharanon'aina**

1. Jeso Loharanon'aina,  
Jeso Masoandronay!  
Izao ny fonay mitaraina,  
Mba velomy izahay!  
O, savao ny zavon-tany  
Ao am-pandehananay,  
Dia Hianao ihany  
No ho Masoandronay.

2. Jeso, Mofon'aina soa,  
Mba vokiso izahay,  
Jeso, Làlana tokoa,  
Mba tariho izahay!  
Alfa sy Omega tsara  
Hianao, Mpamonjinay;  
Teny soa manambara:  
Jeso no fiainanay.

#### **460 - Ario ny tahotrao**

1. Ario ny tahotrao,  
Ry olona osa fo!  
Izay lazain'ny Tomponao  
Tsy hisy tsy ho to;  
Ny fisentoanao  
Dia reny avokoa;  
Ny feon'ny fitarainanao  
Valiany tokoa.

2. Mpanjaka lehibe  
No itokianao;  
Ny tanany mahery re  
No hamonjena anao;  
Tsy misy mahalà  
'Zay tiany hatao:  
Handositra amin-tahotra  
Ny fahavalonao.

3. Ny fitondrany soa  
No iankinonao;  
Koa aoka hofidiny koa  
Izay halehanao;  
Na dia tsy takatrao  
Ny sainy lalina.  
Izay tendreny ho anao  
Ekeo ho marina.

4. Ry Tompo tsara ô!  
Mba mijere anay,  
Na reraka aza re ny fo  
Tohanonao 'zahay:  
Ovay ny hevitrany,  
Ny fonay hazavao,  
Izay atoronao anay  
Hizoranay izao.

#### **461 - Aoka ho an'Andriamanitra**

1. Aoka ho an'Andriamanitra  
Ny fanendrena ny lalanao.  
Fa hovimbiny hianao  
Amin'ny lalan-tsarotra ;  
Fa toky tsy mamitaka  
Ny tenin'Andriamanitra.

2. Fa inona no azonao  
Amin'ny fiahiana ?  
Tsy afaka ory hianao  
Noho ny fisentoana ;  
Na be herehina hianao,  
Ho be ny alahelonao.

3. Lefero kely, maneke  
Izay sitrak'Andriamanitra,  
Ny zavatra tinendriny  
Tsy maintsy mahasoana anao ;  
Isika nofinidiny,  
Ka tsy ho foiny indray.

4. Fa fantatr'Andriamanitra  
Izay andro hifaliana  
Isika no hodiovinay  
Amin'ny fahoriana:  
Tsy maintsy hofantenana  
Vao afa-pahoriana.

5. Dia aza atao fa hianao  
Afoin'Andriamanitra ;  
Fa Izy dia mananatra  
Ny zaza izay tiany,  
Na dia mba manomana azy  
Handova ny an-danitra.

6. Misaora ny Anarany,  
Ka aza ketraka hianao  
Fa ho tanteraka aminao  
Ny soa lazain'ny Teniny ;  
Fa toky tsy mamitaka  
Ny Tenin'Andriamanitra.

#### **462 - Eo an-tananao, ry Raiko!**

1. Eo an-tananao, ry Raiko!  
No apetrako izao  
Ny fiainako rehetra,  
Mba tahio ny zanakao;  
Marobe ny fahavalo  
Ta-hamely ahy e;  
Ry Jehovah, Ray Mpiaro!  
Mba arovinao anie.

2. Raha mbola eto aho,  
Zaza be fisiasia,  
Tia ratsy noho ny soa,  
Ka mandà ny Tompo tia;

Aza mba manary ahy,  
Ry Mpamonjy tsy mandao!  
Aza manalavitra ahy,  
Andrao dia takona aminao.

3. Na ho lava, na ho fohy  
No hiainako ety,  
Tsy mba sitrako akory  
Ny handà 'zay tendrinao;  
Raha, tonga anio ny andro  
Izay handaozako ity,  
Eo an-tànanao no tiako,  
Raiso aho ho ary.

4. Eo an-tànanao, ry Raiko!  
No apetrako izao  
Aina, tena sy fanahy,  
Mba vonjeo ny zanakao;  
Ampianaro hahazaka  
Fitondrana tianao;  
Ilazao mba hahalala  
Fa izao no sitrakao.

5. Eny, Raiko! mba valio  
Izao fivavako izao,  
E, jereo, ka mba tahio  
Izaho miandrandra Anao;  
Mba sasao ny ranao soa,  
Dia hadio aho izao ;  
Ry Mpamonjy! mihainoa  
Ny mpanomponao izao.

#### **463 - Jehovah no Ampinga**

1. Jehovah no Ampinga  
Sy Masoandro koa,  
Hiaro amin-doza  
Sy hanazava koa.

2. Ka tsy handresy ahy  
Izay fahavaloko;  
Na ota na devoly  
Ho resy avokoa.

3. Fa raha alaim-panahy,  
Na misy izay manjo,  
Hanatona Azy aho  
Hakako hery koa.

4. Rehefa tapitra andro,  
Ka tonga amiko  
Izay hialako aina,  
Dia tsy ho tahotro.

5. Ny lanitra haleha  
Sy hitoerako;  
Hidera an'i Jeso  
Mandrakizay doria.

#### **464 - Jeso Tompo manan-kery**

1. Jeso Tompo manan-kery,  
Miarova anay!  
Ry Mpitady ondry very,  
Mamonje anay !

2. Jeso Tompo be fitia,  
Mitsinjova anay !  
Ny fanahinay mania,  
Miantrà anay!

3. Jeso Tompo be fiantra,  
Mijere anay !  
Ny fanahinay mahantra,  
Mitahia anay.

4. Jeso Tompo mahalala.  
Mananara anay !  
Ny fanahinay adala,  
Mitariha anay.

#### **465 - Ry Jeso ô, ry Jeso !**

1. Ry Jeso ô, ry Jeso!  
Ny foko lasanao,  
Ka Hianao irery  
No Tompoko izao;  
Tsy manan-tahotra aho,

Hianao no aroko;  
Ny lalako mazava,  
Hianao faniloko.

Fiv : Ry Jeso ô, ry Jeso!  
Ny foko lasanao,  
Ka Hianao irery  
No Tompoko izao.

2. Mitaona dia mitaona  
Ny zava-poana;  
Ankoso-bolamena  
Mamirapiratra;  
Anefa, ry Mpamonjy!  
Izay ampianao  
Dia haharesy tsara  
Izao tontolo izao.  
Ry Jeso ô, ry Jeso! sns...

3. Ny nofoko malemy,  
Ka be ny sitrapo;  
Be koa ny fitsapana  
Mahazo ahy izao ;  
Anefa, Jeso tia!  
Raha re ny feonao,  
Mahazo hery aho  
Hanao ny sitrakao.  
Ry Jeso ô, ry Jeso! sns...

4. Ry Jeso ô, ry Jeso!  
Mba tovy amiko  
Ilay teny maharavo  
Hoe "Sakaizako";  
Iriko lalandava  
Hiaraka aminao,  
Mba hahitako tsara  
Ny fitiavanao.  
Ry Jeso ô, ry Jeso! sns...

5. Ny dianao jereko  
Ety an-dàlana,  
Ambara-pahatratra  
Ilay fitsaharana;  
Omeo hery aho

Hanompo tsara Anao;  
Fa fantatrao, ry Jeso!  
Ny foko lasanao.  
Ry Jeso ô, ry Jeso! sns...

## 466 - Ry Jeso ô ! ry Jeso ô !

1. Ry Jeso ô! ry Jeso ô!  
Ny fonay tia Anao,  
Ra manomàna anay izao,  
Ho any aminao :  
Fa sambatra avokoa  
Izay tonga ao aminao;  
Izahay maniry koa  
Ho eo ankilanao.

Fiv : Fa sambatra avokoa  
Izay tonga ao aminao;  
Izahay maniry koa  
Ho eo ankilanao.

2. Ry Jeso ô! ry Jeso ô!  
Ampionao izahay  
Hihevitra ny lanitrao  
Izay hodianay  
Fa sambatra, sns...

3. Ry Jeso ô! ry Jeso ô!  
Maloto izahay,  
Tsy mendrika ny lanitrao,  
Diovinao izahay :  
Fa sambatra, sns...

4. Ry Jeso ô! ry Jeso ô!  
Ny fahavalonay  
Mamely ny fanahinay,  
Reseo, fa rafinao :  
Fa sambatra, sns...

5. Ry Jeso ô! ry Jeso ô!  
Sao reraka izahay  
Miandry ny hodianay,  
Tohanonao 'zahay :  
Fa sambatra, sns...

## 467 - Mba manampia anay

1. Mba manampia anay,  
Ry Jeso Tompo soa!  
Ka dia ny fiainanay  
Hambinina avokoa.

2. Ny tadiavinay  
Dia fihavanana,  
Tsy isarahana aminao  
Izay Fiainana.

3. Ampionao izahay  
Mba hahalala Anao,  
Ka aoka mba harahinay  
Ny nodiavinao.

4. Dia mankalaza Anao  
Izahay, ry Tompo ô!  
Fa, he, ny fitahianao  
Dia tena mahaso.

## 468 - Irinay Jeso tia

1. Irinay Jeso tia,  
Mpanota izahay,  
Ka misy alahelo  
Aty anatinay;  
Irinay ny Mpamonjy  
Hiseho ho anay,  
Hanafaka ny ota  
Mba hifalianay.

2. Irinay Jeso tia  
Mba hanazava anay,  
Fa maizina ny sainay,  
Ka diso izahay;  
Irinay Jeso Kristy  
Hanolo-tsaina anay,  
Irinay Jeso hendry  
Mba hianaranay.

3. Irinay Jeso tia

Ho tonga aminay,  
Hiantra sy hiaro  
Sy hanadio anay;  
Na dia malemy aza  
Ka reraka izahay,  
Rehefa voavonjy,  
Matanjaka izahay.

4. Ry Tomponay malala!  
Ry Jeso tianay!  
Ry Havanay mahery!  
Ry Rahalahinay!  
Vonjeo izahay mpanota  
Miankina aminao,  
Tahio izahay mahantra  
Mivavaka aminao.

## 469 - Jeso ô, Mpitia anay

1. Jeso ô, Mpitia anay !  
Maminay ny teninao,  
Osa ny fanahinay,  
Fa mahery Hianao :

Fiv : Mamy, ry Jeso ! (in-3)  
Ny fitiavanao.

2. Jeso ô, Mpitia anay !  
Mahadio Hianao ;  
Ka ny halotoanay,  
Aoka ho voasasanao :  
Mamy ry Jeso !, sns...

3. Jeso ô, Mpitia anay !  
Tompon'aina Hianao ;  
Maro ny aretinay,  
Nefa samy afakao :  
Mamy ry Jeso !, sns...

4. Jeso ô, Mpitia anay !  
Aoka hotarihinao ;  
Aza mba mandao anay,  
Mandra-pahafatinay :  
Mamy ry Jeso !, sns...

## 470 - Ny foko, ry Mpamonjy

1. Ny foko, ry Mpamonjy,  
Mangetaheta Anao,  
Maniry lalandava  
Hikambana aminao.

Fiv : Tsy afaka ao am-poko  
Ny faniriana Anao ;  
Oneno, re, ny foko  
Ho lapanao!

2. Ny androm-pahoriana,  
Raha lapanao ny fo,  
Manjary fitahiana,  
Izay manadio ny fo  
Tsy afaka ao am-poko, sns...

3. Ny ora fifaliana,  
Raha ao anilanao,  
Mamelom-paniriana  
Hanao ny sitrakao :  
Tsy afaka ao am-poko, sns...

4. Ho lao ny fahotako  
Raha akaikezinao,  
Tsy misy hadalako  
Izay tsy afakao :  
Tsy afaka ao am-poko, sns...

5. Finaritra ny saiko  
Raha ipetrahanao,  
Fa reraka ny aiko  
Raha halavirinao :  
Tsy afaka ao am-poko, sns...

## 471 - He sambatra aho, Jeso

1. He sambatra aho, Jeso  
Raha miaraka aminao  
Fa ny lalanao dia lavim-pahoriana  
Ny ali-mampahory, ny raho-mitatao  
Eo anilanao dia mody fitahiana,

Tano aho, Jeso, hiaraka aminao  
Izay làlana ombako e ! mba hazavao

2. Izao no faniriako manetsika ny fo:  
Ho sakaizanao mandrakizay doria  
Na inona mihatra, na inona manjo,  
Hianao no antenaiko hitantana ny dia,  
O ! Avia, Jeso tano aho e!  
Tantanonao ny diako Tompo mamonje !

3. Izay sakaizanao, Jeso, no ampoky ny  
soa,  
Feno haravoana sy lavitra manjo;  
Izay rehetra ilaina anananao tokoa,  
Raha miaraka aminao, Mionona ny fo.  
Sambatra aho Jeso, tretrika tokoa  
Ravo ny fanahiko, tolорanao ny soa.

4. Inona no mamiko mihoatra noho  
Hianao?  
Tompo manan-kery sy loharanon-tsoa?  
Izay zavatra ilaiko azoko aminao  
Koa onenonao ny foko, ho lapanao  
tokoa  
Manjakà, Jeso, ato am-poko Hianao,  
Izay fahotako e! Ry Tompo, avelao.

## 472 - Iriko e, ry Jeso hitovy aminao

1. Iriko e, ry Jeso!  
Hitovy aminao  
Izay tsy manan-keloka,  
Fa masina tokoa,  
Iriko e, ry Jeso!  
Ho tonga toa Anao,  
Namonjy sy nanafaka  
Fanahy, aina koa.

2. Iriko, ry Mpamonjy!  
Mba ho sakaizanao,  
Hiaraka ory aminao  
Ka tsy handao Anao;  
Iriko, ry Mpamonjy!  
Hanara-dia Anao;



Ny hazo fijaliana  
Ho entiko izao.

3. Iriko, ry Mpandresy!  
Hiaraka aminao,  
Ho eo an-toby lehibe,  
Ho miaramilanao;  
Iriko, ry Mpandresy!  
Hanaraka Anao,  
Mitondra ny fanevanao,  
Handray ny herinao.

4. Iriko, ry Mpanjaka!  
Ho ao an-dapanao  
Hiara-paly aminao,  
Fa tonga zanakao;  
Iriko, ry Mpanjaka  
Ho eo anilanao  
Handray ny lova atolotrafo,  
Mpanjaka be fitia!

#### **473 - Mombà anay, ry Jeso Tompo ô**

1. Mombà anay, ry Jeso Tompo ô !  
Fa maizina ny alina aty;  
Tsy misy vonjy raha tsy aminao;  
Mpamonjy tia ô ! Mombà anay !

2. Mandalo koa ny andronay ety ,  
Ka mihalò ny fifalianay;  
Miovaovao izao rehetra izao;  
Ry tsy miova ô ! Mombà anay.

3. Aza mba mivahiny aminay,  
Aza mihevitra ny helokay;  
Aoka ho be ny famindranao fo;  
Ry Jeso Tompo ô ! Mombà anay.

4. Tsy mahaleo tena izahay,  
Fa mora resy, mora kivy koa;  
Ry Jeso Tompo ! Aoka honenanao  
Ety an-dasin'ny mpanomponao.

5. Ny teninao no fifalianay;

Ny masonao mitari-dalana;  
Ary ny herinao no tanjakay;  
Sakaiza tsara ô ! mombà anay.

6. Izay ombanao afa-tahotra,  
Tsy mety kivy na mamoy fo ;  
Tsy misy fahoriana izay  
Haninona ny fo arovanao.

7. Rehefa tonga ny fotoana  
Hitànay ilay ony maizina,  
Aoka ny tavanao hazava ao,  
Amin'izany re mombà anay.

#### **474 - Jesosy ô, Hianao no faleha**

1. Jesosy ô! Hianao no faleha!  
Mba hankanesana amin'ny Ray.  
Ka mitariha anay Mba handeha  
Amin'ny lalana marina indray.

2. Fa Hianao no Mpamonjy voatendry,  
Zanaka mandrakizay Hianao;  
Ka Hianao no Mpitarika hendry,  
Làlana amin'ny Ray Hianao.

3. Diso ny tsara, ka dia nizotra  
Tamin'ny làlana ratsy izahay;  
Koa mamerena anay mba hizotra  
Amin'ny làlana tsara indray.

4. Fa Hianao no mitondra ho any  
Amin'ny lanitra fonenanao;  
Ary tsy misy mahazo mankany  
Afa-tsy amin'ny alàlanao.

5. Maro ny zavatra izay mampahory,  
Fa Hianao no Mpiaro anay;  
Aoka izahay tsy ho reraka akory,  
Ry Mpanalàlana amin'ny Ray!

#### **475 - Jeso Mpamonjy Mpiandry tokoa**

1. Jeso Mpamonjy Mpiandry tokoa!  
Ampivereno hanaraka Anao;  
Ondry mania, manary ny soa,  
Aza avela hiala aminao.

2. Taomin'ny ratsy, fitahin-tSatana,  
Mila ho lasan-ko babo izahay,  
Fa Hianao no mahery mitàna  
Tsy hahavery ny ondry iray.

3. Varivariana, salasalaina,  
Be ahiahy, jereo izahay;  
Ampianaro ny tsy hary saina,  
Ampitsaharo ny fanianay.

4. Aina nomenao hisolo ny very,  
Ary ny ranao naravotra anay,  
Fa Hianao no nitondra irery  
Fampijalian-kanitsy anay.

5. Fa ny fiainan-tsi-hita resenao  
Velona mandrakizay Hianao;  
Dia fiainana an-danitra omenao  
Izay ondry mety manaraka Anao.

#### **476 - Ny eo akaikinao ry Ray no mamiko izao**

1. Ny eo akaikinao, ry Ray,  
No mamiko izao,  
Hanjary tena tafaray  
Ny foko sy ny Anao  
Soa re, ry Raiko ô!  
Raha eo anilanao;  
Ny hazo fijaliana  
Ho tonga maivana.

2. Ny eo akaikinao, ry Ray,  
No herin-janakao;  
Hianao irery no mahay  
Manampy ahy izao.  
Soa re, ry Raiko ô!  
Raha eo anilanao;  
Ny ota tsy hanapaka

Ny olona afaka.

3. Ny eo akaikinao, ry Ray,  
No mandako tokoa;  
Ny ratsy dia tsy hahay  
Handrombaka ahy koa.  
Soa re, ry Raiko ô!  
Raha eo anilanao;  
Ny ora izay manjombona  
Ho fiadanana.

4. Ny eo akaikinao, ry Ray,  
No fifaliako izao,  
Ny tanako dia hifandray  
Amin'ny tànanao.  
Soa re, ry Raiko ô!  
Raha eo anilanao:  
Fenoinao fanambinantsoa  
Ilay kapoakako.

#### **477 - Oram-be mivatratra arotsahy Tompo ô**

1. Oram-be mivatratra  
Arotsahy Tompo ô!  
Fa mangetaheta loatra  
Izahay mpanomponao  
O! valio, O! valio,  
Mitaraina, ka valio.

2. He! Malazo re ny voly  
Izay maniry tsy mamoa;  
Nefa raha omenao aina,  
Dia ho vokatra tokoa.  
O! vangio, O! vangio,  
Sao dia maty, ka vonjeo.

3. Tovy eto, ry Mpamonjy!  
Izay nambara fahizay,  
Ka iraho ny Fanahy  
Amin-kery lehibe,  
O! henoy, O! henoy,  
Ka valio ny vavakay.

4. He! Toa kivy ka manahy  
Izahay mpiasanao;  
ka ela, ry Fanahy!  
Aseho ny herinao,  
O! avia, O! avia,  
Misehoa, Fanahy ô!

#### **478 - Ny hirako izao Ray be fitia**

1. Ny hirako izao,  
Ray be fitia,  
Ny ho akaikinao  
Bebe kokoa,  
Izay, re, no hirako,  
Mandrapahafatiko;  
::: Akaikinao:::

2. Raha mba sarotra  
Ny diako  
Ka zary maizina  
Ny làlako,  
Ry Ray! Akaikinao  
No tian'ny zanakao:  
::: Akaikinao:::

3. Ao no hiseho re  
Ny tohatra,  
M ba hanatonako  
Ny lanitra,  
Anjely miantso ahy  
Akaikinao, ry Ray!  
::: Akaikinao:::

4. Ny fahoriana  
Sy loza koa,  
Raha eo anilanao,  
Dia mody soa,  
Ka dia tano aho  
Ho ao akaikinao:  
::: Akaikinao:::

5. Na dia hilentika  
Ny androko,  
Ary izao hita izao

Hilaozako,  
Mbola ho hirako,  
Ry Andriamanitra!  
::: Akaikinao:::

#### **479 - Jeso no anjarasoa izay mahafa-po tokoa**

1. Jeso no anjarasoa  
Izay mahafa-po tokoa ,  
Soa tsy manam-paharoa,  
Ahy Jeso : Ampy izay.

Fiv : Ahy Jeso hatrety  
Ahy Jeso hatrary  
Ahy Jeso Zoky tia  
Mandrakizay doria, doria.

2. Vola sy harena be  
Maro tia tokoa anie;  
Nefa mamiko ny hoe:  
Ahy Jeso: Ampy izay.  
Ahy Jeso hatrety, sns...

3. Fahefana, laza soa  
Mahafatifaty koa;  
Nefa izao no tena soa:  
Ahy Jeso: Ampy izay,  
Ahy Jeso hatrety, sns...

4. Eny, izao rehetra izao  
Tsy hamoizako Anao,  
Ry Jeso Izay tsy mandao!  
Ahy Jeso: Ampy izay.  
Ahy Jeso hatrety, sns...

5. Jeso, aina, hery, zo;  
Jeso, lova tsy mba lo;  
Jeso, fianinam-po;  
Ahy Jeso: Ampy izay,  
Ahy Jeso hatrety, sns...

#### **480 - Mamin'ny foko, ry Jeso ô**

1. Mamin'ny foko, ry Jeso ô !  
Ny famonjena izay vitanao;  
Ny hadisoako navelanao  
Tena afaka aho mandrakizay.

Fiv : Jeso malala ô !  
Mpamonjy soa!  
Indro ny aiko raiso ho Anao ;  
Velon-kanompo,  
velon-kanoa,  
Vonon-kanao izay sitrakao.

2. Tano ny foko, ry Jeso tia!  
Zaza tsy mahasaraka Anao;  
Mbola malemy mora mania,  
Tano hifikitra ao aminao.  
Jeso malala ô! sns...

3. Aoka ny foko sy ny fonao  
Hiara-mitepo tena iray;  
Aoka ny saiko sy ny sainao  
Hiray safidy mandrakizay.  
Jeso malala ô ! sns...

#### **481 - Ry Tompo be fitia !**

1. Ry Tompo be fitia!  
Izaho zanakao  
Tantano tsy hania  
Hiaraka aminao;  
Fa mamiko tokoa  
Ny eo akaikinao;  
Tsy orin-java-tsoa,  
Izay sakaizanao.

2. Harena be an-tany  
Mamilivily fo,  
Fa tiana mora lany  
Ka tsy mampionom-po;  
Izany aniriako  
Hifikitra aminao;  
Atolotro ny foko  
Ho eo an-tananao.

3. Fa raha izaho irery  
Voasakan-tsitrato,  
Mandeha manirery,  
Ka maro no manjo ;  
Izany no ilàko  
Hiaraka aminao,  
Vimbino aho, Raiko!  
Ho eo an-tananao.

4. Tsy hitako mihitsy  
Izay mahafa-po,  
Tsy misy ety akory  
Izay tsy mety lo;  
Fa ao am-paradisa  
No feno zava-tsoa,  
Tsy mahadisadisa,  
Fa sambatra tokoa.

#### **482 - Jehovah ô! Hianao**

1. Jehovah ô! Hianao nandinika ahy,  
Ka fantatrao ny toe-piainako;  
Ny fo sy saina mbamin'ny fanahy  
Tsy miafina aminao, ry Tompoko!

2. Ka na mipetraka aho, na mandeha,  
Izay rehetra ataoko hitanao,  
He, fantatrao ny lalana haleha,  
Ny androko dia eo an-tananao.

3. Na velona aho, eny, maty aza,  
Ny tenako dia eo imasonao,  
Ka toerana aiza, lalana mankaiza  
No hialako tsy ho hitanao?

4. Ry Tompo! tena mahagaga loatra  
Ny asanao sy ny fisainanao ;  
Tsy misy saina mety mahatratra  
Ny fahendrenao sy ny herinao.

5. Izao no hany zavatra iriko :  
Velaro indrindra ny fitiavanao,  
Hahaizako hametraka ny foko  
Hionona eo am-pela-tananao

## 483 - Zanahariko Tsitoha

1. Zanahariko Tsitoha,  
Tompo, Hery sy Fitia,  
Ray hatramin' ny taloha,  
Ahy anio, ka ho doria.  
Manjaka mandrakizay  
Ao am-poko, Tompo soa;  
Dera, laza, Anao ry Ray !  
Zanaka, Fanahy koa.

2. Ny finoako Anao,  
Hatanjaho, mba hamoa  
Hiasako ny asanao,  
Hamafazako ny voa.  
Aoka ny Fanahinao  
Jiro mba hitarika ahy  
Ka apetrako aminao  
Na ny tena na fanahy.

3. Antenaiko, Hianao, Jeso  
Izay Mpitsara lehibe  
Hanamarina ahy ao,  
Na mpanota aza re.  
Dia hiezaka aho ety  
Mba hanao izay mendrika  
Hamindranao fo ary  
Fa voavela heloka.

4. Ray ô, ny fitiavanao  
Afindrao ho toetrako,  
Mba hitiavako Anao,  
Ary koa ny namako.  
Ho mpanompo aho re!  
Ho mpitory koa Anao!  
Mba hanjaka an-tany e,  
Tompo, ny fitiavanao.

## 484 - Ireo didinao, Jehovah Ray

1. Ireo didinao, Jehovah Ray;  
Izay tianao hankatoavinay  
Dia reharena sy voninahitra,

Satria filamatry ny ao an-danitra.  
Ilaina mba hiseho, fa tsy hiery,  
Ho fisintonana ireo izay very;  
Fa antoky ny fiainanay,  
Hatramin' izao, mandrakizay.

2. Ny fitsipikao, Tomponay  
Izay nomenao mba harahinay,  
Dia mampifantina izay anjara soa  
Ka manamboatra sy manatsara,  
Mampisy endrika itony tena  
Sy manazava ny firenena,  
Ka antoky ny fiainanay,  
Hatramin' izao, mandrakizay.

3. Ireo teninao, Jesosinay  
No hany zavatra ivelomanay,  
Fa tanjaka tokoa, tena hery be  
Hahafahanay ny lalana mideza re,  
Sakafo mahavelona ny aina,  
Sy mampiravo tokoa ny saina,  
Tena antoky ny fiainanay,  
Hatramin' izao, mandrakizay.

## 485 - Moa Jesosy ve tsy ahy?

1. Moa Jesosy ve tsy ahy?  
Andriamanitra mahery  
Koa nahoana no hanahy  
Izy miambina, mijery.  
Fahavalo na dia maro  
Tsy mba mahakasika ahy  
Izy no ampinga miaro,  
Koa izaho tsy hanahy.

2. Moa Jesosy ve tsy ahy?  
Ilay Mpanolotsaina hendry  
Koa tsy kivy fa ho sahy  
Amin-java-tsoa kinendry.  
Tsy manaonao foana  
Fa tarihin-Kapiteny.  
Tsy manahy satria nahoana?  
Ao ny saina izay nomeny.

3. Moa Jesosy ve tsy ahy?

Ilay Jesosy mahagaga.

Mpanasitrana, Mpitahy

Ka ahoako izay hitranga?

Ranomasina aza tao,

Nampangininy ka tony;

Hainy mihitsy ny manao

Hahato ny sitrapony.

4. Moa Jesosy ve tsy ahy?

Rain' ny mandrakizay, eny!

Velon-toky ny fanahy

Izay nènkeny, novonjeny,

Koa na ory sy mijaly

Aza aho ety an-tany,

Vetivety dia hifaly :

Mampaninona izany?

5. Moa Jesosy ve tsy ahy?

Ilay Andriampiadananantsika.

Andriamanitra Mpiahy,

Fitahiana feno hika.

Famonjena efa vita

Hofikiriko hatrany,

Fahasoavana hampita,

Any am-paradisa any.

#### **486 - Inona no hahasarakana ahy**

1. Inona no hahasarakana ahy

Amin' ny fitiavanao, Jeso?

Fahoriana ve, sa ahiahy?

Fahantrana, sa famoizampo ?

Fiv : Tsia, ry Jeso Tompo be fitia,

Izaho tsy mivadika Aminao

Fa mandrakizay doria

Izaho dia hanaraka Anao.

2. Inona no hahasarakana ahy

Amin' ny fitiavanao, Jeso ?

Zo sy laza sy fakampanahy?

Sa harena, zava-mora lo?

Tsia, ry Jeso, sns...

3. Inona no hahasarakana ahy

Amin' ny fitiavanao, Jeso?

Sabatra, sa fanenjehamafy?

Sa mosary, ady be manjo?

Tsia, ry Jeso, sns...

4. Inona no hahasarakana ahy

Amin' ny fitiavanao, Jeso?

Faty ve no hampivadika ahy,

Loza, hery, fahefana koa?

Tsia, ry Jeso, sns...

5. Eny, izao rehetra izao, ry Tompo,

Tsy mba hahasarakana Aminao!

Na inona hanjo ity mpanompo,

Dia hijoro, tsy handao Anao!

Velona aho, Tompo, eny maty,

Dia tsy mivadika Aminao!

Hianao no velona ao anaty,

Ka doria, ny foko ho Anao!

#### **487 - Fanavaozan'izay mahagaga tokoa**

1. Fanavaozan'izay mahagaga tokoa

Nomen'i Jeso ahy re,

Fahazavan'ny fanahy izay mahafa po

Nomen'i Jeso ahy re,

Fiv : :.;Hatramin'izao dia endrey :.;

Ny fitepon'ny foko izay ravo tokoa

Onenan'ny Tompo Jeso.

2. Ny fiainako be siasia taloha

Voaova mihitsy izao

Eny, ny fahotako, izay nahavao

Voasasany koa izao.

Hatramin'izao, sns...

3. Ny finoako, ny fanantenako diabe,

Ny tokiko fatratra koa,

Ny fisalasalana dia levona re,

Ny saiko mandroso ho soa.

Hatramin'izao, sns...

4. Tonga mamirapiratra fatratra ery  
Ny aloky ny faty re!  
Ka dia tsinjoko ilay vavahady ary  
Mankao an-tanan-dehibe.  
Hatramin'izao, sns...

5. Tsy miato, mizotra mankany tokoa  
Ny diako hatramin'izao  
Hovantaniko any Ilay Tompo soa,  
Jesosy malala no ao.  
Hatramin'izao, sns...

### **488 - Na inona na inona hitranga, Jeso!**

1. Na inona na inona hitranga, Jeso!  
Na ny lanitra ho manga, Jeso!  
Na ho maloka mangina, Jeso!  
Dia ho feno fifaliana, Jeso!

Fiv : Ny fotoana dia handalo, Jeso!  
Fa tsy hisy hampimalo, Jeso!  
Raha miorina ao am-poko, Jeso!  
Ilay fitiavanao inoako, Jeso!

2. Raha jereko ny andro lasa, Jeso!  
Tao ny tsiky, tao ny ratra, Jeso!  
Nefa Hianao, Ilay Mpampahery, Jeso!  
No nambomba sy nijery, Jeso!  
Ny fotoana, sns...

3. Ny ho avy antenaiko, Jeso!  
Mbola ho fifalian'ny saiko, Jeso!  
Ny hasasarako hisava, Jeso!  
Ny harivako hazava, Jeso!  
Ny fotoana, sns...

### **489 - Tena sambatra sy maha-te ho tia**

1. Tena sambatra sy maha-te ho tia  
Izay masina, madio fisainana  
Fa miara-dalana, mifankatia  
Amin'Andriamanitra Fiainana.

Fiv : Masina tokoa re ny Tompo.  
Tianay mba ho masina  
Saina tena sy fanahy  
Ka fiainan-danitra tokoa  
No santarin'izay  
Mino sy manoa.

2. Indro, mampahery, mahatoky koa  
Raha mahitsy ny fijery, soa ny fo;  
Fa ny fo madio sy masina tokoa:  
Paradisa an-tany, feno zava-tsoa.  
Masina tokoa, sns...

3. Koa halaviro ny fitaoman-dratsy,  
Ny fisaikazana tsy mba masina;  
Fa ny tia ny Tompo, dia olon-tsoa  
mitafy  
Fahadiovan'ny Fanahy Masina.  
Masina tokoa, sns...

4. Miaraha lalana amin'i jesosy  
Fa ny fahavalo ta-hamotraka;  
Mijoroa, reseo ny toetra mampihosina  
Ao anaty loto sy ny fotaka.  
Masina tokoa, sns...

### **490 - Ry Kristiana, andrandrao**

1. Ry Kristiana, andrandrao  
Ny Tompo sy Mpanjakanao,  
Fa Izy no Mpiaro;  
Ka aza taitra hianao,  
Na dia manakora izao  
Ny fahavalo maro;  
Omban'ny Tompo hianao,  
Ka aza atahoranao  
Ny rahon'ny mpamely.



2. Fa indro tsy rendrehana  
Ilay Mpiambi-masina,  
Izay Tokin'Israely,  
Fantaro, marina izao:  
Izay ataon'ny rafinao  
Aoka ho azy izany;  
Fa andrandrao ny lanitra,  
Anao Andriamanitra,  
Anao ny fanjakany.

#### **491 - Inoantsika marina**

1. Inoantsika marina  
Ny Mpamorona Tsitoha,  
Isika dia natsangana  
Mba ho zanany tokoa,  
Hanina sahaza omeny,  
Ary be ny famonjeny,  
Amin'ireo loza maro  
Dia Izy no Mpiaro,  
Inoantsika ao am-po  
Fa izy marina sy to.

2. Jesosy Kristy Zanany  
No inoantsika koa;  
Isika dia fananany,  
Fa navotany tokoa.  
Izy Zanak'i Maria,  
Dia rahalahy tia;  
Maty ka natao, ho very,  
Fa nitsangana amin-kery,  
Niakatra ao an-dapany  
Hitsara ao am-parany.

3. Ka ny Fanahy Masina  
No inoantsika koa,  
Ny fiangona-masina  
No naoriny tokoa;  
Ao isika dia mahita  
Famonjena efa vita;  
Afaka ny helotsika,  
Fo vaovao no raisintsika;  
Isika dia hatsangana

Ho velona ao an-danitra.

#### **492 - Izaho mino ny Mpamorona**

1. Izaho mino ny Mpamorona,  
Mpanao ny tany sy ny lanitra;  
Izaho manam-panorenana,  
Fa manan-dRay ary an-danitra.

2. Izaho mino ny Mpanavotra,  
Ny rany masina no mamiko,  
Ny momba Azy dia sambatra,  
Ny diany no mba harahiko.

3. Inoako ny Mpanamasina  
Mpananatro sy Masoandroko  
Izaho omeny afo masina,  
Mba ho madio ny fiainako

#### **493 - Ny loharanom-pamonjena**

1. Ny loharanom-pamonjena  
He, hitako tokoa izao,  
Dia jeso Kristy Ilay nomena  
Hamonjy izao tontolo izao,  
Ny rany dia fantatro  
Fa ampy hiankinako.

2. Ny otantsika no nanery  
Ny Tompontsika hankaty  
Isika hitany ho very,  
Izany no nidinany  
Nitondra fahoriana  
Sy hazo-fijaliana.

3. Ny nialan'ny Tompo aina  
Hanaisotra ny heloka  
Dia tsy mba takatry ny saina,  
Fa hitan'ny finoana.  
Ny rany no miantso hoe:  
He, famindrampo lehibe!

4. Izay no mampionona ahy,  
Ka afaka ny tahotro;  
Na dia ory ny fanahy,  
jesosy no Mpanavotro;  
Na misy mampanahy fo,  
Ny Raiko dia be indrafo.

5. Na very aza ny harena,  
Ka be ny fahoriana,  
Izaho mbola manantena  
Hahita fifaliana;  
Jesosy, Izay fananako,  
Dia Tompo feno indrafo.

6. Izaho tsy matoky tena,  
Na ny fahamarinako;  
Jesosy foto-pamonjena  
No tena itokiako.  
Ny Raiko no isaorako,  
Fa Izy no be indrafo.

7. Izay sitraky ny Ray malala  
No aoka mba ho sitrako,  
Fa lzy tena mahalala  
Hametra izay anjarako;  
Izay ataony tiako,  
Fa hitako ny indrafo.

8. Izany fototra izany  
No toky izay hotanako  
Ambara-pitako ho any  
An-koatry ny fasako.  
Ka any no hisaorako  
Ilay Fototry ny indrafo.

#### **494 - O, ry zanahary**

1. O, ry zanahary,  
Izay nahary ahy,  
Be ny herinao!  
Manan-toky aho  
Fa tsy maty taho,  
Manana Anao;

Afa-po ny zanakao,  
Hianao no Ray Mpiahy,  
Ka iza no hanahy.

2. Hianao no Raiko,  
Tena fototr'aiko,  
Sady heriko.  
Hianao no aro,  
Tsy ho reraka aho,  
Tsy ho kivy fo;  
Ao ambany elatrao  
No ataoko fiereko;  
Ao tsy misy sento.

3. Latsaka isan-andro  
Toy ny ranonando  
Ny fitianao.  
Raha alaim-panahy,  
Ka manafotra ahy  
Re ny otako,  
Dia ho tafatsangana  
Hanavao ny herin'aiko  
Hianao, ry Raiko.

4. Ary raha lany  
Toy ny zavon-tany  
Ny fiainako,  
Misy onin'aina  
Tsy mba mety maina  
Ao an-danitrao;  
Ao hitoerako,  
Ao an-tranonao, ry Raiko,  
Ao no antenaiko.

#### **495 - Jeso dia tokiko**

1. Jeso dia tokiko,  
Fa Mpamonjiko mahery  
Sady tena Zokiko,  
Tsy hamela ahy irery  
Ao amorom-pasako,  
Fa hiaraka amiko.

2. Izy tenany nandre  
Ny hangidin'ny fitàna  
Ilay ony' mainty be  
Vokatry ny fahotàna;  
Koa tsy hilaozany  
Irery ao ny olony.

3. Izaho hody vovoka,  
Fa ny androko ho lany,  
Nefa dia hatsangana  
Sy hakarina hankany  
Amim-boninahitra,  
Izay tsy mety tapitra.

4. Dia ho tafatambatra  
Ny fanahy sy ny tena,  
Ary samy sambatra,  
Fa nahazo famonjena,  
Izay Jesosy, havako,  
Vao ho tena hitako.

5. Izao manjo aty izao  
Tsy mba misy, ao akory,  
Fa finaritra ny ao,  
Tapitra ny mampahory,  
Ka ny fahalovana  
Hody fifaliana.

6. Eto aho reraka,  
Any misy hazon'aina;  
Vita sy tanteraka  
Izay rehetra nantenaina;  
Ao no hahatrarako  
Ny fahasambarako.

#### **496 - Jeso iankinako**

1. Jeso iankinako,  
Izy no Mpanavotro;  
Kristy itokiako  
Amin-tsaina sy ny fo;  
Kristy ifaliako  
Izy marina sy to.

2. Nahafoy ny lanitra  
Hianao, Mpanavotra;  
Raha ny vahoakao  
Nobaboin'ny rafinao,  
Hianao nangoraka,  
Ry Kristy Mpanafaka.

3. Fahoriam-be ery  
No nanjo Anao taty,  
Fa ny fahavalonao  
Dia nanenjika Anao;  
Nefa novalianao  
Indrafo ny rafinao.

4. He, nijaly Hianao  
Noho ny fitiavanao,  
Ka ny famindramponao  
No nahafatesanao;  
Hianao nasandratra,  
Fa nijaly fatratra.

5. Saro-bidy izahay,  
Fa ny ranao avotray,  
Izay nomenao ho anay,  
Mba hanafaka anay;  
Tonga olom-potsinao  
Izahay navotanao.

6. Ravoravo izahay,  
Ry Mpamonjy maminay,  
Ka ny fanavotanao  
An'izao tontolo izao  
Sy ny fitiavanao  
No isaoranay Anao

#### **497 - Ny tany sy ny lanitra tsy manampetra**

1. Ny tany sy ny lanitra tsy manampetra  
Hiaraka amin'ny mino rehetra,  
Manaiky fa Jeso no aina hamonjy  
Ny olona ory izay mila vonjy.

2. Na dia manenjika ahy ny ratsy  
Tsy lany ny hery, fa Jeso mamatsy,  
Dia Izy na tanako mafy tokoa,  
Ka tsy ialako fa Tompo Tsitoha.

3. Jesosy sakaizako dia miahya  
Ny Azy, ka afaka ny ahiahy,  
Ny fo malahelo ovany ho faly,  
Ka tretrika indray ireo olo-mijaly.

4. Jesosy fidiko ho Tompo tokoa,  
Efaiko ny asa sy hevitra soa,  
Izay halan'ny Tompo tsy tiako intsony,  
Ka tena iraisako tsara ny fony.

5. Izay tanako mafy sy mamy hambara  
Rehefa ho faty, ka ao ny anjara  
Jesosy, jesosy irery ihany  
No aina, harena tsy mety ho lany.

#### **498 - Ahy va Jesosy Tompon'aina?**

1. Ahy va Jesosy Tompon'aina?  
Moa ahy va ny lanitra?  
Eny, matokia ry fo sy saina,  
Fa eken'Andriamanitra.

2. Eny, zokiko Jesosy Tompo,  
Fahagagana lehibe ery,  
Tsy antsoiny hoe mpanompo,  
Fa ataony tena havany.

3. Toa mila hampisalasala  
Io tena fahagagana io  
Ary lavin'ny tsy mahalala  
Nefa azon'ny finoako

4. O, mba mifalia, ry fanahy,  
Fa anao Ilay Mpanavotra!  
Ka misaora, aza mba manahy,  
Fa ho azonao, ny lanitra.

5. Iombonana ny lova any,  
Fa Iray ny Ray an-danitra!  
Ka harena be dia be izany,  
Hasambarana maharitra.

#### **499 - Inona, re, no atakaloko**

1. Inona, re, no atakaloko,  
An'i Jesosy Izay mpisoloko?  
Ny zavatra izay ho simba va sy mora  
levona.  
Raha mbola hazoniko ny To,  
Ka tsy maty ny jiro ao am-po,  
Jesosy tsy soloako, na inona nainona.

2. Indro, Jesosy no fiainako,  
Izy no manda fiarovako;  
Izaho efa maty, nefa novelominy indray,  
Ka na dia mahantra aza aty,  
Ka tsy mbola nafindra ho ary,  
Jesosy no anjarako, ka ampy ahy re,  
izay.

3. O, ry Jesosy Tompo tsara ô!  
Aza mamela ny fanahiko  
Hisaraka aminao, fa tano aho ho  
mpanomponao.  
Mba velomy ny fitiavako  
Ka tohano ny fandehanako,  
Mba hanarahako ny lalana izay  
nalehano.

#### **500 - He! Manda fiarovana**

1. He! Manda fiarovana  
Andriamanitsika,  
Ampinga mahatohana  
Izay manjo antsika.  
Mamely fatratra,  
Satana sompatra,  
Mpandoza hatrizay,  
Mpamitaka mahay

Tsy manampaharoa.

2. Malemy, tsinontsinona,  
Fa mora resy isika;  
Fa misy voahasina  
Miady ho antsika;  
Jesosy re izay,  
Ilay iraky ny Ray,  
Mpitarika mahay,  
Mpamonjy hatrizay  
Sy Tompom-pandresena.

3. Na dia ta-handevona  
Ireo devoly maro,  
Tsy misy atahorana,  
Jesosy no Mpiaro.  
Ilay rain'ny maizina  
Dia nohelohina,  
Ka tsy ahoana,  
Fa teny tokana  
Dia mahalavo azy.

4. Kendreny hofongorana  
Ny teny tanantsika,  
Kane fa tsy ho foana,  
Ny Tompo momba antsika  
Na dia ho fongana  
Ny laza ananana,  
Harena, havana  
Tsy mampaninona,  
Ny lanitra antsika.

### **501 - Namely mafy loatra**

1. Namely mafy loatra  
Ny henatra aman-tahotra;  
Tsy afaka ny aizim-po,  
Fa mbola tao ny heloko.

2. Nandroso aho nivavaka  
Ry Jeso ô, Mpanavotra!  
Izao no angatahiko:  
Mba mamelà ny heloko.

3. Izaho tsy hiahotra;  
Ny tenako atolotro,  
Izay rehetra ananako  
Anao, Mpamela heloka.

4. Ny tahotra dia levona,  
Ariako ny henatra,  
Satria mandre ny feonao hoe:  
Voavelako ny helokao.

5. Endrey ! ny hafaliako  
Izay velona ao anatiko,  
Ka sahiko ny hanao hoe:  
Voavelanao ny heloko.

### **502 - Finaritra ny vorona ao an'ala**

1. Finaritra ny vorona ao an'ala  
Sy ao an-karam-bato avobe:  
Na dia betsaka ny mpankahala  
Mivonon-kahafaty azy re;  
Matoky izy, tsy misalasala,  
Fa manam-piarovanan-dehibe,

2. Jesosy Tompoko no harambato  
Sy ala mafy i kirizako;  
Na mafy aza sady tsy miato  
Izay ataon'ny fahavaloko,  
Mamely ahy ary misahato,  
Jesosy irery no fiarovako.

3. Izay rehetra ta-hamely ahy,  
Mikendry , nefa sasa-poana;  
Izaho dia ravo am-panahy,  
Tsy azony atao ahoana,  
Fa misy manda manodidina ahy,  
Izay miaro sy manohana.

### **503 - Ry Jeso Tompo tsara ô!**

1. Ry Jeso Tompo tsara ô!  
Tsy azoko valiana

Izato fitiavanao  
Manafa-pahoriana.  
He, sambatra aho, Tompo ô!  
Fa manana Anao izao,  
Izay tsy mba mety sosotra,  
Na faly hampitahotra,  
Ka Hianao no tokiko  
Sy foto-pifaliako.

2. He, isam-pahoriana  
Izay niantsoako Anao,  
Dia efa novaliana  
Ny hataka izay natao.  
Ny heloko navelanao,  
Ny foko nohavaozinao,  
Ny loza nosakananao,  
Ny ngidiny nesorinao;  
Ny aim-baovao iainako,  
Ka velona ny heriko.

3. Ka amin'izao sisa izao,  
Mikasa aho Tompo ô!  
Hano izay nohafaranao,  
Hanaraka Anao am-po.  
Satana dia holaviko;  
Hafoiko izao tontolo izao,  
Rafesiko ny nofoko,  
Fa Hianao, Mpamonjy ô!  
Mpanavotra tsy foiko,  
No sisa hotompoiko.

#### **504 - Ambarao, ry mpivahiny!**

1. "Ambarao, ry mpivahiny!  
Ny alehanao izao!"  
"Fiakarana mideza  
Ihoaranay anio:  
Jesosy Tompo no miantso  
:,:Mba ho ao an-tany soa;  
:,:Mba ho ao an-tany soa;  
Jeso no alehanay:,:".

2. "Lozanao, ry mpivahiny,  
Lalàna tsy fantatrao!"

"Tsia, fa anjely maro  
No miaraka aminay;  
Jeso Tompo no mitondra,  
Tsy hanjo anay ny loza,  
Tsy hanjo anay ny loza,  
:,:Tsy hanjo anay ny loza;  
Izay no ampinganay:,:".

3. "Inona, ry mpivahiny,  
No ho azonao ary?"  
"Jeso Kristy be fitia  
Vonon-kanome anay  
Lamba fotsy, zava-tsoa,  
Ranon'aina tsy ho lany,  
:,:Ranon'aina tsy ho lany!  
Jeso no hatoninay:,:".

4. "Tianay, ry mpivahiny,  
Mba hiaraka aminao!"  
"Mandrosoa, ry sakaiza!  
Miaraha aminay:  
Fa izay mitady tsara  
Tsy mba lavin'i Jesosy,  
:,:Tsy mba lavin'i Jesosy,  
Izy no hidiranay:,:".

#### **505 - Mpivahiny! mba lazao**

1. Mpivahiny! mba lazao:  
Zovy moa hianao?"  
"Izaho namanao ity,  
Fa miandry Ilay ary."  
"Mpivahiny! mba lazao:  
Iza no andrasanao?"  
"Jeso, Havako ary,  
No andrasako aty."

2. Mpivahiny! mba lazao:  
Aiza no halehanao?"  
"Lalana ety avokoa  
Sady sarotra tokoa."  
Mpivahiny! mba lazao:  
Iza no hirahinao?"  
"Jeso, Zoky be fitia,

Tsy mamela mba hania."

3. "Mpivahiny! mba lazao:  
Aiza no hodiovinao?"

"Ao an-danitra madio  
No aleha ankehitriony."

"Mpivahiny! mba lazao:  
Iza no handray anao?"  
"Jeso, Ilay Mpanjaka soa,  
Tombo, Havako tokoa."

### **506 - Tsy misy miadana ka afa-po**

1. Tsy misy miadana ka afa-po  
Izay monina eto an-tany;  
Fa izay tia sy mino ny  
Tombo Jeso  
No hahazo ny soa tsy lany.

Fiv : Mba irio, mba irio  
Ny hananana an'i Jeso.

2. Raha misy mahory mahazo ety  
Jeso no hanala izany;  
Tsarovy ny avotra tao  
Kalvary,  
Fa nalatsany tany ny rany  
Mba irio, Mba irio,  
sns...

3. Izao maniry hanaraka  
Anao,  
Ry Tombo Mpanafaka ota!  
Fa fantatro tsara hatramin'zao  
Ny fitiavana ahy mpanota.  
Mba irio, Mba irio,  
sns...

### **507 - Ranomasi-mampahory**

1. Ranomasi-mampahory  
No alehantsika izao;  
Fa ny mino dia hitody,  
Koa maharitra izy izao:

Fiv : :;O! andeha isika hody  
Mba ho ao an-tranondray::;

2. Jeso Tombo eo am-pitia  
Ka miantso hoe: Avia!  
Izy koa no mampita  
Ka manao hoe:Matokia!  
O! andeha sns...

3. Maro efa tonga any  
Ka mifaly avokoa;  
Mbola be ny fiantrany,  
Misy ho antsika koa.  
O! andeha sns...

4. Kristy koa no sambon'aina  
Izay mitondra ho ary,  
Famonjena azo maina,  
Ka ilaozy re ity.  
O! andeha sns...

### **508 - Ny sambonkelinay ety**

1. Ny sambonkelinay ety  
Mitety rano be,  
Misononoka ho ery,  
An-dafin'ony be. (in-3)

2. Ny rivo-doza tsy hanjo.  
Fa Jeso aminay;  
Ny alondrano mankato  
Ilay Maherinay (in-3)

3. Mamaky onja izahay,  
Fa tsy ho faty ao;  
Ny fitodiantambonay,  
He! tazanay izao (in-3)

4. Irinay ny ho tonga ao  
Hilaozanay ity;  
Mitsena anay tokoa izao  
Ny Zokinay ary (in-3)



## 509 - Jeso Tompo! Vatolampy.

1. Jeso Tompo! Vatolampy,  
Vato voafantina,  
Mba ho fanorena-mafy  
Izay tsy mety levona;  
:,: Vato mafy :,:} (in-2)  
Dia itokianay.

2. Jeso Tompo! Vatolampy  
Voazaha toetra;  
Vato tsy mba misy tsiny,  
Sady tsara endrika:  
:,: Vato soa :,:} (in-2)  
Dia ifalianay.

3. Jeso Tompo! Vatolampy,  
Vato fehizoronay;  
Efa nampiray fanahy  
Ny fitianao anay  
:,: Fehizoro :,:} (in2)  
Vato fampiraisana.

4. Jeso Tompo! Vatolampy,  
Tsy miova Hianao;  
Manan-jara ny matoky  
Ny tsy fivadihanao,  
:,: Fa ho faly :,: } (in-2)  
Ka tsy hanan-kenatra.

## 510 - Jeso! ny hamarinanao

1. Jeso! ny hamarinanao  
No lamba hitafianay,  
Amin'ny andro farany,  
Izany hifalianay.

2. Raha hitsangana izahay  
Handray ny lova aminao,  
Dia tsy ho resy lahatra,  
Fa Kristy no Mpanavotra.

3. Io lamba io no mbola vao,  
Na levona izao tany izao,  
Haharitra tsy rovitra.  
Havaozin' Andriamanitra.

4. Ny hery sy ny antranao  
Toroy izao tontolo izao;  
Ampandrosoy ny teninao,  
Ampanakeo ny rafinao,

5. Ny maty hahare ny feo  
Hiantso azy ho velona;  
Jeso! ny hamarinanao  
No lamba hitafianay.

## 511 - Jeso no Sakaiza tena tia anay

1. Jeso no sakaiza tena tia anay,  
Izy ta-hamonjy olombelona;  
Aoka ho tiantika ny Mpanavotra,  
Fa Izy no Sakaiza mahateo tia.

2. Jeso no Sakaiza ifaliana,  
Izy nahafoy ny voninahitra,  
Mba hananantsika fanavotana  
Sy handraisantsika ny fiainana.

3. Jeso no Sakaiza itokiana,  
Izy mahavaly sy mahanatra;  
Aoka hinoantsika ny Mpanavotra.  
Hahazoantsika fiadanana.

4. Jeso no Sakaiza ivavahana,  
Izy mahavonjy ny mpangataka;  
Aoka hinoantsika ny Mpanavotra,  
Mba handraisantsika fanampiana.

5. Jeso no Sakaiza fiarovana,  
Izy maharesy ny mpanohitra;  
Iza no hanimba izay arovany?  
Aoka hisaorantsika ny Mpanavotra.

6. Jeso ô, Sakaiza! raisonao izao  
Ny fisaoran-tsara izay atolotray:  
Izahay mpanota te-hidera Anao,

Raiso re ny dera izay aterinay.

## **512 - He! matoky aho, Tompo**

1. He! matoky aho, Tompo,  
Azoko ny teninao;  
Teny soa mahafaly,  
Teny avy aminao.

Fiv : He!matoky aho, Tompo,  
Azoko ny teninao;  
Teny soa mahafaly  
No omenao ahy izao.

2. Tahotra amana ahiahy  
Dia ariako izao;  
Fa nomenao toky aho  
Sady tô ny teninao.  
sns...

3. Izay rehatra fahotana  
Entiko hesorinao;  
Hianao no mahadio.  
Ka diÖvy aho izao.  
sns...

4. Mahasasa, mahadio,  
Mahavonjy Hianao,  
Ka mandray sy mahatondra  
Tsara ho an-tranonao.  
sns...

5. Jeso Tompo! avy aho,  
Avy hankalaza Anao;  
Raisonao re izay omeko:  
Vola, tena, aina koa.  
sns...

## **513 - Jeso Sakaizanay**

1. Jeso sakaizanay,  
Jeso anay;  
Sady tsy mahafoy,  
Jeso anay;

Raha ny olona  
Mety mandao anay,  
Jeso no tsy mandao,  
Jeso anay.

2. Jeso Sakaizanay,  
Jeso anay;  
Izy no Avotray,  
Jeso anay;  
Maty ny Tomponay  
Noho ny helokay  
Afaka izahay,  
Jeso anay.

3. Jeso Sakaizanay,  
Jeso anay;  
Izy no Aronay,  
Jeso anay;  
Reraka izahay  
Noho ny adinay,  
Jeso no herinay,  
Jeso anay.

4. Jeso Sakaizanay,  
Jeso anay;  
Izy no Lalanay,  
Jeso anay;  
Lalana marina  
Hahatongavanay  
Any an-danitra,  
Jeso anay.

5. Jeso Sakaizanay,  
Jeso anay;  
Manana izahay,  
Jeso anay;  
Jeso Sakaizanay  
No hovantaninay  
Any an-danitra,  
Jeso anay.

## **514 - Ry Jehovah Tomponay!**

1. Ry Jehovah Tomponay!

Olom-bery izahay;  
Nefa tsy mba foinao,  
Fa vonjen' ny Zanakao :

Fiv : Zanahary, Aba, Ray,  
Jeso Kristy, Havanay.

2. Lehibe ny indrafo;  
Iza re no nanampo  
Famonjena taminao?  
Kanjao azonao izao?  
Zanahary, sns...

3. Gaga izahay izao!  
Be fitia Hianao;  
Avotr' aina azonay,  
Hody aminao izahay.  
Zanahary, sns...

4. Jeso ô, Mpamonjy soa  
Sy Mpamindra fo tokoa!  
Avy ny navotanao  
Ka midera Anao izao:  
Zanahary, sns...

### **515 - Tsara lova, ry Jeso ô!**

1. Tsara lova, ry Jeso ô!  
Ny mpanota voavotrao,  
Fa fonenana soa  
Amboarinao ao,  
Hanefanao ny teninao:

Fiv : Ho amin' io tany io tokoa  
No izoran' ny dianay;  
Jeso Tompo no ao, sady efa manao  
Trano soa hipetrahamanay.

2. Tsara lalana, Jeso ô!  
Ny vahiny tarihinao;  
Raha misy manjo.  
Tsy mba kivy ny fo  
Fa tohanan' ny herinao:  
Ho amin' io,

sns...

3. Tsara vatsy, ry Jeso ô!  
Ny mpandeha fahananao,  
Fa ny teninao soa  
Mofon' aina tokoa  
Iveloman' ny olonao:  
Ho amin' io,  
sns...

### **516 - An-dafin' ny efitra lava sy maina**

1. An-dafin' ny efitra lava sy maina  
No misy ilay tany izay mamin'ny fo,  
Ilay tany izay efa nampanantenaina  
Ho lovan' ny mino izay mankato.  
Iriko indrindra ny mba ho tafita,  
Tsy mety miadana mandra-pahita.

2. Anefa ny lala-mankany no mafy,  
Ny rafiko maro manotrika ao;  
Ny nofo indrindra no tena mpandrafy,  
Ka tery ny lalan-kaleha izao!  
Anefa tsaroako tsara ny teny  
Milaza fa misy fitsaharana eny.

3. Ka aza mba ketraka, ry mpivahiny,  
Hevero fa Jeso no momba anao;  
Ilay nampangina ny loza fahiny  
Dia mbola mahay mampandresy anao!  
Andrasanao kely, ho lany ny fetra,  
Ho ringana ny fahavalo rehatra.

4. Izaho hiezaka mafy tokoa  
Hahazo ny loka ao alohako ao;  
Ny tafio-drivotra mba mahasoana,  
Fa hahatongavako fiaingana ao;  
Indray mipi-maso ny eto an-tany,  
Ny any an-danitra tsy hita lany

### **517 - Ny alina ho lasa**

1. Ny alina ho lasa,  
Na ela aza re,  
Hipoaka ny andro  
Mahafinaritra;  
Ny zavona hisava  
An-tendrombohitra ao,  
Ny vavahady tsara  
Ho tsinjoko izao.

2. Mba sarotra tokoa  
Ny fiakarana e ;  
Mamely mafy koa  
Ny rivo-doza be;  
Fa he ny mpivahiny  
Izay efa trotraka  
Tantanan'ny Mpamonjy  
Tsy ho solafaka.

3. Ny famonjen'i Kristy,  
Ny fanavotany,  
No loharano soa  
Mangarangarana ;  
Nandramako sahady  
Ny rano velona,  
Ka dia nahazo hery  
Am-pandehanana.

4. Ny rano be hitànay,  
Ny fefy tsilo koa,  
Ny lalana mahàna  
Ho afaka avokoa ;  
Ka dera, haleloia.  
No mendrika hatao  
Ambara-pahatonga  
Am-pitsaharana.

### **518 - Rehefa vita ny asako ety**

1. Rehefa vita ny asako ety,  
Ka ny fanahiko raisina ery,  
Miara-mitoetra aminao,  
Tomponay,  
No hasambarako mandrakizay :

Fiv : Mandrakizay, sambatra re,  
Azoko ilay fahasambarana be!

2. Rehefa ataoko veloma ny ety  
Ka azoko 'lay Paradisa ery,  
Sady mahita ny tavan'ny Ray  
No hasambarako mandrakizay :  
sns...

3. Miombom-pahasamabarana ary  
Amin'ireo olon-tiako taty  
Ka tsy misaraka mandrakizay  
No hasambarako mandrakizay :  
No hasambarako mandrakizay :  
sns...

### **519 - Mba maniry hody aho**

1. Mba maniry hody aho,  
Ry Jesosy Tompo ô !  
:,: Ka ny foko hatanjaho  
Mba hankany aminao :,:

2. Tsy tamana eto aho,  
Mampahory ny aty,  
:,: Koa dia mitalaho,  
Mba hafindranao ary :,:

3. Hody aho, ry Mpiantra,  
Aoka mba horaisinao,  
:,: Hianao dia feno antra,  
Ka matoky aho izao :,:

### **520 - Ny masoandronay**

1. Ny masoandronay  
Mirefarefa izao,  
Madiva hody izahay  
Hiverina aminao :

Fiv : Ry Jeso ô! sasao,  
Sasao madio izahay.  
Ho mendrika ny lanitra  
Izay honenanay.

2. Tsy ela intsony koa  
Ity ady lava ity,  
Ho afa-tsasatra tokoa  
Rehefa tonga ary :  
sns...

3. Madiva ho hitanay  
Ilay Tomponay ary,  
Madiva hiahona aminay  
Ny namanay taty :  
sns...

4. He! kely sisa izao  
No hisentoanay,  
Dia hofafan'ny tananao  
Ny ranomasonay :  
sns...

5. Ity hita masi ity,  
Izay, tsy mahafa-po,  
Hisolo paradisa ary,  
Izay hifalian'ny fo :  
sns...

### **521 - Ravoravo re ny foko**

1. Ravoravo re ny foko,  
Fa Jesosy ao am-poko,  
Izy no tsaroako  
Amin'ny alehako.

2. Andro fohy, mora lany  
No mba ahy aty an-tany,  
Fa ny ao an-danitra  
Dia tsara lavitra.

3. Tsy mba msy ota any,  
Ka tsy hisy hitotmany,  
Tsy mba hisy ny manjo,  
Na ny alahelom-po.

4. Any aho no hahazo  
Zava-tsoa tsy halazo.

Satroboninahitra,  
Haingon'ny nanafika.

5. Dia ao no hahitako  
Sady tena hiderako  
An'i Jeso avotro  
Mifalia re, ry fo !

### **522 - He, tanim-pahazavana be.**

1. He, tanim-pahazavana be.  
Tsy misy maizina ao,  
Kany tsy mba hitete  
Ny ranomasonao.  
Izay voavonjy hiangona ao,  
Hiara-mihira ny hira vaovao,  
Ho sambatra any an-danitra,  
Ao amin'ny Mpanavotra.  
Moa ao an-danitra ?  
Eny, ao an-danitra.  
Ka tsy hisaraka ?  
Eny, tsy hisaraka !  
Ho sambatra any an-danitra  
Ao amin'ny Mpanavotra.

2. Ry Rainay feno indrafo,  
Be fitiavana,  
Omàny ny fanahiko  
Handray fiainana.  
Izahay, ry Jesosy, maniry Anao,  
Fa maty nisolo anay Hianao,  
Nanavotra anay mba ho afaka,  
Ka tsy ho voaheloka.  
Moa dia ho afaka ?  
Eny ho afaka !  
Ka tsy helohina ?  
Eny tsy helohina  
Jesosy Mpamonjy nanafaka,  
Ka tsy ho voaheloka.

3. O, ry Jesosy Tompo ô !  
Tsarovy izahay,  
Ka mba ambino hatrizao  
Ny fandehananay.

Vonjeo ny ondry manaraka Anao,  
Fa otany no namonoana Anao.  
Ho faly izahay ao an-danitra  
Ao amim-boninahitra.  
Moa ao an-danitra ?  
Eny, ao an-danitra.  
Ka tsy hisaraka ?  
Eny, tsy hisaraka !  
Hiara-mifaly ao an-danitra,  
Ho feno voninahitra.

### 523 - Te-hifindra

1. .: Te-hifindra .:  
Aho, ry Jesosy ô !  
Be manjo aty an-tany,  
Fifaliam-be no any  
Aminao, ry Tompo ô.

2. .: Ny anjely .:  
Sy ny olo-masina  
Tafahaona ka mihoby ;  
Sambatra ny tafatody.  
Faly fa noraisina.

3. .: Faly koa .:  
Aho, ry Mpamonjiko,  
Manantena fa hahita  
Ny fonenana ao am-pita,  
Ka handray ny lovako.

4. .: Tsy tamana .:  
Aho amin'ny manjo,  
Fa vahiny aty an-tany,  
Ka maniry mba ho any  
Aminao, ry Tompo ô.

5. .: Ao tsy misy .:  
Ota na aretina !  
Tsara raha hodimandry,  
Nefa aho te-hiandry  
Ny fetr'andro marina.

### 524 - Hitsahatra aiza, ry foko, izao ?

1. Hitsahatra aiza, ry foko, izao ?  
Ka iza ataonao hiaro anao?  
Ny tany va misy hitsaharan'ny fo,  
Na lova tsy simba, tsy mety ho lo?  
Tsia, tsia, tsy mba aty  
Izany, fa any an-danitra ery.

2. Afoizo ny tany izay manindao,  
Katsaho ny lanitra ho lovanao.  
Jerosalema any, tanàna vaovao  
Sy tsara tokoa, miandry anao.  
Eny, eny, ao dia ao  
No misy tokoa fonenam-baovao.

3. Ny mponina ao dia tretrika am-po,  
Fa resy ny ota, mahery ny to,  
Ka faly midera ny Tompo ny ao ;  
Ny mino hihira ny hira vaovao !  
Indro, indro, be dia be  
Tokoa ny soa ao an-danitra re !

### 525 - Vahiny eto isika

1. Vahiny eto isika  
Ka monina amin-day,  
Mitady mba hahita  
Ny any amin-dRay :  
Fa ao ny fanjakany  
Sy fiadanana,  
Ka ao tsy hita lany  
Ny fitiavana.  
Ao no fodiana,  
Mihaona ao ny mino,  
Ka tsy hisaraka.

2. Izay aty an-tany  
Dia mora tapitra,  
Fa ny tsy mety lany  
Dia ao an-danitra !  
Fa ao ny Tompontosika  
Izay nohomboana  
Mba hahazoantsika  
Ny fifaliana.

Ao no fodiana, sns

3. Manafotra ny tava  
Ny ranomaso be,  
Kanefa dia hisava,  
Fa hofafana e !  
Isika manantena  
Fa ny Mpampakatra  
Ho tonga mba hitsena  
Ny ampakarina.  
Ao no fodiana, sns

### **526 - Jerosalema ambony**

1. Jerosalema ambony  
Irin'ny fo izao,  
Fa ny aty  
Dia tsy mba fy ;  
Ny lanitra hazony,  
Fa mahamanina.  
Jerosalema ambony  
Irin'ny fo izao.

2. Fa any hofafana  
Ny ranomaso be  
Izay latsaka  
Tan-dalana  
Ka hody fiderana  
Sy fifaliam-be.  
Fa any hofafana  
Ny ranomaso be.

3. Jesosy Tompontsika  
Izay ao an-dapany,  
Manao hoe :  
Ireto re  
Ny oloko nafindra  
Handray ny lovany.  
Jesosy Tompontsika  
Manasa anao hankao.

### **527 - Nahoana no voageja aty**

1. Nahoana no voageja aty

Ity tena tsy tamana ity ?  
Nahoana no tsy hitanay  
Ilay tany tadiavinay ?

Fiv : Ry lanitra ô, ry lanitra ô,  
Hianao tokoa irin'ny fo,  
Irin'ny fo.

2. Ny sombin-tsoa hita aty  
No mariky ny be ary :  
Izao tsy mahafa-po izao  
No anirianay mba ho ao.  
Ry lanitra ô, sns...

3. Ny fitiavanay aty  
No tena akon'ny ary.  
Izao tsy tanteraka izao  
Manandratra ny fo ho ao.  
Ry lanitra ô, sns...

4. Izao fiainanay izao  
Tandindon'ny fiainana ao ;  
Ny andro tsy mateza aty  
Dia tapaky ny mbola ary.  
Ry lanitra ô, sns...

5. Izao hazavana kely izao  
Dia taratry ny betsaka ao.  
Somambisamby ny aty,  
Mazava indrindra ny ary.  
Ry lanitra ô, sns...

6. Ao aminao, ry lanitra ô.  
No mampionona ny fo,  
Fa Andriamanitra no ao,  
Ka tena maminay hianao.  
Ry lanitra ô, sns...

### **528 - Tsaroako ho avy ny maraina**

1. Tsaroako ho avy ny maraina,  
Izay hisavan'ny zavona aty  
Ka hitrangan'ny masoandron'aina,  
Dia Jeso, Ilay malalako ary.



2. Hevero fa tsy hisy fahotana,  
Na heloka, na fahoriana ;  
Ny ranomasintsika hofafana  
Ka hosoloam-pihobiana.

3. Ny havan-tiana tety an-tany  
Nandao antsika ka nisaonana,  
Ireo no hitsena antsika any,  
Ka fifaliana no hihaonana.

4. Ny fiderana ataon'ny olo-marô.  
Izay samy masina sy ravo ao,  
Sy hobin'ny anjely no hiharo,  
Endrey ny hatsaran'ny hira vao

5. Ry tany tsara, aoka hahafaly  
Ny foko ny mihevitra anao,  
Raha saro-dàlana sy mampijaly  
Ny tany itoerako izao

### **529 - Jesosy no Mpiandry tsara maty tia**

1. Jesosy no Mpiandry tsara maty tia,  
Ny rany nampiray antsika olony ;  
Fa izy no mandidy hampifankatia  
Izay te-ho olony.

2. Ka manahafa Azy Tomponao, ry  
mino,  
Tsarovinao ny didy izay natolony,  
Fa tiany hifankatia isika mpino,  
Fa samy olony.

3. Tsarovy fa iray tam-po izao isika ;  
Tsarovy re fa samy mpiantafika ;  
Miraisa hina mba hiaraka tafita  
Ho ao an-danitra.

4. Ka aza mba mijery arina an-tava ;  
Mifanaraha tsara sy mifamelà,  
Fa aza tia fotsiny amin'ny vava ;  
Dia aza mifandà.

5. Mifankatiava ary mifanaova soa ;  
Mifandefera tsy hiavona am-po ;  
Vonoy re ny lolompo sy fosa koa,  
Ka aoka ho tso-po.

6. Morà fo, mihavàna, maleme fanahy,  
Ka aza mety hanaratsy namana ;  
Mifankatiava re, toy ny mpirahalaky  
Miara-dàlana.

7. Ka mivavahana re ho an'ny rahalahy,  
Hiraisantsika tsara, fa iray manjo ;  
Ny fo izay tia tsy mba mampiahiahy,  
Horaisin'i Jeso.

### **530 - Fitiavana ranovelona**

1. Fitiavana rano velona,  
Loharano lalina;  
Ka miafina ao anatin'ny  
Ny fiainan-danitra!

2. Fitiavana no nirahina  
Avy tamin-Jehovah ;  
O, mba raisonao, dia ho fantatrao  
Ny fahasambaranana.

3. Fitiavana didy tokana  
Ary didy lehibe ;  
Mitoera ao, hitoeranao  
Amim-piadanam-be.

### **531 - Ry Jeso Loharanon'aina**

1. Ry Jeso loharanon'aina,  
Izay foto-pahasoavana!  
Ny fonay toy ny tany maina,  
Fenoy fitiavana!  
Aidino ao ny tena aina,  
Mba hampifankatia anay,  
Fandrao ho tonga very maina  
Ny fitiavanao anay.

2. Ny hasomparana levony  
Soloy fitiavana;  
Ny lolompo ampijanony  
Ho tia fihavanana  
Ny fo malaky mankahala  
Ovay ho tia namana;  
Ampianaro hahalala  
Ny didim-pitiavana

3. Toroy sy ampianaro  
Ny fitiavanao zahay;  
Mpiandry tsara o, velaro  
Ny fonao mba ho hitanay  
Mba ho tarafiny tokoa  
Ny fonay mbola maizina,  
Ka samy hifanisy soa  
Sy hifamela heloka.

### **532 - Ry Jeso lohan'ny mpandefitra**

1. Ry Jeso lohan'ny mpandefitra,  
Nilaozanao ny voninahitrao,  
Mba hahatonga anay mpiavona  
Hanetry tena eo imasonao.

2. Ry tsy miavonavona am-po!  
Izaho te-hianatra aminao,  
Mba hitsaharan'ny fanahiko,  
Fa mampiadam-po ny entanao.

3. Ny fietrenao, ry Voahombo ô,  
No iakaram-boninahitra;  
Ny tany sy ny lanitra vaovao  
Hataonao lovan'ny mpandefitra.

4. Mifandefera mifanajà,  
Ry samy voavela heloka!  
Miraisa hazofijaliana,  
Hiraisantsika voninahitra.

### **533 - Iray ny Ray Tsitoha**

1. Iray ny Ray Tsitoha,  
Mpitia olombelona;

Iray ny Tompo soa,  
Iray ny rano velona,  
Iray ny vavahady  
Izay hidirana;  
Ny rafy sy ny ady  
Dia iombonana.  
Iray ny fahantrana  
Ilaozantsika aty,  
Iray ny fanjakana  
Alehantsika ary.

2. Ry zana-janahary,  
Ry voavela heloka,  
Miraisa hina ary,  
Ka mifandraisa tanana;  
Mifamelà isika,  
Fa samy meloka;  
Mifanajà isika,  
Fa samy zanaka.  
Ry jeso be fitia,  
Ampio ny olonao  
Mba ho mpifankatia  
Manahaka Anao.

### **534 - Misy didy tena tsara**

1. Misy didy tena tsara  
?Zay nomen?ny Tompo hoe :  
Mba mifankatiava tsara,  
Hianareo?zay mino e!  
Ka miraisa,  
?Zao no didy lehibe

2. Tonga Jeso mba hanompo  
Sy mba hampihavana;  
Tsy mpanaraka ny Tompo  
?Zay tsy tia namana.  
Ka tadiavo  
?Zay ho fampiraisana

3. Fa iray tokoa ny Loha  
Dia Jesosy Zanaka  
Endriky ny Ray Tsitoha,  
Izay halaina tahaka.

Tsy ho resy  
Raha miray ny tafika.

4. Jeso no Ilay foto-kazo,  
Tena voaloboka;  
Ka ny sampana halazo,  
Raha tafasaraka.  
Ikambano  
Ka aza mihataka.

### **535 - Finaritra ny manome**

1. Finaritra ny manome  
Ireo mahantra marobe  
Ka mahafoy fananana  
Hiantra ny tsy manana.  
Izao no asa mahaso  
Izay manendrika tokoa;  
Ny manome an-tsitrapo  
Hitsinjo olona ory fo.

2. Ry olon' Andriamanitra!  
Mba mihetseha fatratra  
Hamonjy sy hanafaka,  
Hanampy ireo madinika.  
Izay mamokin-tanana  
Malain-kiantra namana,  
Izay mihirim-belona  
Tsy hanarn-piadanana.

3. Ny vola izay nafoinao  
Dia tsy mba very foana izao  
Fa ny mahantra no mandray  
Ka lasan'i Jehovah Ray,  
Ireo kamboty mba vangio,  
Mpitondratena mba jereo;  
Izao no fivavahana  
Izay madio sy masina.

### **536 - Mifankatiava tsara**

1. Mifankatiava tsara  
Jeso no mampihavana,  
Fa Izy no alalantsika

Amin' Andriamanitra.

2. Mifankatiava tsara  
Mba hahatsara antsika,  
Fa fototry ny didiny  
Sady anton'ny lalàny.

3. Hitsahatra finoana,  
Mbamin'ny fanantenana,  
Nefa ny fitiavana  
Haharitra mandrakizay.

4. Mifankatiava tsara,  
Tsy maharatsy namana,  
Ary tsy mahatezitra  
An'Andriamanitra koa.

### **537 - Endrey ny hamaroan' ny soa**

1. Endrey, ny hamaroan'ny soa  
Nomenao Ray ho ahy koa!  
Ny aiko, he, navotanao,  
Ny heloko vonoinao.

Fiv : Eny, Raiko,  
Eny fa! ravo tokoa  
Ity zanakao voavonjy re,  
Ka velombelona ery.

2. He, azoko tokoa jeso,  
Ilay perla soa, madio sy vao;  
Ny zava-tsoan'ny tany re  
Dia tsy ahoako tokoa.  
Eny, Raiko, sns...

3. Ny vavako dia tsy mahay  
Hamisavisa izao ry Ray;  
Ny fanomezan-dehibe  
Dia tsy voatonoko koa.  
Eny, Raiko, sns...

4. Ny foko no hidera izao,  
Hisaotra sy hanaja Anao,  
Hanoa, ho vonona hanao

Ny sitrakao rehetra.  
Eny, Raiko, sns...

### **538 - Finaritra ny masoko**

1. Finaritra ny masoko  
Mijery ny Mpamonjiko  
Ny vavako hisokatra  
Hidera ny Mpanavotro:

Fiv : Andro soa, andro soa,  
Fa jeso no Mpanavotra;  
He! Ravo ny fanahiko  
Mihira ao anatiko,  
Andro soa, andro soa,  
Fa jeso no Mpanavotra.

2. Ho tiako ny Tompoko  
Ambara-pahafatiko,  
Fa Izy no Mpanafaka  
Manaisotra ny heloko :  
Andro soa, sns...

3. Faingàna re, ry havako!  
Hatòny e! ny Tomponao ;  
Andeha mba hiaraka  
Hihira sy hivavaka:  
Andro soa, sns...

### **539 - Faly dia faly**

1. Faly dia faly  
Izahay mpanomponao,  
Izay mihira eto anatrehanao.  
Fa be fiantra Hianao,  
Ry Jeso Tompo tianay!  
Ka feno haravoana  
Tokoa izahay;

Fiv : Faly dia faly  
Izahay mpanomponao,  
Izay mihira eto anatrehanao.

2. Ela dia ela

No nandavanay Anao;  
Be ny zava-dratsy efa vitanay.  
Na diso aza izahay,  
Anefa faly aminao;  
Fa afakao ny helokay,  
Ry Tompo tianay!  
Faly dia faly, sns...

3. Sarotra tokoa,  
Ny alehanay izao ;  
Be ny alahelo, iaretanay.  
Na ory aza izahay,  
dia mbola faly aminao  
Fa levonao ny tahotray,  
Ry Tompo tianay  
Faly dia faly, sns...

4. Manantena tsara,  
Izahay mpanomponao  
Mba handray ny zara,  
Tehirizinao ;  
Rehefa maty izahay,  
Ka entinao an-danitra ;  
Ho azonay ny lova soa,  
Hatolotrao anay;  
Faly dia faly, sns...

### **540 - Hitako ny làlan-tsara**

1. Hitako ny làlan-tsara,  
Ka hizorako izao,  
:,: Azoko ny famonjena,:,:  
Ka hotanako tokoa  
:,: Manampia,:,:  
Ry Fanahy Masina.

2. Ravoravo aho, Jeso!  
Hianao no Tompoko;  
:,:Faly aho, ry Mpamonjy!,:,:  
Afakao ny heloko;  
:,: Gaga aho :,:  
Noho ny fanavotanao.

3. Fitiavana ihany

No natolotrao anay;  
:,:Nefa kosa fahotana:,:  
No navalinay Anao:  
:,: Aza isaina :,:  
Re ny hadisoanay.

4. Ny mpanota hilazako  
Ny Mpamonjy tanaiko;  
:,:Hilazako fa ny rany:,:  
No nataony avotra;  
:,: Matokia:,:  
He, ny fitiavany!

### **541 - He, izany hira manako re**

1. He, izany hira manako re!  
Ilay zaza very tonga amin-dRay;  
He! Falifaly izay mandre;  
Ilay efa maty velona indray.

2. Indro ny Rainy lasa nankao,  
He! Fa miteny: "Peratra soa,  
Soloy ny lamba, kapa alao."  
Ilay efa maty velona indray.

3. He izany hoby an-tranon-dRay!  
Fa voavonjy ilay nania;  
Hobio, ry tany sy lanitra!  
Ilay efa maty velona indray.

4. O, ry anjely an-dapa soa!  
Miraiza hina hanandra-peo;  
Aza mangina, fa mba lazao,  
Ilay efa maty velona indray.

### **542 - Jehovah no anjarako**

Jehovah no anjarako,  
Izaho tsy halahelo,  
Fa jeso no Mpanavotro.  
Izaho ho ravoravo.  
Maro no tia harena,  
Betsaka no mila vola,  
F'izaho efa manana,

Jehovah no anjarako,  
Ny didiny no mamiko,  
Ny asany no tiako,  
Ny teniny mahahendry,  
Ny ran'ny Zanany  
No mahadio.  
Tsy mba mamiko ny tany,  
Tsy sitrako ny filàny,  
Omeko veloma izany;  
Jehovah no anjarako,  
:,: Anao tokoa, ry Jesosy,  
Ny fanahiko, rehetra;  
Ataovy ho Anao aho,  
Hianao no anjarako.:,:

### **543 - Mihoby ny fanahiko**

1. Mihoby ny fanahiko,  
Fa voavonjy izao;  
Ny ratran'ny Mpamonjiko,  
No misy aim-baovao.

Fiv : Ny ran'i Jesosy,  
No tena avotro,  
Ka sambatra aho  
Sy tretrika am-po.

2. Ny ratran'ny Mpamonjinao,  
Ry foko, mba jereo.  
Fa hanasitrana anao,  
Ka ho fiainanao.  
Ny ran'i jesosy, sns...

3. Mba mibitaha re, ry fo,  
Ny gadra tapaka :  
Ny hajambana izay nanjo,  
Izao dia afaka.  
Ny ran'i jesosy, sns...

### **544 - Misaora an'i Jehovah**

1. Misaora an'i Jehovah,  
Miantsoa ny anarany,

Mitoria ny asany,  
Amin'ny olombelona.

2. Ambarao ny fiantrany,  
Lazao ny famindram-pony,  
Fa mahagaga antsika  
Ny fitiavany antsika,

3. Mpanota tsy naringana,  
Very mana-Mpanavotra,  
Maty ka nomeny aina,  
Ho velona mandrakizay.

4. Ry Andriamanitray ô!  
Ry Jesosy Mpamonjy ô!  
Ry Fanahy Masina ô!  
Vonjeo ny olona ory,

5. Fa zohy no itoerana,  
Lava-bato no ierena  
Fa indrafo no ifalian'  
Ny mpivahiny mandalo.

### **545 - Endrey izany hafaliana**

1. Endrey izany hafaliana,  
Fa velona aina izahay;  
Tanteraka ny faniriana,  
Ka dera ho Anao ry Ray!  
Atolotray tokoa ny tena,  
Mba ho fanati-tsitrakao,  
Satria manaiky sy ekena  
Ho tonga olom-baovao.

2. Ny tanindrazanay malala,  
Ry Jeso Tompo, anjakao  
Hiorina eto, tsy hiala,  
Ny fiadanana entinao!  
Ny aizin'ota anie hisava,  
Ny fahantrana koa handao,  
Fa ho tarafin'ny Mazava,  
Hanjary tany vaovao.

3. Ny fiangonanao angony,  
Fanahy ô, ho tena iray,  
Ka tsy hizarazara intsony  
Fa Hianao no mampiray.  
Dia ho fanasina, fanilo,  
Ho an'izao tontolo izao;  
Hijoro, tsy handraraka ilo,  
Hitafy toetra vaovao.

### **546 - Haleloia, Haleloia!**

1. Haleloia, haleloia!  
Jeso no Mpamonjiko,  
Haleloia, haleloia!  
Afaka ny heloko.  
Sambatra aho tretrika aho  
Ahy re ny lanitra,  
Haleloia, haleloia!  
Jeso no Mpanavotra.

2. Haleloia, haleloia!  
Ravoravo re ny fo.  
Haleloia, haleloia!  
Jeso re no soloko.  
Afaka aho, afaka aho,  
Levona ny otako;  
Haleloia, haleloia!  
Lanitra no lovako.

3. Haleloia, haleloia!  
Matokia hianao.  
Haleloia, haleloia!  
Maty mba ho solonao  
Jeso Tompo mahatoky,  
Ry mpanota very ô.  
Haleloia, haleloia!  
Raiso ny famindram-po.

### **547 - Ry Jeso Masoandronay ô!**

1. Ry Jeso Masoandronay ô!  
Ny aizin'ny fo lasa tokoa  
Fa tonga aty anatinay izao  
Mazava lehibe.

Fiv : Eny, Jeso! Zoky be fitia,  
Soa lehibe no nentinao taty,  
Avy izahay, mba hisaotra Anao  
Noho ny fitiavanao.

2. Vangiana ny tokantrano  
Ka menatr' ery, kaody sy lao  
Ny fomba ahitana angano  
Izay tsy mba sitrakao.  
Eny, Jeso! sns...

3. Mpanjaka Fiadanany ô  
Ekena tokoa ny herinao :  
Ny sabatry ny firenena  
Hatao fangady izao.  
Eny, Jeso! sns...

4. Ry Jeso Tompo tia anay ô!  
Misaotra Anao izahay izao  
Fa henika ny hasoavanao  
Izao tontolo izao.  
Eny, Jeso! sns...

#### **548 - He, Jehovah no Mpiandry ahy**

1. He, Jehovah no Mpiandry ahy,  
Tsy mba misy hatahorako;  
Raha izy no mitondra ahy  
Ahi-maitso no handriako.  
Eny, fa ny tany karankaina,  
Dia hody saha lonaka,  
:: Ary ao amoron-dranon'aina  
Hialan'ny foko sasatra ::

2. He, Jehovah no Mpitarika ahy  
Ao an-dàlam-pahamarinana,  
Koa tsy ho kivy ny fanahy  
Amin' ny alom-pahafatesana ;  
Hianao, ry Tokiko irery,  
No hiara-dia amiko.  
:: Ka ny tsorakazonao mahery  
No hanafaka ny tahotro ::

3. Amelaranao latabatra aho  
Eo imaso mpahavaloko;  
Namboaranao kapoaka aho,  
Mampahery sy mahafa-po;  
Eny, indrafo tsy hita lany  
No hiaraka amiko izao  
:: Mandra-pahatongako ho any  
Amim-pahazavan'ny tavanao ::

#### **549 - Jesosy no asandratro**

1. Jesosy no asandratro,  
Fa Izy no Mpanavotro,  
Ny tànany nanafaka  
Ny aiko tao an-davaka ;  
Ny rafiko ho ketraka,  
Izaho afa-kenatra,  
Fa manana ny Tompoko,  
Izay mandako sy aroko ;

Fiv : Ry foko ô! Ankalazao  
Jesosy, Izay Mpamonjinao.

2. Ny tsiron'ny fiainana  
Ananako sahady re,  
Fa efa rnby an-tànana  
Ny famonjena lehibe;  
Ny ranon'aina azoko,  
Ny mofon'aina haniko,  
Sakafo mahatanjaka,  
Mamelona ny reraka;  
Ry foko ô! sns...

3. Ny rany no anjarako,  
Ny ainy no fananako ;  
Ny lanitra ho lovako,  
Ny tany dia hilaozako;  
Ny ota tsy hanaraka,  
Ny ady dia ho tapaka,  
Ny aloka ho tapitra,  
Fa ao ny tena zavatra ;  
Ry foko ô! sns...

4. Ny hanitry ny lanitra



Mamerovero fatratra ;  
Ny kalon'ny voavotra  
Manatsika ahy hiakatra;  
Ny tavan'ny Mpamonjiko  
No tsinjon'ny fanahiko,  
Ny tavany manafaka  
Ny aizina ao anatiko :  
Ry foko ô! sns...

5. Ny masoko mibanjina  
Tahaka ny mpiambina,  
Maniry ny Mpamonjiko  
Ho tafahaona amiko,  
Izaho hovimbininy  
Hipetraka eo anilany,  
Hanao ny hiran-danitra  
Sy honina finaritra ;  
Ry foko ô! sns...

### **550 - Ry Tompo ô, ny tany maina**

1. Ry Tompo ô, ny tany maina  
No itoerako ;  
Midina re, ry Andon'aina  
Ho ao anatiko.

2. Tsy aloka malaky lasa  
No angatahiko,  
Fa hery monina hiasa  
Sy hanavao ny fo.

3. Ny afonao ampandreseo  
Ny afon'nofoko ;  
Ny sitrakao anie hekeko  
Ho tena sitrako.

4. He, tena zavatra ilaiko  
Ny hohavaozinao;  
Ny ainao asoloy ny aiko  
Ho velon-ko Anao.

### **551 - Tsy lany fahoriana**

1. Tsy lany fahoriana

Ity tanintsika ity,  
Fa be ny fihafiana  
Izay hitako aty.  
Ny Tompo no jereko,  
Raha reraka ny fo,  
Ka eo no fiereko,  
Raha azon' ny manjo.

2. Ety alaim-panahy  
Jeso, ny olonao,  
Kaneffa tsy manahy  
Izay mahita Anao.  
Hianao no hojereny,  
Ka moa ho resy ve?  
Hianao no handreseny  
Ny fahavalo be.

3. Tsy azo ialana  
Ny eo anilanao,  
Mahita fanimbana  
Izay mahafofy Anao.  
Asain'ny fahoriana  
Jerena Hianao,  
Mahazo fifaliana  
Ny maso aminao.

4. Rehefa hialana  
Izao tontolo izao.  
Ny tany tsy hitana  
Izay mahita Anao.  
Ka dia hojereko,  
Ry Tompo, Hianao,  
Fa Hianao homeko  
Izao aiko kely izao.

### **552 - Ry foko ô, mba atolory**

1. Ry foko ô, mba atolory  
Ny Rainao ny manjo anao ;  
Na mafy aza ny mahory,  
Dia hovanjeny Hianao;  
Ny lanitra no andrandrao  
Hahafaka ny sentonao.

2. Andriamanitra mahita  
Izay hahasambatra anao,  
Ka Izy no mahay mamita  
Izay zava-tsarotra aminao ;  
Tsy hotsitsiny aminao  
Izay mety hahasoa anao.

3. Ka aza kivy, ry mahantra,  
Na ory aza hianao,  
Fa matokia ny Mpiantra,  
Izay tsy mahafoy anao;  
Ny amboariny izao  
Dia famonjena ho anao.

4. Dia aoka hianao hatoky,  
Raha mafy ny manjo anao,  
Ny Rainao dia mahatoky,  
Ka ampy hiankinanao;  
Tsy misy tsy ho afany,  
Raha avy ny fotoany

### **553 - Any an-danitra ambony**

1. Any an-danitra ambony  
Misy mijery anao ;  
:,: He, feno antra ny fony,  
Koa mangina izao!,::

2. Ry rera-po mitomany,  
Jeso onena anao ;  
:,: Ampy ho toky izany,  
Koa mangina izao!,::

3. Na dia be ny mahory,  
Izy hiaro anao  
:,: Tsy ho tra-doza akory,  
Koa mangina izao!,::

4. Mba mahareta miandry,  
Izy hanafaka anao ;  
:,: Haka anao hodimandry,  
Koa mangina izao!,::

### **554 - Ry Tompo mahavonjy ô**

1. Ry Tompo mahavonjy ô!  
Henoy ny vavakay.  
Ka mamelà ny helokay  
Fa tena tsy mba fantatray  
Izay tokony hatao.

2. Ry Tompo be fiantra ô!  
Malemy izahay,  
Kanefa raha ampianao  
Dia hanan-kery toa Anao  
Izahay mpanomponao.

3. Ry Tompo Izay Mpandresy ô!  
Omeo ny herinao,  
Fa tianay handresena koa  
Ny ota mety hahavao  
Ny olon-tianao.

4. Ry Tompo Ilay mahery ô!  
Ampionao izahay,  
Hijoro, hampiseho izao  
Fa aminay tokoa Hianao,  
Ry Tompo tia ô!

### **555 - Rahoviana no ho lany**

1. Rahoviana no ho lany  
Ny manjo aty an-tany?  
Jeso Vatolampiko  
Ampy hiankinako.

2. Mahereza ry fanahy,  
Aza manana ahiahy,  
Jeso itokiako  
Hampionona ny fo.

3. Ny mahory dia mandalo,  
Ringana ny fahavalo,  
Ny aty hilaozako  
Mba handray ny lovako.

4. Mino aho, ry Mparnonjy,  
Fa ho tena voavonjy;

Afakao ny heloko,  
Hianao isaorako.

5. Dia ho lany ny mahory,  
Ka ho samy tafavory  
Eo anatrehanao  
Izahay mpanomponao.

### **556 - Ny paradisa an-tany**

1. Ny Paradisa an-tany  
Tsy misy, re, izany!  
Ny hazon'aina very,  
Fa tsilo be no ao.

Fiv : Ry Foko, aza kivy,  
Fa ao ny tany soa,  
Ny Paradisa hisy ;  
Ry foko, andrandrao!  
Tsy misy ory any,  
Fa tretrika avokoa ;  
Afaka ady ka mihôby ;  
Misy hazon'aina ao.

2. Mandrahona ny ady,  
Mirehitra sahady,  
Fa be ny fahavalo  
Mamely ahy izao.  
Ry Foko, aza kivy, sns...

3. Ny eso, latsa, ratra,  
Matetika mihatra,  
Tsaroako avaly,  
Ny asa vitako.  
Ry Foko, aza kivy, sns...

4. Miferinaina eto  
Tomany sy misento;  
Indrisy! Ory aho,  
Vonjeo, Tompo ô!  
Ry Foko, aza kivy, sns...

### **557 - Raha manahy ny fanahy**

1. Raha manahy ny fanahy  
Azom-pahoriam-be,  
Ka ny aina mitaraina,  
Ranomaso mitete,  
Aza ketraka ety,  
Fa tazano ny ary.

2. Ao miharo feo maro,  
Fatratra ny hira ao ;  
Ao mifaly ny nijaly,  
Ory teo, ravo izao ;  
Ao Jesosy zokinao  
Faly hovantaninao.

3. Hazon'aina tsy mba maina  
No maniry tsara ao,  
Voninkazo tsy halazo  
No ho fifalianao ;  
Faly ny mandre izao,  
Mainka fa ny tonga ao.

4. Ry Mpamonjy, ho tra-bonjy  
Anie ny olonao!  
Fa maniry ny tahiry  
Ao an-danitra aminao ;  
Mba faingàna Hianao  
Haka ny malalanao!

### **558 - Ity fonenana ity**

1. Ity fonenana ity  
Tsy manam-pitsaharana ;  
Maniry aho ho ary  
An-koatry ny fasana,  
Ny lanitra no hitodiako,  
Fa tena tanindrazako.

2. Kanefa mahatahotra  
Ny ranobe alehako,  
Fa ny tafio-drivotra  
Manohitra ny samboko,  
Ny tsèlatra, ny kotrokorana,  
Mamely sy mandrahona.

3. Ny sambon'ny fiainako  
Mamaky onja sarotra,  
Ka amin'ny alehako  
Mitopatopa fatratra  
Ny alondranom-pahoriana,  
Kaneffa tsy maninona.

4. Fa ny Mpamonjy tokana  
Mitarika ny samboko;  
Ny Tompon'ny fiainana  
Miara-mita amiko,  
Mba ho tafita aho olony,  
Ka honina any Aminy.

### **559 - He, vetivety ny aty an-tany**

1. He, vetivety ny aty an-tany ;  
Fa trano lay no itoeranao ;  
Ka aza ketraka na mitomany,  
Fa andrandrao ny tanindrazanao.

2. He, vetivety ao an-dalan-tery  
No mahasarotra ny dianao.  
Ka, aza kivy, fa Ilay Mahery  
Mamboa-trano hitsaharanao.

3. He, vetivety ao an-tany maina  
No mahabe ny fijalianao,  
Ka dia ho hitanao ny ranon'aina  
Hahafaka ny hetahetanao.

4. Arahonao ny lalan-toratady,  
Mba hahafaingana ny dianao ;  
Jesosy Tomponao no vavahady,  
Ny lanitra no hovantaninao.

5. He, vetivety ary dia ho hita  
Ny tany soa mandry fahizay ;  
Jesosy ô, faingàna hahavita  
Ny fikasanao tsara aminay

### **560 - Mpivahiny aho eto**

1. Mpivahiny aho eto

Tahaka ny razako,  
Ka ny foko feno sento  
Amin'ny alehako.  
Eny, tsy ety tokoa  
No ho fitsaharako,  
Fa mandalo avokoa  
Izay rehetra hitako.  
Ka izaho tsy miato  
Andro aman'alina,  
Nefa aho, izay misento  
Dia hasoavina.

2. Be ny mampahory ahy  
Mila tsy ho zakako,  
Toa velona ahiahy  
Ao am-pandehanako ;  
Nefa kosa tsy mba tery  
Sady tsy mamoy fo,  
Fa izaho tsy irery  
Eto amin'ny manjo,  
Fa jesosy momba ahy  
Ka manafa-tahotra ;  
Raha ory ny fanahy,  
Izy no mahavotra.

### **561 - Raha maizina ny lalana**

1. Raha maizina ny lalana,  
Jehovah Tompo ô!  
Hianao no iankinana,  
Hianao no jiroko.

2. Tsy hitako izay hanjo,  
Fa takona amiko  
Ny andro sisa ianinako,  
Izay nalahatrao.

3. Na mbola ela velona,  
Na maty haingana,  
Ny zarako voatendrinao,  
Tsy te-hifidy aho.

4. Fa Kristy ivelomako  
Raha mitoetra;

Ny faty tombondahiko,  
Fodiana Aminao.

5. Ny fanompoako aty,  
Tsy mahavesatra ahy;  
Tsy maika te-hiala ety  
Raha tsy antsoinao.

6. Raha tapitra ny androko,  
Dia tsara lavitra  
Ny mody any aminao  
Hiala sasatra.

7. Ny sitrakao no sitrako,  
Jehovah Tompo ô!  
Ny teninao andrasako,  
Hianao no tokiko.

### **562 - Miandry ao ambony**

1. Miandry ao ambony  
Ny fifaliana ;  
Aty tsy mety tony  
Ny fahoriana,  
Ka tonga sasilany  
Ny fitarainana ;  
Ary tsy hita lany  
Ny hasambarana.

2. Variana mikorana  
Ny tsy misaina be,  
Ny hendry dia mitana  
Ny hevitra hoe :  
Aleoko mitomany  
Noho ny otako ;  
Ny lanitra ihany  
No fianinako.

3. Ny lalan'ny adala  
Tsy mba harahiko,  
Tsy mampisalasala  
Izay anjarako ;  
Ny sasany mikendry  
Ho afa-po aty,

Izaho dia miandry  
Ny lovako ary.

4. Izaho manantena  
Anao, ry Tompo ô!  
Ka hobim-pamonjena  
No hoventesiko;  
He, vetivety ihany  
No hiaretako,  
Tsy ela dia hankany  
An-tanindrazako.

### **563 - Ry mana-manjo**

1. Ry mana-manjo!  
Akaiky anao,  
Ny Tompo, Ilay be fiantrana

2. Ka Izy anie  
Hitahy anao,  
Hanafaka ny mampahory.

3. Ny ory aty  
Ho faly ary,  
Ka aza mba be alahelo.

4. Ny Tomponao re  
Hanefa tokoa  
Izay hataky ny malahelo.

5. Ny lapany ao  
Voavoa ho anao  
Honenanao mandrakizay re.

### **564 - Tsy hita izay androko sisa aty**

1. Tsy hita izay androko sisa aty,  
Ahiko fandrao tsy tonga ary,  
Ry fanahiko! Ao ny Mpamonjy anao,  
He! Jeso, Mparnonjy anao.(in-3)  
Ry fanahiko! Ao ny Mpamonjy anao,  
He! Jeso Mpamonjy anao.

2. Izaho anefa tamàna aty ;

Tsy hiomana va, fa hifindra ary?  
Fa efa fantatro izao, fa havela ity,  
He! Lanitra soa ary. (in-3)  
Fa efa fantatro izao fa havela ity,  
He! Lanitra soa ary.

3. Ilaozy ity, hadinoy, ry fo!  
Afoizo izao, ry fanahiko ô!  
Fa efa reko ny Tompo  
Miantso anao,  
He! Feo mahafaly izao. (in-3)  
Fa efa reko ny Tompo  
Miantso anao,  
He! Feo mahafaly izao.

### **565 - Mandrahona ny andronay**

1. Mandrahona ny andronay  
Ka raiki-tahotra izahay ;  
Avia, manampia anay ;  
Ry Tompo ô! Vonjeo!

2. Ny teninao no tokinay,  
Ny herinao no tanjakay ;  
Afaho loza izahay :  
Ry Tompo ô! Vonjeo!

3. Fa misy ifaharanay,  
Ka toky be no azonay ;  
Hianao no iankinanay:  
Ry Tompo ô! Vonjeo!

4. Noho ny nahaterahanao,  
Noho ny nahafatesanao,  
Sy noho ny fifonanao :  
Ry Tompo ô! Vonjeo!

### **566 - Raha mafy ny manjo**

1. Raha mafy ny manjo,  
Raha be ny hovitray,  
Raha malahelo fo,  
Mihainoa, Jeso ô!

2. Endrikay notafinao,  
Nentinao ny entanay,  
Nitomany Hianao,  
Mihainoa, Jeso ô!

3. Mafy ny manjo Anao  
Nefa tsy mba meloka;  
Helokay no nentinao,  
Mihainoa, Jeso ô!

4. Voahombo Hianao,  
Voatsindron-defona,  
Nandry tao am-pasana,  
Mihainoa, Jeso ô!

5. Raha ory izahay,  
Ka ny fitarainanay  
Tonga eo an-tsofinao.  
Mihainoa, Jeso ô!

6. Raha tapitra aminay  
Ny fe-taom-boatendrinao,  
Aza mba mandao anay,  
Mihainoa, Jeso ô!

### **567 - Aza malahelo**

1. Aza malahelo,  
Aza kivy fo ;  
Izay tia an'i Kristy,  
Loza tsy hanjo,

Fiv : Jeso be fiantra!  
Mba avia izao,  
Ary ny mahantra  
Mba tantanonao.

2. Aza mba ahina,  
Mpino hianao,  
Fa mba miankina  
Amin'ny Rainao.  
Jeso, sns...

3. Aza mba misento ;

Kristiana anie!  
Fa homen'ny Tompo  
Fifaliam-be.  
Jeso, sns...

4. Tomponay mahery ;  
Mba tsinjavinao,  
Tano sao ho very  
Ny mpanomponao.  
Jeso, sns...

### **568 - Ry fanahy ory**

1. Ry fanahy ory,  
Azon' ny manjo!  
Be ny mampahory,  
Aza rera-po ;  
Feo mamelovelo  
Mba henoy izao,  
Aza malahelo,  
Jeso havanao.

2. Aza mba misento  
Na mamoy fo,  
Raha mbola eto,  
Misy ny manjo ;  
Nefa Jeso tia  
Tsy mandao anao,  
Ka mba matokia,  
Jeso havanao.

3. Namanao mahantra,  
'Ndeha, ilazao,  
Jeso be fiantra  
No Mpamonjy izao ;  
Izy Tompo tia  
Ka mandray anao,  
Dia mifalia,  
Jeso havanao.

### **569 - Indrisy ry sakaiza ory fo**

1. Indrisy! Ry sakaiza  
Ory fo!

Holazainao aiza  
Ny manjo?  
Jeso no Mpamonjy  
Ho anao ;  
Izy mahavonjy,  
Ambarao,  
:,: Azy, ry trabonjy!  
Ny manjo Ao am-po.:,:

2. Indrisy! Ry mahantra!  
Lozanao ;  
Aiza ny mpiantra?  
Indro ao ;  
Jeso hanazava  
Aizim-po.  
Izy hampisava  
Ny manjo ;  
:,: Soa lalandava  
No hatao Aminao.:,:

3. Harena be an-tany  
Tsy anao,  
Zava-mora lany .  
Ka mandao,  
Nefa, indro Jeso  
Zaranao ;  
Hira no venteso,  
Ka derao  
:,: Izay nataon'i Jeso  
Ho anao Hatrizao.:,:

4. Ny lanitra mivoha  
Rahateo ;  
Andrandrao ny loha  
Ka jereo!  
Jeso Tompo soa  
No ary,  
Havanao tokoa  
Hatrety ;  
:,: Dia mazotoa  
Hiditra ao Hiana.:,:

### **570 - Mafy ny alon-drano izao**



1. "Mafy ny alon-drano izao,  
Sady maria no manindao,  
Nefa ny Tompo momba anao ;  
Moa ho kivy va?"

Fiv : "Tsia, Jeso ato aminay,  
Izy hampifaly ny fonay ;  
Tsy mba ho kivy re izahay ;  
Izy no tokinay."

2. "Maro no efa tola sy lao  
Noho ny alahelo izao ;  
Isan'ireny va hianao?  
Moa ho kivy va?"  
"Tsia, sns..."

3. "Amin'izao fiainana izao  
Tsy mba ilaozan-java-manjo,  
Nefa ao Jesosy, tokin'ny fo ;  
Moa ho kivy va?"  
"Tsia, sns..."

4. "Raha ny Tompo aza tety  
Nety ho faty tao Kalvary,  
Iza no tsy handefitra aty?  
Moa ho kivy va?"  
"Tsia, sns..."

### **571 - Raha misy mampahory**

1. Raha misy mampahory,  
Indro, Jeso Tomponao;  
Tsy afoiny tsy akory,  
Aza kivy hianao.  
Raha rava ny harena,  
Ka ho mafy ny manjo,  
Mbola misy famonjena,  
Aza mety kivy fo.

Fiv : Raha misy mampahory,  
Indro Jeso Tomponao;  
Tsy afoiny tsy akory  
Aza kivy hianao.

2. Raha misy ady mafy,  
Indro Kristy herinao ;  
Raha avy ny mpandrafy,  
Raiso koa ny sabatrao.  
Raha tamy hanangoly  
Ilay fahavalonao,  
Ka mandrobo ny devoly,  
Mba aingao ny vavakao.  
Raha misy, sns...

3. Na marary mafy aza  
Ka mangirifiry ao,  
Ary na ho faty aza  
Ka handao ny havanao,  
Mbola misy antenaina,  
Indro, Jeso avotrao ;  
Famonjena avotr'aina,  
Indro, raiso ho anao.  
Raha misy, sns...

### **572 - Jereo ny fahorianay**

1. Jereo ny fahorianay,  
Andriamanitra ô!  
Marary izao ny namanay,  
Ka dia mba iantrao.

2. Raha sitrakao, ry Tomponay!  
Valio ny vavakay,  
Fa mora reraka izahay,  
Tohano sy ampio.

3. Ny fitondrana tianao  
No iankinanay;  
Ny didy avy aminao,  
Izay no sitrakay.

4. Sitrano ny fanahinay  
Ho tonga zanakao,  
Tariho lâlana izahay  
Hankany Aminao.

### **573 - Mahereza ry sakaiza**

1. Mahereza, ry sakaiza  
Vontom-pahoriana!  
Matokia, aza kivy,  
Kristy mialoha anao ;  
:,: Matokia,:,:  
Mahereza hianao.

2. Aza mba matoky tena,  
Foana ny herinao ;  
Tano mafy ny apinga  
Izay atolony anao ;  
:,: Raiso koa,:,:  
Ny Fanahy ho sabatrao.

3. Maizina izao ny andro,  
Saroitra ny lalanao ;  
Ao ambony ny mazava  
Ampy hanazava anao ;  
:,: Mba jereo,:,:  
Ilay mazava amboninao.

4. Vetivety, afa-doza,  
Vita ny alehanao;  
Ao an-danitra ambony  
Misy hifalianao;  
:,:Miravoa,:,:  
Tapitra ny adinao.

### **574 - Aza kivy hianao**

1. Aza kivy hianao  
Azom-pahoriana,  
Tany no fonenanao,  
Misy fihafiana,  
Matokia hianao.  
Raha tratry ny manjo,  
Jeso Tompo herinao,  
Aza mety rera-po.

2. Aza kivy hianao  
Noho ny manjo izao,  
Raha Jeso aminao,  
Afa-tahotra hianao ;  
Matokia hianao.

Fa Jeso Tompo tia tokoa,  
Ka izao rehetra izao  
Dia mety mahaso.

3. Aza kivy hianao  
Na dia ory aza ety,  
Ny Mpanjaka Tomponao  
Mba nihafy koa tety ;  
Matokia hianao.  
Na inona mihatra izao,  
Jeso Ilay Sakaizanao  
Tsy mba mahafoy anao.

### **575 - Ry Jeso ô! Sakaiza**

1. Ry Jeso ô! Sakaiza,  
Mpamonjy tia anay!  
Raha mbola mianjera  
Ny rian-drano be ;  
Mifofofofy mafy  
Ny rivo-doza be,  
Vimbino izahay re,  
Mba tsy ho faty ao.

2. Arovy izahay re,  
Ry Jeso Tomponay!  
Ambara-pahalasan'  
Ny loza izay manjo ;  
Dia ento izahay re  
Ho any aminao,  
Ka raiso ny fanahy  
Ho faly aminao.

3. Kanefa raha mbola  
Hijanona izahay  
Aty ambony tany  
Ka malahelo fo,  
Na misy fahavalo  
Miady aminay,  
Avia, Jeso Tompo!  
Ampio ny olonao.

4. Tsy tambonay isaina  
Ny olona aminao ;

Hiadana tokoa  
Izay horaisinao ;  
Fa Jeso no Sakaiza,  
Anjely maro be  
No hiaraka aminay ao  
An-dapa rahatrizay.

### **576 - Ry Sakaizan' ny mpanota**

1. Ry Sakaizan' ny mpanota!  
Fantatrao ny zanakao,  
Fa malemy, mora lavo,  
Ka mangataka aminao ;  
.:Mba tadiho, mba tadiho  
Ka henoy ny vavakay.:;

2. Raha mitombo harena  
Noho ny fanambinanao,  
Na matanjaka ny tena  
Noho ny fitahianao,  
.:Mba tantano, mba tantano,  
Sao tsy mahalala Anao.:;

3. Raha mamely ny devoly,  
Fahavalon-janakao,  
Ka mandroso manangoly  
Hampisaraka aminao,  
.:Mba tazôny, mba tazôny,  
Fa tsy mahatana Anao.:;

4. Raha mangirifiry mafy,  
Noho ny tsorakazonao,  
Ka ny havana rehetra  
Tsy mahita izay hatao,  
.:Mba tsidiho, mba tsidiho,  
Fa maniry indrindra Anao.:;

5. Raha tonga ilay fotoana  
Hiverenana aminao,  
Ka manahinahy foana  
Noho ny ratsy izay natao :  
.:Mba tohano, mba tohano,  
Hahatsiaro tsara Anao.:;

### **577 - Jeso Sakaizanay**

1. Jeso Sakaizanay,  
Sakaiza rahateo!  
Indreto izahay, vonjeo,  
Fa be ny adinay :

Fiv : Jeso Sakaizanay,  
Sakaiza rahateo!  
Indreto izahay, vonjeo,  
Fa be ny adinay.

2. Jeso Sakaizanay,  
Sakaiza be fitia!  
Tariho izahay hanao  
Ny zava-tiana :  
Jeso, sns...

3. Jeso Sakaizanay,  
Sakaiza tsy mandao!  
Na dia mpanota aza re  
Izahay mpanomponao :  
Jeso, sns...

4. Jeso Sakaizanay,  
Sakaiza tsy mamoy,  
Na ory na finaritra  
Izahay ankehitrin'io :  
Jeso, sns...

5. Jeso Sakaizanay,  
Omaly sy anio,  
Ka mbola ho Sakaizanay  
Mandrakizay doria :  
Jeso, sns...

### **578 - Lohasahan-dranomaso**

1. Lohasahan-dranomaso  
Izao fiainan-tsika izao;  
ka misento lalandava  
Izay rehetra velona ao;  
Koa aiza re no misy  
Hampionona ny fo?

Iza no mahay mamonjy  
Hampisava ny manjo?

2. Manatona Ilay Mpamonjy,  
Ry sakaiza ory Ô!  
Ka aza mba misalasala,  
Mandrosoa hianao;  
Famonjena mahatoky  
Tsy miova no anao,  
Raha manana an'i Kristy  
Ho fanala-tahotrao.

3. Vola sy harena an-tany  
Mety tsy hanananao;  
Havana, sakaiza koa  
Dia hisaraka aminao;  
Nefa Jeso no anjara  
Tsy alaina aminao;  
Izy no Sakaiza tsara  
Izay nanavotra aina anao.

### **579 - Aza mba mandao ahy ry Mpamonjy ô**

1. Aza mba mandao ahy,  
Ry Mparnonjy ô!  
Aza mba manary ahy,  
Jeso Tompo ô!

Fiv : Ry Mpanjaka,  
Mihainoa re!  
Mamonje fa mitaraina  
Ny vahoakao.

2. Fantatrao fa malahelo  
Ny mpanomponao;  
Raha mbola eto aho,  
Mba tsinjavinao:  
Ry Mpanjaka, sns...

3. Indro! fa miandry eto  
Ny navotanao;  
Aoka tsy mba halahelo,

Mba falio izao:  
Ry Mpanjaka, sns...

4. Eny, manomeza hery  
Mba ho ahy re,  
Ka hahery sy handresy  
Ny mpanomponao:  
Ry Mpanjaka, sns...

### **580 - Ry be fiantra sy be indrafo**

1. Ry be fiantra sy be indrafo!  
Ao Aminao misy soa;  
Ory izahay noho ny zava-manjo;  
Ao Aminao misy soa;  
Be siasia an-dalana aty,  
Sao tsy ho tratra ny tsara ary;  
Tompo miantrà, vonjeo izahay,  
Ao Aminao misy soa.

2. Rahona mainty manarona anay,  
Ao Aminao misy soa  
Mba hazavaonao izay dianay,  
Ao Aminao misy soa;  
Ampaherezo hanaraka Anao,  
Ampaherezo hatoky Anao,  
Tompo mahery, hazony izahay,  
Ao Aminao misy soa.

3. Any an-danitra izay lapanao,  
Ao Aminao, misy soa;  
Ka dia matoky izahay zanakao,  
Ao Aminao, misy soa;  
Aza ilaozana akory izahay,  
Sao dia very an-dàlana indray:  
Tompo malala, tariho izahay,  
Ao Aminao, misy soa

### **581 - Aiza re no hahitako izay hampionona ny fo**

1. Aiza re no hahitako  
Izay hampionona ny fo?  
Iza re no handrandraiko,  
'Ndrao dia tolan'ny manjo?  
O! ry ory sy mahantra,  
Manatòna Ahy izao  
He, ny foko feno antra  
Hampiadana anao.

2. Aiza re no hahitako  
Izay hanala tahotra?  
Fa ny làlana ombako,  
Mahatora- kovitra!  
Aza kivy, ry mahantra:  
Manatòna Ahy izao;  
He, ny foko feno antra  
Ampy hiafenanao.

3. Aiza re no hahitako  
Izay hamela heloka?  
'Ndrisy re ity fahotako  
Tena mahaketraka!  
Ry sakaizako mahantra!  
Mba minoa Ahy izao;  
He, ny foko feno antra  
Hanavotako anao.

4. Ry Jesosy ô! Malala!  
Fialofako Hianao;  
Izaho tsy hisalasala  
Hiantoraka aminao.  
Eny, manatòna Ahy  
Feno fitiavana;  
Aza manana ahiahy;  
Izaho no mpiantoka.

### **582 - Ry Jeso ô tahio izahay aty am-pandehananay**

1. Ry Jeso ô! Tahio izahay  
Aty am-pandehananay,  
Ny hadalanay avelao,  
Ny fonay koa ovay ho vao:

Fiv : Arovy re ny olonao,  
Ny lalanay mba hazavao.

2. Ny aizim-be alehanay,  
Mamely koa ny rafinay,  
Tsy fantantray izay hanjo,  
Ka be ny tahotra ao am-po:  
Arovy, sns...

3. Mikasa mafy izahay  
Ho tsara, nefa fantatray  
Fa raha tsy ambininao,  
Tsy misy azonay atao:  
Arovy, sns...

4. Mba tano mafy izahay  
Ambara- pahafatinay,  
Dia ento ao an-danitrao  
Izahay ho faly Aminao:  
Arovy, sns...

### **583 - Mba tarihonao Tompo ô izahay**

1. Mba tarihonao,  
Tompo ô! Izahay,  
Fantatray fa mpivahiny  
Izahay ankehitriny;  
Any Aminao  
No honenanay.

2. Mafy ny manjo,  
Reraka ao am-po;  
Na dia be ny ady aza,  
Tsy ho ketraka ny fonay;  
Any Aminao  
No halehanay.

3. Alahelo be  
Ranomaso koa  
Azon'ny fakam-panahy,  
Saiky resin'ny devoly;  
Fa ny sandrinao  
Iankinanay.

4. Any Aminao  
No honenanay;  
Ry Mpitari-dàlan-tsara;  
Mba tarihonao izahay re,  
Hahatongavanay  
Any Aminao.

#### **584 - Arovy ny fanahinay Andriamanitra**

1. Arovy ny fanahinay,  
Andriamanitra!  
Tariho ny fanahinay (in-2)  
Hanaraka Anao. (in-3)

2. Hianao no hiankinanay,  
Fa tsara Hianao;  
Ka mamelà ny helokay (in-2)  
Fa diso izahay. (in-3)

3. Izahay hiantso Anao,  
Andriamanitra!  
Ka henoy ny fivavaka (in-2)  
Ataonay Aminao. (in-3)

4. Mitsinjova ny mpanota  
Mahantra indrindra,  
Fa Jeso, Ilay Mpanavotra (in-2)  
No maty nisolo. (in-3)

#### **585 - Mahantra aho Tompo ô ka mba tsarovinao**

1. Mahantra aho, Tompo ô!  
Ka mba tsarovinao,  
Maniry ho madio fo  
Sy mendrika Anao.

2. Manolo-tena aho izao,  
Ry Jeso Tompo ô!  
Ka aza dia lavinao  
Izay atolotro.

3. Izaho voasoratrao

Ao amim-bokinao,  
Ho isan'ny mpianatrao,  
Hianatra Aminao.

4. Ataovy izay hahaizako  
Hanaraka Anao.  
Amin'ny fahadiovam-po  
Ho voninahitrao.

#### **586 - Jesosy Kristy Tompo ô hianao no antenaiko**

1. Jesosy Kristy Tompo ô!  
Hianao no antenaiko;  
Tsy misy Mpamonjy toa Anao,  
Ry Heriko sy Aiko,  
Fa tsy mba misy olona  
Mahafaka ny heloko,  
Tsy zakako nyentako,  
Ry Jeso ô!  
Hianao anefa tokiko.

2. Ny otako dia lehibe,  
Ny foko dia ory!  
Mpamonjy Ô, vonjeo re!  
Ny heloko esory.  
Ny Rainao tsara ilazao,  
Fa izaho no navotanao,  
Ka mba havela heloka,  
Dia azoko  
Ny fiadanana ao am-po.

3. Finoa-marina ao am-po  
No aoka mba homenao,  
Mba hanandramako tokoa  
Ny tsirom-pamonjenao,  
Mba hitiavako Anao  
Sy ireo rahalahinao;  
Raha avy ny fotoako,  
O, mba vonjeo!  
Ka mba reseo ny rafiko.

4. Ny saotra, dera, ho Anao,

Ry Raiko be fiantra,  
Sy ho Anao, ry Kristy Ô,  
Mpamonjy ny rnahatra,  
Anao, Fanahy Masina,  
Izay te na Mpampionona!  
Izaho mba omeonao  
Ny aim-baovao,  
Haharitra ho olonao!

### **587 - Jehovah Tompo no itokiako**

1. Jehovah Tompo no itokiako,  
Fa mampitombo ny fifaliako;  
Ny fo sy saiko miankina Aminy,  
Izay ilaiko omen'ny teniny,  
Ka tena aiko ny toroheviny.

2. Ampio aho, Jehovah Tompo ô!  
Fa mitalaho izao ny zanakao,  
Omeo hery hitanako ny to,  
Mba tsy ho very ny rakitra ao am-po;  
Hianao irery no iankinako.

3. Ry Kristy Tompo, mba mamonje  
anay  
Mba ho mpanompo mazoto izahay,  
Mpiasa tsara ankasitrahanao,  
Izay manambara ny fitiavanao  
Ka hiafara eo anatrehanao.

### **588 - Tompo Mpamindra fo mahery sy tsitoha**

1. Tompo Mpamindra fo!  
Mahery sy Tsitoha  
'Zay nidina taty  
Hamonjy ny mania;  
Mivavaka Aminao  
sy mitalaho izahay  
Ny gadranay tapaho  
hanafaka anay'

2. Tompo ô! Manjakà  
Amin'ny olonao;

Faingàna, iantrao  
Ireo izay narovanao;  
Miondreha, mijere,  
Izahay miandrandra Anao;  
Ny herinao anie  
Hatafinao ireo.

3. Tompo Mpanova fo,  
Mpampionona tokoa.  
Midina ka ampio  
Izahay hahery izao.  
Toky mamy loatra  
No omena anay:  
Hatrany ankoatra,  
Arovinao izahay.

### **589 - Ry Jesosy Tompoko, izay nanetry tena ô**

1. Ry Jesosy Tompoko,  
Izay nanetry tena ô!  
Naka ny tarehinay  
Hanavotanao anay;  
Mba omeo anay izao  
Ny Fanahy Masinao,  
Hanarahanay Anao.

2. Zanak'i Davida ô!  
Mba midira ao am-po,  
Raiso ka diovinao  
Izy ho tempolinao;  
Izahay manasa Anao  
Honina ao am-po izao,  
Koa mba ekeonao!

### **590 - Kristy Tsitoha, Tomponay mahery**

1. Kristy Tsitoha, Tomponay mahery,  
Mba mitodiha re ny olom-bery,  
Ka mamonje anay izay mania;  
O, mba avia!



2. He, Hianao kiadin'ny mivalo,  
Ka mba reseonao ny fahavalo;  
Ny ta-hanimba ny Anao sakano  
Izahay tantano!

3. Ny fiangonanao ampiadano,  
Ny tanindrazanay re mba tohano,  
Ny tena sy fanahinay tahio,  
Ampifalio!

4. Ny asanao, ry Zana-Janahary,  
Dia mankalaza Anao miharihary,  
Ka izahay midera Anao Mpamonjy  
Fa voavonjy!

### **591 - Ry Jesosy, Izay Mpiahy**

1. Ry Jesosy, Izay Mpiahy,  
Mba henoy izao;  
Raha misy mamely ahy,  
Mba reseonao!

Fiv : Ry Jesosy, mba henoy izao;  
Raha misy mahory ahy,  
Mba tsarovinao!

2. Raha avy ny devoly  
Ka mandrahona,  
Raha ny nofo manangoly  
Sy manintona,  
Ry Jesosy, sns...

3. Be ny fahavalo fetsy  
Mampahory izao,  
Izaho dia mora resy,  
Ka vonjeonao!  
Ry Jesosy, sns...

4. Raha misalasala aho,  
Mba toroy ny to!  
Ary raha mitalaho,  
Amindraonao fo!  
Ry Jesosy, sns...

5. Miangavy mafy aho,  
Ry Mpamonjy ô!  
Mba vonoy ny fahotako  
Amin'ny ranao.  
Ry Jesosy, sns...

6. Raha tapitra ny andro  
Ivelomako,  
Hazavao, ry Masoandro,  
Ao am-pasako,  
Ry Jesosy, sns...

### **592 - Be ny mampahory**

1. Be ny mampahory  
Aty, Jesosy ô!  
Kely, osa, ory,  
Ny mpanomponao.  
Ry Mpiandry lehibe,  
Anao ny tenako;  
Hianao irery re,  
No iankinako.  
Tompo ô, ny foko  
Manantena Anao.

2. Miarova ahy,  
Jesosy Tompo ô!  
Tena sy fanahy  
Hasoavinao,  
Ry Mpamonjy lehibe,  
Anao ny tenako;  
Hianao irery re  
No vatolampiko.  
Tompo ô, ny foko  
Manantena Anao.

### **593 - Ry Jeso ô, Mpanjakanay**

1. Ry Jeso ô, Mpanjakanay,  
Hadinonao va izahay,  
No tsy omenao faingana  
Ny rano mahavelona?

2. He, maina sy mangetana

Sy ivesarana entana,  
Ka mapiferin'aina anay  
Ny efitra onenanay.

3. Tsy hitanao ve, Tompo ô,  
Fa valaka sy rera-po,  
Malain-kanaraka Anao  
Ny olom-boafidinao?

4. Aidinao ny Fanahinao  
Sy fifaliam-po vaovao;  
Ny ranon'aina anie  
Hatondrakao ny tany re!

5. Reseo ny fahavalonay,  
Omeo rariny izahay,  
Tapahonao ny gadranay,  
Ampiadano izahay!

#### **594 - Ry Tompoko malala, mpiandry tsara ô**

1. Ry Tompoko malala,  
Mpiandry tsara ô!  
Hianao no mahalala  
Ny hasasarako.  
Ny ota an-tapitrisa  
Izao mandreraka!  
Ka manomeza ahy  
Fiadanana!

2. Ry Tompoko malala,  
He, zatra Hianao  
Mampody ny adala  
Niala taminao;  
Ampiadano aho,  
Tariho lalana,  
Ka mahareta, Tompo  
Aza sasatra!

3. Ry Tompoko malala,  
Te-hody aho izao,  
Fa manina ny vala  
Ny ondrikelinao;

Ka mitalaho aho:  
Vohay, ry Jeso ô,  
Izay mba efitrano  
Hitoerako!

#### **595 - Ry Raiko ô ! Mba raiso ny tanako**

1. Ry Raiko ô ! Mba raiso ny tanako.  
Tantano mba handroso ny diako,  
Hazony tsy hania ny zanakao,  
Ry Raiko ô, avia, tarihonao.

2. Ny foko ta-hanoa ny didinao,  
Kanefa mora voan' ny ratsy izao,  
Ka dia mba fenoy ny herinao.  
Ry Raiko ô, henoy ny zanakao.

3. Rehefa tsy mahita ny lâlana  
Ka toa tsy ho tafita ny lalina,  
Fa ketraka ny aiko, dia raisonao,  
Trotroy aho, Raiko, an-tratanao.

#### **596 - Indreto izahay mitomany**

1. Indreto izahay mitomany  
Fa be alahelo ny fo;  
Ny ota no fototr'izany,  
Ny heloka sy ny mania;  
Fa reraka, re, ny fanahy,  
Mahantra sy be ahiahy,  
Ka tena variana ery

2. Ry Tompo, Izay mofon'ny aina  
Ry rano mamelona anay,  
Tsinjovy izay mitaraina,  
Mahantra izao izahay!  
Onòny ny fonay fa voa,  
Omeo izay mahaso, a,  
Monena aminay Hianao.

3. Ny fonay dia be hetaheta.  
Maniry indrindra Anao;

Ry Tompo, mba mampahareta  
Anay ho mpanaraka Anao;  
Ny reraka ataovy mahery,  
Vonjeo izahay olom-bery  
Matoky Anao izahay!

### **597 - Ô ry Jesosy Mpamonjy mahery**

1. Ô ry Jesosy Mpamonjy mahery!  
Izaho maniry indrindra Anao,  
Fa reraka aho ka mila ho very;  
Ny foko saronan'ny ratsy izao:

Fiv : Ry Tompo, tsilovy,  
Ny lalan'ny saiko,  
Ka mba arovy  
Ny fo sy ny aiko!

2. Efa hanafotra ahy ny rano,  
Faingàna, Jesosy, vonjeonao re!  
Ho difotra aho, ry Tompo, ka tano,  
Diovy, afaho ny foko anie!  
Ry Tompo, tsilovy, sns...

3. Efa akaikin'ny lalina aho,  
Ka mila ho voa, hilentika ao;  
Ry Tompo malala, ny foko tanjaho,  
Ka mba hazavao hahalala Anao:  
Ry Tompo, tsilovy, sns...

4. Aiza izao Hianao, ry Mpamonjy,  
Ry Tokin'ny ory sy reraka ô,  
No tsy mampiseho ny herin'ny vonjy  
Hanafaka ahy, izay ory am-po?  
Ry Tompo, tsilovy, sns...

5. Ô, ry Jesosy, izay naharara  
Ny onja namely ny sambo tary  
Anivon'i Genesareta ho tsara  
Toneo ny onjan'ny foko aty!  
Ry Tompo, tsilovy, sns...

### **598 - Omeo mba handramako**

1. Omeo mba handramako  
Ny fitiavanao,  
Hahaizako, ry Jeso ô,  
::: Hiavana aminao :::

2. Iriko re ny tavano,  
Ry Ilay malalako,  
Fa tiako ny hahita Anao,  
:: Izay Sakaizako :::

3. Raha ao ny ali-maizim-be,  
Izay handehanako,  
Ho eo an-tananao anie  
::: No hahafatesako :::

4. Ka tsy mba hatahorako  
Ny aizim-pasana,  
Hatsangano ny tenako  
::: Ho tena sitrana :::

### **599 - O, Ry Jesosy mifaly ny foko**

1. O, Ry Jesosy mifaly ny foko,  
Raha tsy lavitra Anao,  
Ka mba mangataka indrindra re aho.  
Ary mifona aminao;  
Tano ny zanakao mba tsy ho very,  
Tano akaiky Anao !  
Zaza adala ka mety miery,  
Raha dia lavitra Anao.

2. Aza manary izay mitalaho,  
Fa mba vonjeo anie;  
Tena mahantra sy ory re aho.  
Diso sy meloka be;  
Nefa maniry hiova ho tsara,  
Ka ta-hanoa Anao,  
Ary ny zavatra izay voarara,  
Tsy mba hataoko izao.

3. Raiso, ry Tompoko, ny fikasako,  
Raiso ny foko anio !  
Raha ny marina no ialako,  
Dia ahitsio sy ampio;

Fa Hianao, ry Mpamonjy mahery,  
No tsy mba mety mandao,  
Ary izaho dia tsy mba irery,  
Fa tsy ho lavitra Anao.

### **600 - Ry Raiko ô!**

1. :,:Ry Raiko ô! :,:  
Izaho aty mpivahiny  
Manina ny tranonao,  
Ka mba tariho  
Ny zanakao.

2. :,:Ry Raiko ô! :,:  
Indro, Satana milofo  
Mba hanangoly anay,  
Ka mba vonjeo  
Ny zanakao.

3. :,:Ry Raiko ô! :,:  
Maizina sady malama,  
Sarotra ny lalanay,  
Ka mba tantano  
Ny zanakao

4. :,:Ry Raiko ô! :,:  
Maro ny zava-mihatra,  
izay mampanahy anay  
Ka mba tohano  
Ny zanakao

### **601 - Misaotra Anao, Jesosy ô!**

1. Misaotra Anao, Jesosy ô!  
Ny olom-boavonjy,  
Fa be dia be ny indrafo  
Nataonao, ry Mpamonjy.  
Fa tonga ory Hianao,  
Ny ainao no natolotrao  
Hisolo ny mpanota.

2. Ampibebaho izahay  
Ho olonao manoa;  
Ny ota iverasanay

Esory avokoa.  
Ny fifaliana vaovac,  
No aoka mba hasolonao  
Ny alahelom-ponay.

3. Ampio izahay izao  
Hinoanay ny teny  
Izay nolazain'ny vavanao,  
Fa tanjakay ireny.  
Izao, no angatahinay,  
Mba hatanjaho izahay,  
Hanaraka izany.

### **602 - Ry Andriamanitry ny famonjena**

1. Ry Andriamanitry ny famonjena  
Sy kintana antenain'ny firenena,  
Henoy ny fangataham-pandresena,  
Ry Ray Tsitoha!

2. Ilay fitopatopan'ny alondrano  
Sy rehrehan-drafinay fohano  
Ny olonao mahantra mba tantano,  
Ry Ray mpiaro!

3. Raha osa, Hianao mahay mitàna,  
Raha reraka asiam-pahotàna,  
Ny herinao tsy resin'i Satana,  
Ry Ray Mahery!

4. Ampionao izahay handresy rafy,  
Ampionao mba haharitra ny mafy,  
Ampionao tsy ho ketraka mihafy,  
Ry Ray Mpanampy!

### **603 - He sambatra Jesosy ô**

1. He, sambatra Jesosy ô,  
Ny ondry vitsinao!  
Fa Hianao Mpiandry soa  
Maharo ny Anao.  
Ny ainao no natolotrao,  
Ho an'ireo ondrinao,

Ny very tadiavinao  
Hiaraka Aminao.

2. Izaho voamarika  
Ho isan'ny Anao,  
Anefa mba matahotra  
Sao dia lavinao,  
Ka aoka mba hotairinao,  
Ny foko, raha hitanao  
Fa mila ho sondriana  
Sy diso làlana.

3. Ny hafanana mahamay  
No mahatrotraka,  
Anefa mbola tazanay  
Ny fitsaharana.  
Ho avy faingana anie  
Ny andro soa lehibe,  
Izay hamelaranao ny lay  
Handrakotra anay.

#### **604 - Ento aho ry Jehovah**

1. Ento aho, ry Jehovah,  
Mpivahiny raha ety;  
Tano aho, fa malemy,  
Raha tsy hazoninao,  
Mofon'aina,;,  
Ho fihinako, anie.

2. Mba savao ny loharano  
Hahazoako ny soa;  
Aoka hitari-dàlana Ahy  
Izay andri-rahonao,  
Ry Tsitoha,;,  
Fiarovana Hianao.

3. Raha hita an'i Jordana,  
Am pandrio ny tahotra;  
Ry Mpandresy fanimbana,  
Ento any Kanana aho!  
Fiderana,;,  
No hatolotro Anao.

#### **605 - Jeso Hery mahavonjy**

1. Jeso Hery mahavonjy  
Tena Fialofana,  
Fa miantra sy mamonjy  
Zanak'olombelona  
;,:Hery soa, hery soa,  
Itokianay tokoa,;:

2. Raha misy ny tafiotra  
Izay mamely mafy anay,  
Ny fitiany tsy ho ritra  
Tokinay mandrakizay.  
;,:Tsy mandao, tsy mandao,  
Iankinana hatrizay,;:

3. Raha mambomba sy miaro,  
Mampitony tahotra,  
Jeso Tompo tia, Mpiaro;  
Resy re, ny hovitra.  
;,:Fa matoky, fa matoky,  
Ilay ampinga lehibe,;:

4. Tianay tokoa tokoa  
Ho an-tratranao doria,  
Mba hatoky ka ho soa,  
Ry Mpamonjy be fitia.  
;,:Tompo soa, Tompo soa,  
O! hazoninay tokoa,;:

#### **606 - O, ry Raiko Izay mpandahatra**

1. O, ry Raiko Izay Mpandahatra!  
Vato fantsika mafonja!  
Aminao no mifahatra  
Itany foko safotra onja.

Fiv : Ry Tsitoha ô! Mijere!  
Ry Mpamonjy ô, mamonje!

2. He, manonja mafy loatra  
Itany fiainako voafofo  
Toa dia diso tafahoatra  
Ireo ankaso izay milofo,

Ry Tsitoha, sns...

3. Nefa kosa tsy mamoy!  
Izany foko manantena!  
Fa ny masonao manjohy,  
Iandrindrako famonjena.  
Ry Tsitoha, sns...

### **607 - Jeso no mpiambina antsika**

I.Jeso no Mpiambina antsika  
Sy Mpiandry tsara,  
Ka natolony ny ainy  
Hisolo ny ondry.

2. Matokia hianareo,  
Ry ondry vitsy  
Fa ny Raiko no mikasa  
Hitandrina anareo.

3. Izaho no Mpitarika  
Sy Mpitondra tsara  
Izay manaraka Ahy  
Handresy ny ratsy.

4. Ary amin'ny farany  
Halaiko ny Ahy  
Tsy hisaraka amiko  
Ela mandrakizay.

### **608 - He, miandrandra Anao,**

1. He, miandrandra Anao,  
Jehovah Tompo ô!  
Ny olonao;  
Henoy ny vavakay  
Vonoy ny helokay  
Hahafantaranay  
Fa zanakao.

2. Raha hodiavinay  
ny tany maizina,  
Tarihonao;  
Fafao, Ry jesosy

Ny ranomasinay,  
Ka mba esorinac,  
Ny tahotray.

3. Mba manomeza anay  
Ny hasoavanao,  
Ry Tompo ô  
Mba hahazoanay  
Ny hasambarana  
Tsy mety levona,  
an-danitra.

4. Tohanonao izahay,  
Rahefa tapitra  
Ny andronay.  
Ray ô! Mba hamoray  
Ny hanalana anay  
Ho any aminao,  
mandrakizay.

### **609 - Hianao Jehovah Tompo!**

1. Hianao Jehovah Tompo!  
No hatoninay izao;  
Avy izahay hanompo  
Sy hanao ny sitrakao,  
::Indro raiso,  
Raiso ho Anao izahay:::

2. Mba tantano sy arovy,  
Fa malemy izahay,  
He! Marary sy farofy,  
Hianao no herinay,  
::Ody aina  
Hitsaboanao anay:::

3. Mpivahiny ka mahantra,  
Entonao, Fanahy ô!  
Ana sy mangetaheta,  
Asehoy ny antranao;  
::Ranon'aina  
Hosotroinay izao:::

4. Tranonao madio no any,

Vorodamba no anay,  
Fa hilaozanay ny tany,  
Ka soloy ny lambanay,  
::Lamba fotsy  
Hitafianay anie:::

### **610 - Ny foko, ry Jehovah ô!**

1. Ny foko, ry Jehovah ô!  
Fidio ho lapanao;  
Ekeo ho fonenanao,  
Ka ao no anjakao.

2. Ny foko, ry Jesosy ô!  
Sasao ho voadio;  
Izay eritreri-dratsy ao  
Levoninao anio.

3. Ny foko, ry Fanahy ô!  
Mba hamasinonao;  
Avia, Fanahy Masina ê  
Ovay ho fo vaovao.

4. Ray, Zanaka, Fanahy ô!  
Mpamonjy mahasoana,  
Mpanafaka ahy Hianao,  
Isaorako tokoa.

### **611 - Jehovah Ray Malala ô**

1. Jehovah Ray Malala ô!  
Izay ao an-danitrao,  
Henoy ny fivavahako  
Ataoko aminao,  
Fa Jeso Kristy Zanakao  
No tena sorona  
Izay entiko ho aminao  
Mpamela heloka.

2. Ny lalako mba hazavao,  
Hianao no jiroko,  
Fa maizim-pito e izao  
Sy be ny kotroka;  
Na misy loza aza re

Izay mampamoy fo,  
Tsy misy hatahorako,  
Hianao no amiko.

3. Ny fikapohana, izay  
Ataonao amiko,  
Dia misy fananarana  
Mba hibebehako;  
Ny fahafatesana, izay  
Ho tonga koa izao,  
Dia lalana halehako  
Ho any aminao.

4. Mba raisonao ny tanako,  
Tantano aho izao,  
Fa zazabodo, Raiko ô!  
Ampio ny zanakao;  
Na tondraka ny rano re  
Ka safononoka ao,  
Ny faty tsy ho tahotro,  
Hodiako aminao.

### **612 - Ry Ray mpiaro lehibe**

1. Ry Ray Mpiaro lehibe,  
Mba mihainoa ahy e,  
Ka ampio aho hanao hoe:  
Hatao anie ny sitrakao!

2. Izay rehetra sitrakao  
No aoka mba hatao izao,  
Fa mahasoana ny tianao :  
Hatao anie ny sitrakao!

3. Na sarotra aza ny hatao,  
Mba manampia ny zanakao  
Hanaraka ny teninao :  
Hatao anie ny sitrakao!

4. Na tonga aza ny manjo,  
Ka ory sy mivadi-po,  
Ho toy izao no teniko :  
Hatao anie ny sitrakao!



5. Mba tanterahonao tokoa  
Izay kasainao hahasoa;  
Ny tena sy fanahy koa;  
Hatao anie ny sitrakao!

6. He, Hianao dia tsy mandao  
Izay voaray ho olonao  
Ka mankato ny didinao;  
Hatao anie e ny sitrakao!

### **613 - Mpiandry lehibe!**

1. Mpiandry lehibe!  
Vorio ny ondrinao  
Hiray fisoko avokoa,  
Hiadana aminao.

2. Sakaiza herinay!  
jereo ny ondrinao  
Mitebiteby, ory fo,  
Ka miandrindra Anao.

3. Manahy izahay,  
He! Ala be izao;  
Andrao ho very foana aty,  
Vonjeo ny ondrinao.

4. Henoy, ry Tokinay!  
Vohay ny tranonao',  
Raha avy ny hodianay  
Hitoetra aminao.

### **614 - O! Ray jereo ny zanakao!**

1. O! Ray jereo ny zanakao!  
Mivavaka aminao;  
Henoy ny fitarainanay  
Izay atao, izao.

2. O Ray! Vonjeo ny zanakao,  
Fa osa izahay;  
Ny tananao no herinay,  
Handresy izahay.

3. O Ray! Tahio ny zanakao,  
Ny soa aminao,  
Ka arotsahy aminay  
Ny fitahianao.

4. O Ray! Misaotra Anao, izahay  
Ka dera no atao;  
Ny soa azonay aty  
Isaoranay Anao.

5. O Ray! Vahiny izahay,  
Tsy taninay ity;  
Ka raha hody raisonao,  
Ho aminao ary.

### **615 - Ry Jehovah Ray mahery!**

1. Ry Jehovah Ray Mahery!  
Indreto ny mpanomponao;  
Fa mpanota saiky very  
Nefa tsy mba foinao;  
Fa ny masonao mijery  
Ny fanahinay mania;  
Ny fitaomanao mahery  
No miantso hoe: "Avia".

2. Ry Jehovah, Ray Mpitahy  
Izay rehetra ory fo!  
Ny tsy manana mpiahy  
Mora resin'ny manjo;  
Zovy ary no hanahy  
Raha miankina Aminao?  
Eny, faly ny fanahy  
Izay mitoky aminao.

3. Ry Jehovah, Ray Mpiaro!  
He ny fahavalonay  
Izay masiaka sy maro;  
Hodidinanao, izahay,  
Fa ety dia mifangaro  
Amin-dratsy izahay,  
Ka tsy misy izay maharo  
Raha ilaozanao, ry Ray!

4 .Ry Jehovah ô! Vimbino  
Itany zanakao ety,  
Aza avela hanadino  
Ny fonenan-tsoa ary ,  
Ka omeo fanahy mino  
Tsy mivadika aminao;  
Ary koa, mba sakambino  
Tsy hisaraka aminao.

## **616 - Rainay be fitia!**

I. Rainay be fitia!  
Avy izahay  
Hila zavatra  
Ato aminao;  
Mihainoa anay.

2. Rainay tsy miova!  
Mijere anay,  
Zanaka nikomy,  
Fa naverinao;  
Maneke anay!

3. Rainay be fiantra!  
Menatra izahay,  
Dia mba mifona  
Eo imasonao;  
Miantrà anay!

4. Rainay be harena,  
Mpanome ny soa!  
Izahay mahantra,  
Mitaraina hoe:  
Manomeza anay!

5. Rainay be fitia!  
Indreto izahay  
Avy mba hitondra  
Saotra ho Anao:  
Aza lavinao!

## **617 - Aza manadino ahy**

1. Aza manadino ahy,

Ry Mpihaino vavaka!  
Aza mba manary ahy  
Hanalavitra Anao;  
Mitodiha ry Mpanjaka!  
Ka Jereo ny olonao;  
Aza manadino ahy,  
Ry Mpihaino vavaka!

2. Hianao no fiereko,  
Vatolampy, heriko!  
Na kamboty aza aho,  
Faly manana Anao;  
Afa-tahotra ny foko,  
Raha miandrindra Anao;  
Aza manadino ahy,  
Ry Mpihaino vavaka!

3. Eny Hianao no Raiko,  
Ka hatoniko izao;  
Nefa ny fahadalako  
Aza mba heverinao;  
O! ampifalio aho,  
Ka ombay ny elatrao;  
Aza manadino ahy,  
Ry Mpihaino vavaka!

4. Tabataba lalandava  
No mba hitako izao,  
Ka izaho te-ho tonga  
Ao am-pitsaharanao-  
Mitenena, ry Jehovah!  
Mamalia ahy izao;  
Aza manadino ahy,  
Ry Mpihaino vavaka!

## **618 - Eny, Raiko! Mba tariho**

1. Eny, Raiko! Mba tariho  
Ny fanahin-janakao.  
Ka ny saiko atodiho  
Hankato ny teninao.  
Zaza be fisiasia,  
Tano re ny zanakao,  
Dia taomy mba ho tia

Sy hanao ny sitrakao.

2. Eny, Raiko! Mba tsilovy  
Ny alehan-janakao,  
Ka tantano sy arovy  
Mba hankany aminao;  
Mora reraka ny aina  
Raha tsy fahananao,  
Ka tohano tsy halaina  
Mba hanao ny sitrakao.

3. Eny, Raiko! Raha mafy  
Izany tsorakazonao,  
Ka ny aiko tsy mahahafy  
Mba vonjeo ny zanakao;  
Ka ny foko 'zay adala  
Mba ovay sy hazavao,  
Dia taomy hahalala  
Mba hanao ny sitrakao.

4. Eny Raiko! Mba tohano  
Raha mihatra ny manjo,  
Ka vimbino sy tantano  
Tsy ho kivy re ny fo;  
Raha tapitra ny aiko,  
Raiko hody aminao;  
Eny, ento aho, Raiko!  
Fa izay no sitrakao.

#### **619 - Ry Raiko ô! Tariho ny zanakao,**

1. Ry Raiko ô! Tariho ny zanakao,  
Tariho re!  
Fa maizina ny lalako izao,  
Tariho re!  
Tsilovy ka omeo finoana,  
Tantano ao am-pandehanana.

2. Izay ela izay ny lalan-tsitraro  
No tiako;  
Izay ela izay izac, tontolo izao  
No mamiko;  
Kanefa izao, tariho ny zanakao,  
Ry Raiko ô! Handia ny lalanao.

3. Tsy mba ahoako ny loza aty  
An-dalana;  
Tsy te-hitsinjo koa ny ary  
An-koatra;  
Fa isan'andro alaharonao,  
Ry Raiko ô! Ny dian'ny zanakao.

4. Na mbola lavitra aza re izay  
Alehako,  
Tarihona ambara-pahafaka  
Ny alina,  
Dia vao hitsahatra ny zanakao,  
Ry Raiko ô! Ary an-danitrao.

#### **620 - Zanahary, Ray mahery**

1. Zanahary, Ray mahery,  
Izahay tsy manan-kery,  
Nefa he, ny fahavalo  
Fa masiaka sady maro;  
O! ampio re izahay,  
Fa ny zavatra mihatra  
Tsy mba misy maharatra  
Ny arovanao, ry Ray,  
Zanahary Ray mahery,  
Mba arovy izahay!

2. Zanahary, Ray miantra!  
Olon-diso sy mahantra  
Izahay izay mitaraina,  
Hiana no antenaina:  
lantrao, re izahay!  
Be tokoa ny fahotana  
Mahatonga fanimbana  
Efa vitanay tatỳ:  
Zanahary, Ray miantra,  
Mamelà ny helokay!

3. Zanahary, Ray malala!  
Enga anie ka hahalala  
Mba ho tia sy hanaiky,  
Ary koa mba hanakaiky  
Ny Mpamonjy izahay;

Tsy ny tahotray ny loza  
No nanaitra anay hiova,  
Fa ny ran'ny Zanakao;  
Zanahary, Ray malala,  
Mba hazony izahay!

### **621 - Ry Jeso be fitia!**

1. Ry Jeso be fitia!  
Tariho izahay  
Mba tsy haniaasia  
Fa hiaraka aminao.  
Indrisy! Ela loatra  
No nijanonanay,  
Nanaram-po nihoatra  
Ny sitrapon'ny Ray.

2. Ry Tompo! Miarova  
Ny fiananay ety,  
Izay fohy, mora miova,  
Fa tsy toy ny ary.  
Izay ianteharana eto  
Mandalo avokoa :  
Ny fo re no mba ento  
Hikambana aminao.

3. Tariho hahalala  
Ny tianao hatao,  
Ka tsy hisalasala  
Handà izay halanao;  
Mandatsaka ao an-tsaina  
Ny soa vitanao,  
Ka dia hikely aina  
Hanao ny sitrakao.

### **622 - Mba tantano Raiko ô!**

1. Mba tantano Raiko ô!  
Ny fanahin-janakao,  
Aoka re ny sandrinao,  
No hiaro ahy izao;

Fiv : Indro! Raiso,  
Tano aho Tompo ô!

Mba hanao ny sitrakao  
Sy hitoetra ao aminao.

2. Ray malala Hianao,  
Sady tia ny zanakao:  
Aoka re ny tavanao  
Hanazava ahy izao!  
Indro! Raiso, sns...

3. Na dia maizina aza aty,  
Dia matoky aho izao  
Fa hianao, dia tsy mandao,  
Izay miaraka aminao:  
Indro! Raiso, sns...

### **623 - Mba omeo ahy**

1. Mba omeo ahy  
Fo madio kokoa  
Afaka ahiahy  
Ho Anao tokoa.  
Izaho dia malaina,  
O! mba hafanao re  
Mba hikely aina  
Hahefako be.

2. Mbola manangoly  
Ny fakampanahy;  
Ao koa ny devoly  
Ta-hamotraka ahy;  
Tompo ô! Ampio  
Ny mpanomponao izao,  
Ary mba tafio  
Herim-po vaovao.

3. Atolory ahy  
Zotom-po sy hery,  
Fahendrern-panahy,  
Fo mahay mietry.  
Ampianaro aho  
Mba hanolo-tena,  
Ka mba hatanjaho  
Ny finoako.

4. Dia hamasino  
Ny saiko, ry Tompo!  
Ka omeo fo mino,  
Fo mahay manompo,  
Fo mahay mihafy,  
Fo miravoravo,  
Na dia voa mafy,  
Fo toy ny Anao.

#### **624 - Jeso ô, Mpiandry tsara!**

1. Jeso ô, Mpiandry tsara!  
Sambatra ny ondrinao;  
Hianao no mialoha  
Hanarahanay Anao;  
Mitariha, mitariha  
Ny fanahinay izao:;

2. Jeso ô, Mpiandry tsara!  
Fohy ny fisainanay;  
Hianao mahay manoro  
Lalana halehanay;  
Mitariha, mitariha  
Ny fanahinay izao:;

3. Jeso ô, Mpiandry tsara!  
Tsinjonao ny dianay;  
Ondry very ka ho faty,  
Raha tsy hatoninao;  
Mitariha, mitariha,  
Ny fanahinay izao:;

4. Jeso ô, Mpiandry tsara!  
Izao, alehanay izao,  
Ala be sy làla-mafy,  
Maty re ny ondrinao!  
Miarova, miarova  
Ny fanahinay izao:;.

5. Jeso ô, Mpiandry tsara!  
Mafy re ny tahotray;  
Bibidia mampiravira  
Mampivadi-po anay;  
Miarova, miarova

Ny fanahinay izao:;

6. Jeso ô, Mpiandry tsara!  
Ento mody izahay;  
Aminao ny valan'ondry  
Tsy mba misy tahotra;  
Mitariha, mitariha  
Ny fanahinay ho ao:;

#### **625 - Mpamonjy soa malala ô**

1. Mpamonjy soa malala ô!  
Mba miandrindra Anao,  
Ny foko sy fanahiko  
Ankehitriny zao;  
Fa Hianao, irery  
No tena Mpanome  
Ny fahafinaretana  
Sy fitsaharam-be.

2. Mpiandry ondry mora ô!  
Ry Jeso be fitia!  
Hazony aho ondrinao  
Mba tsy haniaasia,  
Andraso isan'andro,  
Arovinao anie,  
Endrey! Fa mahatahotra  
Ny biby marobe.

3. Ry Kristy be fitia!  
Ry Tompo tsy mandao!  
Ny sandrinao iondanako,  
Fa mamy Hianao;  
Hianao nanolo-tena  
Ho faty fahizay,  
Hanangana olo-meloka  
Ho zanakao indray.

4. Ry Tompo Zanahary  
Be faharetam-po!  
Izaho te-ho olonao  
Mahitsy sy madio;  
Ovay ny toe-tsaiko,  
Ny foko mba sasao,

Mba ho tempoly mendrika  
Ny hitoeranao.

5. Ry Jeso tsy miova!  
Ry Vonivatoko!  
Ry Zanak'Andriamanitra ô!  
Ry Aro lehibe!  
Izaho dia matoky  
Ny fitiavanao;  
Fa sambatra ny olonao  
Miankina aminao

### **626 - Jeso Tompo, mamindrà fo**

1. Jeso Tompo, mamindrà fo  
Amin'ny mpanomponao  
Fa tsy misy famonjena  
Afa-tsy ao aminao.  
O! vonjeo, :;;  
Ny mifona aminao.

2. Fa kamboty sy mahantra,  
Ory, osa, reraka  
Izahay aty an-tany,  
Raha tsy vimbininao;  
O! ampio, :;  
Ny miankina aminao.

3. Tokinay sy vatolampy,  
Aro sy Ampinganay!  
Afa-tahotra, afa-doza,  
Tsy ho ketraka izahay;  
:;; O! arovy, :;  
Ny mialoka aminao.

### **627 - Vimbino tsara izahay**

1. Vimbino tsara izahay,  
Ry Jeso Kristy Tomponay!  
Mba tsy ho diso lalana  
Aty ambony rano be,  
:;;Ka na manonja aza re  
Ny rian-dranomasina,  
Tazony mafy izahay

Mba tsy ho rendrika aty. :;;

2. Dia mitsangàna, ka avia,  
Ry Jesosy, Mpamonjy tia!  
Jereo ny fahorianay;  
Anaronao ny rivotra  
:;;Izay mampanonja toy izao  
Ny alon-dranomasina,  
Izay manafotra anay  
Aty am-pandehananay. :;;

3. Fa Hianao no aronay,  
Ka dia sahy izahay  
Hamaky sy hanohitra  
Ny onjan-drano betsaka;  
:;;Ka aoka tsy ho fefika  
Aty an-dranomasina,  
Fa mba ho tonga aminao  
Ny sambonay, ry Tompo ô, :;;

### **628 - Ry Mpamonjy olom-bery!**

1. Ry Mpamonjy olom-bery!  
Ry Jesosy tia anay!  
Izahay tsy manan-kery  
Tsy mba hendry, tsy mahay,  
:;;Koa Hianao irery  
No mba iankinanay. :;;

2. Ry Mpamonjy be fitia!  
Aza ilaozanao izahay;  
Ry Jesosy ô! Avia,  
Hianao no tanjakay!  
:;;Miarova, manampia,  
Be ny fahavalonay. :;;

3. Ry Mpamonjy! Mitantàna  
Izao mpanomponao izao;  
Be tokoa ny fikasana  
Ta-hanao ny sitrakao,  
:;;Nefa be ny fahosana  
Momba ny mpanomponao. :;;

4. Ry Mpamonjy, jeso tia!  
Mivimbina, mamonje;  
Ry mahery! Manampia,  
Miambena, mijere;  
.:;Miarova, mitariha,  
Ry Sakaiza lehibe!.:;

### **629 - Ry Jeso Mpamonjy, Mpanavotra any!**

1. Ry Jeso Mpamonjy, Mpanavotra  
anay!  
Tafangona eto anio izahay  
Hidera sy mba hankalaza Anao,  
Fa Tompo namonjy anay Hianao;

Fiv : Haleloia! Haleloia! Hosana an'ny  
Avo!  
Haleloia! Haleloia! Hosana ho Anao!

2. Ry Jeso, Sakaiza tsy mety mandao!  
Sakaiza tsy mba mahafoy Hianao,  
Mijery anay raha misy manjo,  
Ho aron'ny tena sy tokin'ny fo:  
Haleloia! sns...

3. Ry Jeso, Mpanjaka Mpiaro anay!  
Handroso hiady tokoa izahay,  
Ka dia vonjeo handresy izao,  
Fa tsy mba ho resy izay manana Anao:  
Haleloia! sns...

4. Ry Jeso, Mpitarika anay ho ary,  
Tariho izahay tsy hivily aty.  
Ka dia hamantana ao aminao,  
Fa faly miandry anay Hianao:  
Haleloia! sns...

### **630 - Ry Jesosy mba tantano**

1. Ry Jesosy mba tantano,  
Ho tafita soa ary,  
Ka ambeno sy sakano,  
Izay rehetra loza aty.

Rano be mangeniheny,  
Izao alehako izao;  
Ka aoka Hianao hiteny,  
Mba ho tokiko hatrao.

2. Aza miandry ao am-pita  
Sao dia fefika aho aty;  
Fa avia hiara-mita,  
Dia ho tody soa ary.  
Raha sendra ka manonja  
Izany alon-drano be,  
Aoka Hianao ho tonga  
Hampitony ahy re.

3. Ao ny rivotra mahery  
Mety hampivadi-po,  
Fa ny feonao irery  
Mampisava ny manjo  
Any koa ny vatolampy  
Sy ny biby marobe,  
Fa ny herinao dia ampy,  
Ka vonjeo ny zanakao.

4. Ry jesosy! Mihainoa,  
Izao fivavako izao,  
Mijoroa, misehoa,  
Ka jereo ny diako izao;  
Mbola lavitra ao am-pita  
Ka tsy hita izay hanjo,  
Toy ilay tao Genesareta,  
Misehoa Hianao!

### **631 - Ry Jesosy Tompo tsara**

1. Ry Jesosy Tompo tsara,  
Ry Mpamonjy ô!  
Sambatra aho, mananjara  
Manana Anao;  
Fa na maro ny mpandrafy  
Ta-hamely ahy mafy,  
Hianao mahay manafy  
Hery ny Anao.

2. Be ny manodidina ahy



Efa lasana;  
Manakaiky mampanahy,  
Re ny fasana;  
Nefa, ry Mpamonjy soa,  
Tena sitrakao tokoa  
Ny hitantana ahy koa  
Ao an-dàlana.

3.Eny, izaho manantena,  
Ry Mpamonjy ô!  
Fa hahazo famonjena  
Any aminao.  
Raha hilaozako ny tany,  
izaho tsy mba hitomany,  
Fa hiakatra hankany  
Anatrehanao.

### **632 - Ampianaro aho, Tompo, mba hiambina**

1. Ampianaro aho, Tompo, mba hiambina!  
Mandalo tahaka ny rivotra ny androko.  
Ka mihalany isan'andro, isan'alina,  
Ambara-pahatapitry ny fe-potoako.

2. Endrey ny voninkazo, raha vaomaraina e!  
Fa tsara ka mampirapiratra ny endriny;  
Kanefa maty izy amin'ny hainandro be;  
Ka raha hariva dia simba ny tarehiny.

3. Ny tenako no voninkazo ka hihintsana,  
Ny aiko tahaka ny zavona sy aloka  
Izay mandalo ka tsy manam-pijanonana;  
Ny taonako mandroso tahaka ny riaka.

4. Tsy manam-panorenana aty ny heriko,  
Mihelina ka tsy mba hita ny alehany;  
Malaky tahaka ny tselatra ny androkô,  
Ka tsy miatoato ao am-pandehany.

5.Ry Tompo ô, ampio aho mba hiomana,  
Ka mba hadio fo na aiza noalehako;  
Ampaherezo mafy aho mba ho malina,  
Mba tsy ho tonga tampoka amikony fetrako!

### **633 - Izaho tsy mba mahalala**

1. Izaho tsy mba mahalala,  
Izay hiairako aty;  
Anio angaha dia hiala,  
Ka hodimandry ho ary!

Fiv : Ny ran'i Kristy, Raiko ô,  
No amelanao, ny heloko.

2.Ry Ray ô, mampianara ahy  
Hanisa e, ny androko,  
Hiantombenan'ny fanahy  
Ao amin'ny Mpamonjiko.  
Ny ran'i Kristy, sns...

3. Ny asa sy ny ahiahy,  
Izay maningotra ahy izao,  
Vahao mba tsy hisakana ahy  
Hiainga raha antsoinao.  
Ny ran'i Kristy, sns...

4. Ny fahotako an-tapitrisa  
Saronanao ny avotra,  
Izay nandraisako batisa  
Sy ny sakafo masina.  
Ny ran'i Kristy, sns...

5. Tsy misy mahasaraka ahy  
Amin'ny fitiavany:  
Ny teniny no mahasahy  
Ny olom-boafidiny.  
Ny ran'i Kristy, sns...

6. Ka dia tsy mba mampanahy  
Ny andro hahafatesako,  
jesosy no miantoka ahy,  
Ny ainy no anjarako.

Ny ran'i Kristy, sns...

### **634 - Ny làlana izay nataon'Andriamanitra**

1. Ny làlana izay nataon'Andriamanitra

Tamin'ny olombelona  
:,: Marina indrindra.:,:

2. Raha manaraka izany,  
Dia tsy manan-tsiny  
Fa nanota ny olona  
:,: Ka nanan-keloka.:,:

3. Raha tsy mino an'i Kristy  
Ny olombelona,  
Fa matoky ny tenany  
:,: Tsy azo hitsina.:,:

4. Fa Jeso no manafaka  
Ny ota rehetra,  
Ny manaiky ny teniny  
:,: No azo hitsina.:,:

### **635 - Aina no fetra ry Jesosy Tompo**

1. Aina no fetra ry Jesosy Tompo  
Izany no tenin'ity zanakao  
Vonon-kanaraka Anao sy hanompo  
Amin'ny mora sy sarotra hatao.

Fiv : Mandrakizay no  
tokimpanompoana  
Mamin'ny olon'izay afakao.  
Mandrakizay ekenay ho faneva  
Ny holatrao nanavotana anay.

2. Na ny mangidy heverina ho mamy,  
Raha miray aminao izahay,  
Iza no tsy hahafoy ny ainy  
Mba ho Anao Izay nisolo anay!  
Mandrakizay, sns...

3. Hianao, ry Jeso! No ilay Kapiteny,  
Izay hampandresy tokoa anay;  
Ka raha Hianao, Tompo, no mba  
miteny,  
Lasa izay mahakivy anay:  
Mandrakizay, sns...

4. Vonon-kandeha na aiza na aiza,  
Ireto mpanompo matoky Anao,  
Na dia ny fahafatesana aza,  
Tsy hahaleo anay mpianatrao:  
Mandrakizay, sns...

### **636 - Hianao ry Jeso ô**

1. Hianao ry Jeso ô!  
No mba hatoninay,  
:,: Tompon'ny aina.:,:  
Mba mihainoa ka avia.

2. Mba ampangino re  
Ny ao anatinay,  
:,: Tsy hisy renay.:,:  
Raha tsy feonao.

3. Aoka izahay handray  
Ny fanavaozanao,  
:,: Ka mba hitovy.:,:  
Toe-tsaina aminao.

4. Mafy ny adinay,  
Ka be ny tahotray;  
:,: Nefa tsy resy.:,:  
Izay miankina aminao.

5. Dia tafionao  
Amin'ny herinao,  
:,: Mba ho mpandresy.:,:  
izahay mpianatrao.

6. Ny fonay hafanao,  
Mba hirehetanay  
:,: Amin'ny asa :,:  
Izay omenao hatao.

7. Mba ho tanterakay  
Izay tena anjaranay,  
:,:Dia manomeza,:  
Fo miray aminao.

### **637 - Mahareta, mahareta,**

1. Mahareta, mahareta,  
Ry mpihazakazaka ô!  
Be ny zava-mahalavo,  
Aza kivy hianao.

2. Mahareta, mahareta,  
Ry mpihazakazaka ô!  
Mahavesatra ny ota,  
Aoka re harianao

3. Mahareta, mahareta,  
Ry mpihazakazaka ô!  
Lavi-dalana haleha,  
'Ndrao tsy tonga hianao.

4. Mahareta, mahareta,  
Ry mpihazakazaka ô  
Indreo ny maso izay mijery,  
Tazany ny dianao.

5. Mahareta, mahareta,  
Ry mpihazakazaka ô!  
Ao ny Tomponao miandry,  
Izy no jereonao.

### **638 - Ry Jeso Mpamonjy malala**

1. Ry Jeso Mpamonjy malala  
Indreto ny mpanomponao;  
Raha misy izay mankahala,  
Matoky fa manana Anao.

Fiv : :,:Jereo, jereo!  
Fa vonon-kanaraka Anao.:,:

2. Ny tafika ataon"i Satana

Milofa hamotraka anay;  
Avia, ry jeso! Mitantana  
Fa mioman-kandresy izahay.  
Jereo, jereo! sns...

3. Na zovy mioman-kandrafy,  
Irianay hanaraka Anao;  
Na iza hisakana mafy,  
Hijoro, fa manana Anao.  
Jereo, jereo! sns...

4. Ireo nentinao voatantara  
No feo mampahery anay;  
Ny token'ireo Maritiora  
Faneva mitarika anay:  
Jereo, jereo! sns...

### **639 - Ry miaramila! Mandrosoa izao**

1. Ry miaramila! Mandrosoa izao,  
Kristy Kapiteny mialoha anao;  
Ao aloha tafika, loza, ratra be,  
Fitsaharana tsy misy, misikina re.

Fiv : Ry miaramila! Mandrosoa izao  
Kristy Kapiteny mialoha anao.

2. Any lehy ratsy no manotrika,  
Any ny tsipika no milatsaka;  
Tano ny finoana ho ampinganao  
Entonao ho fandresena Izao  
rehetra izao:  
Ry miaramila! sns...

3. Aza miamboho na miherika,  
Ao an-tratranao ny fiarovana;  
Aza mba matahotra, fa sahia  
fandrao  
Raha tsy mandresy, dia ho resy hianao;  
Ry miaramila! sns...

4. Dia mandrosoa hianao izao  
Ka miraisa dia aminay ho ao  
Milofosa fatratra, aza ketraka,

"Miadia ny ady tsaran'ny  
Finoana"  
Ry miaramila! sns...

5. Kristy Kapiteny tapitra ohatra,  
Izy no mpiaro ny mpanafika;  
Miankina aminy mafy hianao,  
Ka aza mba ny tenanao no  
itokiana:  
Ry miaramila! sns...

#### **640 - Misy fahavalo maro**

1. Misy fahavalo maro,  
Te-hiady aminay,  
Faly sy miravoravo,  
Raha mamotraka anay;  
Izahay tsy manan-kery  
Handresenay azy ireo;  
Ry Mpamonjy olom-bery!  
Jeso Tompo ô! Vonjeo.

2. He! Mibaiko ny devoly,  
Ilay mpihaza aina soa,  
Ka mikendry hanangoly  
Sy handatsaka aina koa;  
Tsy mba misy izay hanampy  
Hampandositra azy izao;  
Hianao no tsy manary  
Jeso Tompo ô! Vonjeo.

3. Indreo ny fandrika harato  
Izay mivelatra avokoa,  
Tsara sy milantolanto,  
Toa fiainana tokoa;  
Kanjo, indrisy ny mahazo  
Izay fatoran'izy ireo;  
Tsy mba hainy ny miala:  
Jeso Tompo ô! Vonjeo.

4. Miomàna, ry sakaiza!  
Be ny fahavalo  
Mitandrema sy mahaiza,  
Saroitra ny làlanao;

Aza mba matoky tena,  
Fa ny Tompo no jereo;  
Indrisy re ny halemena:  
Jeso Tompo ô! Vonjeo.

#### **641 - Ry kapiteny, be ny ady manjo**

1. Ry Kapiteny, be ny ady manjo,  
Mila ho reraka sy kivy ny fo,  
Ka hatanjaho mba hatoky Anao,  
Tompo ô! Avia mamonjy ahy izao.

Fiv : "Eny, Izaho mamonjy anao,  
Ka mampahery sy miaro anao;  
Aza matahotra mihitsy hianao,  
Fa Izaho momba sy manampy anao."

2. Ny fahavaloko aty mba reseo,  
Ka taomy aho mba handray rahateo  
Ny fiadiana avy aminao;  
Tompo ô! Vimbino aho, aza mandao:  
"Eny, Izaho, sns...

3. Lasa tokoa re ny tahotro teo,  
Ka na mamely ahy aza ireo,  
Tsy mba manahy intsony aho izao,  
Fa mamonjy sady tsy mandao Hianao:  
"Eny, Izaho, sns...

4. Fa ny mpiady maharesy aty  
no hosatroham-boninahitra ary;  
Maro, no efa tonga ao, Aminao,  
Tompo ô! Avia hitarika ahy hankao:  
"Eny, Izaho, sns...

#### **642 - Hitako izao, sakaiza!**

1. Hitako izao, sakaiza!  
Jeso no Mpanavotra;  
Tsy mba lany ny fitia,  
Jeso no Mpanavotra;  
Na dia saiky lasa aza,  
Ka ny olona mandao,  
Izao no mampiadana ahy,

Jeso no Mpanavotra.

2. Raha miady mafy aho,  
Jeso no Mpanavotra;  
Toky sy Ampinga Izy,  
Jeso no Mpanavotra;  
Manome ny soa Izy,  
Fa ny rany mahadio  
No mahafa-keloka ahy,  
Jeso no Mpanavotra.

3. He ilaozako ny eto,  
Jeso no Mpanavotra;  
Indro lanitra no azo,  
Jeso no Mpanavotra;  
Izy no Mpamonjy ahy,  
Aina sy fanilo koa,  
Fahendrena mahasoana,  
Jeso no Mpanavotra.

4. Ray ô! Hianao deraiko,  
Jeso no Mpanavotra;  
Hianao naniraka Azy,  
Jeso no Mpanavotra;  
Hianao Mpiaro ahy,  
Mpitahiry, Tokiko,  
Ka deraiko lalandava,  
Jeso no Mpanavotra.

### **643 - O! mandrosoa mba ho tena mpandresy**

1. O mandrosoa mba ho tena mpandresy  
Dia mazotoa, miasà mitomboana,  
:::Raiso ny tsara, ka roahy ny ratsy,  
Ka matokia an'i jeso tokoa:::

2. O mandrese, ny finoana tano,  
Na dia mafana ny ady hatao,  
:::Ny fandresena homena ny mino,  
Azy ny herin'ny Tompo izao:::

3. Mba matokia ny hery tsy hita  
Izay voatahirin'ny Ray ho anao,

:::Ka voatolotra tao Golgota  
Mba ho antsika rehetra izao:::

### **644 - Matahora mangovita**

1. Matahora mangovita,  
Fa indro ny devoly  
No mihendry hisambotra  
Ny saintsika rehetra;  
:::Miambena:::  
Ka mivavaha, tsara.

2. Mifalia, mivavaha,  
Jeso no arontsika,  
Manaraha ny teniny,  
Fa hovanjeny isika;  
::: Tano Izy :::  
Hahazoana aina.

3. Manandrata feo hihira  
Hidera an'i Kristy,  
Hanome voninahitra  
an'Andriamanitra  
::: Tompontsika:::  
Fa marina izany.

### **645 - Jesosy Kapiteninay,**

1. Jesosy Kapiteninay,  
Izao miantso izao,  
Hiady no ilàna anay  
Ka zovy no hanao?  
Izay mahafy hatraty,  
Mahery fo tokoa  
Ka tsy miraika hatrany,  
Ireny no hanao.

2. Ny tany hotafihinay,  
Izao tontolo izao;  
Ny tafika hikatrohanay,  
Tsy ady mora atao;  
Ny ota no hasianay  
Ho ringana avokoa  
Ny tany no hasondrotray

Ho Paradisa soa.

3. Indreo, ny maritiora soa  
No loha-làlanay,  
Nalatsaka aina avokoa  
Ka marika aminay.  
Fandavan-tena lehibe  
No vitan'izy ireo,  
Hodian-tsy hita foana ve  
Ireo maritiora ireo?

4. Ry Jeso Kapiteninay!  
Izao, anio izao  
No anavaozanay indray  
Ny fanompoana Anao  
Atolotray Anao tokoa  
Izao tenanay izao,  
Ka hamasino avokoa  
Hanao ny sitrakao.

#### **646 - Na aiza no alehako**

1. Na aiza no alehako.  
Dia misy izay hanina;  
Fa be ny fahavaloko  
Mahery sy kirina.  
Mikendry fatratra  
Ireo mpamitaka,  
Ka dia hazoniko ny to  
Na aiza no alehako.

2. Na aiza no alehako,  
Dia misy ady mafy;  
Ny ota hotoheriko,  
Hataoko tena rafy;  
Ny fahoriana,  
Izay fikapohana,  
Tsy maintsy hiaretako,  
Na aiza no alehako.

3. Na aiza no alehako,  
Ny fasana mangina  
Miandry eo alohako,  
Fa aloka ny aina

Sy toy ny zavona  
Malaky levona;  
Izany no tsaroako  
Na aiza no alehako.

4. Na aiza no alehako,  
Momba ahy ny anjely,  
Ka tsy mba hatahorako  
Satana izay mpamely.  
Ry izao tontolo izao,  
Ho resy hianao,  
Anjely no ho mandako  
Na aiza no alehako.

5. Na aiza no alehako,  
Jesosy no kiady;  
Ny ratrany no aroko  
Sy herin'ny mpiady.  
Ny dian-tongony  
Arahiko aty,  
Ka fandresena azoko  
Na aiza no alehako.

6. Na aiza no alehako,  
Ny lanitra andrandraiko,  
Ka ravo ny fanahiko,  
Fa ao ny Tompon'aiko,  
Ry izao Tontolo izao,  
Ny voninahitrao,  
Dia vovoka hitsahiko:  
Ny lanitra ao alohako.

#### **647 - He! Sarotra ny lalam-pamonjena**

1. He! Sarotra ny lalam-pamonjena,  
Hitanana ny vonjy izay nomena,  
Hamelona hatrao, am-parany  
Ny fitiavana voalohany.

2. Ny maro dia mazàna mankamamy  
Izao, tontolo izao, ka mora lany  
Ny zotom-po sy ny finoana,  
Dia tonga tia zava-poana.

3. Malaina izy ka tsy te-hiady  
Ny ady masina izay maro fady,  
Ny lalan-tery dia halany,  
Fa ny malalaka no tiany.

4. Mazàna mety menatra ireny  
Rehefa voatsindron-toriteny,  
Fa hitany ny ratsy ao am-po,  
Kanefa tsy mba te-hiova fo.

5. Ry Jeso, Hianao no tokin'aina,  
Izay novonoina sy nankahalaina.  
Omeo ahy faharetam-po,  
Hiaritra izay anjarako.

6. Raha reraka aho ka misalasala,  
Dia asehoinao, ry Ray Malala,  
Ny lovako ary an-danitra  
Hihazona ahy mba haharitra.

#### **648 - Miambena izao,**

1. Miambèna izao,  
Ry fanahiko!  
Misy rafinao misaina  
Hanangoly ny malaina;  
Be ny fandrika  
Voavelatra.

2. Miambena izao,  
Ry fanahiko!  
Mba tsy ho andevon'ota,  
Na ho taomin'ny mpanota;  
Mivavaha izao,  
Ry fanahiko!

3. Miambena izao,  
Ry fanahiko!  
Ka tohero ny devoly,  
Raha avy manangoly;  
Kristy raisonao  
Mba ho aronao!

4. Miambena izao,  
Ry fanahiko!  
Tsy ho ela tsy akory  
Dia ho lasa ny mahory,  
Ka ho afaka  
Ny mpiambina.

5. Miambena izao,  
Ry fanahiko!  
Fa ho avy indray ny Tompo  
Mba hampody ny mpanompo  
Ho finaritra  
Ao an-danitra.

#### **649 - Ry mino miambena re,**

1. Ry mino, miambena re,  
Fa manam-pahavalo be;  
Jesosy no arahonao  
Hitarika anao.  
Ezahonao ny dianao,  
Ny satro-boninahitrao  
Miandry ao aloha ao,  
Ka mba tratraronao!  
Mba mivavaha, ry havako,  
Ka miomàna ao am-po;  
Andeha izao ilaozinao  
Ny zavatra ho lo!

2. Alao ny fiadianana  
Omen'Andriamanitra,  
Ny fahamarinana alao  
Mba hisikinanao;  
Hazonny ny finoana  
Ampinga hanohanana;  
Ny tenin'Andriamanitra  
No tena sabatra;  
Ny famonjena raisonao  
Ho fiarovan-dohanana;  
Ireny no hanoheranao  
Ny ratsy ao am-po.

3. Ry havana malala ô,  
Andeha isika hiray am-po



Hikatsaka ny lanitra,  
Fa ao tsy misy manjo.  
Ho faly ao an-danitra  
Ny vita fanompoana,  
Ka aoka izao isika handao  
Ny zava-poana!  
Ho lasa faingana indray  
Ny androntsika an-trano lay;  
Vonjeonao ilay tany vao,  
Izay mandry fahizay.

### **650 - Miambena mivavaha, fa tsy fantatrao**

1. Miambena mivavaha, fa tsy fantatrao  
Na ny andro, na ny ora fe-potoanao;  
Ny Mpanjaka masina ho tonga tampoka  
Hampaneno ny trompetra ao andrahona.

2. Amboary ny fanilon'ny finoana  
Sy ny solika fitaiza voaomana,  
Ka velomy re ny afom-pitiavana,  
Mba hidiranao an-dapam-pifaliana.

### **651 - Jeso, ampio izahay mba handresy**

1. Jeso, ampio izahay mba handresy!  
Ny fahavalo mamely anay!  
Indro ny aizina tsy mbola resy,  
Ary Satana mamandrika anay,  
Ka mba omeo anay ny mazava  
Hampahasahy anay lalandava.

2. Jeso, ampio izahay mba handresy!  
Kely finoana re izahay;  
Kivy matetika, mila ho resy;  
Aoka ny herinao homba anay;  
Dia hatoky izahay, ry Mpandresy,  
Fa ny devoly dia ho voasesy.

3. O, ry Mpandresy, arovy ny ainay!  
Ady mafana hiseho izao;  
Ka mba tohany hatoky ny fonay!

Dia hiainga hanaraka Anao;  
Na dia loza ny herin-tSatana,  
Sahy izahay, Hianao no mitana.

4. Ampandreseo izahay, ry Mpamonjy!  
Ka raha vita ny ady aty,  
Dia ho isan'izay voavonjy,  
Ary ho faly sy tretrika ery ;  
Tsy mba hitsahatra intsony ny hoby  
Hankalazana Anao, ry Mpamonjy

### **652 - O, ry Jesosy, omeo ny hery,**

1. O, ry Jesosy, omeo ny hery,  
Mba handreseko ny ota izao!  
Osa sy ketraka aho irery,  
Raha tsy avy izao Hianao.  
Raiso ny fo,  
Tano tokoa,  
Mba handreseko ry Tompo ô!

2. O, ry Jesosy, omeo ny hery,  
Ka amboary ny fonay izao;  
O, mba esory izay mahavery,  
Mitomoera aminay Hianao;  
Ka hazavao  
Ny fo izao,  
Ampandosiro ny aizina ao!

3. O, ry Jesosy, omeo ny hery!  
Kely finoana re izahay,  
Ary ny lalanay ety sy tery,  
Ry jeso ô, mitantàna anay!  
Tohanonao  
Ny olonao,  
Ampandreseo izay manaraka Anao!

### **653 - Sakaiza, raha tia**

1. Sakaiza, raha tia  
Ny Tompo hianao;  
Faingàna ka avia  
Hanaraka Azy izao!  
O, mba tsarovinao,

Fa Izy tsy nifaly,  
Naleony nijaly  
Mba hamonjena anao.

2. Fanahy, mahereza,  
Efao ny adinao,  
Fa làlana mideza  
No hiakaranao;  
Ny zava-tsoa aty  
Dia zavatra mandalo;  
Tsy azom-pahavalo  
Ny lovana ary .

3. Ry Tompo, manomeza  
Anay ny herinao;  
Finoana mateza  
Mba atolorinao,  
Mba hanarahanay  
Ny làlam-pamonjena,  
Hahita Anao mitsena  
Anay rahatrizay.

#### **654 - Mba faingàna re, ry mino**

1 . Mba faingàna re, ry mino,  
Aza mba tamana aty,  
Ary aza manadino  
Ny anjaranao, ary.

Fiv : Ny Mpamonjy anao,  
No manangana faneva,  
Ary mampihevaheva  
Azy eo alohanao.

2. Marobe no mba mitady  
Ny fiainana vaovao,  
Nefa kosa tsy miady  
Amin'izao tontolo izao.  
Ny Mpamonjy anao, sns...

3. Koa raiso ny ampinga,  
Tano re ny sabatrao,  
Fa izany mahakinga  
Ny mpandeha toa anao.

Ny Mpamonjy anao, sns...

4. He, akaiky anao Kanana,  
Tany hovantaninao;  
Ary any ny tanàna  
Misy ny anjaranao.  
Ny Mpamonjy anao, sns...

#### **655 - Kristy miantso antsika hiady**

1. Kristy miantso antsika hiady,  
Izy nandresy ilay ratsy sahady,  
Ka mba henoy, ry sakaiza izao;  
Kristy miandry indrindra anao!  
Mila antsika Kristy Mpanjaka.

2. Kristy Mpitarika amin'ny ady,  
Ka mampanresy izay te-hifady  
Ny fahotana, izay maimbo sy lo;  
Izy no mânda mafin'ny fo.  
Miaro antsika Kristy Mpanjaka.

3. Kristy mampiatrana antsika hahery,  
Izy miaro antsika sao very,  
Ka mba avia hifahatra ao,  
Indro ny ady mandroso izao.  
Miantso antsika Kristy Mpanjaka.

4. Kristy mamonjy antsika izay voa  
Ary tsaboiny ho entiny koa  
Ho ao, an-dapany mandrakizay  
Honina ao an-tranon'ny Ray.  
Haka antsika Kristy Mpamonjy.

5. O, ry Jesosy, Mpanjaka, Mpamonjy!  
Tompon'ny dera aman-daza sy vonjy,  
Ireo rafinao mba reseo izao,  
Ka tanteraho izay sitrakao.  
O, mba avia, Kristy Mpanjaka!

#### **656 - Maty malala, ka ory ny fo!**

1. Maty malala, ka ory ny fo!  
Lasa tiana ka mafy manjo!  
Nefa isika tsy dia mba mamoy,  
Fa manantena hihaona indray:

Fiv : Ao aminao, Tompo izy izao  
Tsy mba marary na misy manjo!  
Nentina any ambony madio  
Dia ho sambatra mandrakizay

2. Mba notandremana fatratra koa,  
Nefa tsy tapa, fa lasa izao;  
Eny, ry Tompo! Ekena tokoa  
Izay sitrakao, fa izany no soa:  
Ao aminao, sns...

3. Fantatra koa fa isika izao,  
Samy vahiny ka hody indray;  
Indro! Ny namana lasa izao,  
Lasa miandry antsika ary  
Ao aminao, sns...

4. Ary isika, raha hiala aty,  
Dia hotsenain'ireo havan-tsy foy;  
Eny, hihaona mifaly indray  
Ka tsy hisaraka mandrakizay.  
Ao aminao, sns...

### **657 - Lasa re ilay nazoto**

1. Lasa re ilay nazoto,  
Nody ao an-tany soa,  
Izay nanompo tamin-joto,  
Ka nahefa be tokoa  
:,: Indro, faly:,:  
Fa mijinja voka-tsoa.

2. Lasa nody fa voantso:  
"Miakara," hoy ny Ray,  
Ka fafao, ny ranomaso,  
jeso Tompo no mandray,  
:,: Faly, ravo, :,:  
Fa tafakatra ao, tokoa.

3. Lasa re ilay nihafy  
Ory tena, be nanjo,  
Fa nanohitra ady mafy  
Nefa mba nahery fo.  
:,: Ka nandresy:,:  
Fahavalo maro be.

4. Afaka ady ka nifaly,  
Fa tsenaina hatraty;  
Afaka ota, afa-jaly,  
Ka mihoby, hatrary'  
:,: Hoy ny Tompo:,:  
"Mandrosoa, ka mifalia."

### **658 - Tonga ny fahafatesana!**

1. Tonga ny fahafatesana!  
Ary jinjany ny velona;  
Izy manapaka ny lehibe,  
Sady mamira ny kely, re!

2. Nefa ny fasana maizina  
Efa nidiran'ny Masina;  
Izy nampody ny fiainana,  
Resy ny fahafatesana.

3. Amin'ny manam-pinoana,  
Dia mazava ny fasana,  
Izy hitsangana finaritra  
Noho jesosy Mpanavotra.

4. Resin'ny Tompo ny fasana,  
Koa, ry fahafatesana,  
Aiza izao, ny fanindroanao?  
Aiza, ry helo, ny herinao?

### **659 - Ry hava-malala misaona**

1. Ry hava-malala misaona,  
Mangina fa mbola hihaona,  
Isika sy izy nalaina,

Raha tonga indray ilay maraina.

2. Ny naman'ny tany ihany  
No mody ho amin'ny tany,  
Ka dia ny fanahy mifindra  
Ho amin'ny Avo Indrindra.

3. Tsy maintsy afafy aloha  
Ny vary vao mety hamoa;  
Ny faty halevina koa  
Tsy very fa mbola hifoha.

4. Dia miandrandra, ry mpisaona!  
Ho avy ilay lohataona,  
Ka dia haniry ny voa,  
Izay misy ny ain'ny Tsitoha.

5. Ho avy ny Tompon'aina  
Hiantso ny vovoka maina  
Hitafy ny fahazavany  
Sy hiditra ao am-panjakany.

6. Faingàna, ry Kristy mahery,  
Ry Fanantenanay irery,  
Ny fasanay iva tsarovy,  
Ny toky nomenao mba tovy!

### **660 - Sambatra ny nodimandry**

1. Sambatra ny nodimandry  
Niala teto ka tafandry  
Ao ampofoan'i Kristy;  
Ravoravo izao ny fony  
Ka tsy misasatra intsony,  
Mby ao, am-pitsaharany.  
Ny asany taty  
Manaraka azy ary,  
Haleloia!  
Tafiditra ao an-dapanao  
Ry Jeso, ny malalanao.

2. Saotra, dera, laza, hery,  
Mba raiso ho Anao irery,  
Ry zanak'ondry tokinay!

Hianao dia nialoha  
Hanolotra anjara soa  
Ho an'ilay malalanay.  
Ny fahafatesanao,  
No misy aim-baovao,  
Haleloia!  
Hahita Anao ny olonao  
Hohazavain'ny tavanao.

3. Tsy mba misy alina any,  
Jesosy no fahazavany  
Sy tena masoandrony,  
Azony izay niriny,  
Ka sambatra ny mpivahiny,  
Fa ao no tanindrazany,  
Fa efa tapitra  
Ny ali-maizina,  
Haleloia!  
Fa foana ny fasana,  
Maraina no miposaka.

### **661 - He, lasa ny zaza malalan'ny fo!**

1. He, lasa ny zaza malalan'ny fo!  
Atolotra ny tany ny tena ho lo.

2. Tsy maty anefa ny zaza, fa he,  
Jesosy no milaza: Matory izy e!

3. Jesosy hamoha ny zaza indray,  
Hiara-paly amin'anjelin'ny Ray.

4. Ka mba mionona, ry havana aty!  
Ho hitanao ny zaza ao, an-danitra ary.

### **662 - O, ry Mpamonjy avia Hianao**

1. O, ry Mpamonjy avia Hianao,  
Indro misento ny fonay izao;  
Ny alahelo mamely anay,  
Koa mitady Anao izahay!  
Iza no aron'izay ory fo,  
Sady mpanampy ny manamanjo,  
Fa tsy ny Tompo mahery sy to?

Dia Hianao izay be indrafo.

2. Jeso Mpamonjy ô, mba iantrao,  
Izay malahelo miantso Anao!  
Ny mitomany tsy hitanao va?  
Fantatray fa Hianao, tsy handà  
Dia manatàna ka mba mijere  
Ny ranomaso izay mitete!  
Fa Hianao no mahay manome  
Fampiononana be dia be.

### **663 - He, lasa izao ny malala**

1. He, lasa izao, ny malala  
Nifindra ao an-dapan'ny Ray;  
Isika rehefa miala,  
Ho faly hahita azy indray.  
Isika izao mitomany,  
lharan'ny mafy manjo;  
::Jesosy mahita izany,  
Ka Izy hanony ny fo::;

2. Matetika re ny mangidy  
Avela hihatra amina,  
Ka aoka mba tsy hanadidy,  
Fa feon'ny Tompo izao.  
Ny zanaka tian'ny rainy  
Tsy maintsy anariny re!  
::Izay mahaso ataony,  
Ombam-pitiavana be::;

3. Ny fo mora kivy ario,  
Fa tsy mba hanary ny Ray;  
Ny mamy tsy hita anio  
Haposany rahatrizay,  
Hofahony ny ranomaso  
Soloarn-pifaliana be;  
::Ny toky omeny andraso,  
Fa ho tanterahiny re!::;

### **664 - Nalain'ny Mpahary ity zaza ity**

1. Nalain'ny Mpahary ity zaza ity  
Ho sambatra mandrakizay.

Miandry antsika nilaozany aty,  
Fa mbola hihaona indray.

Fiv : Onony ny fonao, ry mana-manjo,  
Ao an-danitra izy izao,  
Ravo izy izao,  
Fa ny lapan'ny Ray  
Fonenana mandrakizay.

2. Nafahana amin'ny loza ety  
Ka tretrika izy izao,  
Ny nofo ho lo no alevina aty  
Fa any ny tena vaovao.  
Onony ny fo, sns...

### **665 - Ry mpisaona malahelo**

1. Ry mpisaona malahelo,  
Mijere ny Tomponao,  
Izay namindra ny malala  
Mba ho ao an-danitra;  
Mba fafao ny ranomaso;  
Andrandrao ny lanitra.  
Mitsahara ry mpisento,  
Ka derao ny Tomponao!

2. Sento no anjarantsika,  
Izy kosa faly izao,  
Afa-jaly, afaka ota,  
Tapitra ady izy ao,  
Tsy mba misy ranomaso  
Na izay mahory ao,  
Koa aza mitomany,  
Fa derao ny Tomponao!

3. Nofo no aterintsika  
Ao am-pasana anio;  
Ny fanahiny anefa  
Tsy mba ao anatin'io.  
Jeso no namindra azy,  
Lasany ny havanao,  
Fa navotany ho Azy,  
Ka derao ny Tomponao.

4. Mangataha fahendrena,  
Ka isao ny andronao;  
Mikatsaha famonjena  
Sy fiainana vaovao,  
Mba horaisiny tokoa  
Honina any aminy,  
Ka ekeny ho sakaiza,  
Mba ho ao an-tranony.

#### **666 - Eo ankavanan-dRay Hianao,**

1. Eo ankavanan-dRay Hianao,  
Ry Zanakondry ô!  
Kanefa loza mahamay  
No niaretanao.  
Ny henatra aman-kelokay  
Nihatra taminao;  
Nivesatra ny otanay  
No nahafatesanao.

2. Ry Zanakondry masina  
Nijaly an-tsitrapo,  
Teren'ny fitiavana  
Hanala otako!  
Ny tongotra aman-tananao  
Dia voafantsika;  
Ny gadranay dia tapakao,  
Izahay dia afaka.

3. Vahoaka alinalina  
Mitafy fotsy ery,  
Ka samy miramirana  
Mahita an'i Kristy.  
Ny hira fihobiana  
Manakoako ao,  
Maneho fa navotana  
Izao tontolo izao.

4. Indreo ny vahoakanao  
An-tapitrisany  
Mitondra ny Anaranao  
Eo an-kandriny.  
He! Toy ny rian-drano be  
Ny fiderana Anao,

Voasokatrao ny lanitra  
Ho an'ny olonao.

5. Misaotra Anao izahay, ry Ray  
Izay navotanao,  
Natolotrao ho solonay  
Ny Lahitokanao.  
Ry Zanak'ondry, Avotray,  
Derainay Hianao,  
Derainay ho mandrakizay  
Ny fitiavanao!

#### **667 - Zavatra iray ihany**

1. Zavatra iray ihany  
No ho tadiavina,  
Fa izay aty an-tany  
Dia zava-poana,  
Ny nofo dia zavamandalo ihany,  
Satria ho lo ao anatin'ny tany;  
Raha azoko kosa ny zavatra iray  
Ny foko ho sambatra mandrakizay

2. Tadiavinao tokoa  
Va ny zavatra izay?  
Mba hevero fa ny soa  
Momba ny mandrakizay;  
Ka aza fatoran'ny eto intsony,  
Katsaho tokoa ny any ambony,  
Fa any no misy ny zavatra iray  
Izay hifalianao mandrakizay.

3. Ry Fanahy ô, ampio  
Ny finoako izao!  
Ry Mpamonjy ô, tahio  
Ny mpangataka aminao.  
Tariho ny foko hitady tokoa  
Ny any ambony izay mahasoana;  
Jesosy ihany no zavatra iray,  
Izay ho anjarako mandrakizay.

#### **668 - Jesosy Tompoko no lalana**

1. Jesosy Tompoko no lalana

Fahamarinana, fiainana.

2. Tsy afaka manatona ny Ray  
Raha tsy amin'ny alalany.

3. Jesosy, Tompon'ny fiainana ô!  
Aoka Hianao no ho fiainako.

4. Ety an-tany: fiainam-bavaka,  
Rahatrizay: fiainan-danitra.

5. Iriko mafy ny hiakatra,  
Hiaina izany fiainan-tsambatra!

6. Jesosy tokana no hanome  
Ahy ny fiainana mandrakizay.

### **669 - He, tazako ny lalan-tery,**

1. He, tazako ny lalan-tery,  
Izay misy fahoriam-be,  
Kane fa feno hira re,  
Fa na miady, tsy ho very.  
Ny mino izay mizotra eo,  
Na misy maty aza eo,  
Hahazo ny lakrona.

2. He, tazako Sakaiza mora,  
Mpanala fahoriam-be,  
Mpiaro soa, Mpanome  
Ny toky tsara isan'ora;  
Sakaiza feno herim-po,  
Mamonjy amin'ny manjo;  
Sakaiza tsy manova.

3. He, tazako ny lamba soa  
Omena ny voavotra  
Ho fanesoran-keloka  
Sy fanavaozana azy koa;  
Fa Jeso efa nanome  
Ny rany saro-bidy re,  
Ho fanadiovana azy.

4. He, tazako ny andro ho avy,

Izay hialako sasatra,  
Ka ny ririn'efitra  
Hanjary lohataona mamy;  
Ka any vao hivelatra  
Ny vonindrazin-danitra  
Ao amin'ny Edena.

5. He, tazako ny voavonjy  
Ao amin'ny Mpampakatra,  
Dia ao an-tampon-danitra,  
Izay niakaran'ny Mpamonjy;  
Miravoravo izy ao,  
Mihira fideram-baovao  
Ho an'ny Zanak'ondry.

### **670 - Ny ony tsy miato, fa mitady**

1. Ny ony tsy miato, fa mitady  
Ny ranomasina ihaviany.  
Ka toy izany koa ny fanahy  
Mitady ny Andriamaniny  
Andriananahary  
No Tompoko nahary  
Ny faniriako,  
Izay mitady Azy, ka manary  
Izay misakana ny diako.

2. Izay midongy sy mirehareha  
Tsy hahatratra ny Edenany;  
Lomarina ny rano tsy mandeha,  
Ka simba ao am-pijanonany;  
Ka toy izany koa:  
Ho simba avokoa  
Izay mijanona,  
Ka tsy manatona ny Tomposoa,  
Izay mitahy sy mamelona.

3. Tsy misy zavatra aty an-tany  
Mahafa-po ny faniriako;  
Vahiny aho eto ka mankany  
An-danitra izay fodiako.  
Ny Tompoko malala  
Ho avy hampiala  
Ny olony aty;



Izaho dia tsy misalasala  
Hanaraka ny Tompo ho ary!

### **671 - Ao an-danitra dia ho sambatra**

1. Ao an-danitra  
Dia ho sambatra  
Izay tia ny Tompo aty!  
Malahelo izao,  
Ravoravo re ao  
Amin-dRaintsika an-danitra ary.

2. Fahoriana  
Ao an-dàlana,  
Fa iharan'ny zava-manjo;  
Ao an-danitra re,  
Fiadanana be;  
Mba hevero, ry havana ô!

3. Aza kivy ô,  
Ry fanahiko,  
Na dia maizina aza aty;  
Vetivety izao  
Dia hody hianao  
Ao am-pahazavana ary.

4. Ry Mpanavotray,  
Indreto izahay  
Mpivahiny an-dàlana izao;  
Tsy tamana aty,  
Te-hifindra ary  
Ao an-danitra ao aminao.

### **672 - O, mampiratra fatratra ery**

1. O, mampiratra fatratra ery,  
Irony kintana tazana ety,  
Ka manainga ny foko hankao  
Amin-tranon'ny Raiko izao.

Fiv : Raiko ô, mba vohay  
Aho hiditra ao, aminao,  
Raiko ô! Mba vohay  
Fa iriko, ny honina ao.

2. Feno ota ny tant' aty;  
Tsy mba misy izany ary,  
Tena masina ireo mponina ao.  
Ka mifaly mijery Anao,  
Raiko ô, mba vohay, sns...

3. O, fonenana mamiko re!  
Fa jesosy nirina elabe,  
Sady aina iainako izao,  
No miandry handray ahy ao.  
Raiko ô, mba vohay, sns...

4. Mba tsilovy ny làlako izao,  
Ry Fanahy Mpitarika ô,  
Hahitako ny tranon'ny Ray  
Hovantaniko rahatrizay.  
Raiko ô, mba vohay, sns...

### **673 - Hevero ny fihaonam-be**

1. Hevero ny fihaonam-be  
Ary an-danitra;  
Vahoaka izany re!  
:,:He, samy sambatra.:,:

2. Ho vory ao ny iraky  
Ny Tompom-bokatra,  
Mitondra amboarany  
:,:Am-pihobiana.:,:

3. Ny isam-pirenena aty  
Dia samy misy ao,  
Ny teny izay ninoany  
:,:Tanteraka izao.:,:

4. Ny feon'ny fisaorany  
Ho toy ny riana,  
Ny hira iray iraisany,  
:,: Ka samy mirana.:,:

5. Ny lanitry ny lanitra  
Dia feno hobiny,  
Ny Zanak'ondry masina

∴ No ao anivony ∴ ∴

6. Ry Ray be fitiavana,  
Izahay mba taominao,  
Mba samy ho tafangona  
∴ ∴ Ao anatrehanao ∴ ∴

### 674 - Ry mpivahiny reraka sy hana

1. Ry mpivahiny reraka sy ana!  
Herezonao ny dia, fa iry  
Ny lapa soan'ny fanantenana,  
Ka aza mba mamoy fo ety,  
Fa vetivety hianao no eto,  
Dia tapitra ny alahelonao,  
Ka dia mba ononinao ny sento  
∴ ∴ Fa mihafohy ny alehanao ∴ ∴

2. Jesosy no mpitsinjo mpivahiny,  
Ka Izy dia ta-handray anao;  
Ny fony dia toy ny fahiny  
Ka vonona hitantana anao.  
Ka miezaha hanatratra eny,  
Antsoiny hianao izao, hoe:  
Minoa Ahy araka ny teny,  
∴ ∴ Ny tranon-dRaiko dia lehibe ∴ ∴

3. Mangoraka anao izao ny fony!  
Ny tena aman-drany vatsinao.  
Ka aza mba mihemotra intsony,  
Fa ampy ho anao Jesusinao.  
Ka raiso ny finoana ho ampinga,  
Ny teny masina ho sabatra,  
Ny fahamarinana mba hahakinga,  
∴ ∴ Ny fitiavana hanandratra ∴ ∴

### 675 - Indreo ao an-danitra ny olo-marobe

1. Indreo ao an-danitra ny olo-marobe,  
Mitsangana manatrika ny Zanak'ondry re!  
Akanjo fotsy lava no anaovany,

Ka sampam-palma fandresena eo an-tanany.

2. Ka iza moa ireo, ary avy taiza re?  
Ireny dia avy tamim-pahoriam-be,  
Nanasa sy namotsy ny akanjony  
Tao amin-dran'ny Zanakondry, izay  
Mpanavony.

3. Ny tia ny maloto tsy ho ao, andanitra,  
Fa marina ny tonga any, sady sambatra  
Mihira fiderana sy fisaorana  
No zavatra ataony amimpifaliana.

4. Endrey, maniry mafy aho mba ho isany,  
Hiaraka hihoby sy hifaly aminy;  
Anefa an'ny Tompo ny fotoana,  
Ka dia Izy no manendry ny hodiana.

### 676 - Ny voarain'Andriamanitra ary

1. Ny voarain'Andriamanitra ary,  
Ka afaka taty  
An-tany be mahory  
Dia lasa nody  
Fa tsy maty tsy akory.

2. Ny tafafindra monina ao an-danitra ao,  
Nankao an-tany vao  
Fonenan'ny mazava,  
Dia tsy mba maty,  
Fa nandao ny mety rava.

3. Ny voasatro-boninahitra tsy lò,  
Ka manaram-po  
Misotro ranon'aina,  
Dia tsy mba maty,  
fa nandray ny natenaina.

4. Ny ondrinao izay manaraka Anao,  
Ho ao an-balanao,  
Ry Ilay Mpiandry Tsara,

Dia tsy mba maty,  
re, fa tsara fiafara,

5. Ny fo mivantana aminao lzay nanome  
Ny hasambaram-be  
Nandramany sahady,  
Dia tsy mba maty, fa mpandresy afaka  
ady.

### **677 - He! Tazana ao an-danitra**

1. He! Tazana ao an-danitra  
Vahoaka finaritra  
Mitafy fotsy ravo fo,  
Ka mirana avokoa.  
Ny vazan-tany efatra  
No nielezan-kafatra,  
Dia tonga izao  
Ny ory tao  
Ka afaka entana.  
Ny ran'Ilay Mpamonjiny  
Nahafotsy ny akanjony;  
Koa dia ireo  
Manandra-peo  
Ampifaliana.

2. Ho an'Andriamanitra  
An-tsezam-boninahitra  
Ny famonjena anie!  
Hobin'ny marobe,  
Ilay Zanak'ondry avotra  
No nanafahan-tahotra  
Izay voaray  
Ho zana-dRay  
Hobio mandrakizay!  
Ka saotra, voninahitra  
Ho an'Andriamanitra,  
O, mba derao,  
Ankalazao,  
Haleloia! Amena!

### **678 - Hajao ny olo-masina**

1. Hajao ny olo-masina  
Mpanaraka ny Tomponao,  
Miely sy manerana  
Izao tontolo izao,  
Ireo dia tonga ohatra,  
Ka tokony harahinao,  
Na efa olon-dehibe,  
Na zaza hianao;  
Tanteraka ny sasany,  
Ka efa nody amin-dRay;  
Ny sasany dia mbola aty  
Milasy amin-day.

2. Ka betsaka ny isany,  
Na aty, na ao an-danitra;  
Ny Rainy kosa dia iray, Andriamanitra;  
Ireo maro namanao  
Miantso koa maka anao  
Hiaraka hiezaka  
Hankao an-danitra;  
Ka dia miezaha re,  
Ka aza kivy hianao;  
Jereo ao aloha ao  
Ny loka ho anao.

### **679 - Moa te-hiara-dia?**

1. Moa te-hiara-dia?  
Moa te-hiara-dia?  
O! ry hava-malala,  
Ho ao Kanana izao?  
Eny, te-hiaradia,  
Fa antsoin'ilay Mpamonjy,  
Ho ao Kanana izao:

Fiv : Dera, dera, haleloia!  
Dera, dera, haleloia'  
An'Andriamanitsika,  
Izay ao ambony ao.

2. Kristy re no lâlantsika,

Vatolampy, arontsika,  
Izy no mitondra antsika  
Ho ao Kanana izao.  
Tano izahay, ry Tompo;  
Hatanjaho ny mpanompo.  
Ka tsilovy ny haleha  
Ho ao Kanana izao!  
Dera, dera, haleloia! sns...

3. Tazana ery sahadry  
Perla re ny vavahady,  
Volamena ny tanàna  
Ery Kanana ery.  
E! hahita ny Mpamonjy,  
Ka hifaly fa tra-bonjy,  
Sy hidera re ny vonjy  
Ery Kanana ery.  
Dera, dera, haleloia! sns...

### **680 - Aingao ny masontsika**

1. Aingao ny masontsika  
Hitsinjo tany soa;  
Fa ao ny Tompontsika  
Manomana tokoa;  
Tanàna, trano tsara,  
Fiainan-tsambatra e!...  
Izany no anjara  
Ho an'ny mino re!

2. Ny andro fifaliana  
Ho avy ka antenao;  
Ny andro nihafiana  
Ho foana sy handao;  
Ny taona fihobiana  
Homen'ny Tomponao;  
Ho feno fifaliana  
Izao rehetra izao

3. Ny andro maharavo  
Tsy ho ela intsony izao:  
Hiarina ny lavo  
Handray ny tena vao.  
Irio ny Tompo Avo,

Ho avy hanavao;  
Ho faly izay mahazo  
Izao fiainan-tsoa izao.

### **681 - Iza moa ireo mitsangana**

1. Iza moa ireo mitsangana  
ary an-koatra ary?  
Ny Seza fiandrianana:  
No eo anilany.  
Haleloia! Mihobia  
Fa mpandresy izay e!  
Ka mitana ny rofia  
Voninahi-dehibae.

2. Fahoriana mafy loatra  
No nentin'izy ireo,  
Kaneffa tsy nitsoaka,  
Nijaly, fa tsy leo.  
Famonjena firenena,  
Ady masina tokoa.  
Nanolorany ny tena  
Ho mpitory "Teny soa".

3. O! ry mponina ao an-danitra,  
Anjely marobe,  
Omeo voninahitra  
Ny maritiora e!  
Ilay kanàna soa tokoa  
No fonenany izao,  
Hetaheta, sanatria  
Tsy haninona azy ao.

4. Mba avia ry olombelona  
Avia, ankalazao  
Ilay maty, nefa velona,  
Jesosy Tomponao.  
Dera, laza atolotray  
Haleloia, haleloia!  
Ho anao, Mpanjakanay,  
Ho Anao doria, doria.

### **682 - Hianao, Jehovah Tompo**

1. Hianao, Jehovah Tompo,  
No itokiako,  
Ka tsy matahotra aho  
Fa manana Anao.  
Ry harambato mafy,  
Izay ao mandrakizay,  
Ny foko tsy hanahy  
Fa miankina aminao.

2. Mitsoka mafy loatra  
Ny rivo-daza re,  
Kanefa tsy hihoatra  
Ny fefy lehibe.  
Ry Aron'ny tanora,  
Ry Tokin-dehibe  
Ho heriko isan'ora  
Ny herinao anie!

3. Raha tonga re ny fetra,  
Ny andro tapitra,  
Haneno ny trompetra,  
Hihovitrovitra.  
Kanefa matokia,  
Ry foko, fa Jeso  
Hitantana ny dia  
Ho eo anilanao.

### **683 - Ao am-pitan'ilay lohasaha izay**

1. Ao am-pitan'ilay lohasaha izay  
Alo-pahafatesana koa,  
Moa mba tsinjonao ve iry tanàna iray  
Iray mamiratra toa vatosoa?

Fiv : Ny masoandrony tsy mba  
milentika koa,  
Izay rehetra mby ao vadio avokoa,  
Ka mamiratra toa vatosoa.

2. Ny Mpanjakany dia Ilay Ray be fitia  
Sady aina ho an'izay ao;  
Ry Mpanota mibebaka ô, matokia  
Hosasany hadio hianao.  
Ny masoandrony, sns...

3. Nefa tsinjoko fa ny fidirana ao  
Dia am-pototr'ilay lakoroa!  
He mideza sy ety ny lala-mankao  
O, ry foko, moa ho kivy va?  
Ny masoandrony, sns...

4. Olo-masina maro no tsinjoko indreo  
Ao mihira sy mitafy vao;  
He iriko indrindra ho isan'ireo  
Ka tantano, Jeso aho, ho ao.  
Ny masoandrony, sns...

### **684 - Ao ny lanitra tsara tokoa**

1. Ao ny lanitra tsara tokoa  
Izay fonenana mandrakizay,  
Tany be hasambarana koa;  
Ao isika hihaona indray

Fiv : Mifalia, mihobia,  
Fa ao isika mihaona indray

2. Ao ny lova izay mamin'ny fo  
Sy fiainana mandrakizay,  
Voninahitra tsy mba ho lo;  
Ao isika hihaona indray:  
Mifalia, sns...

3. Ao ny Ray, Loharanon'ny soa,  
Hovantanina rahatrizay,  
Izay hampiditra hoe: mandrosoa!  
Ao isika hihaona indray:  
Mifalia, sns...

4. Ao ny Zanaka be indrafo  
Izay nijaly taty fahizay;  
Nefa tsy mba nahita ny lo.  
Fa efa velona mandrakizay:  
Mifalia, sns...

5. Ny Fanahin'ny Ray ao tokoa.  
Izay mitarika antsika izao  
Sy mananatra antsika ho soa

No mitondra antsika hankao:  
Mifalia, sns...

6. Matokia, miravoa, mifalia,  
Fa azontsika ny laplan'ny Ray:  
Miderà , mihirà , mihobia.  
Fiadanana mandrakizay:  
Mifalia, sns...

### **685 - Matokia mpivahiny!**

1. Matokia mpivahiny!  
Any an-tanàna ary  
Misy trano soa madio,  
Mandrosoa hianao

Fiv : Misy fitsaharana any  
Matokia hianao;  
Misy fitsaharana any  
Izay ho azonao.

2. Ao ny Tomponao miandry  
Hanome anao ny soa;  
Misy fiadanana any  
Voavoa ho anao:  
Misy fitsaharana, sns...

3. Any tsy mba misy rofy  
Amam-panaintainana;  
Izay rehetra tonga any  
Afa-pahoriana.  
Misy fitsaharana, sns...

4. Tsy mba mamy va ny mody  
Mba ho afa-tsasatra  
Sy horaisin'i Jesosy  
Amim-piadanana?  
Misy fitsaharana, sns...

### **686 - Maniry izahay**

1. Maniry izahay  
Ho any aminao,  
Jerosalema tanànanay,

Tanàna masina;  
Ny trano lay aty,  
Tsy maintsy rovitra,  
Kanefa tazanay ery  
Ilay tsara lavitra;

Fiv : Tazanay, tazanay  
Ny tany masina.

2. Mba tanterahorao,  
Ry Tompo tia anay!  
Ny fikasan'ny Zanakao  
Nataony taminay:  
"Ho any amiko  
Izay nomenao Ahy,  
Fa tiako ho hitany  
Ny voninahitro."  
Tazanay, sns...

3. Mankany aminao  
Izao ny dianay,  
Na sarotra ny làlana  
Mihira izahay;  
Ny hasasaranay  
Tsy misy intsony izao,  
Fa tazanay sahadry re  
Ny tany masina:  
Tazanay, sns...

### **687 - Ny tranon'ny Raiko Trano madio**

1. Ny tranon'ny Raiko Trano madio  
Tsy misy mahory na zava-manjo,  
Avia, ry malahelo! Hankao  
Mizora, fa Izy hampiditra anao.

Fiv : :; Sambatra re, izay tonga ao:;  
:; Faly tokoa :; izay tafiditra ao.

2. Mandalo izao fiainana izao,  
Ka aza sondriana aty hianao  
Ny ratsy izay mitaona reseho,  
Ny any an-danitra no mba irio

∴ Sambatra re, sns... ∴

3. He, ao no ho hitantsika tokoa  
Ny tavan'ilay Zanakondry madio;  
Ny mpino tety no efa ao koa,  
Maniry hihaona amintsika tokoa.

∴ Sambatra re, sns... ∴

4. Tsy misy manjo izay afa-mankao,  
Na andro mahory hitseran'ny fo;  
Fa any tsy misy alina koa,  
Tanàna mazava, fonenana soa,  
∴ Sambatra re, sns... ∴

5. Ny mino rehetra ory tety  
Tafakatra any ka faly tokoa,  
Mihira ny famonjen'i Jeso,  
Midera ny fiandrianan'ny Ray.  
∴ Sambatra re, sns... ∴

### 688 - Misy tany mahafaly

1. Misy tany mahafaly,  
Tany izay alehanay.  
Tany misy an'i Jeso,  
Jeso Tomponay  
Tany soa maharavo,  
Tany tadiavinay!  
Afa-tahotra afa-doza  
Izay tafiditro ao.

2. Tany tia mpivahiny,  
Tany namboarinao,  
Ry Jesosy be fitia,  
Jeso Tomponay!  
Ho anay aty an-tany  
Izay malahelo fo  
Noho ny fomban-tany ratsy  
Mahazatra anay.

3. Maro be ny fahavalo  
Izay miady aminay:  
Mafy ny fakam-panahy hitanay aty;  
Sakan-dalana, ady mafy

No alehanay izao:  
Be tokoa ny mampahory,  
Nefa fantatrao.

4. Eny, fantatrao, ry Jeso,  
Fa izahay mpanomponao  
Dia handresy ny devoly  
Noho ny herinao;  
Koa ampionao izahay re  
Mba hiankina aminao  
Hahatrarany ny tany  
Namboarinao.

### 689 - Fandalovana aty, lanitra honenako

1. Fandalovana aty,  
Lanitra honenako;  
Efitra izao tany izao,  
Lanitra honenako;  
Voahodin-doza aty,  
Reraka ao an-dàlana,  
Valaka sy sasatra;  
Lanitra honenako.

2. Na mandrivotra aza aty,  
Lanitra honenako;  
Tany no hilaozako,  
Lanitra honenako;  
Alon-dranomasina  
sy ny rian-drano be  
Tsy hisakan-dàlana;  
Lanitra honenako.

3. Ao an-tratran'i Jeso,  
Lanitra honenako;  
Afa-pahoriana,  
Lanitra honenako;  
Ao ny olo-masina  
Izay tiako taty,  
Faly raha hitako;  
Lanitra honenako.

4. Dia tsy halahelo aho,



Lanitra honenako;  
Mafy ny manjo aty,  
Lanitra honenako;  
Ao no hitoerako  
Faly anatrehan-dRay,  
Ao homeny toerana;  
Lanitra honenako.  
Amen.

### 690 - He! Misy re fonenana

1. He! Misy re fonenana  
:: Tsara e!::;  
Kanefa tsy mba lavitra;  
:: Tsara e!::;  
Ny trano ao voavatra  
Ho an'izay mangataka,  
Fa Jesosy no Tompony;  
:: Tsara e!::;  
  
2. Tsy misy fahoriana ao,  
:: Tsara e!::;  
Tsy misy alahelo ao,  
:: Tsara e!::;  
Ny ota tsy tafiditra ao,  
Ny devoly tsy monina ao,  
Fa ny anjely masina;  
:: Tsara e!::;  
  
3. Ny Tompo dia miantso anao;  
:: Tsara e!::;  
Ny teniny henoinao;  
:: Tsara e!::;  
"Avia aty, ry zanako:  
Ka mibebaha re anio,  
Tsy misy izay holaviko:"  
:: Tsara e!::;  
  
4. Efa azonay ny santatra:  
:: Tsara e!::;  
Voavelany ny heloka:  
:: Tsara e!::;  
Ho any faingana izahay,  
Fa Kristy manome anay

Fiainana mandrakizay;  
:: Tsara e!::;

### 691 - Ny lapan'Andriamanitra

1. Ny lapan'Andriamanitra  
No ivorian'ny olona  
Amena, Haleloia  
Tsy omby alinalina,  
Izay madio sy masina.  
Amena, Haleloia  
  
Fiv : ::Finaritra hono ny olona  
Mitoetra eo Aminao Mandrakizay ::;  
  
2. Izao firenen-drehetra izao  
Dia samy afaka hankao;  
Amena, Haleloia  
Tsy fomban'Andriamanitra  
Hizaha tavan'olona.  
Amena, Haleloia  
Finaritra sns...  
  
3. Ireny no naharitra  
Ny hazo fijaliana,  
Amena, Haleloia  
Ka dia nanao ny henatra  
Ho zava-tsinontsinona.  
Amena, Haleloia  
Finaritra sns...  
  
4. Endrey, ny hafaliany!  
Mazava ny tarehiny;  
Amena, Haleloia  
Fafàn'Andriamanitra  
Ny ranomaso latsaka.  
Amena, Haleloia  
Finaritra sns...  
  
5. Ataony ao ny hira vao  
Hoe: "Voavono Hianao;  
Amena, Haleloia

Ny ranao, Zanak'ondrinay!  
No nanavotanao anay."  
Amena, Haleloia  
Finaritra sns...

6. Ry Jeso ô, Mpanavotra:  
Izaho dia milatsaka  
Amena, Haleloia  
Ho isan'ny mpanomponao  
Manaraka ny dianao.  
Amena, Haleloia  
Finaritra sns...

### 692 - He! Misy tany soa

1. He! Misy tany soa  
Izay tsy aty;  
Maro ry olona  
Faly ary;  
Tsara fonenana,  
Sambatra sy tretrika  
Sady finaritra  
Izay mponina ao

2. Aza sondriana  
Foana aty;  
O! miomàna re  
Mba ho ary;  
Be fiadanana,  
Tsara fitoerana,  
Be haravoana  
Izay mponina ao.

3. Mafy izay manjo  
Hita aty,  
Ka misikina re  
Mba ho ary;  
Jeso mitandrana  
Sy mitahy fatratra  
Ary mahenina  
Izay mponina ao.

4. Aza variana  
Foana aty

O! miaingà izao  
Mba ho ary,  
Jeso sakaizanao  
No mpitari-dàlana,  
Ka dia hitondra anao  
Ho tonga ao.

### 693 - Ao ambony ny lapan'ny Ray

1. Ao ambony ny lapan'ny Ray,  
Ao an-danitra feno ny soa.  
Hasambarana mandrakizay,  
Kristy soa iriko tokoa.

Fiv : ,,: Kristy soa, Kristy soa  
No iriko ho ahy tokoa.,,:

2. Misy tsara ihany aty,  
Mba ho santatra eto izao;  
Fa tsy mety ho toy ny ary,  
Ka iriko tokoamba ho ao.  
Kristy soa, sns...

3. Ny voavotra ravo izao,  
Afaka ota ka faly tokoa.  
Afa-paty izay tonga ao,  
Afa-doza, mahazo soa.  
Kristy soa, sns...

4. Tsy ny lanitra be zava-tsoa,  
Fa ny Tompo malalako ao;  
Tsy mba tahotro hela tokoa.  
Fa ny Tompo tsy foiko izao.  
Kristy soa. sns...

### 694 - Enga ka hanana elatra soa

1. Enga ka hanana elatra soa  
:,: Aho ety.,,:  
Mba hanidinako avo tokoa  
:,: Hody ery.,,:  
Fo malahela ny ratsy natao  
No ela-tsoa hitondra hankao;  
Hanana elatra aho anie

Mba hanidinako ao!

2. Trano mamiratra tsara iry,  
:: Raiko no ao,::  
Na nahabe ahy aza ity,  
:: Mamiko ao; ::  
Havako maro no sambatra ao.,  
Faly ny foko hankenany izao:  
Enga ka hanana elatra aho,  
Mba hanidinako ao!

3. Na dia an-danitra aza ery,  
:: Lavitra va?::  
Raha tarihin'i Jeso ety,  
:: Ketraka va?::  
Tsia, fa hiainga tokoa aho izao!  
Indro akaiky ny làla-mankao:  
Enga ka hanana elatra soa,  
Mba hanidinako ao!

4. Andriamanitra Ray no ery.  
:: Tsara tokoa; ::  
Jesosy koa Ilay Mpamonjy tety,  
:: Zanaka soa; ::  
Ao ny Fanahy masina re!  
Tapitra ao avokoa ny soa;  
Hanana elatra aho anie,  
Mba hanidinako ao!

### **695 - Ary an-koatra ary ilay Paradisa soa**

1. Ary an-koatra ary,  
Ilay Paradisa soa  
Toa takona aty,  
Kaneffa ao tokoa,  
Mamirapiratra ao,  
Ny endriky ny Ray;  
Jesosy Tompo ao  
Miandry mba handray.

2. Tsy misy ny hanjo  
Izay tafiditra ao;  
Ny ranomaso koa

Tsy afaka hankao  
Ny hazavana soa  
Manelatrelatra ao;  
Ny zava-mahasoa  
Tsy misy izay tsy ao.

3. Anjely marobe  
Mihira any koa;  
Ireo olo-masina e  
Mifaly avokoa.  
Andeha re izao,  
Sakaiza marobe,  
Aria ny tahotrao,  
Ka dia mizora re!

4. Raha misy loza ety,  
Jereo ny Tomponao;  
Fa Izy raha tety  
Nitondra toy izao.  
Ireo fahoriana aty  
Odio tsy hita re,  
Handraisantsika ary  
Ny fiadanam-be.

### **696 - Raha ho faty aho**

1. Raha ho faty aho,  
Ka handao ny havako,  
Ary dia hisaonany,  
Fa handeha hifaly aho;  
Raha afaka ny aiko,  
Dia ho finaritra aho.

2. He! Antsoiny aho,  
Ha any an-danitra,  
Dia faly ny foko  
Sy ravo ny kiboko,  
Fa azoko ny iriko  
Sy nantenaiko ela.

3. Havelako ny tany,  
Fa ela azoko tokoa  
Ny fifaliam-be;  
Lovako ny lanitra,

Dia tsy matahotra  
Ny hafatesano aho.

### 697 - Any ambony fonenana tsara

1. Any ambony fonenana tsara  
Dia tsy mba misy itseran'ny fo;  
Eny iriko ho tsara miafara  
Hiara-manjaka aminao, ry Jeso.  
Isaoranay ny Tomponay,  
Raha 'mby any' dia faly tokoa  
Isaoranay ny Anaranao soa!

2. Rehefa tonga ilay andro malaza  
Izay hanatrehana Anao, ry Jeso!  
Izao no heveriko ho tena laza:  
Dia ny hidera Anao, Tompo ô!  
Isaoranay ny Tomponay,  
Raha 'mby any tsy mba ory koa;  
Isaoranay ny Anaranao soa!

3. Ao izany havana tena malala,  
Izay mahafaly fa hita indray,  
Nefa izay hampifaly tokoa  
Dia ny mihaona aminao, ry Jeso!  
Isaoranay ny Tomponay,  
Raha 'mby any tsy mba misy manjo;  
Isaoranay ny Anaranao soa!

### 698 - Iza re ireto avy

1. Iza re ireto avy  
Voatafy lamba soa,  
Samy voasatro ka avy,  
Satro-bolamena koa?  
Avy taiza izy ireo,  
Ka ho aiza izy izao?

2. Izy ireo dia voavonjy,  
Voavela heloka;  
Samy nino an'i Kristy  
Fony mbola velona;  
Be ny ratsy nentiny,

Fa izao dia sambatra.

3. Maro be ny fahavalo  
Niadiany taty,  
Fa tsy misy izany intsony;  
Afaka ny sarotra,  
Afa-pahoriana,  
He, ny hafaliany!

4. Miramirana tarehy,  
Indreo, avy izy ireo  
Mba hihoby an'i Kristy,  
Tompo sy Mpanjaka koa,  
Fa nahazo zava-tsoa.  
Ka dia tretrika tokoa.

### 699 - Midera Anao ny olo-masina

1. Midera Anao ny olo-masina,  
Naha ny fandresena nomenao:  
Ry Jeso ô, Mpitari-dalana!  
Haleloia! Haleloia!

2. Ory sy lao, fadiranovana,  
Natao ho zava-tsinontsinona  
Nefa ireo no tsy nivadi-po:  
Haleloia! Haleloia!

3. Mafy ny ady aman-tafika,  
Izay nihatra tao an-dàlana,  
Fa Hianao no nitokiany:  
Haleloia! Haleloia!

4. Indro! Mpandresy no idirany  
Ao afovoan'ny ao an-danitra,  
Handray ny satro-boninahitra:  
Haleloia! Haleloia!

5. Mpanompo tsara sady mahasoana,  
Midira am-pifalian'ny Tomponao;  
He! Sambatra Izy, fa efa voaray:  
Haleloia! Haleloia!

6. Aoka ireo hotahafinay

Amin'ny ady iadiana,  
Hiraisam-boninahitra aminy:  
Haleloia! Haleloia!

7. Ankehitrrio, anao ny fiderana,  
Ry Ray sy Zanak, Fanahy koa  
Eran'ny tany aman-danitra:  
Haleloia! Haleloia!

## 700 - Ao ny andro lehibe

1. Ao ny andro lehibe  
Misy fifaliam-be  
Dia ny andro hahatongavana  
Amin'ny fonenana  
Feno fiadanana,  
Tsy mba misy ota na heloka,  
Any, tena andro malaza tokoa izay.  
Jeso Ilay nandresy ny fasana,  
Izy no hitantana  
Ao am-pahafatesana,  
Ka ho mora ny handehanana.

2. Ao ny andro lehibe  
Misy fifaliam-be  
Izay hihaonana any an-danitra  
Afa-pahoriana,  
Afa-pijaliana,  
Sambatra tokoa sy tretrika.  
Enga ka ho ao avokoa isika izao  
Ka tsy hisy very na dia iray!  
Tava miramirana,  
Endrika mampiratra  
No hananantsika mandrakizay.

3. Ao ny andro lehibe  
Misy fifaliam-be  
Hahitana an'Andriamanitra  
Sy Jesosy Zanany  
Mbamin'ny Fanahiny.  
Hoby no hameno ny lanitra.  
Serafima sy arkanjely no namana  
Mankalaza Ilay feno indrafo.

Ny fitomaniana  
Sy ny fisentoana  
Tapitra, fa afaka ny manjo.

## 701 - Ny hiran'ny lanitra tsara tokoa

1. Ny hiran'ny lanitra tsara tokoa sy  
mahafinaritra re!  
Henoy izany feon'ny olona maro izay  
faly tokoa mihira hoe:

Fiv : (feo 1)  
Haleloia. Amen!  
Haleloia. Amen!  
Haleloia. Amen!  
Haleloia. Amen!

(feo 2)  
Ny dera aman-daza sy hery, anie,  
Ho Anao, ry Zanak' ondry  
Ny dera aman-daza sy hery, anie,  
Ho Anao, Anao, Amen!

2. Toy ny feon'ny rano mahery ny hira  
ataon'ny tra-bonjy ary;  
Manerana ny lanitra ny fiderany, fa vita  
ny adiny mafy taty.  
Haleloia, Amen! sns...  
Ny dera aman-daza, sns...

3. Tsy mety mangina ny hiran'ny  
lanitra, velona mandrakizay!  
Endrey ny fihaonana any an-danitra sy  
ny fiainana mandrakizay.  
Haleloia, Amen! sns...  
Ny dera aman-daza, sns...

## 702 - An-danitra, an-danitra

1. An-danitra, an-danitra  
Tempolin-Jehovah,  
No hahitana Azy re,  
Am-boninahitra!  
∴ Ka masina i Jehovah, ∴ ∴  
No hohiraina ao.

## 703 - Ry Jehovah Ray Tsitoha

2. An-danitra, an-danitra  
No mba hamiratra  
Ny voninahi-dehibe  
Hananantsika e!  
:: Raha tonga ny fihaonana::  
Ao amin-Jehovah.

3. An-danitra, an-danitra  
No ho finaritra  
Ny tena izay nijaly be  
Am-pahoriana  
:: Fa any no hifaly e::  
Fahasambarana.

4. Ny fo sy ny fanahy e,  
Ho faly anie,  
Fa afaka ny entana,  
Izay nivesarany;  
:: Ka fitsaharan-dehibe::  
Omen'i Jehovah.

5. Tsy hain'ny lela anie  
Hanonona izao  
Ny soa antenaina e,  
Raho anatrehany.  
:: Manenika ny lanitra::  
Ny fitiavany.

6. Ry Jeso Kristy Tomponay  
Tariho izahay,  
Ka mamelà ny helokay,  
Mba hitokianay,  
:: Fa tsy ho menatra izahay!::  
Fa ao i Jehovah.

7. Raha avy ny hodianay  
Eo anatrehany,  
Mba ento, Jeso, izahay  
Hankany Aminy!  
:: Mba ho anay mandrakizay::  
Ny fitsaharana!

1. Ry Jehovah Ray Tsitoha!  
Vory eto izahay  
Ray hatramin'ny taloha  
Mihainoa ny vavakay  
:: Mitsangàna::  
Eto afovoanay.

2. Andro fampakaram-'bady,  
Fifaliam-be izao;  
Hianao no mampivady  
Raha voatendrinao;  
:: Vady hendry ::  
Lova avy aminao.

3. Ry Jehovah Ray malala!  
Mba tezao ireo ho soa,  
Samy tsy hisalasala,  
Fa hifankatia tokoa;  
:: Hamasino ::  
Mba ho olonao ireo.

4. Ho fanahy mifandanja  
Sady tsy ho toy ny roa,  
Ho mpivady mifanaja  
Sady mifamaly soa;  
:: Akambano ::  
Mba ho fo iray tokoa.

## 704 - Ry olon-kanao fanekena masina

1. Ry olon-kanao fanekena masina,  
Misaora ny Tompo, fa ny sitrapony  
No mampikambana  
Amim-pitiavana,  
Ka dia tsy olon-kisaraka intsony:  
Ny tany Edena tsahivina indray.

2. Ny fahamarinan'Andriamanitra  
No haingo manendrika ny tokantrano  
Ho toy ny lanitra Mamirapiratra.  
Ry mpivady marina, Kristy no tano  
Handamina ny tokantrano vaovao.

3. Ny fahasoavan'Andriamanitra  
No andry manohana ny tokantrano.  
Ka mampisandratra  
Ny te-ho sambatra,  
Izay ankohonanareo atsangano  
Hidera ny famindrampo lehibe.

4. Ny fanaky ny tokantrano masina  
Manoatra be noho ny volamena:  
Ny fivavahana  
Sy ny fifonana,  
Fisaorana sy fiderana homena  
Marain-tsy hariva ny Mpamonjy e!

5. Jehovah Mpitana ny fanekena ô!  
Tahio ny toky nomeny ho mafy,  
Ho masina sy to,  
Ho marina am-po:  
Ka izy handresy izay ta-handrafy;  
Ho azy ny lova ho mandrakizay.

### **705 - Ry Tompo Zanaharinay**

1. Ry Tompo Zanaharinay!  
Jereo ny fivorianay,  
Izao lampakaram-bady izao  
Tahio sy hamasinonao.

2. Ireo zatovo roa ireo  
Manketo anatrehanao,  
Fa mifanaiky izy izao  
Hivady sy hifanasoa.

3. Mangataka aminao izahay  
Hitahy ireo havanay,  
Raha ory, mba ononinao;  
Raha faly, aza ilaozanao.

4. Arovinao ny tenany,  
Tsinjovy ny taranany;  
Ho tsara fara anie ireo,  
Ho ravoravo toy izao.

5. Ny fifalianay anio  
Hitohy hatrany anie!  
Ity andro lehibe ity  
Ho santatry ny soa ary.

### **706 - Izao manatrika Anao**

1. Izao manatrika Anao,  
Ry Jesosy izahay,  
Indro tokantrano vao  
No haorina indray.  
Izahay mangataka  
Ny tsodranonao omeo,  
Ka avia hanapaka  
Ny fiainan'izy ireo.

2. Ho Kristiana velona  
Anie ny zanany,  
Ho vavolombelona  
Fa Anao ny tranony  
Aoka mba hamiratra  
Ny Filazantsaranao,  
Velona hanaraka  
Ny fonay ka hazavao

3. Ka ny fiangonana  
Hanompoanay Anao,  
Hanana olom-banona  
Faly ny hiasa ao.  
Antenainay marina,  
Fa Hianao hanohana  
Izay firaisa-masina,  
Hisy fahasoavana.

### **707 - Ry Jesosy be fitia**

1. Ry Jesosy be fitia,  
Manatreha, manampia  
Ny mpanomponao izao  
Izay mivavaka aminao  
Filaliana madio  
No omeo anay anio.



2. 'Ndreo ny havanay jereo,  
Mba ho soa anie ireo:  
Tanan-droa mifandray,  
Nofo roa tonga iray,  
Mifaniry soa tokoa,  
Mifanampy, mifanoa.

3. 'Lay tsodrano hatrizay  
No omeo ireo havanay;  
Mba ho maro fara anie,  
Hanam-panambinana,  
Feno fiadanana  
Noho ny fitahianao.

4. Raha ory mba vangio,  
Mitaraina, mba valio:  
Mitoera aminy  
Ao an-tokantranony,  
Hamasino, hafanao  
Ny fitiavany Anao.

### **708 - Ry Jehovah, Ray Kiady**

1. Ry Jehovah, Ray Kiady,  
Sy mpikarakara anay  
Ka nitahy ny mpivady,  
Tao Edena fahizay.  
Indro misy tonga koa  
Eto anatrehanao,  
Manam-pikasana soa,  
Ho mpivady hatrizao.

2. Mba tahia, ry Ray mpiahy,  
Ny firaisany izao,  
Hifanaraka am-panahy  
Sy hiankina aminao.  
Ny tsodranonao fahiny  
Angatahinay indray,  
Mba hatao ankehitriny  
Hahatò ny hatakay!

3. Raha omenao zaza izy,  
Dia mba ampio re,  
Hitaizany ny ankizy

Amim-pahendrena be;  
Aza avela ho irery  
Raha tratry ny manjo,  
Fa tafionao ny hery  
Mahatanjaka ny fo.

4. Raha ao ny andro tony  
Mila haharenoka,  
Dia taironao ny fony,  
Ry Mpamela heloka,  
Raha tapitra ny taona  
Efa voafetranao,  
Enga ka ho tafahaona  
Ao an-danitra aminao.

### **709 - Jehovah ô, mba mihainoa!**

1. Jehovah ô, mba mihainoa!  
Indreo, misy olon-droa izao,  
'Zay manam-pikasana soa  
Hanorin-tokantrano vao:  
O! tahio, O! tahio,  
Mba ho tokantrano soa madio!

Fiv : O! tahio, O! tahio,  
Mba ho tokantrano soa!

2. Dia angatahinay, Ry Ray  
Ny fitahianao ho azy ireo  
Ho nofo sy fanahy iray  
Ka hifanaja hatrizao.  
O! tahio, sns...

3. Fenoy ny fiadananao  
Ny tokantranon'izy ireo  
Ka mba hamirapiratra ao  
Ny fivavahana Aminao.  
O! tahio, sns...

4. Tahio ireo, ry Tompo soa,  
Mba ho mpivady marina,  
Hitana sy hanaja koa,  
Ny fanekena masina.  
O! tahio, sns...

5. Tahio, hifampitantana  
Mandritra ny fiainany,  
Ka dia ny fahafatesana  
No fetra isarahany.  
O! tahio, sns...

### **710 - Nakambanao, ry Tompo ô!**

1. Nakambanao, ry Tompo ô!  
Adama sy Eva nankatò  
Ny fakamparam-bady.  
Tahio sy vimbinonao  
Ireto anatrehanao  
Manaiky ho mpivady.  
Hahay handray  
Ny anjara izay hihatra  
Izy roa,  
Ary hifanisy soa.

2. Dia nifanaiky izy, izao;  
Ry Tompo ô! Vimbinonao  
Mba ho iray tokoa;  
Ny fony mba tarihonao  
Hanaraka ny didinao  
Nomenao azy roa;  
Izao, handao  
Ray sy reny, ka ny teny  
Nolazainy  
Enga anie ka tsy hovan'ny

### **711 - Tompo ô, endrey ny fitahiana**

1. Tompo ô, endrey ny fitahiana  
Izay natodrakao ny zanakao.  
Vory eto, feno fifaliana,  
Ampoky ny fahasoavanao.  
Izay rehetra nikelezan'aina  
Dia nomban'ny fitantananao;  
Vonona avokoa izay nilaina,  
Tsy mba lany ny harenanao

2. Indro tranonovitaina  
Hanasoavana taranaka,

Hitaizàna, hanolokoloana  
Ireo tanora halain-tahaka.  
Izay voafafy, antenaina  
Mba hamokatra tsy tapaka;  
Dia ho vanona ny firenena,  
Ka hitombo, hisandrahaka

3. Izany re, ry Tompo, no finoana  
Tananay, ka mba herezonao  
Izahay handroso tsy hivaona  
Eo ambany fiarovanao.  
Ka ny fangataham-pitahiana,  
Tompo ô! Akarina aminao  
Ny Anaranao no iaingàna.  
Hoderaina ny Anaranao!

### **712 - Raha tsy Jehovah no manao ny trano**

1. Raha tsy Jehovah  
No manao ny trano,  
Dia miasa foana  
Ny mpanorina;  
Raha tsy Jehovah  
No miambina azy  
Miaritry foana  
Ny mpiambina.

2. Nahavita trano  
Ny mpianakavy,  
Ka mifaly, ravo  
Nahatsangana.  
Nefa koa tsaroana  
Fa Jehovah Tompo,  
Feno fitahiana,  
No nanambina.

3. Mankasitraka aho  
Ary koa misaotra  
An'Ilay Nahary  
Be fitiavana.  
Izay rehetra ahy  
Dia nomen'ny Ray  
Eny, ity trano

Dia avy taminy

4. Tompo ô! Tahio

Izay miditra ato  
Dia arovy koa  
Izay mivoaka:  
Mba monena ato,  
Miaraka aminay  
Anjakao ny trano,  
Hiadanany.

**713 - Miposaka indray ny masoandro**

1. Miposaka indray ny masoandro  
Ny ali-maizim-be dia tonga andro.  
Ry foko, mba derao ny Ray Tsitoha,  
Ka dia andrandrao,  
Derao, ankalazao  
Ny Rainao soa.

2. Ny loza marobe aty an-tany

Dia niarovany anao izany,  
Ka zava-mahafaly no omeny,  
Dia fiarovana  
Sy fitiavana  
Tsy hita lany.

3. Ry Masoandronay, mba mitariha

Ny dianay anio mba tsy hania;  
Mahery Hianao ka maharara  
Ny fahavalonay  
Tsy hahataona anay  
Handàny tsara.

4. Ny zavatra manjo tsy mampanahy

Napetraka aminao ny ahiahy,  
Ka dia matoky aho, ry Tsitoha!  
Omeo ny zanakao  
Izay heverinao  
Ho mahaso.

**714 - Jehovah Zanahary**

1. Jehovah Zanahary,

Izahay midera Anao;  
Ny alina nanjary,  
Ho firaketanao.  
Maraina izao ny andro,  
Ka lazao ny maizina,  
Savao, ry Masoandro,  
Izay Iahoriana.

2. Ry kintan'ny maraina,

Jesosy Havanay,  
Arovinao ny aina,  
Tahio izahay;  
Ny asanay anio  
Mba hasoavinao.  
Ny dianay tariho  
Ho any aminao.

**715 - Tonga ny maraina**

1. Tonga ny maraina,

Dimbin'alina,  
Ka ny Tompon'aina  
No isaorana.

2. Raha mbola nandry

Aho, Tompo ô,  
Hianao Mpiandry  
Dia aroko.

3. Tano sy ampio

Ny madinikao,  
Sao hanota anio,  
Ka handao Anao.

4. Aoka ny anjara

Fanompoako  
Mba ho vita tsara  
Ka ho sitrakao.

5. Ary raha lany

Ny fotoako,  
Izaho hody any

Anatrehanao.

## 716 - Ry Tompo ô, tahio

Ry Tompo ô, tahio,  
Izao dianay izao;  
Ny lehibe ampio,  
Ny kely mba tezao,  
Fa ny Anaranao, no iaingana anio;  
Tantano sy vimbino  
An-dàlana izahay.

## 717 - Andeha raha maraina

1. Andeha raha maraina,  
Raho atoandro koa.  
Andeha raha hariva,  
Hivavaka tokoa;  
Fa marina no ento.  
Ario ny tahotrao,  
Miondreha ao an-trano.  
Ka mivavaha ao.

2. Tsarovy ry sakaiza,  
Ny havan-tianao;  
Raho misy fahavalo,  
Mifona ho azy koa;  
Ka dia mangataha  
Ny soa ho anao,  
Jesosy, 'Lay Mpamonjy,  
Alao ho tokinao.

3. Na tsy irery aza,  
Fa be ny olona ao,  
Ka misy hevi-tsara  
Miposaka ao am-po.  
Ny hataka mangina  
Voeritreritrao  
Ho ren'ny Rainao tia,  
Jehovah Tomponao.

4. Mba manatòna Azy  
Raha azon'ny manjo;

Tsarovy koa raha faly  
Hisaotra ao am-po;  
Tsy misy hafaliana  
'Zay mamy toy izao;  
Ny fahazoantsika  
Mivavaka aminy.

## 718 - He torimaso mamy

1. He torimaso mamy  
No atolory ahy  
Ry Raiko mpiandany  
Sy herin'ny fanahy  
Ny sandrinao mahery  
No hiampofo ahy  
Ny masonao mijery  
Manala ahiahy.

2. Ny otako androany  
Koseho, Raiko ô!  
'Reo ory mitomany  
Ampaherezona.  
Ny havako rehetra  
Sy ny sakaiza koa,  
Tahio tsy hanjorettra  
Ampifalio tokoa.

3. Ireo sahiran-tsaina  
Sy mandry fotsy izao  
Ny kivy, mitaraina  
Vonjeo, ry Tompo ô!  
Ireo marary maro  
Sy ny mpitsabo koa,  
Tahio, ry Mpiaro,  
Arovy tsy ho voa.

4. Hianao no tokinay  
Ka dia hatory izao  
Ireto nofonay  
Am-pelatananao.  
Sakano re ny ratsy  
Mba tsy hamely izao  
Ry jeso Mpiambina ahy  
Sy voninahitra ô!

## 719 - Efa lasan-davitra

1. Efa lasan-davitra  
Ka hariva izao ny andro;  
Hianao no Masoandro,  
Ry Andriamanitra.  
Mba arovinao ny aiko,  
Fa atolotro Anao,  
Ampidiro ao am-poko  
Izao ny fiadanana!
2. Raiso ny fisaorako,  
Ka tondrahy ranon'aina  
Ny fanahy aman-tsaina,  
Mba ho velona izao.  
Dia hamoa voa tsara  
Amiko ny teninao,  
Ka ho tiako hambara  
Ny fahasoavanao.
3. Ry Andriamanitra ô!  
Hitanao ny fahotako,  
Fantatrao ny fahosako;  
Mamindrà fo amiko;  
Izaho tsy misalasala  
Mba hanatona Anao,  
Fa ny Zanakao malala  
Maty noho ny otako,
4. Izaho ta-hatory izao  
Fa mba sasatra niasa  
Tsy heveriko ny lasa,  
Fa apetraka aminao  
Aoka aho mba hahazo  
Fitsaharana izao;  
Raha maraina mba fohazy,  
Dia hankalaza Anao.
5. Kintan'i Jakoba ô,  
Sady Masoandron'aina,  
Hazavao ny fo sy saina,  
Mba tsy hatahorako  
Ny mpanimba sy mpandoza,

Liona mieronana,  
Izay minia hampidi-doza  
Andro aman'alina.

6. Arosoy ny teninao,  
Hazavao ny firenena,  
Mba ho samy hanantena  
Famonjena aminao;  
Ka ny manam-pahefana  
Aoka hotarihinanao,  
Mba hitondra fanjakana  
Araka ny sitrakao.
7. Fantatrao, Jesosy Ô,  
Izay rehetra mitaraina  
Ka miandry ny maraina  
Sy ny fahasitranana;  
Ny kamboty sy mahantra  
Aoka hotsarovanao;  
Ry Sakaizanay Mpiantra,  
Iantao ny olonao.

## 720 - Lany indray ny andro

1. Lany indray ny andro;  
Hianao, ry Ray,  
No ho masoandro  
Sy ampinganay.
2. Be ny zava-tsoa  
Azo taminao:  
Ka misaotra koa  
Izahay izao,
3. Andronay mandala  
Toy ny rivotra:  
Be ny fahavalo  
Mampitahotra.
4. Jeso ô, Mpiandry,  
Izaho ondrinao,  
Aoka re mba handry  
Eo an-tratrananao.

5. Mpivahiny ihany  
Izahay aty,  
Ka mba te-ho any  
Aminao ary.

## 721 - Ny andro efa lany

1. Ny andro efa lany,  
Mangina izao ny tany  
Miala sasatra:  
Heveronao ry saina,  
Fa mendrika ho deraina  
Ny Raiko ao an-danitra.

2. Na maty masoandro,  
Ka alina ny andro,  
Tsy mampaninona,  
Fa Jeso, Izay Sakaiza,  
Dia ao fa tsy mankaiza,  
Ho tena Masoandroko.

3. Hatory izao ny maso;  
Ry Tompo, mba andraso  
Ny ondrikelinao;  
Ny tena sy fanahy  
Sy izay rehetra ahy  
Atolatro harovanao.

## 722 - He, alina ny andro

1. He, alina ny andro,  
Ka mba esorinao;  
Ny fahotako maro,  
Mba tsy ho hitanao:  
Reseo ny mpamely  
Ny zanakao, ry Ray;  
Iraho ny anjely  
Hiambina anay.

2. Raha maizina ny tany,  
Ny andro tapitra,  
Tsaroanay ihany  
Ny fasa-maizina;  
Arovy lalandava

Izahay, ry Tomponay,  
Ka aoka ho mazava  
Ny hitsangananay.

## 723 - He, alina indray izao

1. He, alina indray izao,  
Jesosy Tompo ô,  
Ka aoka ny mpanomponao  
::: Homban'ny elatrao:::

2. Fa iza no hahita anay,  
Raho azon-doza izao,  
Kaneffa kosa aronay  
::: Ireo anjelin'ao :::

3. Ka raha hatory izahay,  
Ry Rainay tsara ô,  
Ny tena sy fanahinay  
::: Dia mba arovin'ao :::

4. Ka raha aposakao indray  
Ny masoandronao,  
Fohazy tsara izahay  
::: Hisaoranay anao :::

## 724 - Mpamonjy Masoandronay!

1. Mpamonjy Masoandronay!  
Fahazavan'ny alinay,  
Ny zavon-tany mba savao  
Tsy hanakonany Anao.

2. Tontolo andro Hianao  
No anton'ny iainanay;  
Raho alina, momba anay,  
Ny faty tsy ho tahotray.

3. Ny aizina mba hazavao,  
Tarihona ny lalana,  
Halehanay an'efitra,  
Ho tonga any Aminao.

4. Izay marary mba tsaboy,  
Ny ory aza afoinao,  
Ho toy ny torin-jaza anie  
Ny fiadanany izao.

5. Tahio ny hifohazanay  
Hanaovanay ny sitrakao  
Arnbara-pahatapitra  
Ny andro ivelomanay.

6. Raha mby aminao izahay,  
Hahita fiadanana,  
Fa ao tsy misy alina,  
Hianao no Masoandronay.

### **725 - Alina ny andro**

1. Alina ny andro,  
Ka efa mba hatory  
Ny masonay;  
Hianao, Jehovah ô!  
'Zay tsy mety sasatra,  
::: No aronay:::

2. Lasa ny mazava,  
Ka ny masoandro  
Tsy hitanay:  
Tsy matahotra izahay,  
Hianao an-danitra  
:::Mahita anay:::

3. Fa ny kintana eny,  
Efa manazava  
Ny dianay;  
Koa tsy nafoinao,  
Fa nasehonao ireo  
:::Ho tokenay:::

4. Alina sy andro  
Samy mba manaiky  
Ny tendrinao;  
Tonga re nY maizina,

Nefa: tsy ilaozanao  
:::Ny olonao:::

5. Eto ny mazava  
Dia manam-petra;  
Fa ao aminao;  
Tsy mba misy alina,  
Fa mampirapitra  
:::'Ny tavanao:::

### **726 - Efa hariva Jeso tia!**

1. Efa hariva Jeso tia!  
Tomoera aminay;  
Ny fanahinay tahio,  
Fa hatory izahay.

2. Fa ny helokay ekenay,  
Mahavonjy Hianao;  
Ny manjo anay lazainay,  
Fa miantra ny fonao,

3. Alina maharitra ela,  
Aizi-mampivadi-po,  
Fa ny olona fidinao  
Tsy mba takona aminao.

4. Hianao no mitahiry  
Ny miankina aminao  
Voahididin'ny anjely  
Ny mialoka aminao.

5. Raha anio no tapitra andro  
Izahay mpanomponao,  
Aoka izahay hifoha  
Ao an-dapaso anao.

### **727 - Andriananahary nikarakara anay**

1. Andriananahary  
Nikarakara anay,  
Ka nampitsiry vary



Ho fivelomanay!  
Ny haninay tahio  
Ho tonga tanjakay,  
Ny hevitrany tariho  
Mba hiadanany.

2. Ry Rainay ao ambony,  
Misaotra Anao izahay,  
Fa zava-tsoa itony  
Izay nohaninay.  
Ny zavatra rehetra  
Dia manantena Anao,  
Fa tsy mba misy fetra  
Ny fitiavana.

### **728 - Atreho ny sakafonay**

Atreho ny sakafonay,  
Jehovah , Mpanome ny soa;  
Velominao ny tenany,  
Ny sainay hatanjaho koa.

### **729 - Ry Jehovah Ray Tsitoha**

1. Ry Jehovah Ray Tsitoha  
Mba avia hialoha  
Sy hiaro ny mpandeha  
Lavi-dalana haleha  
Mba jereo ny olonao  
Sarak'olona irery  
Sady tsy mba manan-kery  
::: Ka jereo ry Tomponay!:::  
Mba Tazano ny mpandeha; (in-3)  
Hianao no herinay.

2. Ao ny andro mamananala,  
Sakambino ao an'ala:  
Raha mandeha mita rano,  
Mba hazòny sy tantano,  
Ka vonjeo ny olonao;  
Be ny zavatra mihatra  
Izay manimba sy mandratra,

::: Ka vonjeo, ry Tomponay!:::  
Mba arovy ny mpandeha; (in-3)  
Hianao no aronay.

3. Raha ory, mba tohano,  
Ka vimbino sy tantano  
Tsy ho reraka ny fony,  
Aza afoy, fa mba hazòny,  
Iantrao ny olonao;  
Raha mahantra izy any,  
Ory sady mitomany,  
::: Ka vangio, ry Tomponay!:::  
Mba tsarovy ny mpandeha; (in-3)  
Hianao no tokinay.

### **730 - O! tahio ny havanay re**

1. O! tahio ny havanay re  
Izay handeha lavitra,  
Be tokoa ny alahelo  
Noho ny fisarahana:  
::: Manatreha:::  
Izao veloma atao izao.

2. Mba sakanonao ny loza  
Tsy hamely azy izao;  
Raha misy mampahosa,  
Asehoy ny herinao;  
::: Mba tantano :::  
Tsy hisaraka aminao.

3. Aoka mba ho tonga soa,  
Tsy ho azon-tsampona;  
Aoka koa mba hampodina  
Eto aminay indray,  
::: Ka hisaotra :::  
Noho ny fivimbinanao.

### **731 - Enga anie ka homba anao Jeso!**

1. Enga anie ka homba anao Jeso!  
Hanadio sy hanazava,  
Hampahery lalandava

Enga anie ka homba anao Jeso!

Fiv : Homba anao, Homba anao Jeso  
Homba anao anie Jeso,  
Homba anao, Homba anao Jeso  
Enga anie ka homba anao Jeso

2. Raha mitambatra ny rahona,  
Ka mikimpy ny masoandro,  
Raha Jeso momba isan'andro  
Ho tantely koa ny vahona.  
Homba anao, sns...

3. Mangamanga indray ny lanitra  
Loharanom-pitahiana  
Sady foto-pifaliana.  
Jeso Zanak' Andriamanitra.  
Homba anao, sns...

4. Raha mitolona ady sarotra,  
Matokia fa tsy ho irery,  
Homba anao Jeso mahery,  
Homba anao tsy miady varotra  
Homba anao, sns...

5. Raho hilaozana ny havana,  
Sady mainty koa Jordana,  
Ho mazava ny fitàna  
Ao Jeso hanangana avana.  
Homba anao, sns...

6. Raha Jesosy no mitantana,  
Paradisa koa ny tany,  
Hasambarana hatrany,  
Ao Kanana no hamantana.  
Homba anao, sns...

### **732 - Veloma indrindra, ry havana ô!**

1. Veloma indrindra, ry havana ô!  
Veloma, e, mandrampihaona;  
Ry Tompo, vimbino an-dalana ao  
Ny havana izay vao handeha;  
Ka ny mifanao

Veloma izao  
Tahio, mba ho tafahaona!

2. Ry Jeso Mpamonjy, tariho izahay  
Hihaona indray ao ambony,  
Hiara-pinaritra mandrakizay,  
Rehefa tafita ny ony,  
Hiara-manao  
Ny hira vaovao,  
Fa tsy mba hisaraka intsony!

### **733 - Ny fihaonana an-tany**

1. Ny fihaonana an-tany,  
Ry Jesosy Tomponay,  
Vetivety mora lany,  
Ka mangoraka izahay,  
Namana nifankahazatra  
Hifanao veloma anio.  
Ry Jesosy be fiantra,  
Ny mpandeha mba tahio.

2. Ny ho lasa mba tantano  
Tsy ho voa an-dàlana;  
Ny hitoetra koa tohano,  
Dia mba hiadana.  
Na maraina na hariva,  
Na aiza alehany ety,  
Mba ombay mandrakariva  
Mandra-podiny ary.

3. Any volana, any taona,  
Ny misaraka izao  
Enga anie tafahaona  
Raha mbola sitrakao.  
Ilay fihaonana ao ambony.  
No irinay fatratra,  
Tsy hisaraka intsony  
Izahay ka sambatra.

### **734 - Zanahary ô tahio ny tanindrazanay**

1. Zanahary ô tahio  
Ny tanindrazanay,  
Handroso lalandava,  
Handry fahizay.  
Enga anie hanjaka ao  
Ny saina mahay miray,  
Dia ho tany sambatra  
Ilay Madagasikaranay.

2. Ireo mpitondra anay  
Arovy lalandava koa,  
Tolory saina hendry,  
Kinga sy mahay  
Ka ny marina anie  
No mba hanjaka ao tokoa,  
Dia ho tany sambatra  
Ilay Madagasikaranay.

3. Ny taranakay tahio  
Ho vanona tokoa:  
Ireo no solofo,  
Dimby rahatrizay.  
Mba ho tena mahatoky,  
Feno fahendrena koa,  
Dia ho tany sambatra  
Ilay Madagasikaranay.

### **735 - Arovy, Ry Tsitoha**

1. Arovy, Ry Tsitoha,  
Ny Tanindrazanay,  
Vimbino avokoa  
Izay mitondra anay;  
Ity Nosy ity tahio,  
Mba handry fahizay;  
Tantano sy ampio,  
Handroso izahay!

Fiv : Ny tsara mba tohano,  
Ry Zanaharinay,  
Ny ratsy mba sakano,  
Mba hiadanany.

2. Tahio ny mpitsara  
Nampanapahinao,  
Hahay hitondra tsara  
Izao olonao izao;  
Ny lehibe rehetra  
Vangio sy hafanao,  
Mba hanam-po miantra,  
Hatahotra Anao.  
Ny tsara mba tohano, sns...

### **736 - Mba tahionao, ry Jehovah!**

1. Mba tahionao, ry Jehovah!  
Ny tanindrazanay,  
Ho tsara sy hiova,  
Hambininao anie!  
Ho tany izay mandroso  
Sy sambatra tokoa,  
Ka hanjakan'i Jeso  
Mpamonjy Tompo soa.

2. Mba tahio ny firenena  
Izay monina eto izao,  
Handroso hihatsara,  
Hatahotra Anao,  
Handao ny fomba ratsy  
Izay manadala re;  
Hanary koa ny sampy  
Mampidi-doza è!

3. Mba tahionao ny mpitondra  
Nampanapahinao,  
Arovy isan'andro  
Mba tsy handà Anao;  
Tariho lalandava  
Hiankina Aminao;  
Omeo fahendrena  
Hanao ny sitrakao.

4. Mba tahio koa, ry Jehovah!  
Ny fiangonanao  
Handroso lalandava  
Homban'ny herinao,  
Hanerana ny tany

Itoeranay izao,  
Ka isam-bazan-tany  
Hiondrika Aminao

### **737 - Ry Ray, tahionao i Madagasikara**

1. Ry Ray, tahionao  
i Madagasikara  
Izay nohasoavinao,  
Ka voakarakara,  
Ka nandefasanao  
Ny teny masinao,  
Dia angatahanay  
:,: Ny fitahiana :,:

2. Ny fiangonanao,  
ry Rain'ny fahazavana,  
Izay natsanganao hatao  
Fahazavana  
Ka nodidianao  
Hanao ny asanao,  
Dia angatahanay  
:,: Ny fitahiana :,:

3. Ny asa maro be sy izay  
Fanaovan-tsoa  
Miorina eto izao,  
Ka sitrakao tokoa;  
Ny fanjakana koa,  
Izay natsanganao,  
Dia angatahanay  
:,: Ny fitahiana :,:

4. Ny tokatranonay,  
Ny tena sy fanahy,  
Ny fivelomanay,  
Ry Rainay Izay Mpiahy,  
Ireo rehetra ireo  
Dia iantsoana Anao.  
Ka angatahanay  
:,: Ny fitahiana :,:

### **738 - Havaozy, Tompo ô,**

1. Havaozy, Tompo ô,  
Ny endriky ny tany,  
Ny voninahitrao hatao  
Fahazavany,  
Izao aizim-pito izao  
Levoninao tokoa,  
Izao ratsy be izao  
:,: Esory avokoa :,:

2. Havaozy, Tompo ô,  
Ny endriky ny tany,  
Reseo ny rafinao,  
Ravao ny fanjakany,  
Ampanjakao tokoa  
Jesosy Zanakao,  
Izao rehetra izao  
:,: Hanao ny sitrakao :,:

3. Havaozy, Tompo ô,  
Ny endriky ny tany,  
Koa averenonao indray  
Ny hatsarany;  
Fanahy Mpanavao,  
Ny famelomanao  
Tadiavinao izao;  
:,: Vitao ny asanao :,:

4. Havaozy Tompo ô,  
Ny endriky ny tany,  
Ny olona izao maniry  
Indrindra izany.  
Henoy ny sentonay  
Miakatra Aminao,  
Ka hafainganonao  
:,: Ny fanavaozanao :,:

### **739 - Ry Jehovah Tompon'aina,**

1. Ry Jehovah Tompon'aina,  
O, tahio ny taninay!  
Mba fohazy, re, ny saina  
Sy fanahinay hahay

Mankatô sy hankalaza  
Ny Anaranao,  
Mba ho fantatray mazava  
Ny fitiavanao.

2. Iantraonao, ry Jesosy  
Hazavao ny Nosinay,  
Ka ny fon'ny Malagasy  
Diovy re ka mba ovay,  
Tsy hanompo sampy intsony  
Fa hazava re,  
Ka ho sitraky ny fony  
Ny ho masina e!

3. O, tahio ny faritany  
Mba handray ny teninao,  
Na ambony na ambany  
Mba tsarovy, iantrao!  
Ny mpitory mba iraho,  
Ka hiely anie,  
Omeo hery, hatanjaho  
Hahavita be!

4. O, Jehovah Ray Mahery,  
Sakambino izahay,  
Eny, Hianao irery  
No mba hany tokinay;  
Ka ny ratsy mba sakano  
Tsy hanimba anay,  
Fa ny tsara no tohano  
Hiadanany.

5. Ao koa ny mpanao lalàna  
Mba toroy ny marina,  
Ireo manam-pahefana  
Omeonao sain-dalina!  
Ka ny tany mba ampio  
Handry fahizay!  
O, arovy sy tahio  
Ny mpitondra anay!

6. Indreo ny isan-tokantrano  
Mba tsidiho, hafanao,

Ka ny zanakay tantano  
Sy trotroy ho olonao!  
Eny, Tompo, mandrosoa,  
Anjakao izahay  
Ka onenonao tokoa  
Izao ny Nosinay!

## 740 - He! Ny tany manontolo

1. He! Ny tany manontolo  
Mba ambinonao izao,  
Ry Jeso Mpanolokolo,  
Tena Tompo tsy mandao.  
Mba vontosy andon'aina  
Mba ho lonaka tokoa,  
Tsy ho tany karankaina  
Fa ho vokatra tokoa.

2. Mba tahio ny fanjakana  
Izay mitondra anay izao  
Ireo mpitana ny lalàna  
Mba omeo ny hevitrao.  
Ny mpifehy isan-toko,  
Ny mpikarakara izao  
Anehoy ilay vokovoko  
Mba hitondra marina ao.

3. Ny komity sy vaomiera  
Raha miady hevitra ao  
Tsy hitompo hevi-tena  
Fa handray ny sitrakao.  
Ka ny didinao hatrany  
No mba hijoroany izao  
Fa ny tetiky ny tany  
Dia ho laviny tokoa.

4. Ry Mpanjakan'ny mpanjaka,  
Miasà mahery izao  
Ireo mpitondra samihafa  
Mba toroy ny sitrakao.  
Ireo mpanjaka an-tany hafa,  
Revon-diadema koa,  
Mba sitony re hitafa

Aminao ry Tompo soa.

### 741 - Jehovah Tompo ô!

1. Jehovah Tompo ô!  
Tahio si hatsarao  
Ny taninay,  
Tahio ny namanay  
Ho tia ny teninao,  
Dia mba hazavao  
Ny nosinay.

2. Ovay ny fombanay,  
Ho foin'ny taninay  
Ny sampiny;  
Omeo fo marina  
Izao rehetra izao,  
Ka dia mba iantrao  
Ny nosinay.

3. Jehovah Tompo ô!  
Tahio ho olonao  
Ny zanakay;  
Tahio ho zanakao,  
Tahio ho marina,  
Ka dia ho taninao  
Ny nosinay.

4. Izay mpitondra anay  
Tahio ho tia Anao,  
Jehovah ô!  
Omeo sai-marina  
Hanao ny sitrakao,  
Ka ampanompoy Anao  
Ny nosinay.

### 742 - Zanahary no mahela

1. Zanahary no mahela  
Izay fe-toana iainanay,  
Ka miantra sy mamela  
Tombon'andro ho anay.

::: Nefa vitsy, :::  
No ho andronay aty.

2. Betsaka ny andro lany  
Nanaranam-po izao;  
Misy feo manontany:  
"Vita va ny asanao?"  
::: Miezaha, :::  
Avy re ny alim-be.

3. Mamindrà fa, Zanahary!  
Mamelà ny helokay;  
Tompo! Aza mba manary,  
'Ndrao ha very izahay;  
::: Mihainoa :::  
Ny mifona aminao.

4. Ry Jehovah! Manomeza  
Izay ilainay olonao;  
Mitahia, mampahereza,  
Mba ho tonga ao aminao.  
::: Ka hahazo :::  
Satro-boninahitra ao.

### 743 - Ny andronay mandala

1. Ny andronay mandala,  
Lany foana taminay;  
Ny mandrakizay nohatoninay,  
Nefa adala izahay,  
Ry Mpanota, ifony ny helokao.  
Fa Jeso tia anao.  
Mba tsy ho very mandrakizay,  
Avoty ny ainao.

2. Ny fiadanan-dratsy  
No mba manadala anay  
Hijanona foana aty izao  
Hanadino ny Rainay.  
Mba hevero fa olon-ko fatye!  
Tsy ela no ety;  
Tsarovinao fa hody tokoa;  
Antsoiny hianao.

3. Ny taninay havela,  
Mpivahiny izahay;  
Tsy maintsy hiainga hiala aty,  
Any no hodianay.  
Tsara sady mazava ny tranonao,  
Miomàna, fa hankao;  
Tazano, fa mivoha izao:  
Midira hianao.

#### **744 - He! Ny andro mora lasa**

1. He! Ny andro mora lasa,  
O, ry mpivahiny ô!  
Tsy ho ela, kely sisa,  
Dia hody hianao!  
Tsy mba fantatrao akory,  
Izay hahafatesanao:  
Koa aza mba matory,  
Sao ho very hianao.

2. Miomàna, ry sakaiza,  
Aza mba tamàna aty,  
Fa ny eto tsy mateza,  
Miaingà mba ho ary!  
Ao ny Tomponao, Jesosy,  
Hampihaingo tsara anao  
Fa ny rany no mamotsy  
Ny akanjo ho anao.

#### **745 - Henoy ry Jeso Tompo**

1. Henoy ry Jeso Tompo:  
Ny fitarainanay,  
Fa amin'alahelo  
No ipetrahanay;  
Ny fonay mba maniry  
Hitovy aminao,  
Kanefa be ny ratsy  
Misakana anay.

2. Nateraky ny nofo,  
Ka nofo izahay;

Nanompo tompo ratsy,  
Ka very hatrizay!  
Ny razanay nanota  
Ka nodimbiasanay:  
Ry Tomponay Tsitoha,  
Havaozy izahay!

3. Ny asam-pamonjena  
Natolotra Anao;  
Tsy hisy tsy ho vita  
Izay natombokao;,  
Raho resy avokoa  
Ny fahavalonao,  
Hiposaka tokoa  
Ny tena taom-baovao!

4. Ny tavanao malala,  
Ry Jeso Tomponay,  
Ho tena masoandro,  
Izay hifalianay.  
Ry nosatrohan-tsilo,  
Faingàna Hianao,  
Hanangana ny maty,  
Hitondra aim-baovao!

#### **746 - Mifalia, ry sakaiza!**

1. Mifalia, ry sakaiza!  
Fa nahazo taom-baovao,  
Zanahary no mitaiza,  
Ka isaory sy hajao.  
Mihirà sy mihobia,  
Jeso Tompo no derao,  
Miravao, mifalia,  
Velona aina hianao,

Fiv : Mifalia, ry sakaiza!  
Fa nahazo taom-baovao,  
Zanahary no mitaiza,  
Ka isaory sy hajao.

2. Izao no andro mampifaly,  
Andro lehibe anio,



Dia hira mahafaly  
No hatao ankehitrilo;  
Zanahary no mitàna,  
Mifalia hianao;  
Tonon-kira hoe: Hosana!  
No hatao aty izao.  
Mifalia, sns...

3. He, Hosana, he! Hosana,  
Ho Anao, ry Tompo ô!  
Fihirana, fiderana  
No asandratray izao;  
Dera, saotra, hery, laza,  
Ho Anao, Mpanjakanay,  
Ho Anao anie ny haja,  
Raiso ho Anao izao.  
Mifalia, sns...

#### **747 - Haleloia! Sambasamba!**

1. Haleloia! Sambasamba!  
Hitany ny taom-baovao;  
Avy izahay, Jehovah!  
Mba hifaly aminao:  
Fihirana no atao,  
Saotra vavaka  
No atolotray Anao,  
Ry Mpamelona!

Fiv : Haleloia! Sambasamba!  
Faly izahay izao;  
Haleloia! Sambasamba!  
Hitany ny taom-baovao.

2. Lasana ny andro maro,  
Be ny zavatra natao,  
Na ny mety, na ny diso,  
Samy efa fantatrao;  
Aoka anie ny tsininay  
Hovonoinao,  
Fa ny mety vitanay  
Mba haharitra:  
Haleloia, sns...

3. Ka ny taom-baovao, Jehovah!  
Aoka hanomezanao  
Fahendrena ny mpitondra,  
Hahasoa ny olonao;  
Ka ny Fiangonana  
Hamasinonao  
Mba handroso marina  
Hahalala Anao:  
Haleloia, sns...

4. Mitsingerina ny taona,  
Fohy andro izahay,  
Vetivety dia hihaona  
Aminao, ry Tomponay!  
Enga ka ho hitany  
Ao an-danitra  
Ny Sabata tsara izay  
Tsy ho tapitra:  
Haleloia, sns...

#### **748 - Havaozy Tompo ô!**

1. Havaozy Tompo ô!  
Izao rehetra izao  
Ka aoka mba ho hita ao  
Ny voninahitrao  
Ry Tompo Mpanasoana.  
Levony avokoa.  
Ho fongotra tsy hisy re  
Ny ratsy marobe.

2. Izao taona vaovao  
Diavinay izao  
Ho fanavaozan-dehibe  
Ny tenanay anie!  
Ka ny fiainanay  
Izay ratsy hatrizay;  
Ovay hatramin'ny anio  
Ho tsara sy madio.

3. Havaozy , Tompo ô!  
Ny Fiangonanao

O! akambano ho iray,  
Hiray mandrakizay.  
Ry Tompo be fitia,  
Tongava, mamangia;  
Mba tanteraho aminay  
Ny fanavaozanao.

### **749 - Ny taom-baovao dia tonga indray**

1. Ny taom-baovao dia tonga indray  
Ho fiantsoanao anay  
Mba hanolaranay Anao  
Ny tenanay voavatrao.

2. Fa maro be, ry Tomponay!  
Ny zava-tsoa nomena anay  
Tamin'izao taon-dasa izao,  
Izay isaoranay Anao.

3. Ny mafy izay manjo anay,  
Tsy tonga foana aminay,  
Fa mba ho fitahiana  
Izay miankina aminao.

4. Ka enga anie ny otanay,  
Izay mitambesatra aminay,  
No hibe-bahanay izao,  
Hanaovanay ny sitrakao.

5. Ny taom-baovao diavinay,  
Ny taona teo tafitanay,  
Ka dia ny fitarihanao  
No mba irinay aminao.

### **750 - Dera, laza, ry Mpanjaka**

1. Dera, laza, ry Mpanjaka!  
No atolotray Anao,  
Noho Hiana nitahy  
Tratranay ny taom-baovao.

2. Andro maro, izay no lasa,  
Be ny soa hitanay;  
Fitahia-mahagaga  
Azo taminao, ry Ray!

3. Marobe ny ratsy vita,  
Lehibe ny helokay,  
Ka tsy mendrika hiantso  
Ny Anaranao izahay.

4. Miantrà, ry Zanahary!  
Mamelà ny helokay,  
Ka sasao ny ran'i Jeso,  
Mba hadio izahay.

5. Aoka re ny andro sisa  
Hanompoanay Anao;  
Hatanjaho, ry Jehovah!  
Izahay mpanomponao.

### **751 - He, vaovao ny taona**

1. He, vaovao ny taona,  
Ry Jesosinay,  
Ka te-hihaona  
Aminao izahay.:.

2. Hiana mitahy  
Ny mpanomponao,  
Koa tsy manahy  
Izay tarihinao.:.

3. Ary izaho koa  
Mba tantanonao,  
Dia hahita soa  
Ao an-danitrao!.:.

### **752 - O, ry Jesosy, ny Anaranao**

1. O, ry Jesosy, ny Anaranao,  
Manatsika ahy izao hanatona,  
Hanolotra ny foko ho Anao,  
Mpamonjy tia sy Mpamelona.

2. Manatona aho, ka miondrika  
Hanoroka ny tongo-masinao  
Izaho olona tsy mendrika,  
Ka mba havaozy,  
Tompo, ho Anao!

3. Antsoiko isan'andro Hianao,  
Ry toky tsara mahafatra-po,  
Ka amin'ny Anara-masinao  
No anankinako izay hanjo.

4. Raha io no entiko mangataka  
Hisokatra amiko ny lanitra,  
Ka dia ho azoko malalaka  
Ny zava-tsoa izay maharitra,

5. Mamirifiry izao tontolo izao  
Tsy misy tena fitsaharana;  
Fa fiereko ny Anaranao,  
Ka ahitako fiadanana.

6. O, ry Anaran'i Jesusiko,  
Ry paradisa aty an-tany ô  
Ry voninkazo mampifaly fo,  
Ry tohan'aina ao an-dalako

7. Iriko andro aman'alina  
Ny hanana Anao ho ao an)  
Ho Tokiko raha mbola vel,,i  
Sy amin'ny hahafatesako.

### **753 - Tiako ny hiaraka Aminao**

Fiv : Tiako ny hiaraka Aminao Jesoa  
N?aiza n?aiza hitondranao ahy  
Tiako ny hiaraka Aminao Jesoa  
Fa Hianao no miantso ahy.

1. Hiaraka Aminao aho, Ô ry Jeso  
Tompoko  
Tsy manana olon-kafa aho,  
Fa Hianao no fiainako  
Hanara dia Anao, ?zay no faniriako

Hifikitra Aminao aho, Jesoa !  
Tiako ny hiaraka, sns...

2. Hiaraka Amina aho,  
ô ry Jesoa Tompoko  
Hitory teny soa amin'ireo havako  
Hanara dia Anao : ?zay no faniriako  
Hanohy ny asanao aho, Jesoa !  
Tiako ny hiaraka, sns...

3. Hiaraka Aminao aho, ry Jeso  
Tompoko,  
Ho zary famonjena anie ny fahoriako  
Hanara dia Anao, ?zay no faniriako  
Hifantsika Aminao aho, Jesoa !  
Tiako ny hiaraka, sns...

4. Hiaraka Aminao aho, ry Jeso  
Tompoko,  
Hibanjina ny Ray, Tompo  
Andriamanitra.  
Hanara-dia Anao, ?zay no faniriako.  
?Zay misy Anao, no hisy ahy Jesoa.  
Tiako ny hiaraka, sns...

### **754 - Mitsangàna, mandehana**

1. Mitsangàna, mandehana,  
Ry zatovo be laolao!  
Manatôna ny Mpamonjy,  
Avelao ny sitrapo.

2. He, tsarovy fa mahantra  
Sady ory hianao,  
Ka hatàny ny Mpamonjy,  
Dieny mbola hitanao.

3. Mandehana, mianara,  
Mba ho hendry hianao;  
Jeso Tompo no miandry  
Hampianatra anao.

4. Ry zatovo! Mandehana,  
Mba vitao ny asanao;

Mahereza, aza osa,  
Ny Mahery homba anao.

### **755 - O! ry tanora, mba tsarovy**

1. O! ry tanora, mba tsarovy  
Ilay Tompo soa maty noho ny helokao;  
Izy miantso anao moramora,  
Vohay ny fonao hidirany izao.  
Ny saina sy ny safidy nomeny,  
Ka mba fidio ny ho mpanaraka  
An'i Jesosy, Mpanjaka Tsitoha,  
Ny fonao atolory hanjakany ao.

2. O! ry tanora, miambena,  
Fa ny devoly dia mpamitaka mahay,  
Maro, ny fandriny, ka mitandrema  
Tsy ho tra-nenina re mandrakizay.  
Koa ekeo anatrehan'ny Tompo.  
Handao ny ratsin'izao tontolo izao.  
Raha Jeso no iankinanao mafy,  
Izy hiaro mba tsy hivadihanao.

3. O! ry tanora, mivavaha,  
Fa Jeso Tompo dia Mpihaino vavaka,  
Azy irery ny hery rehetra,  
Dia matokia mba ho afa-tahotra;  
Ka raha ory sy mila ho kivy,  
Dia andrandraonao Ilay Tompo be fitia;  
Ny fitarainanao dia hohenoiny  
Ary ny fonao dia hampiadaniny.

4. O! ry Jesosy mba ampio  
Izaho mpianatrao mba ho madio fo  
Tantano aho, vimbino, ry Jeso.  
Fa sarotra ny lâlana alehako;  
Iriko ny ho mpandresy ny ratsy,  
Iriko hahatanteraka ny soa;  
Omeo hery sy tanjaka aho,  
Efao, ny asa tsara ao anatiko.

### **756 - Avia, ry sakaiza ô!**

1. Avia, ry sakaiza ô!

Fa antsoin'ny Mpanjaka izao!  
Handray ny fiadiana  
Ho entina hanafika.

Fiv : Velona ny baikonao,  
Andrandrainay Hianao,  
Ka arahinay tokoa,  
Ry Mpandresy ao Ziona!

2. Ny sabatra atolony  
Dia ny teny marina,  
Ampinga fiarovana  
Mahery ny finoana.  
Velona ny baikonao, sns...

3. Ny vatsy izay atolony  
Dia ny ra sy ny tenany  
Ho herintsika olony,  
Izay miaramilany.  
Velona ny baikonao, sns...

4. Jesosy ô, arahinay  
Ny fiantsoanao anay,  
Ka manampia ny olonao,  
Hiady sy handresy izao.  
Velona ny baikonao, sns...

### **757 - Tsarovy, ry sakaiza**

1. Tsarovy, ry sakaiza,  
Ny Ray an-danitra e,  
Fa Izy no nitaiza  
Sy nahalehibe:  
Fa raha mbola zaza  
Nampitomboiny,  
Ka na ho antitra aza  
Tsy mba foiny.  
Ny saina sy safidy  
Nomeny ho anao,  
Ka tiany hifidy  
Ny tsara hianao.

2. Tsarovy, ry tanora,  
Jesosy, avotrafo,

Mahay mitondra mora,  
Mitandrina anao,  
Miaraka mambeta  
Ny fahoriana:  
Ka dia mahareta  
Ny hatrotrahana,  
Fa Izy no miaro  
Izay mpianany  
Ka dia mba fantaro  
Ny fitiavany!

3. Tsarovy, ry zatovo,  
Ny Mpanamasina,  
Fa Izy no manovo  
Ny rano velona,  
Ka dia mba mampandro  
Ny ta-hadio fo;  
Lazainy isan'andro  
Ny marina sy to,  
'Ka ny masirasira  
Esoriny aminao;  
Izay maniratsira  
No halavironao.

4. Tohero, ry zatovo,  
Izay mamitaka;  
Satana ta-hamovo,  
Ny tsy miambina:  
Ny nofo mitsikilo  
Ny voninahitrao;  
Mamono ny fanilo  
Izao tontolo izao.  
Ka raiso ny ampinga  
Alao ny sabatra,  
Izany mahakinga  
Ny te-ho sambatra.

### **758 - Tsarovy e! rankizy**

1. Tsarovy e! rankizy,  
Ilay Mpanao anao!  
Ka tadiavo Izy!  
Dieny hitanao;  
Dieny mbola kely

Tsarovy rahateo,  
Ka aza manadino  
Ilay Mpanao anao.

2. Tsarovy, ry zatovo,  
Ilay Mpanao anao!  
Ilaozy ny mpanota,  
Fandrao manimba anao,  
Tsarovy ny Jehovah  
Namorona anao,  
Mampanantena lova  
Sy nahatoy izao.

3. Tsarovy, ry sakaiza,  
Jehovah Tomponao!  
Fa Izy no mitaiza  
Sy manasoa anao;  
Koa aza manadino  
Ilay Mpanao anao,  
Ny teniny araho,  
Fa Izy no Rainao.

### **759 - Ry Sakaizan'ny tanora!**

1. Ry Sakaizan'ny tanora!  
Zoky be fitia,  
Sakambino moramora,  
Izahay mpania.

Fiv : Tompo ô! Arovy  
Ny madinikao,  
Aza afoy fa mba tsarovy,  
Tano mafy ho Anao,  
Eny, aza afoy fa mba tsarovy,  
Tano mafy ho Anao.

2. Ry Sakaizan'ny tanora!  
Tsinjonao ary,  
Izany ady tsy mba mora  
Hitana ety.  
Tompo ô! sns...

3. Ry Sakaizan'ny tanora!  
Tanonao izahay;

He! Fa be ny mpanakora  
Raha lavo indray.  
Tompo ô! sns...

4. Ry Sakaizan'ny tanora!  
Eny, sitrakay,  
Isan'andro, isan'ora  
Ho Anao izahay.  
Tompo ô! sns...

#### **760 - Aza mba manadino ny ray sy reninao**

1. Aza mba manadino ny ray sy reninao;  
Fa izy no nitaiza sy nanasoa anao;  
Ka no aiza na aiza aleha an-tany lavitra,  
Aza mba manadino ny ray sy reninao;  
Tsara izay! Tsara izay!  
Eny, tsy ho hadinonay  
Ny ray sy reninay.

2. Aza mba manadino ny tanindrazanao,  
Tsarovy ny tanàna izay nahabe anao;  
Fadio izay tsy mety fanaony fahizay,  
Aza mba manadino  
Ny tanindrazanao:  
Tsara izay! Tsara izay!  
Eny, tsy ho hadinonay  
Ny tanindrazanay.

3. Aza mba manadino ireo mpitondra  
anao,  
Araho ny lalàna mba hiadananao:  
Ka na aiza na aiza aleha an-tany lavitra,  
Aza mba manadino  
Ireo mpitondra anao:  
Tsara izay! Tsara izay!  
Eny, tsy ho hadinonay  
Izay mpitondra anay.

4. Aza mba manadino ny fivavahanao,  
Ataovy isan'andro mba hamonjena  
anao;

Mpitondra, ray sy reny ny tany, tena  
koa,  
Aza mba manadino ny fivavahanao:  
Tsara izay! Tsara izay!  
Eny, tsy ho hadinonay  
Ny fivavahanay.

#### **761 - Ry Jeso, Zoky be fitia**

1. Ry Jeso, Zoky be fitia!  
Avia, mitantana  
Fandrao izahay maniasia  
Avilin'i Satana

Fiv : Ry Jeso ô! Tahio izahay,  
Fa mbola kely saina  
He! Tsy mba hendry, tsy mahay,  
Ka mora ambakaina.

2. Maniry izahay, Jeso!  
Ho zandry izay manoa,  
Ka dia ampaherezona  
Ho tia Anao tokoa.  
Ry Jeso ô! Tahio izahay, sns...

3. Indreto izahay, Jeso!  
Tariho hahalala  
Hanaraka ny sitrakao  
Izay zokinay malala.  
Ry Jeso ô! Tahio izahay, sns...

#### **762 - Modia, modia**

1. Modia, modia,  
Fandrao very tokoa,  
Fa ny efitra be  
Nodiavina izao;  
Ry zanako ô!  
Modia izao.

2. Modia, modia,  
Fa miandry ny Ray  
Hampandroso anao,  
Sady hanome soa:

Ry zanako ô!  
Modia izao.

3. Modia, modia,  
Fa nanavotra anao  
Jeso Ilay be fitia,  
Izay nisolo anao:  
Ry zanako ô!  
Modia izao.

4. Modia, modia,  
Ka ilaozy izao  
Izay ratsy natao,  
Nahameloka anao;  
Ry zanako ô!  
Modia izao.

5. Modia, modia,  
Hovantaninao ao  
Ny trano n'ny Ray  
Sy ny lamba madio  
Ry zanako ô!  
Modia izao.

### **763 - Tanora ô! Ny Nosindrazanao**

1. Tanora ô!  
Ny Nosindrazanao  
Miandry izao,  
Manasa anao,  
Ingao anio  
Ilay fanevanao,  
O! tafia ny herinao.

Fiv : O! mifohaza izao  
Tahio ny herinao,  
Injao, ny Nosinao,  
Manantena Anao.  
Jereo ny namanao  
Taninin-doza izao  
O! vonjeo fa mitoreo.

2. Avia, jereo  
Ny Fiangonanao;

O! mba vonjeo  
Fa mila anao.  
Tanora soa  
No mba ilaina koa  
O! avia Hiara-dia.  
O! mifohaza, sns...

3. Omeo anio  
Ny herinao izao,  
Ka dia falio  
Ireo tapakao.  
Ireo didy soa  
Sy baikon'ny  
Tsitoha Tanteraho  
Sy hajao.  
O! mifohaza, sns...

### **764 - Tsy mangataka aho Tompo**

1. Tsy mangataka aho Tompo,  
Zava-py, harena, zo,  
Fa ny tena mba iriko  
Dia izao: ny fo madio.

Fiv : Fo madio izay akany  
Feno eritreri-tsoa  
Fo madio haren-tsy lany  
Sarobidy avokoa.

2. Indrisy, fa ny soan'ny tany  
Manodòka, mora lò;  
Ny haren-tsy mety lany  
Dia izao: ny fo madio.  
Fo madio, sns...

3. Na maraina na hariva,  
Izao, no angatahiko:  
Mba ho ahy ilay soa indrindra,  
Dia izao: ny fo madio.  
Fo madio, sns...

### **765 - Henoy ny antson'ny Tompo**

1. Henoy ny antson'ny Tompo:



Iza no ho irakay?  
Vonon-kandeha sy hanompo  
Hiasa an-tanihay?  
Adidy sarotr'efaina  
Asa mangetana re  
Mety handritra ny aina  
Iza no vonona e!

2. Tsy didy miendrika baiko  
Nefa mahery tokoa;  
Nanindry mafy ny saiko  
Ny antsonao, Tompo soa.  
Satriko lavina, anefa  
Manery ahy hanoa,  
Any am-po no miantefa  
Ny ako, onjany koa.

3. Inty, ry Tompo malala  
Izaho ho irakao,  
Nofo ka misalasala  
Raha toa tsy tohananao.  
Ny foko omeo fahendrena  
Hanao ny sitrakao,  
Ny saiko mora mivena  
Fenoy ny hasoavanao.

4. Vonona ka hamasino  
Hanefa ny irakao,  
Eny, ry Tompo, vimbino  
Handia ny làlanao.  
Borotra nefa hataoko  
Ny osa atolotrao,  
Ny sitrapo dia hafaiko  
Tohano ny herinao.

## **766 - Jeso Mpanjaka Malaza tokoa**

1. Jeso Mpanjaka Malaza tokoa  
Nefa Sakaizan'ny ankizy koa  
Mamin'ny foko ny fitiavanao,  
Sintàny e! ny foko ho tia anao.

Fiv : Jeso malala ô! Tompo be fitia  
Tano ny foko tsy haniaisia

Ho zaza hendry hahay hanompo  
Ho tia Anao anie, ry Tompo ô!

2. Mamin'ny foko hotantananao,  
Tiako Jeso, hiaraka Aminao  
Ny foko e! arovy ho madio,  
Ny faniriako, Tompo ô, valio.  
Jeso malala ô! sns...

3. Ny hazazako, ry Tompo, tahio,  
Enga ho zaza tia ny madio  
Ho zaza hendry, zaza mpankatà,  
Anao Mpanjaka, Tompo manan-jo,  
Jeso malala ô! sns....

## **767 - Ry Jeso, Zaza marina ô**

1. Ry Jeso, Zaza marina ô!  
Izay tonga zaza toa anay;  
Nafoinao ny lapanao,  
Hitondra vonjy ho anay,  
Ry Jeso, Zaza masina ô!

2. Ry Jeso, Zaza masina ô!  
Nanetry tena Hianao;  
Nilaozanao ny lanitrao  
Noho ny fitiavanao,  
Ry Jeso, Zaza masina ô!

3. Ry Jeso, Zaza marina ô!  
Hianao no fihavanana;  
Izahay izay nandà ny Ray  
Tadiavinao ho Azy indray,  
Ry Jeso, Zaza masina ô!

4. Ry Jeso, Zaza marina ô!  
Hihira ho Anao izahay.  
Hianao nanondrotra anay;  
Ny lapan-dRay ho azonay,  
Ry Jeso, Zaza marina ô!

## **768 - Endrey! Endrey! Tompo ô!**

1. Endrey! Endrey! Tompo ô!  
He! Ny hasoavanao,  
Fa tsy tapaka hatrany  
Izany fitahiana,  
Notantananao, ry Tompo  
ltony ondrikelinao.

2. Endrey! Endrey! Tompo ô!  
He ny fitiavanao:  
Efa elabe tokoa  
No mba niheveranao  
Izany zaza malagasy  
Izay irinao mba ho soa.

3. Anio zahay, Tompo ô!  
Mankasitraka Anao  
Fa ny sandrinao, mahery  
No niaro toy izao  
Tratranay mandrakariva  
Ny androm-pahasoavanao!

4. Tahio tokoa, Jeso ô!  
Madagasikaranay  
Mba handroso ka ho tonga  
Madagasikaranao,  
Izany re no faniriana:  
Ho tanteraka anie!

### **769 - Misy toerana voafidy**

1. Misy toerana voafidy,  
Manandaza lehibe  
Dia saha sarobidy,  
Tena mahavokatra e!  
Saha feno fitahiana  
Misy vokatsoa ery.  
Ao no mendrika niriana  
Saha masina izy ity.

2. Ny sekoly Alahady  
Io no sahanao ry Ray  
Ny baiboly no angady

Hanasoavanao anay;  
Mahavatra ny Mpamboatra,  
Ka mirobona tokoa;  
Voakarakara loatra,  
Ka mitombo sy mamoa.

3. Midadasika ny tany  
Nefa karankaina koa!  
Fa ny sahanao ihany  
No tsy manam-paharoa.  
Misy rano tsy mba ritra  
Dia ny Teny Masinao;  
Izay torina eran-tany  
Mikoriana lava izao.

4. Ny ankizy sesehena  
No mivory eto izao;  
Ireo no hazo ambolena  
Ao anaty sahanao.  
Raha mirona mba tohana  
Raha lavo, ajoroy,  
Zaza osa, ka tantano  
Mbola kely ka toroy!

### **770 - Hajain'ny saiko, fototry ny aiko**

1. Hajain'ny saiko,  
Fototry ny aiko  
Itsaohan'ny fanahiko,  
Tokane iriko,  
Malalatiako,  
Hianao Jeso Mpamonjiko!

2. Mety malazo  
Ny voninkazo,  
Ny ahi-maitso koa re!  
Fa misy lova  
Tsy mba miova:  
Jesosy Perla soa e!

3. Ao lalandava  
Ny andro mazava,  
Ny kintana, ny volana;  
Jesosy irery

Tompon'ny hery  
Tsy azo ihoarana.

4. He, igagàna  
Ny hatanorana,  
Fa na mahafinaritra,  
Mety mihena  
Ny herin-tena;  
Jesosy no maharitra.

5. Tsy misy fetra  
Zavatra rehetra  
Hianao Jesosy,  
Tokiko, akaiky ahy,  
Zoky Mpiahy,  
Ny tsara indrindra amiko.

6. Raha ho lasa,  
Fa vira ny asa,  
Tohano aho, Jeso ô!  
Ampio aho,  
Sy atanjaho,  
Ho sambatra eo an-tratranao.

## 771 - Tsinjovinao ny vorona

1. Tsinjovinao ny vorona,  
Fa tsy mamafy na mijinja,  
Nefa ao Ilay Mpamelona  
Miahy sy mikajakaja.  
Jereo ny vonikazo soa  
Fa tsy miasa na mamoly.  
Ireo ahin'ny Tompo koa  
Ka velona ao an-tanimboly.

2. Isika izay malalany  
No dia andrian'ny fony indrindra,  
Ka mifalia, ry zanany!  
Ny Zanahary no mpitondra  
Ry Tompo, Ray malalanayl  
Hatoky tsy hanahy intsony  
Ny tena sy fanahinay,  
Fa manana ny Ray ambony

## 772 - Manatòna, manatòna

1. Manatòna, manatòna  
An'i Jeso izao, izao;  
Manatòna an'i Jeso izao.

Vakio Jao:3.16

2. Mba minoa, mba minoa  
An'i Jeso izao, izao  
Mba minoa an'i Jeso izao.

Vakio Heb:7.25

3. Mahavonjy Jeso Tompo,  
Mahavonjy izao, izao  
Mahavonjy Jeso Tompo izao.

Vakio Jak:5.11

4. Be fiantra, be fiantra  
Jeso Tompo izao, izao  
Be fiantra Jeso Tompo izao.

Vakio Jao:6.37

5. Tsy hanary Jeso Tompo,  
Tsy hanary anao, anao  
Jeso Tompo tsy hanary anao.

Vakio Mar:10.47

6. Miantsoa, miantsoa  
An'i Jeso izao, izao  
Miantsoa an'i Jeso izao.

Vakio Mar:10.5

7. Fa hamaly Jeso Tompo,  
Fa hamaly anao, anao  
Fa hamaly Jeso Tompo izao.

Vakio I Jao:1.7

8. Fo madio, fo madio,  
No homeny anao, anao  
Fo madio no homeny anao.

Vakio Apok:3.1

9. Lamba fotsy, lamba fotsy  
No hatafy anao, anao  
Lamba fotsy no hatafy anao.

### **773 - Hianao, ry Jehovah, no Rainay tokoa**

1. Hianao, ry Jehovah, no Rainay tokoa,  
Ka manatona Anao izahay,  
Ary Jeso no Hava-malalanay koa  
Dia matoky Anao, ny fonay.  
Mivoria, ry ondry madinika ô!  
Mba ho ao, am-pisoko anio.  
Mihainoa ny feon'ny Mpiandry izao,  
O! faingàna, modia hianao.

2. Eny, mamy tokoa ny mihaino Anao,  
Ry Mpamonjy Mpanavotra anay!  
Fa Sakaiza malala tokoa Hianao,  
Te-hihaino Anao izahay.  
O! andeha, rankizy madinika e!  
Fa miantso Jesosy ery.  
Mahafaly antsika ny teniny hoe:  
"Avelao, izy mba hankaty."

3. O! ry Tompo tsy toha! Tsinjovy izahay,  
Fa masiaka ny lion-dozabe,  
Ka manenjika mba hahafaty anay  
Sy mihaza ny ain-dehibe.  
Mitsangàna, ry zaza madinika ô!  
Mandosira ny loza ety,  
Manatàna an'i Jeso Mpamonjy izao,  
Ka modia ho an-danitra ary.

### **774 - Fony Jeso nivahiny**

1. Fony Jeso nivahiny,

Nisy zazakely koa  
Tonga tao, ka notahiny  
Sy noraisiny tokoa:

Fiv : He, rankizy! He, rankizy!  
Ny fitiavan-dehibe.::;

2. Manatona izao, rankizy!  
An'i Jeso Tompo soa,  
Fa mandray ny zaza Izy  
Ka mitahy azy koa:  
He, rankizy! sns...

3. Maro be ny zaza faly  
Ao an-dapan-dRainy ao,  
Afaka ota, afa-jaly,  
Sambatra izay tonga ao;  
He, rankizy! sns...

4. Mihobia izao, rankizy!  
Fa isika koa hankao;  
Eny, mifalia, fa Izy  
Ho Sakaizantsika ao:  
He, rankizy! sns...

### **775 - Ry Jesosy Tomponay, mamindrà fo aminay**

1. Ry Jesosy Tomponay!  
Mamindrà fo aminay;  
Be ny hasoavanao,  
Be ny fitiavanao:

Fiv : Zazakely izahay,  
Mamindrà fo aminay.

2. Fony teto aminay  
Hianao Sakaizanay,  
Tia zaza Hianao,  
Zaza notrotroinao  
Zazakely, sns...

3. Masina sy marina

Hianao, ry Tomponay!  
Hamasino izahay;  
Mba ho zanakao tokoa;  
Zazakely, sns...

4. Be ny fahavalonay,  
O! Arovy izahay;  
Manomeza fo madio,  
Fo miankina aminao;  
Zazakely, sns...

5. Ary raha tapitra  
Ny iainanay aty,  
Ento ny fanahinay  
Honina ao an-danitrao;  
Zazakely, sns...

### **776 - Mba ekeo, ry Jeso Tompo izahay madinikao**

1. Mba ekeo, ry Jeso Tompo,  
Izahay madinikao  
Fa maniry te hanompo  
Sy hanao ny sitrakao;  
Tsy mba zaza no terena  
Na nomena zava-tsoa  
Fa minia manolo-tena  
Ho Anao tokoa tokoa.

2. Tsy ny manan-kery ihany,  
Na ny lalin-tsaina koa,  
No mahazo miandàny  
Aminao, Mpamonjy soa;  
Fa ny mbola zaza osa,  
Ka malemy toa anay,  
Izay mba te-hidodododo  
Homba Anao, Mpanjakanay

3. Maminay ny fanompoana  
Izay natolotrao anay,  
Ka hataonay sasa-poana  
Izay mamily dia anay.  
Fa ny hany mba ilaina,

Dia ny fanohananao;  
Mba ho azonay vitaina  
Izay rehetra sitrakao.

4. Enga anie ny faniriana,  
Izay anananay izao,  
Ka harahim-pitahiana  
Sy hotanterahinao.  
Dia ho feno fifaliana  
Ny fanahy anatinay,  
Ka tsy hisy hakiviana  
Hanan-kery aminay.

### **777 - He, zaza marobe tokoa**

1. He, zaza marobe tokoa  
Ary an-danitra,  
Mifaly amin'i Jeso,  
Finaritra avokoa:

Fiv : He, mihoby mafy izy,  
Ka midera an'i Jeso.

2. Moa nentin'iza izy ireo  
Ho ao an-danitra ao  
No miramirana endrika  
Sy faly toy izao?  
He! Mihoby, sns...

3. Jesosy Tompo no nandao  
Ny lapa fahizay  
Ka nahatonga azy ireo  
Ho aminy ary:  
He! Mihoby, sns...

4. Ny lambany novàny soa,  
Dia lamba tena vao,  
Ny fony nosasany koa,  
Ka faly izy izao:  
He! Mihoby, sns...  
Amena.

### **778 - Vory izahay izao**

1. Vory izahay izao  
Eto anatrehanao.  
Ry Jeso Tomponay!

Fiv : He! Faly ny fonay,  
Faly, faly, faly,  
He! Faly ny fonay,  
Avy mba hidera, anao.

2. Saotra tsara entinay,  
Dera koa atolotray  
Anao, ry Tompo ô!  
He! Faly, sns...

3. Zazakely izahay,  
Fohy ny fisainanay,  
Tarihona izao:  
He! Faly, sns...

4. Ela no nasianao  
Soa ny mpanomponao  
Ry Tompo be fitia!  
He! Faly, sns...

5. Ao ny ray sy reninay,  
Ary koa ny havanay  
Ataovy olonao:  
He! Faly, sns...

6. Zaza, ray sy reny koa  
Dia hihaona avokoa  
An-danitrao ary:  
He! Faly, sns...

### **779 - Jeso Kristy Tomponay, Jeso Kristy, Avotray**

1. Jeso Kristy Tomponay!  
Jeso Kristy, Avotray!  
Avy mba hidera Anao  
Izahay mpianatrao.

Fiv : :,:Mihainoa, ry Jeso Tompo  
Fa ny fonay, fa ny fonay,  
Entinay midera Anao:,:

2. Zazakely izahay,  
Zava-bitsy fantatray,  
Koa ny mahasoana anay  
Dia ankinina aminao.  
Mihainoa, sns...

3. Mamindrà fo aminay,  
Mamelà ny helokay,  
Mba hiraaisana aminao,  
Fa izay no maminao.  
Mihainoa, sns...

4. Mba tahiona izahay,  
Ary koa ny havanay  
Atsangano ho Anao,  
Fa izay no sitrakao.  
Mihainoa, sns...

### **780 - He, dera, laza, hery**

1. He, dera, laza, hery  
Anao ry Jeso ô!  
Ny zaza no hilaza  
Ny voninahitrao.  
Hianao Mpanjaka tia,  
Hianao no Tomponay,  
Izay tonga ho Mpamonjy  
Sy ho Mpisolonay.

Fiv : He, dera, laza, hery,  
Anao ry Jeso ô!  
Ny zaza no hilaza  
Ny voninahitrao.

2. Midera Anao, ry Jeso!  
Anjely maro be,  
Ka izahay an-tany  
Ta-hankalaza Anao.  
Toy izay nataon'ny zaza  
Izay tao Jerosalema,

Nitondra ny rofia  
Ho fanajana Anao.  
He, dera, sns...

3. Raha mbola tsy nijaly  
Hianao, ry Tompo ô!  
Nidera Anao ny zaza,  
Ka faly Hianao;  
Koa mbola hoderaina  
Hianao ankehitrion,  
Ry Jeso Tompo tia!  
Mandrakizay doria.  
He, dera, sns...

### **781 - Mijere ry ray sy reny!**

1. Mijere ry ray sy reny!  
Ireto sombin'ainareo Aoka tsy  
hirenireny,  
Tano toy ny ainareo. Aza avela ho  
adala,  
Ray sy reny ô! jereo; Aza mahafoy  
malala,  
Fa tezao ho anareo.

Fiv : Indro ô! Indro ô!  
Indro ny zanakareo, jereo, jeso ô! Jeso ô!  
Indro ny zanakay mba vonjeo

2. Ray sy reny! Mananàra,  
Aza mampanaram-po; Manomeza teny  
tsara,  
Fa ny zaza hankatà:  
Aza avela mba hanompa,  
Aoka hotezainareo; Mampahory raha  
manota,  
Aoka tsy hafoinareo.  
Indro ô! sns...

### **782 - Lazao, lazao, rankizy**

1. "Lazao, lazao, rankizy!  
Izay nandaozan'i jeso

Ny fanjakany mba honina tety".  
"Ry mpampianatray ô!  
Hamonjy sy handio  
Antsika olom-bery  
No nihaviany".

Fiv : Mifalia izao,,:  
Misy avotra sy vonjy  
Ho antsika aty

2. "Rankizy ô, rankizy!  
Mpitrosa hianao,  
Ka inona no omenao  
Hanefa trosanao?"  
"Ry mpampianatray ô!  
Ny saina amam-po  
Homenay mba ho Azy  
Raha velona izahay".  
Mifalia izao, sns...

3. "Rankizy ô, rankizy!  
Hamonjy sy handray  
Anao ve Jeso Tompo  
Raha mino hianao?"  
"Ry mpampianatray ô!  
Matoky izahay  
Fa efa maty Izy  
Ho avotray to ko a  
Mifalia izao, sns...

4. "Rankizy ô, angataho  
Ny indrafony izao.  
Ry Jeso ô, Mpamonjy!  
Mba iantrao izahay  
Ry Tompo ô! Ry Tompo!  
Henoy, henoy izahay,  
Na kely na vaventy,  
Izay mitaraina izao:"  
Mifalia izao, sns...

### **783 - He maharavoravo!**

1. He maharavoravo!  
Miantso zaza e



Ny Andriamanitra avo,  
Mpanjaka lehibe:

Fiv : Ka andeha hanatona Azy,  
Fa hot' ny Tomponao:  
"Mba avelao ny zaza  
Hanatona Ahy izao".

2.Isika mbola zaza,  
Kanefa tian'ny Ray,  
Na dia tsy hendry aza,  
Na dia tsy mba mahay?  
Ka andeha, sns...

3.Ny tahotra esory,  
Ny henatra ario,  
Tsy laviny akory,  
Ka manatàna anio:  
Ka andeha, sns...

4. Manetry tena Izy  
Ka saotra no atao;  
Isika mbola ankizy  
Matoky Azy izao.  
Ka andeha, sns...

5.He, maharavoravo!  
He, mahafaly fo!  
Fa zanaky ny Avo  
Isika aty anio:  
Ka andeha, sns...

#### **784 - Jeso be fitia!**

1. Jeso be fitia!  
Zaza izahay,  
Avy mitaraina  
Mihainoa anay.

2. Bodo sy adala,  
Indreo ny zanakao-,  
jeso ô, malala!  
Aza lavinao.

3. Mpiandry ondry mora!  
Mba tarihonao;  
Tano tsy hania  
Ny ondrikelinao.

4.Aza avela hitady  
Laza aman-jo!  
Fa Hianao irery  
No mahafa-po.

5.Tianao ny zaza,  
jeso! fantatray,  
Ka manolo-tena  
Ho Anao izahay.

6.jeso be fitia  
Zaza izahay,  
Avy mba hidera;  
Mihainoa anay.

#### **785 - Izahay ankizy te-hidera Anao**

1. Izahay ankizy  
Te-hidera Anao,  
Ry Jeso Mpamonjy!  
Ka henoy izao.

2. Zanaky ny Avo,  
Jeso Tomponay,  
Faly sady ravo  
Raha hatoninay.

3. Te-hifalifaly  
Izahay izao;  
Hira mifamaly,  
Tianay hatao.

4. Te-hiravoravo  
Miaraka aminao  
Nefa mavomavo  
Ka antsoy izao.

5.Te-hisoka-bava  
Hankalaza Anao;

Hira lalandava  
Satrinay hatao.

6.Sambatra ny zaza!  
Izay t rot ro i nao;  
Na kamboty aza,  
Tonga zanakao.

### **786 - Ny teninao Jehovah Izay ianaranay**

1. Ny teninao, Jehovah!  
Izay ianaranay,  
Dia tsara, tsy miova,  
Ka ifalianay  
He! Tena mananjara,  
Izahay ankehitrilo,  
Fa lova tsara fara,  
No azo amin'io.

2. Ireo zaza teo aloha  
Dia tsy nahita izao  
Tsy nisy hampifoha,  
Natory foana tao;  
Nahantra sady ory,  
Niferina aina koa,  
Tsy fantany akory  
Izay tena foto-tsoa.

3. Mamiratra indrindra.  
Ny masoandronay,  
Milanto sy mirindra  
Ny antom-piainanay;  
Ny teninao ihany  
No mahatonga izao,  
He! Sambatra ny tany,  
Fa mahalala Anao.

4. Irinay mba hihombo  
Izay ianaranay,  
Ampio koa mba hitombo  
Ny saina anananay;  
Ho avy zato heny

Ny voan'ny teninao,  
Hiely eran-tany  
Ny voninahitrao!

### **787 - Izay mahakolokolo no manana ny soa**

1. Izay mahakolokolo  
No manana ny soa,  
Zahao ny tanimboly,  
Izay fatratra tokoa,  
Fa he ireo voninkazo  
Mamerovero ao,  
Toa nofy izay handazo  
Andeha mba jereo.

2. Ireo izay mahavatra  
Handray ny voka-tsoa,  
Ka tena tsy hahantra,  
Tsy reraka tokoa;  
Jereo ireo taninketsa  
Mampanantena voa,  
Fa soa tsy manam-petra  
Sy hanim-be tokoa.

3. Izahay, ry ray sy reny,  
No voninkazo koa,  
Hamerovery any  
An-tokatrano soa,  
Tezao mba hihatsara.  
Ny fofomanitray,  
Mba tsy harahin-tsento  
Ny toetra anananay.

4. Izahay no toy ny ketsa  
Ho vanona tokoa,  
Hamoa tsy misy fetra,  
Sy tena hahasoa.  
Ny fiangonantsika,  
Hahita valiny,  
Ny fivavahantsika  
Handroso hery koa.

### **788 - Ry Jeso Sakaizan'ny zaza**

1. Ry Jeso Sakaizan'ny zaza,  
Kanefa Mpanjaka malaza,  
Midera ny anaranao, re,  
Izahay vory eto izao,

Fiv : :,:Ny saotra sy dera aman-daza  
No atolotray ho Anao.:,:

2. Ry Jeso malemy fanahy!  
Manatona Anao tsy manahy  
Ny zaza mivory aty izao,  
Ekeo mba ho mponina ary.  
Ny saotra sy dera, sns...

3. Fahiny Hianao tonga teto  
Nanala ny rofy sy sènto,  
Avia mitahy anay re,  
Matoky Anao, izahay.  
Ny saotra sy dera, sns...

4. Ry Jeso Mpamonjy sy Zoky!  
Izay ampy tokoa mba toky,  
Mifaly ny manana Anao izao,  
Arovy ka aza mandao.  
Ny saotra sy dera, sns...

### **789 - Zaza izahay, ry Jeso ô**

1. Zaza izahay, ry Jeso ô!  
Nefa Hianao dia tia anay  
Injany re ny feonao  
Miantso hoe: "Avia! Avia!"

Fiv : Mba raisonao re, mba raisonao re,  
Ry Tompo ô!  
Mba raisonao re, mba raisonao re,  
'Zahay izao.

2. Zaza izahay, ry Jeso ô!  
Hianao taty mba zaza koa;  
Tarihona ny hevitra  
Hanahaka ny hevitrao!  
Mba raisonao re, sns...

3. Zaza izahay, ry Jeso ô!  
Ny tenanay malemy koa;  
Kanefa, he, ny herinao  
Miaro ny fanahinay!  
Mba raisonao re, sns...

### **790 - Jeso ô, Sakaiza tsara**

1. Jeso ô, Sakaiza tsara!  
Be ny fitiavanao;  
Tsy mba misy voarara  
Tsy hihavana Aminao;  
:,: Mahagaga:,:  
Ny haben'ny antranao.

2. Jeso ô, mba manampia!  
Ny mpanompokelinao  
Tsy hivily, tsy hania,  
Fa hanara-dia Anao,  
:,: He, malemy,:,:  
Nefa be ny herinao.

3. Jeso ô, Mpamonjy mora!  
Manampia, mamonje,  
Fa isan'andro, isan'ora  
Misy fahavalo be  
:,: Izay mamely,:,:  
Ka harovanao anie!

### **791 - Tonga ny hariva**

1. Tonga ny hariva,  
Ka ny aizina  
Efa mba madiva  
Ho mpanarona.

2. Jeso ô, tsinjovy,  
Ka tahio izahay,  
Eny, mba arovy  
Handry fahizay!

3. Maniraha anjely

Mba hiambina  
Ahy zazakely  
Raha maizina.

4. Ary raha maraina  
Mba fohazy indray  
Ho madio sy tsara  
Eo imasonao.

### **792 - Misy zaza marobe**

1. Misy zaza marobe  
Faly, sambatra ao ambony,  
Ny devoly lozabe  
Tsy mamely azy intsony,  
Izy ireo dia zazakely  
Tonga naman'ny anjely.

2. Mba irionao tokoa  
Ny ho naman'izy ireny,  
Indro, misy zava-tsoa  
Ho anao raha tonga eny,  
Dia afoizo sy ario  
Izay rehetra tsy madio.

3. Tompo, raiso izahay  
Mba ho zanakao handova  
Lapa soa rahatrizay,  
Lova tsy miovaova;  
Manan-jara aoka izany  
Izay rehetra tonga any.

### **793 - Mba tsarovy re rankizy**

1. Mba tsarovy re rankizy,  
Ao am-piangonana,  
:,:Tsy hatory, fa haniry  
Mba ho zaza maotina.:,:

2. Tonga ao Jesosy Tompo,  
Ka mihaino vavaka;  
:,:Ny manatona hanompo  
Raisiny ho zanaka.:,:

3. Mba hirao ny fiderana,  
Ka ezaho mafy hoe:  
:,: "Arahaba re, hosana!  
Ry Mpanjaka lehibe!" :,:

4. Eny Tompontosika Izy,  
Tompo tsara, mora fo,  
:,:Ka hatoninao, rankizy,  
O, hatòny eram-po! :,:

5. Aza mba misalasala,  
Atolory izao ny fo,  
:,:Fa ny Tomponao malala  
Faly ta-hamindra fo.:,:

6. Ry Mpamonjiko mahery,  
Raiso aho ho Anao,  
:,:Raiso ho anao irery,  
Raiso re, ka anjakao! :,:

### **794 - Ry Jesosy tsara ao an-danitra**

1. Ry Jesosy tsara  
Ao an-danitra,  
Ikoto sy Ikala  
Saro-tahotra.

2. Koa ny anjely  
Mba irahonao  
Ho anay izay kely,  
Raha sitrakao.

3. Dia mba tantano,  
Jeso, izahay,  
Ary mba fahano  
Ny fanahinay.

4. Hianao, Mpamonjy,  
Dia tia anay;  
Izahay voavonjy  
Tia Anao indray.

## 795 - Jeso ô, Sakaizanay

1. Jeso ô, Sakaizanay  
Ao an-danitra aminao  
Misy zaza namanay  
Mifaly ravo ao.

2. O, ry tia zaza ô!  
Mba ampio izahay  
Mba hifaly Aminao  
Aty an-dasinay.

3. Raha mbola ho aty,  
Mba tantano izahay,  
Ka tariho ho ary,  
Ry Zoky tia anay.

4. Ary raha tapitra  
Ny anjaranay aty,  
Raisonao mba hiditra  
Ao aminao ary!

## 796 - Henoy izany hira vao

1. Henoy izany hira vao  
Ery an-danitra,  
Fa teraka Jesusinao  
Ka mahafinaritra.

2. Ianaronao matetika  
Ny fitiavany,  
Fa sambatra sy tretrika  
Izay sakaizany.

3. Atero zava-manitra  
Sy volamenam-po  
Ilay Mpanjakan-danitra,  
Mpanjakantsika koa.

4. Valio fitiavana  
Ilay Zoky tia anao,  
Ateronao fisaorana,  
Derao fa Tomponao

## 797 - Ry Jeso Zaza masina

1. Ry Jeso Zaza masina  
Mitsaok'Anao izahay  
Atolotray ho hasina  
Ny tenakelinay.

2. Mihoby ny fanahinay  
Mihaona aminao;  
Ry zanak'Andriamanitray,  
Tsy misy toa Anao.

3. Ny zavatra anananay  
Dia aoka ho Anao,  
Ny tena sy fanahinay  
Mba hasoavinao.

4. Ny lanitra nafoinao,  
Nilaozanao ny Ray  
Mba hanavao ny olonao  
Ho velona indray.

## 798 - Izahay zazakely manatona Anao

1. Izahay zazakely manatona Anao  
Ry Jeso izay teraka androany  
Fa tonga hanavotra anay Hianao  
Ka faly izahay noho izany

Fiv : Mitehafa tanana  
Dera no asandratra  
Mihobia, mifalia  
Fa Kristy Tompo teraka ho antsika.

2. Izahay zazakely maniry izao  
Ho tena sakaiza tokoa.  
Ka avy izahay mba hanaraka Anao,  
Ry Jeso Mpanjaka Tsitoha.  
Mitehafa, sns...

3. Izahay zazakely mangataka Anao  
Hamory ny zaza rehetra,

Fa be ny ankizy miandry Anao  
Ho Tompon'ny tany rehetra.  
Mitehafa, sns...

### **799 - Zaza sambatra tokoa**

1. Zaza sambatra tokoa,  
Ry Jesosy, izahay,  
Fa ny Tompo Zanahary  
No mamelona anay.

2. Zaza sambatra tokoa,  
Ry Jesosy, izahay,  
Hianao nijaly mafy  
Hanavotanao anay.

3. Zaza sambatra tokoa,  
Ry Jesosy, izahay,  
Ny Fanahy Mpanadio  
Manamasina anay.

4. Zaza sambatra tokoa,  
Ry Jesosy, izahay,  
Fiarovanay tsy toha  
Hianao, ry Tomponay!

### **800 - Haleloia asandratray**

1. Haleloia asandratray  
Ho Anao ry Jeso ô!  
Resinao ny rafinay  
Fa nitsangana Hianao.

2. Foana ny fasana  
Fa tsy nahatana Anao;  
Ny fahafatesana  
Dia nofolahinao.

3. Ka mihira izahay,  
Fa nandresy Hianao,  
Ka ho velona indray  
Izahay madinikao.

4. Hianao hisaoranay  
Raha hitsangana izahay  
Ka handao ny fasanay  
Mba handray ny lovanay.

5. Dera no ventesinay  
Ho Anao, ry Zokinay;  
Hoby no asandratray,  
Ry Mpanjaka maminay.

### **801 - Izaho dia zaza, malemy osa fo**

1. Izaho dia zaza  
Malemy, osa fo,  
Fa na izany aza,  
Mba ondrin'i Jeso.

2. Ary an-danitra Izy  
Mitsinjo ahy koa,  
Satria ny ankizy  
Dia tiany tokoa.

3. Anefa koa akaiky  
Jesosy mamiko,  
Fa Izy dia manaiky  
Ho eto amiko.

4. Manafa-tahotra ahy  
Ny tsorakazony,  
Manaisotra ahiahy  
Ny fitiavany.

5. Izao tsy mbola hita  
Ny endrik'Izy izay,  
Fa raha ary am-pita  
Ho tafahaona indray.

### **802 - Misy ny fonenana**

1. Misy ny fonenana  
Vita re, ho ahy,  
Tany ifaliana  
Mamin'ny fanahy;  
Ao tsy misy tahotra,

Ao ny Tompon'avotra,  
Hira mahafinaritra  
No ataon'ny any.

2. Saotra no hataoko ao,  
Faly fa nandresy;  
Hiakanjo fotsy vao,  
Haingon'ny mpandresy.  
Ny anjely masina  
Hiaraha-monina,  
Jeso Tompo marina  
Hiampofo ahy.

3. Izaho voavidinao,  
Ry Mpamonjy tsara,  
Sady namboaranao  
Lova tsara fara.  
Koa mba arovinao  
Toy ny ondrikelinao  
Izaho izay fanananao,  
Ry Mpiandry Tsara!

### **803 - Avia ry Fanahy ô, ho eto aminay**

1. Avia, ry Fanahy ô!  
Ho eto aminay  
Ny fanahinay mba fenoinao  
Ny hasoavanao.

2. Maloto ny fanahinay,  
Ka mba diovinao;  
Tsy mahomby re ny fihevitray,  
Mba amboarinao.

3. He, zaza osa izahay,  
Ka mba tantanonao,  
Be ny ratsy izay te-hitaona anay  
Ampio ny olonao.

4. O, ry Fanahy hendry ô,  
Miandry izahay,  
Manantena Anao hanadio ny fo  
Henoy ny hatakay.

### **804 - O, ry Fanahy Masina**

1. O, ry Fanahy Masina,  
Izahay ampionao  
Fa izahay madinika  
Maniry ho Anao.

2. Ny fonay dia maizina,  
Ka tsy mba fantatray  
Ny tena làla-marina;  
Tariho izahay.

3. Mba amorony fo vaovao  
Izahay mpanomponao,  
Ny ratsy mba esorinao  
Hitiavanay Anao.

4. O, ry Fanahy Masina!  
Mangataka izahay:  
Mombà anay madinika,  
Henoy ny hatakay,

### **805 - Iza rehetra izao dia mankalaza Anao**

1. Iza rehetra izao dia mankalaza  
Anao,  
Ry Ray Mahery Tomponay tokoa  
Ny zava-boahary no asan-tànanao  
Ka tsara indrindra sady soa.

2. Miondrika aminao izahay madinikao,  
Midera Anao, ry Rainay be fitia  
Ampio izahay, ary mba arovinao  
Ny fonay mba tsy haniaasia.

3. Ry Rainay be fiantra, tariho izahay  
Ho tonga zaza tia ny mazava,  
Hifaly ao an-danitra ao rahatrizay,  
Ho sambatra any lalandava.

### **806 - Avia ry zaza, avia izao**

1. Avia ry zaza, avia izao



Fa indro ny Tompo miandry anao,  
Lazao an'i Jeso ny zava-manjo  
Fa Izy onena ny ory am-po.

2. Jesosy Mpamonjy nanavotra anao,  
Ka zaza malalany koa hianao.  
Ka dia matokia tokoa eram-po,  
Fa Izy Mpanjaka mahery sy to.

3. Jesosy no tsy manadino anao,  
Tsarovy izany ka mba andrandrao  
Ny Tompo malala izay be indrafo,  
Anao re ny lova tsy mety ho lo.

4. Sasaonao ny foko, Mpanavotra ô.  
Ho tonga madio sy mendrika Anao,  
Ho sambatra aho hahita Anao,  
Mpamonjiko tsara ao an-danitra ao

### **807 - Manatona re, rankizy**

1. Manatona re, rankizy,  
Ny Mpamonjy avotrao,  
Fa henoy miantso Izy,  
Izao fotoana anio izao.  
"Zaza be faniafia,  
Miverena hianao;  
Ondry kely, malakia,  
Manaraha Ahy izaol"

2. Ny devoly andosiro,  
Ka ny ota ialao,  
Fa ny tsara no fikiro,  
Tiavo re Jesusinao;  
Miovà ka manenena  
Noho ny ota izay natao,  
Raisonao ny famonjena  
Ka hazony hatrizao.

3. Miaingà ka manompoa  
An'i jeso Tomponao,  
Tanteraho avokoa  
Ny anjara asanao;  
Halaviro re ny laina,

Miasà ka mazotoa,  
Hatanjaho re ny saina,  
Mahareta, mandrosoa.

### **808 - Eo an-tratranao Jesosy**

1. Eo an-tratranao Jesosy  
Dia mahafinaritra;  
Fa ny hafa mampahory  
Ka tsy mahasambatra.  
Raha Hianao no aro  
Afaka ny tahotro,  
Raiso ho Anao ny foko  
Ry Jesosy tia ô.

2. Mampifaly ahy koa.  
Jeso, ny fitiana;  
Zara mamiko tokoa  
Izany ampofoinao;  
Na matory na mifoha  
Dia eo an-tratranao;  
Ry Mpanonjy Tompo soa,  
Hoderaiko Hianao.

3. Izaho tena tsy tamàna,  
Raha lavitra Anao  
Fa mitebiteby lava  
Izay tsy eo ankaikinao;  
Eo an-tratranao, Jesosy,  
Tsara hitoerako,  
Eo ihany e! no misy  
Zava-tsoa mahafa-po.

### **809 - Jeso Sakaizan'ny zaza, Tompo tokoa**

1. Jeso Sakaizan'ny zaza, Tompo tokoa,  
Jeso Sakaiza malaza, Mihainoa!.

2. Zaza izahay mitaraina Aminao;  
Mbola marefo ny aina, Tanonao.

3. Jeso, Sakaiza malala, Tokinay,  
Aoka mba tsy ho adala izahay.

4. Jeso ô, ampianaro izahay.  
Jeso ! avia hiaro ny dianay

5. Zaza izahay, ka sakano tsy hania,  
Kely izahay, ka tantano, jeso tia.

6. Ary ny ray aman-dreny raisonao,  
Aoka ny fony homeny Anao.

7. Jeso, Sakaizan'ny zaza, Tompo koa !  
Jeso, Sakaiza malala! Mihainoa

### **810 - Tompo, manampia ny mpianatrao**

1. Tompo, manampia ny mpianatrao,  
Ary mitahia ny madinikao,  
Mba ho tonga zaza sitrakao izahay  
Zaza mankalaza ny Mpanavotray.

2. Maminay tokoa ny anaranao,  
Sambatra avokoa re ny havanao;  
Manana anjara any Aminao,  
Ry Mparnonjy tsara, ny madinikao.

### **811 - O, rankizy izay mivory**

1. O, rankizy izay mivory,  
Mba derao ny Tompo soa,  
Ka ny fonao atolory,  
Ny fanahy tena koa.  
::Mba venteso re ny hira,  
Ka derao ny Tomponao:::

2. O, Ry Tompo be fitia,  
Mba henoy ny zanakao;  
Fa miantso hoe, Avia!  
Mànatreha anay izao !  
::Izay hataonay re tahio  
Ho madio sy masina:::

3. Mba tolory fahendrena  
Izahay madinikao,

Ka omeo ny famonjena  
Hifikirana aminao,  
:: O, tarihonao ny dia  
Hahitana Anao, ry ray! :::

4. He ny fonay manontolo,  
Izay mangetaheta re,  
Dia atolotray daholo,  
Aza dia lavina e!  
::Mba onenonao ny fonay  
Ho Anao mandrakizay! :::

### **812 - Ry Jeso Zokinay ô**

1. Ry Jeso Zokinay ô!  
Jeso malalanay,  
Henoy ny vavakay izao;  
Fa zandrino izahay.

2. Batisa no nandio  
Anay ho zandrino,  
Ka dia mba tahio  
Hanaraka Anao,

3. Ry zokinay malala,  
Arovy izahay  
Fa be ny manadala,  
Manimba ny fonay.

4. Ry Zokinay malala,  
Trotroy ny zandrino,  
Rehefa mba hiala  
Ho any aminao.

### **813 - Tia zaza**

1. Tia zaza,  
Tia zaza,  
Ny Jesosinay!  
Lanitra nafoiny,  
Zaza notrotroiny  
Tia zaza,  
Tia zaza  
Ny Jesosinay.

2. Trano tsara,  
Tany tsara  
Namboariny,  
Trano be anjely,  
Ho anay izay kely,  
Trano tsara,  
Tany tsara  
Namboariny.

3. Voankazo,  
Voninkazo,  
Tsara fofona,  
Tsy halazo intsony  
Ao Edena ambony  
Voankazo,  
Voninkazo,  
Tsara fofona.

4. Zazakely  
Sy anjely,  
Samy sambatra;  
Hira no hirainy  
Ao an-tranon-dRainy.  
Zazakely,  
Sy anjely,  
Samy sambatra.

5. Seza tsara,  
Lamba tsara,  
Ho antsika ao;  
Hiakanjo lava  
Fotsy lalandava.  
Seza tsara,  
Lamba tsara,  
Ho antsika ao.

6. Ento mora,  
Ento mody,  
Jeso, izahay,  
Ho an-tranon-dRainao,  
Fa ao no tranonay  
Ento mora,  
Ento mody,

Jeso, izahay.

## 814 - Tsara re, ny lanitra

1. Tsara re, ny lanitra  
Sady mahafinaritra!  
Ao ny Rainay be fitia,  
Ao ny zaza tsy mania,  
::: Ao ny fifaliam-be:::

2. Ondry kely izahay,  
Ary tsy mba fantatray  
Ny hanio aty an-tany,  
Ka maniry mba ho any  
::: Aminao, ry Tomponay:::

3. Ry Mpiandry Tsara Ô!  
Aoka mba hamindra fo  
Aminay izay mbola kely  
Mba iraho ny anjely  
::: Ho mpiambina anay:::

## 815 - 'Lay ora tao Getsemane

1. 'Lay ora tao Getsemane  
Tsaroako tsara izao,  
Fa Tompo tia sy lehibe  
No ory loatra tao;

Fiv : Tsaroako 'zao Getsemane  
'Zay niaretanao,  
Tsy haiko hadinoina re,  
'Lay fahoriana tao.

2. Ny mpianatrao, malalanao  
Natry avokoa;  
Nafoin'izao, rehetra izao,  
Jesosy Tompo soa;  
Tsaroako 'zao, sns...

3. Nanjary ra ny dinitrao  
Noho ny helokay;  
Fadiranovana Hianao  
Nisolo voina anay;

Tsaroako 'zao, sns...

4. Soraty ao am-poko re,  
Ho sary velona ao,  
Ny sarin'i Getsemane  
Zay niaretanao;  
Tsaroako 'zao, sns...

### **816 - Ny lohan'ny eklesia dia Jesosy Tompony**

1. Ny lohan'ny eklesia  
Dia Jeso Tompony,  
Ny rano aman-teny  
No iorenany,  
Nitady azy Izy  
Ho ampakariny,  
Nalatsany ny rany  
Ho avo-tsoany

2. Na be ny firenena  
Izay ihaviany,  
Iray ny famonjena  
Izay inoany  
Iray ny antenaina  
Rehefa mby ary;  
Iray no mofon'aina  
Izay fihinany.

3. Na dia mba hita aza  
Ny fisarahana,  
Na dia tsy manan-daza  
Ny Fiangonana,  
Miambina ny mino,  
Ka mitaraina hoe:  
«Aza ela, ry Mpamonjy,  
Avia, mamonje!»

4. Tsy ela dia ho hita  
Ilay Mpampakatra  
Tsy ela dia ho vita  
Ny ady masina;  
Ny rafy horeseny,  
Ny loza tapitra,

Fa Izy ho tonga eny  
Am-pitsaharana.

5. Iraisany anefa  
Andriamanitra  
Sy ireo izay nahefa  
Ny ady masina.  
Ry Tompo, miarova  
Anay izay mbola aty,  
Hiraisanay handova  
Ny lanitra aminy.

### **817 - Ry Andriamanitra Rainay, mihainoa**

1. Ry Andriamanitra  
Rainay, Mihainoa  
:,: Mihainoa,:,:  
Miondrika eto anatrehanao 'zahay,  
Fa Hianao no Andriamanitray  
Ka henoy izahay!

2. Ry Jeso Kristy,  
Zanak' Andriamanitray, mamonje!.  
:,:Mamonje!,:,:  
Fa Hianao no Mpamonjy izao  
tontolo izao,  
Ary ny Ranao no nanavotanao  
Ka vonjeo izahay

3. Ry Fanahy Masina,  
Mpanavotra anay diovinao.  
:,: Diovinao! :,:  
Fa Hianao no mahay  
manadio ny fonay  
Mba ho tempoly mendrika ny  
hitoeranao,  
Diovinao izahay!

### **818 - Ry Zanakondry ô, Mpisolo ny mpanota**

Ry Zanakondry ô, Mpisolo ny mpanota!  
Mamindra fo aminayl

Ry Zanakondry ô, Mpisolo ny mpanota!  
 Mamindra fo aminay.  
 Ry Zanakondry ô, Mpisolo ny mpanota!  
 Omeo anay ny fiadananao!  
 Tompo ô, mba miantrà!  
 Mamelà re, ny helokay!  
 Niara-nanota izahay tamin-drazanay,  
 Ka tsy mba madio, fa ratsy ny toetray!  
 Ry Tompo ô, aza ataonao aminay araka  
 ny fahotanay,  
 Ka aza averina aminay ny helokay!  
 Henoy ny hatakay.  
 Ka raisonao ny fifonanay  
 Amen!

### **819 - Andriamanitra Tompo ô, Ray, Fanahy, Zanaka**

Fizarana I

1. Andriamanitra Tompo ô  
 Ray, Fanahy, Zanaka,  
 Mihainoa anay izao,  
 Ry Telo izay Iray.

2. Jeso Zanak'i Maria,  
 Naka endrik'olona  
 Tonga zaza toa anay:  
 Mihainoa, Jeso ô!

3. Notafian-dreninao  
 Lamban-jaza Hianao  
 Tao anaty vilona:  
 Mihainoa, Jeso ô!

4. Novangian'olona  
 Izay niandry ondriny  
 Tao an-tsaham-Betlehema  
 Mihainoa, Jeso ô!

5. Notezaina Hianao  
 Notrotroin'i Simeona,  
 Notompoin'i Ana koa,  
 Mihainoa, Jeso ô!

Fizarana II

6. Amin'ny avonavona  
 amin'ny fahatezerana  
 Amin'ny fialonana  
 Mamonje, ry Jeso!

7. Amin'ny hevi-tsy madio,  
 Amin'ny teny ratsy koa,  
 Amin'ny fahasarotam-po  
 Mamonje, ry Jeso

8. Hankato ny didinao  
 Hankahala heloka,  
 Mba ho zanakao tokoa,  
 Mitariha, Jeso!

9. Mba hazoto izahay,  
 Tia fivavahana,  
 Tsy ho resin'i Satana,  
 Mitariha, Jeso

Fizarana III

(Ny feon'ny Fizarana I no ihirarana  
 an'ity)

10. Noho ny nahaterahanao  
 Noho ny ranomasonao,  
 Noho ny fahorianao  
 Mamonje, ry Jeso

11. Noho ny satro-tsilona,  
 Noho ny ra nalatsakao,  
 Noho ny nitsangananao  
 Mamonje, ry Jeso !

12. Noho ilay Anaranao  
 londrehan'olona  
 Sy ny ao an-dranitra  
 Mamonje, ry Jeso

13. Noho ny herinao tsy hita  
 Noho ny voninanirrao,  
 Noho ny famindraponao  
 Mamonje, ry Jeso!

## 820 - Jeso Kristy Tomponay

1. Jeso Kristy Tomponay,  
Zanaka malalan-dRay,  
No naetry ho anay;  
Mamonje anay anie.

2. He! ny fahatsoranao  
Sy ny hadiovanao  
Tsy mpanota Hianao;  
Mamonje anay anie.

3. Hianao no marina,  
Mora fo sy masina,  
Ary tsy mialona;  
Mamonje anay anie.

4. Tsy niala sasatra,  
Tsy nandà ny sarotra,  
Fa nitondra henatra.  
Mamonje anay anie.

5. Heloka, tsy rariny;  
Hianao najaliny  
Tao an-tampon'i Kalvary;  
Mamonje anay anie.

6. Lasanao ny helokay  
Raha mibebaka izahay  
Tsy manao ny sitrakay  
Mamonje anay anie.

7. He! ny fitsangananao,  
Resy ny fahavalonao  
Tamim-boninahitrao,  
Mamonje anay anie.

8. Hianao, ry jeso ô!  
Anateranay izao  
Saotra izay anjaranao;  
Mamonje anay anie.

9. Fo, fanahy, tena koa,  
Ho anao mba hahasoa

Izay rehetra tia tokoa;  
Mamonje anay anie.

## 821 - Rainay ô, Mpamorona

1. Rainay ô, Mpamorona!  
jeso ô, Mpanavotra,  
Ary ny Mpananatra;  
Mihainoa, ry Tompo!

2. Hianao no foto-tsoa  
Sy harem-panahy koa,  
Handrosoanay tokoa;  
Mihainoa, ry Tompo

3. Be ny heloka natao,  
Be ny famindramponao,  
Mamelà anay izao;  
Mihainoa, ry Tompo

4. Malahelo izahay,  
Fa maditra hatrizay,  
Aza mba mandao anay;  
Mihainoa, ry Tompo

5. Mba diovy ny fonay,  
Hatanjaho ny sainay,  
Ahitsio ny dianay;  
Mihainoa, ry Tompo

6. Be tokoa ny indrafo  
Izay naseho ho anay,  
Tena latsaka ao am-po;  
Mihainoa, ry Tompo!

7. Eny, famonjena re,  
Hahitanay aim-be,  
No he, vitanao tety;  
Mihainoa, ry Tompo

8. Aina, hery, andro koa  
No atolotray tokoa,  
Mba hahazanay ny soa;  
Mihainoa, ry Tompo

9. Ho Anao tsy tapitra;  
Haja, dera, saotra koa,  
Ho Anao mandrakizay;  
Mihainoa, ry Tompo  
Amena.

## **822 - Nohariana mba ho tsara ny tontolo**

1. Nohariana mba ho tsara ny tontolo  
Ka ho sambatra, ho mendrika ny Ray  
Nihasin'ba, simban'ota dia nisolo  
Fanjakan'ny haratsiana mahamay,  
Nisy anefa Tompo izay nampanantena  
Mba hamerina ny soa 'zay efa very  
Kristy fiainana mizara famonjena,  
Tokana no azo antok'Izy irery.

2. Noharina mba ho iray isika mpino  
Ka hanompo Tompo tokana Tsitoha  
Ndrisy anefa, fa miki-py manadino  
Fa matory am-pisarahana tsy mifoha  
Nisy anefa, mbola misy Tompo iray  
Azo toky fa hamory ny mania  
Kristy fiainana, hanangona indray  
Ny Fiangonany hiray raha toa minia

3. Tsia, tsy nisy nohariana mba hijaly  
Tsia, tsy nisy voatokana ho faly  
Tsy hi-fandrafy sy hiady sanatria  
No namoronana ny olona, ô, tsia!  
Fa ireny vokatry ny kihatana  
Ka mamikitra, tapisaka, lovàna  
'Reo rehetr'ireo ho levona sy foana  
Raha Kristy Fiainana no ho Tomponao.

## **823 - Hoderaina tokoa Hianao, ô ry Ray**

1. Hoderaina tokoa  
Hianao, ô ry Ray  
Noho ny teny soa,  
Izay nomenao anay

Fiv : Teninao ny Baiboly  
Andriamanitra Ô!  
Teny fiainana  
Ho an'izao tontolo izao.

2. Fa ny Teny nomenao,  
Tompô ô, Ray Tsitoha,  
Manadio, manavao,  
Mampahery ny fo!  
Teninao sns...

3. Mitsangàna hanompo  
Ô! ry mino izao,  
Ka ny tenin'ny Tompo  
No torio, ambarao.  
Teninao sns...

4. Dia tariho lalandava  
Mba hiely, ry Ray,  
Teny soa hanazava  
Ity firenenay!  
Teninao sns...

## **824 - Ry Andriamanitra nahary**

1. Ry Andriamanitra nahary,  
Isaoranay ny Anaranao  
Nasehonao miharihary  
Ny herin'ny fitiavanao:

Fiv : Fa ny Fiangonanao najoro  
Ho fiorenana-pahamarinana,  
Dia vatolampy tsy hikoro  
Sy andry azo ifikirana,

2. Ny teninao, Jeso Mpandresy,  
No nifahira-dRasalama  
Tanaty memy nifanesy  
Sy fiakarana malama:  
Fa ny Fiangonanao sns...

3. Ny tranomaizim-pijaliana,  
Nampian'ny lefona mifofo,



Nanjary hiram-pihobiana  
Nandresy lahatra ny nofo:  
Fa ny Fiangonanao sns...

4. Ilay nantsoina ho maritiora,  
Fitarikandro nanazava,  
Namerovero toy ny miora,  
Nandroaka aizina hisava:  
Fa ny Fiangonanao sns...

## **825 - Raha manjavona ny andro**

1. Raha manjavona ny andro  
voasarona avokoa  
Ny tendrombohitra avo  
sy ny lohasaha koa  
Sy ny renirano tsara izay  
mangarana madio.  
Tsy hita ankehitriny  
fa manjavona anio.

Fiv : Na manjavona aza anio  
Nefa ao ambony ao  
Ny mazava lalandava  
Tsy miova na mandao :  
Matokia, ry sakaiza  
Aza kivy hianao.

2. Raha misava indray ny andro,  
dia ho hita avo-koa  
Ny tendrombohitra avo  
sy ny lohasaha koa  
Sady ao ny renirano  
ka mangarana izao,  
Ka afaka ny zavona  
nanarona azy tao:  
Na manjavona aza anio, sns...

3. Raha mbola aty an-tany  
ka vahiny izahay,  
Manjavona matetika  
tokoa ny andronay.  
Na dia ao ny masoandro aza,  
takona izy 'zao

Fa maizina ny andro,  
ka tsy fantatra fa ao:  
Na manjavona aza anio, sns...

4. Raha tapitra ny dian'ny fanahinao  
aty,  
Fatiny Ka lasan'Andriamanitra  
ho aminy ary,  
Tsy hanjavona ny andro,  
fa tsy misy rahona ao,  
Hazava ery an-danitra avokoa  
ny andronao.  
Na manjavona aza anio, sns...

## **826 - Taona tokana sarobidy**

1. Taona tokana sarobidy  
Ka isaorana Ilay Tsitoha  
Tena taona mba fitadidy  
Fa tsingerina mampifoha  
Ny hafalian'ny lohantaona  
No manenika izato lasy  
:,:Fa naharitra ka tsy foana  
Ny Baibolin'ny Malagasy:,:

2. Ny vahoakan'ny firenena  
'Njao mianoka fifaliana  
Fa ny Tenin'ny Famonjena  
No rnivimbina fitahiana  
Ka manenika ny eran-tany  
Sy manerana ny tontolo  
:,:Ary isany tamin'izany  
Ny taninay ka niova volo.:,:

3. Be ny sarotra nosetraina  
Be ny sakana izay nandrara  
Nisy aza famoizana aina  
'Zay voarakitry ny tantara.  
Nefa, tao Andriamanitra  
Ka ny Teniny tsy mba resy  
:,:No sabatra iray maranitra  
Nampahatoky sy nampandresy:,:

4. Irina indrindra ho tafatoetra

Hitondrana ny firenena,  
Ho filamatra, tarigetra  
Izany tenin'ny Famonjena:  
Ny fitiavana hahazo laka,  
Filaminana no hiseho,  
:,:Fiadanana no hanjaka,  
Ny fahantrana ho foana hatreo:,:

## **827 - Na mamely ny tafiotra lehibe**

1. Na mamely ny tafiotra lehibe  
Sy mandrivotra fatratra  
Ka efa mila hahavery saina re!  
Hozakaiko fa lahatra  
Jeso Tompo no amiko izao  
Ka ny loza resiny avokoa  
Izy no mitondra ahy mba ho ao  
Amin-dRainy handova ny soa.

Fiv : Mandrosoa hoy ny Tompo  
Fa Izaho hitondra anao  
Ka hitandrina anao  
Sy hanatitra anao  
Any Ziona fonenan'ny Ray

2. Na dia maizina ny lalako ety,  
Sady be fahavalo koa  
Kelikely foana dia ho tonga ary  
Ka ho tretrika ao tokoa.  
Jeso Tompo no misakambina  
Sy mihazona ny tanako roa,  
Sady be fitia ka te-hiambina  
Ny fanahy sy ny aiko koa.  
Mandrosoa hoy ny Tompo, sns...

3. Reko re ny alon-drano lehibe  
'Zay mamely ankehitrilo;  
Ka toa kivy ny fanahiko mandre,  
Kanjy tsara ho ahy io.  
Fa tsy tiako ny hanalavitra  
'Lay Mpanafaka ny zava-manjo,  
Raha toa ny saiko tsy finaritra,  
Ka mangovitra mafy ny fo.  
Mandrosoa hoy ny Tompo, sns...

## **Auto Draft**

### **AN 1 - Masina, Masina**

Masina, Masina  
Jehovah Tompo!  
Feno ny voninahitrao  
Izao rehetra izao,  
ry Tompo ô! Amena.

### **AN 2 - Toy ny diara**

Toy ny diara maniry ny rano an'onny,  
ny foko maniry Anao.  
Ry fanahiko! nahoana moa no  
mitanondrika hianao,  
ka mitoloko ao anatiko? Manantenà ny  
Tomponao.

### **AN 3 - Ny Tompo hajao**

Ny Tompo hajao  
noho ny fahamarinany  
sy ny fahamasinany.  
Matahora Azy re,  
ry vahoaka marobe!  
Ny voninahiny mahagaga.  
He ny heriny sy ny hatsaràny

### **AN 4 - Ary maro**

:,: Ary maro, ary maro, ary maro  
amin'izay matory ao, matory ao,  
matory ao, matory ao,  
amin'ny vovoky ny tany no hifoha, no  
hifoha, no hifoha.:,:

:,: Ary izay hendry dia hamirapiratra,  
ary izay hendry dia hamirapiratra,  
ary izay hendry dia hamirapiratra,  
toy ny famirapiratra ny lanitra.:,:

::: Ary izay mamerina ny maro,  
ary izay mamerina ny maro,  
ho amin'ny fahamrinana,  
dia ho tahaka ny kintana mandrakizay  
doria.:;

Amena.

## **AN 5 - Indro ny aron'ny mandanao**

Indro ny aron'ny mandanao,  
Ry Jerosalema! Miadàna ka mandria  
fahizay.  
Mandry tokoa ny tany izao.  
Fa Jehovah manampy anao, ka aza kivy  
fo..  
Aza mangina, fa ny faneva no  
atsangano.  
Haleloia! Amena.

## **AN 6 - Miderà an'i Jehovah**

Miderà, miderà, miderà an'i Jehovah.  
Miderà an'i Jehovah, ry firenena rehetra.  
  
::: Miderà, miderà, miderà Azy, ry olona,  
ry olona rehetra.  
Miderà Azy, ry olona rehetra.  
Miderà Azy, ry olona rehetra.  
Fa lehibe ny famindrampony amintsika,  
Fa lehibe ny famindrampony amintsika.  
Ary mandrakizay, ary mandrakizay, ary  
mandrakizay  
ny fahamarinan'i Jehovah.  
Haleloia, Haleloia, Haleloia, Haleloia,  
Haleloia!:::

## **AN 7 - Tamin'ny andro voalohany**

::: Tamin'ny andro voalohany amin'ny  
herinandro,

dia nankany amin'ny fasana izy,  
nitondra zava-manitra izay efa  
namboariny.:;

::: Ary hitany fa indro ny vato efa  
voakodia niala tamin'ny fasana.  
Dia niditra izy, nefa tsy hitany ny  
fatin'i Jesosy Tompo.  
Ary raha mbola very hevitra  
tamin'izany izy ireo,  
indreo nisy roalahy niseho taminy,  
nitafy fitafianà manelatrelatra.:;

::: Ary nony natahotra izy ka  
niankohoka,  
dia hoy izy roalahy taminy.  
Nahoana no ato amin'ny maty no  
itadiavanareo ny velona?  
Tsy ato Izy fa efa nitsangana;  
tsarovy ny teny izay nataony taminareo,  
fony lzy mbola tany Galilia hoe: :;

Ny Zanakolona tsy maintsy hatolotra  
eo an-tànan'ny mpanota ki hohomboana  
amin'ny hazo fijaliana, ary, ary,  
hitsangana,  
hitsangana amin'ny andro fahatelo.:;

## **AN 8 - Mandrakizay ny Anaranao no hoderaiiko**

Mandrakizay ny Anaranao no hoderaiiko  
eram-po, eran-tsaina.  
Hianao, ry Jehovah!  
no hoderaiiko eram-po, eran-tsaina;  
fa tsara sady miantra Jehovah,  
mahatsindry fo ka tsy maika.  
Izao asany rehetra izao dia samy tiony  
sy amindrany fo.  
Ny Anarany lehibe hoderaiiko sy  
hankalazaiko.

## **AN 9 - An'i Kristy ny fanjakana**

An'i Kristy ny fanjakana,  
Azy izao na ny hery,  
na ny fahefana,  
na ny fandresena.  
Azy koa na ny voninahitra,  
na ny fiandriananan  
na ny laza Mpanjaka mandrakizay  
Kristy Tomponay.  
Azy irery ny seza fiandrianana  
sy ny satro-boninahitra.  
Azy izao sy mandrakizay.

### **AN 10 - O! mihobia, ry vahoaka any Ziona!**

O! mihobia, ry vahoaka any Ziona!  
Fa indro, ny Masina Jehovah  
Mpanavotra,  
Mitsangan-kitahy eo afovoanareo,  
Hahatsara an'i Ziona mba ho tany  
hiadananareo.  
Sambatra ao Ziona fonenanareo.  
Endre, ny tranom-panjakana ao Ziona!  
Izahao. Hotantaraina hatramin'ny  
farany,  
samy hahare izay taranakareo.  
O! mihobia, ry vahoaka any zona!  
Fa indro, Jehovah eo afovoanareo.

### **AN 11 - O, lanitra! O, tany masina!**

O, lanitra! O, tany masina!  
Raha tapitra ny asanay,  
dia ravo aminao.  
Ny mandanao no hitanay,  
sy vavahady soa;  
ny lalam-bolamena koa no hodiavinay.  
Fonena-mahasambatra,  
tsy misy heloka.  
Ny làlana mahazo ao no mba hizorako.  
O, lanitra! O, tany masina!  
Nahoana ny ho faty re no hatahorako?  
Ny lanitra honenako mandrakizay

doria.  
O, lanitra! fonena-masina!  
O, lanitra! ny dianay havitrika ho tonga  
aminao.  
O, lanitra! ho tonga aminao.

### **AN 12 - He ny aiko tsy lalaiko**

He ny aiko  
Tsy lalaiko  
Hamonjeko ny fanahinao;  
Famonjena  
No nomena,  
Kanefa tsipahinao.

Menatre aho,  
Ry Mpamonjy!  
Mamelà ny mpanomponao!  
Fa ny tena  
Sy fanahy  
Omeko Anao izao.

### **AN 13 - Akory ny hamaroan'ny asanao**

Akory ny hamaroan'ny asanao, ry  
Jehovah ô! Fahendrena no nanaovanao  
azy rehetra. Henika ny asanao izao  
tontolo izao. Ao ny ranomasina feno  
zava-manana aina, na kely na lehibe.  
Indro ny lanitra, feno famirapiratana  
mahagaga; ary ny tany rehetra samy  
feno zavatra avokoa, ka mampiseho ny  
voninahitrao, Andriamanitra ô!

### **AN 14 - Haleloia! Iza moa ireo miakanjo fotsy lava**

Haleloia! Iza moa ireo miakanjo fotsy  
lava, ary avy taiza izy ireo? Ireo no avy  
tamim-pahoriana lehibe, ny akanjony  
nosasany sy nofotsiany tamin'ny ran'ny  
Zanakondry! Haleloia! Ary noho izany

dia mitoetra eo anoloan'ny seza  
fiandrianan'Andriamanitra izy, ka  
manompo Azy andro aman'alina eo  
amin'ny tempoly. Tsy ho noana na  
hangetaheta intsony ireo, fa ny  
zanak'ondry izay eo afovoan'ny seza  
fiandrianana no ho Mpiandry azy, ka  
hitondra azy amin'ny ranon'aina, ary  
hofafan'Andriamanitra ny ranomasony  
rehetra amin'ny masony.

### **AN 15 - Voninahitra amin'ny avo indrindra**

Voninahitra amin'ny avo indrindra ho  
an'Andriamanitra, ary fiandrianana ho  
Anao, ry Tompon'ny tompo!  
Miankohoka eo anatrehanao izahay.

::: Derao, hobio ny Anaran'i Jehovah!  
Azy anie ny dera sy ny laza ety an-tany  
ka hatrany an-danitra! Dia hamasino  
izahay, ry Tompo ô, hitoeran'ny  
voninahitrao.:::

Voninahitra amin'ny avo indrindra, ho  
an'Andriamanitra, ary fiandrianana ho  
Anao, ry Tompon'ny tompo!  
Miankohoka eo anatrehanao izahay.

### **AN 16 - Isaoranay Jehovah Tomponay**

Isaoranay Jehovah Tomponay,  
isaoranay Andriamanitray; fa be fitia  
ny Tomponay, ny Tompo tia anay,  
Mpanjaka tia, Mpamindra fo. Deraina  
Hianao. Isaoranay izao, fa be fiantra  
Hianao, Mpanjaka be fitia. Isaoranay  
ny Tomponay. Ny tany aty mandray  
fitahiana; ny lanitra ary mamoaka ny  
soa, ka misy tokoa ny vokatra tsara,  
Jehovah Tsitoha manambina anay.  
Deraina ny Anaranao Andriamanitray.

He! faly izahay izao manao ny hiranay!  
Isaoranay Andriananaharinay  
Mpanjaka be fitia.

### **AN 17 - Manopy ny masoko ho amin'ny tendrombohitra aho**

Manopy ny masoko ho amin'ny  
tendrombohitra aho. Avy aiza ny  
famondra ahy? Ny famondra ahy avy  
amin'i Jehovah, izay namorona ny  
lanitra sy ny tany. Jehovah no Mpiaro  
anao. Ny Tompo no fialofanao eo  
amin'ny ankavananao. Ny masoandro  
tsy hamely anao amin'ny atoandro na  
ny volana nony alina. Jehovah hiaro  
anao amin'ny ratsy rehetra. Hiaro ny  
fanahinao Izy na mivoaka na miditra,  
hatramin'izao ka mandrakizay; Jehovah  
hiaro anao amin'ny ratsy rehetra  
hatramin'izao ka ho mandrakizay.  
Haleloia! Amena.

### **AN 18 - Saotra, dera, an'Ilay Mpanjaka Tompo Tsara**

Saotra, dera, an'Ilay Mpanjaka Tompo  
Tsara, dia Andriamanitra. Izy mitahy  
ny taona ka finaritra re ny vahoaka, fa  
Izy miaro ny loza tsy hitranga matetika.  
Ny ranonorana tonga hanatsara ny  
zavatra maro; izay fitahiana rehetra dia  
ateriny avokoa. Miderà, saotra no atero,  
fa tsy mba diso fanomezana. Izy no  
derao eo anatrehan'ny vahoaka maro.  
Miderà, saotra no atero, fa tsy mba diso  
fanomezana. Izy no derao re, Izy no  
derao eo afovoan'ny fiangonana.

### **AN 19 - Didy vaovao no omeko anareo**

Didy vaovao no omeko anareo, dia ny  
mba hifankatiavanareo. Eny, aoka ho

tahaka ny nitiavako anareo, no mba hifankatiavanareo koa. Izany no hahafantaran'ny olona rehetra fa mpianatro hianareo, fa mpianatro hianareo, fa mpianatro hianareo, raha mifankatia.

Izao no didiko, izao no didiko, izao no didiko, dia ny mba hifankatiavanareo, tahaka ny nitiavako anareo. Tsy misy manana fitiavana lehibe, lehibe noho izao: manolotra, manolotra ny ainy hamonjy ny sakaizany.

### **AN 20 - Endrey ny hatsaran'ny trano**

.:Endrey ny hatsaran'ny trano, tranonao, Andriamanitra ô! Maniry anao ny foko sy fanahiko. Sambatra izay, izay mitoetra, sambatra izay mitoetra ao an-tranonao, tranonao. Hidera Anao, Tompoko: Tompoko sy Andriamanitra.:. Amen.

### **AN 21 - Jehovah ô! Hianao no Vatolampy**

.:Jehovah ô! Hianao no Vatolampy iorenan'ny finoanay sy fanantenanay, Jehovah ô, Jehovah ô!.:  
Mpamonjy mora azo indrindra, ka mety mba hanavotra izay manota.  
Jehovah ô, Hianao no faleha: mijere anay, ry Tompo Masina ô! Dia tafionao ny hery vaovao ny mpanomponao, ho mendrika ny asa izay atao izao, aty antranonao, noho ny fitiavana anay.  
Ka ny dera aman-data, hery voninahitra anie, ho Anao mandrakizay, Jehovah Tompo ô! Jehovah ô! Jehovah ô!  
Jehovah ô! Hianao no faleha: mijere anay ry Tompo Masina ô!

### **AN 22 - Jehovah Tomponay ô! Ray mandrakizay**

Jehovah Tomponay ô! Ray mandrakizay, Andriamanitra Mpanjakanay, manerana izao rehetra izao ny herinao. Tsy tratry ny fisainanay ny voninahitrao, andanitra ao.

Te-hidera Anao izahay noforoninao. Kanefa tsy hainay izay vavaka ho entimankalaza ny fiandriananao. Fa masina sady marina, be fahendrena, Hianao Izay andohalehan'izao tontolo izao. Noho ny famindramponao izay maharitra mandrakizay, Tompo ô! mba omeo ny Fanahinao Masina, hifona sy hitaraina ho anay. Amin'ny Anaran'i Jesosy Zanakao, mba henoy ny fivavakay.:.

Noho ny haben'ny fahasoavanao, ary noho ny fitiavanao, jereo, Tompo ô, ny Fiangonanao! Mba ampiraiso, hatanjaho, arovy izy, mba hijoro amin'ny Teninao. Ka na mafy ny tafiotra sy ny alon-dranomasina, ny Ran'ny Zanakao no hamonjy azy sy hanavotra azy. Ampitomboy ny finoany. Ny Anaranao ankalazaina mandrakizay, sy hanefanay isan'andro nyvoadinay. Mba raiso ny fisaoranay. Henoy, henoy ny vavakay, ry Tompo ô!

### **AN 23 - Hoderaina ny Anaranao, ry Andriamanitra ô**

Hoderaina ny Anaranao, ry Andriamanitra ô! Tompo be fahasoavana, mba henoy ny vavakay! Ry Mpanjakan'ny mpanjaka ô! Raiso ny fifonanay! O ry Tompo Mpampionona, mba henoy ny vavakay! Mihainoa ny



vavakay, mihainoa ny vavakay! Tompo  
tia sy Mpamindra fo! Mihainoa anay.  
Amen!

## **AN 24 - Miderà ny Tomponao**

∴ Miderà ny Tomponao∴  
Ry Jehovah Tomponay, tafavory  
izahay; avy hankalaza Anao izahay  
vahoakao.  
Faly, ravo izahay noho ny soa azonay;  
tonga mba hisaoatra Anao voavotrao  
Saotra tsara entinay, hira no  
asandratray mba ho fiderana Anao  
Rain'izao rehetra izao  
(Famaranana :)  
Derao, derao, dera no omena Anao

## **FF 1 - Mitsangana ianao ry mino**

1. Mitsangàna ianao ry mino  
Fa ilain? ny taninao  
Ny finoanao ifikiro  
Mivonòna ianao  
Ny ady anatrehanao tsy mora  
Tena sarotra tokoa  
Nefa toy ? lay tao Edoma  
?Lay mahery momba anao.

Fiv : Mbola ho avy ny maraina  
(?lay maraina)  
?Zay mitondra hery vao  
Ry mpiambina miarena  
Ka ingao ny zovinao  
Ambarao fa ny aizina  
Indro efa lasa re  
Efa tonga ny maraina  
Hisy hazavana be.

2. Raha sendra ady mafy  
Mila handreraka ny fo  
Dia tsarovy fa mihafy  
Vao hahita ny soa  
Raha tafita ianao

Hisy hazavana be  
Ny aizin-kitroka ho lao  
Tapi-dàlana haleha.  
Mbola ho avy ny maraina sns...

3. Fahafahana doria  
Tsisy tambiny aminao  
No omen? ny Tompo tia  
Raha tahiana ianao  
Ho fanilo mandramaty  
Ho mpitantana ny dia  
?Lay finoana ao anaty  
Homba anao doria doria.  
Mbola ho avy ny maraina sns...

## **FF 2 - He, manolo-tena**

1. He manolo-tena ho Anao  
Fa mandre ny feo sy antsonao  
'Zato tenako izay mania  
Ka raiso Tompo, raiso ry Jesoa Tia

Fiv : Hanoa ny sitrakao  
Hanao izay tianao  
Ka ho mpanompo vonona  
Sy sahy koa  
Hitory hatrany ilay Fitiavanao  
Ambaram-pialam-pofon'aiko Jesoa.

2. Eny Tompo tsy mba mendrika aho  
Feno loto ny ao am- poko ao  
Nefa re ilay fitiavanao  
No inoako handray ahy  
Ho Mpanomponao  
Hanoa ny sitrakao sns...

3. Eo anilanao no fifaliako  
Ho Anao mandrakizay no tiako  
Ny ho vavolombelonao Jesoa  
No mamiko sy tena iriko tokoa  
Hanoa ny sitrakao sns...

4. Fantatro fa sarotra ny diako  
Marobe ny zavatra ho sedraiko



Nefa raha Ianao no momba ahy  
Dia tsy hanan- tahotra ny fo sy fanahy  
Hanoa ny sitrakao sns...

### **FF 3 - Jeso Vato fehizoro**

1. Jeso vato fehizoro  
Afa- tahotra ny fo  
Raha Ianao no mampijoro  
Sy iankinana tokoa.  
Vato fiorenanay  
Jeso Zanaky ny Avo  
Vato fialofanay  
Amin- dratsy te handavo.

Fiv : Vato azo itokiana  
Sady tsy mba mivena  
Afaka ny fahoriana  
Raha ianao no ekena.  
Jesoa Tompo irery  
No 'lay vato tsy mifindra  
Jeso Tompo irery  
No ' lay fehizoro indrindra.

2. Jeso vato fehizoro  
Mampisinda ahiahy  
Fa mandresy horohoro  
Manatanjaka fanahy.  
O, ry vato tsara paika  
?Zay mandray Anao am- po  
Dia mijoro tsy miraika  
N' inon' inona manjo.  
Vato azo itokiana sns...

### **FF 4 - Ry Fanahy ô**

1. Ry Fanahy ô midina,  
Manatreha anay anio Ianao  
Mba hanoloranay,  
Ny vavakay mangina  
Vetsojetsom- po 'zay atolotray  
Vola sy ny harena  
Samy tsy anananay  
Fa indro ny vavakay mangina

Fanoloran-tena ho Anao tokoa.

2. Ry Fanahy ô monena  
Aza mba mandao anay Ianao  
Kolokoloy 'zahay  
Hitombo fahendrena  
Ka tsy hahafy hiarak' Aminao  
Ota sy rendrarendra  
Samy te handavo anay  
Soa ihany, soa fa eo Ianao Fanahy  
Vonona hitahy ny fiainanay.

3. Ry Fanahy ô , meteza  
Mba handray anay ho mpianatrao  
Avia Ianao,  
Avia mampahereza  
Hahatonga anay mba ho irakao  
Eso sy fitsapana  
Samy manakivy anay  
Ka taomy , taomy hanam-po mafana  
Herim-po vaovao hiasa ho Anao.

### **FF 5 - Izaho no fananganana ny maty**

1. Hoy Jesosy Tompo 'zaho no  
fananganana  
Fananganana ny maty sy fiainana  
'Zay rehetra mino Ahy na dia maty aza  
Dia ho velon'indray, ho velon'indray,  
ho velon'indray  
Satria velona Aho, Ho velona hianareo  
Aza matahotra fa (ho velon'indray)3

2. Maharavo fo ny teniny henoy indray  
koa  
'Zay rehetra velona ka mino Ahy tokoa  
Dia tsy ho faty mandrakizay hatsangako  
Ka ho velon'indray, ho velon'indray,  
ho velon'indray  
Satria velona Aho, ho velona hianareo  
Aza matahotra fa (ho velon'indray)3

3. 0 ! Jesosy Tompoko indro re  
ampitomboy

Ny finoako Anao, ny herinao aseho  
Tombo iantrao ny foko tsy finoako  
vonoy  
Mba ho velon'indray, ho velon'indray,  
ho velon'indray  
Mino Anao tokoa ny foko Jesosiko  
Feno toky aho, fa (ho velon'indray)3

### **FF 6 - Ny teninao**

1. Ny teninao Jehovah Ray mahery  
Izay nomenao anay  
Dia teny tsara sady mampahery  
Ka mampifaly ny fonay

Fiv : Ny teninao  
Mofon'aina sakafo tokoa  
Ny teninao  
Ranon'aina satria foto-tsoa  
Ny teninao no teny tsy mba maty  
Maharitra mandrakizay

2. Soraty re ho velona ao anaty  
Hitondra aina vaovao  
Hitana ny finoana tsy ho faty  
Ka hankato ny didinao

### **FF 7 - Tsy hainay ny hangina**

1. Tsy hainay ny hangina  
Ka tsy hankalaza ny Avo  
Nameno fitahiana  
Ka tsy mba namela ho lavo.

Fiv : Ka dera ry Ray o!  
Sy saotra no atolotra Anao  
Ny fo sy fanahy, tena faly loatra  
No entinay midera Anao.  
Ny sainay tsy ampy hahalala  
Ny fatran'ny fitiavanao  
Ka raiso ry Tompo Malala  
Ny fankasitrahana Anao (ry Ray).

2. Tsy hainay hadinoina  
?Lay fara-fitiavanao, Ray o!  
Fa maty novonoina  
Ny Zanakao hamonjy anay.  
Ka dera ry Ray o! sns...

### **FF 8 - Masoko manganohano**

1. Masoko manganohano,  
Nitomany feno rano  
Noho ny helok'efa vita,  
Dia mitony raha nahita  
Masonao be fiantra  
Ry Mpamonjy ny mahantra  
O Voavotrafo ?lay very  
Ry fitiavana mahery.

2. Tanako mangadihady  
Nisarangotra nitady  
Fanavotana sy Vonjy  
F'efa resy ka nilonjy.  
Dia noraisinao ry Tompo  
Na dia tànana maloto  
O voavotrafo ?lay very  
Ry Fitiavana mahery.

3. Foko tena fahavalo  
Nefa resy ka mimalo  
Raha nifona fa naditra  
Hitanao nipitrapitra.  
Babo ka tsy afaka ho aiza  
?Zay noraisinao ho sakaiza  
O voavotrafo ?lay very  
Ry Fitiavana mahery.

### **FF 9 - Isaorana anie Jehovah**

Isaorana anie Jehovah  
Andriamanitra anie  
Andriamanitry ny Israely  
Isaorana anie Jehovah  
Andriamanitra  
Izy irery ihany no nanao fahagagana

Isaorana, mandrakizay  
ny anarany Malaza  
Ary aoka ny tany rehetra,  
Ho henika ny famirapiratra  
Ny voninahitr'i Jehovah Ray Tsitoha  
Amen!

## **FF 10 - Mivavaka aho satria**

1. Miloatra avy ao am-poko  
Ny tonom-bavako  
Maneho ny fanajako  
Sy fankatoavako  
Ny Tompoko Tsitoha  
Nitahy hatrizay  
Hatramin'ny taloha  
Sy ho mandrakizay.

Fiv : Mivavaka aho satria tena mino  
Mino sy mankato  
Manaja sady tia an'Andriamanitra  
Mivavaka aho satria tena faly  
Faly sy manantena ny avotro  
Omena mandrakizay doria

2. Mibahana ato am-poko  
Fanahin'I Kristy  
Mitaiza tsy miato  
Ka mahafaly ery  
Manesika ahy hivoatra  
Hiasa bebe kokoa  
Ka ataony tafahoatra  
Ny hasoavako.  
Mivavaka aho satria tena mino sns...

## **FF 11 - Faly aho**

Faly aho raha hoy izy ireo tamiko  
?Handeha isika ho any an-tranon'I  
Jehovah,  
Ny tongotray efa mijoro  
Ao anatin'ny vavahadin'ao  
Ry Jerosalema, ry Jerosalema.  
Dia ianao ry Jerosalema,

Izay efa vita tahaka ny tanàna  
Efa voalamina tsara.  
Any no hiakaran'ny firenena,  
Ny firenen'I Jehovah,  
Mba hisaotra ny Anarany  
Mba hisaotra ny Anarany  
Mba hisaotra ny Anaran'i Jehovah.?

## **FF 12 - Am-pelatananao ry Raiko**

1. Am-pelatanana ry Raiko  
Ny mombamomba ahy rehetra  
Iriko ianao no ho mpibaiko  
Ianao anatiko ao mitoetra  
Ho andrirahoko tokoa  
Hitarika ahy hatrany hatrany  
Andriafo tsy mandao Ianao  
Jesoa Ianao no hazavana tsy ho lany  
Am-pelatananao ihany  
Mandrakizay doria doria  
Na ny fiainako eto an-tany  
Na hatrany ankoatra ary.

2. Ny saiko am-pelatananao  
Ny foko efa tsy ahy intsony  
Fa voaova ho vaova  
Dia lasanao ry Ray ambony  
Ny hasambarako ombieny  
Mifaly manana Anao  
Ilay fiainako mpanjeninjeny  
No voafehinao anatiko ao  
Am-pelatananao ihany  
Mandrakizay doria doria  
Na ny fiainako eto an-tany  
Na hatrany ankoatra ary.

## **FF 13 - Mihirà fihiram-baovao**

Mihirà fihiram-baovao  
Ho an'i Jehovah, ry tany  
Mihirà fihirana  
Ho an'i Jehovah  
Dia ambarao amin'ny jentilisa  
Ny Voninahiny.

Mihirà fihirana  
Fihiram-baovao  
Mihirà fihirana  
Ho an' i Jehovah, ry Tany  
Dia ambarao amin'ny Jentilisa  
Ny Voninahiny  
Ambarao amin'ny Jentilisa  
Fa Jehovah no mendrika.  
Izy no mendrika ny Fiderana

#### **FF 14 - Jesoa, apetraka Aminao**

1. Jesoa, apetrako Aminao  
Ny fanahiako rehetra  
Ny asa vita hatrizao  
Anao tokoa tsy misy fetra  
Jesoa, apetraka Aminao

2. Jesoa, apetrako Aminao  
Ny asa fikelezan'aina  
Tsy misy miafina Aminao  
Ny hetaheta tsy hay lazaina  
Jesoa, apetraka Aminao

3. Jesoa, apetrako Aminao  
Ny toky sy fanantenana  
Ny sitrakao no aoka hatao  
Na aiza lalana ombana  
Jesoa, apetraka aminao

#### **FF 15 - Raiko ô !**

1. Tompo Malala Tsitoha, inty aho  
Izao vao nandre ilay feo niantso ahy  
Tsapako anatiko ao ny herinao  
Mitaona ahy mba hiverina Aminao.  
Raiko ô ! Raiko ô ! Inty aho  
Raiso mba ho isan'ireo zanakao  
Fa izaho 'zay nania dia hiova  
Hanaraka ny didinao Ray ô!

2. Jesosy Zokiko ô ! Raiso aho

Ho isan'ireo zandrinao tianao  
Neniko ireny taloha fa hiova aho  
Raiso aho ! Raiso aho Jeso ho Anao.  
Tompo ô! Tompo ô! Inty aho  
Raiso mba ho isan'ireo zandrinao  
Fa izaho 'zay nania dia hiova  
Hanaraka ny didinao Jeso!

#### **FF 16 - Tsy vitam-po onena**

1. Tsy vitam-po onena  
Tsy vitan-dranomaso  
Ny Asam-pamonjena  
Tsy azo atao mifampiandry andraso  
Tsy azo ifanerena  
Mila fandavan-tena  
Sy hery tsy mba maty  
Herim-po, herin-tsaina koa

Fiv : Na onena ny fonao  
Na tomany ny maso  
Tsy izany no ilaina  
Fa fifankatiavana

2. Ny mpianatry ny Tompo  
Asainy mifanompo  
Na mamy na mangidy  
Miara-dia , fizany no Didy  
Mamonjy ny mahantra  
Manarina ny lavo  
Mitsabo ny maratra  
Ary koa tsy mba miavom-po  
Na onena ny fonao, sns...

#### **FF 17 - Ho avy ny maraina**

1. 0 ry Tompo be fitia  
He isaoranay lanao  
Fa manaiky hiara-dia  
Aminay mpanomponao  
'Zay miasa hanasoa  
Olo-marompiara-miaina  
Manantena vokatsa  
Amin'ny asa izay efaina

Fiv : He! talenta samihafa  
No nomenao hampiasaina  
Raha ireo no miara-miasa  
Dia ho avy ny maraina  
Ka ho maro sesehena  
No hahazo tombontsoa  
Hampandroso firenena  
'Zay kinasanay ho to.

2. Taona maro izay ry Ray  
No nodiavina hatrizao  
Niara-nilofosanay  
Mba hanao ny asanao  
Nefs tsapanay tokoa  
Vitsy no mba vita tsars  
Ka tafio ny herim-po  
Hahavita izay anjara  
He! talenta samihafa, sns...

## **FF 18 - Afafazo**

1. Raha tonga ny andro izay  
Itsarana anao  
Amin'izay fotoana izay  
Adinina ianao  
Ka hiatrika  
Ilay Mpanjakanao  
Efa vonona ve ianao ?(Ary koa)  
Efa ampy ve  
'Zay anananao  
Hiatrehanao ny Tomponao

Fiv : Fihatsarambelatsihy  
Aok'izay dieny ety  
Fahafaham-baraka ho anao  
Ka ialao  
Raha toa tianao  
Ho voavonjy ianao  
Afafazo 'zay voa mendrika (Mendrika)

2. Raha tonga ny andro izay  
Itsarana anao  
Amin'izay fotoana izay

Adinina ianao  
Efa ampy ve  
'Zay nafafinao  
Mba ho voa mendrika tokoa ?(Ary koa)  
Efa tontosa ve  
Ny anjaranao  
Tsy hahameloka anao rahatrizay  
Fihatsarambelatsihy, sns...

3. Raha ho avy ny fotoana  
Hodiana  
Amim-boninahitra  
Ho ao an-tranon-dRay  
Tsy hatahotra  
Na hangovitra  
Ianao, raha madio fo (Ary koa)  
Satroboninahitra  
Tsy mba lo  
No an'ny mpanompo mahaso  
Fihatsarambelatsihy, sns...

## **FF 19 - Raha Jehovah no Mpiandry**

1. Raha Jehovah no Mpiandry  
Tsy mba hisy mampahory  
Ahi-maitso no handriana  
Ny fanahy velombelona  
Eny, tsy hanahy akory  
Lala-marina itondrany  
Lalan-tsambatra  
(Sambatra ifaliana)

Fiv : Raha Jehovah no Mpiandry  
(Tsy mba hisy)  
Tsy mba misy 'zay mampahory  
Ahi-maitso no handriako  
(Ranon'aina hosotroiko)  
Ranon'aina hosotroiko  
Ny fanahiko hovelominy  
(Miasa izy)  
Miasa lzy tsy mba matory  
Lala-marina itondrany  
Tsy ho foiko

2. Ny aloky ny fasana aza  
Tsy ho tazantsika intsony  
Tsy hatahotra ny loza aho  
(Izy no mihazona ahy)  
Tsorakazo nitondrany  
Sy ny tehiny any ambony  
No manolotra ny toky  
Ny fanahiko  
(Toky ny fanahiko)  
Raha Jehovah no Mpiandry, sns...

3. Eo imasom-pahavalo  
Ny latabatro velariny  
Diloilo feno hanitra  
(Efa namontosany ahy)  
Safononoka tantely  
Ny kapoakako namboariny  
Fahasoavana no sise  
Afaka ahiahy  
(Afaka ahiahy)  
Raha Jehovah no Mpiandry, sns...

4. Ao an-tranonao ry Tompo  
No iriko hialofana  
Ka tsy afa-miditra any  
(Ny hetraketraky ny tany)  
Raha ny fonao feno antra  
No ho lamba hirakofana  
Ary ny androm-pifaliana  
Tsy ho lany  
(Tsy ho lany)  
Raha Jehovah no Mpiandry, sns...

### **FF 20 - Jesoa Fitiavana**

Efa trotraky ny adin-tsaina  
Vao mba mahatsiaro anao ry Tompo  
Menatra aho tsy sahy mitaraina  
Ry Jesoa Fitiavana

Kanjo tambitamby, safosafo  
No nasetrinao ny ditrako  
Eny tsapako fa novidiana lafo  
Tamin' ny Ranao ny tenako

Jesoa Malalako! tafio ny herinao  
Hahaizako mandresy ny fakam-panahy  
He, tsinontsinona izao tontolo izao  
Fa fanimbana tena, saina sy fanahy

Ho reharehako ilay tanambokovoko  
Hihamina eo anilanao anie ny foko  
Fa eo anilanao tsy misy ny toloko  
Eo no mahatsara ahy, Jesoa

### **FF 21 - Mahatoky ka tokony hekena**

Mahatoky, ka tokony hekena  
Amin'ny fankasitrahana rehetra  
Izao teny izao <sup>(2)</sup> :  
Tonga tety ambonin'ny tany  
Kristy Jesoa  
Hamonjy ny mpanota  
Ary amin'ireny, izaho (izaho)  
Amin'ireny, izaho no lohany <sup>(2)</sup>.  
Kanefa izao no namindrana fo tamiko  
<sup>(2)</sup>  
Dia ny mba hisehoan'i Jesoa Kristy  
eo amiko izay Lohany <sup>(2)</sup>  
Ny faharipo rehetra Ho fianarana  
Ho an'izay hino Azy  
Hahazoana fiainana mandrakizay.

### **FF 22 - Tsy mendrika ahy**

Tsy mendrika ahy mpanompo  
Ny atao hoe " zanakao "  
Kanefa lanao, ry Tompo  
No niantso ahy izao  
Izay manatona Ahy  
Tsy ho laviko, hoy lanao  
Dia tamy aho ka sahy  
Nanatona anao

Ianao no Madio  
(Mba diovy aho re)  
Ianao no Marina  
(Mba hamarino aho re)

Ianao no Masina  
(Mba hamasino aho re)  
Tsy mendrika hitsimpona  
Ny latsaka amin'ny latabatrao aho  
Kaneffa, hoy ianao :  
"Izay manatona Ahy  
Tsy ho laviko mihitsy"  
Noho ny teninao, noho ny teninao  
Dia sahiko ny manatona

Ianao no Madio  
(Mba diovy aho re)  
Ianao no Marina  
(Mba hamarino aho re)  
Ianao no Masina  
(Mba hamasino aho re)  
Mba diovy aho re  
Hamarino aho re  
Mba diovy aho re  
Mba hamarino re  
(Hamarino aho re)  
Mba hamasino re  
(Hamasino aho re)  
Mba diovy  
Hamarino  
Hamasino re.

### **FF 23 - Andriamanitra ô ! Ry Tompo Zanahary (A.T.Z.)**

1. Andriamanitra ô ! Ry Tompo Zanahary  
Be fitiavana, mamonjy sy mamelons  
Vatolampy, toky tsy mifindra  
Fa maharitra mandrakizay

Fiv : Raha ny eto an-tany  
Dia mandalo ihany  
Miovaova  
Tsy azo ianteherana  
Be no efa vos  
Ka mamoy fo  
Fa izany  
No fomban'ny tany  
Toa fiainana raha jerena

Kanjo indrisy fa mahonena  
Hasambarana miserana ihany

2. O! ry velona tsarovy ny andronao  
Fa mandalo tsy mba manam-pijanonana  
Ka tandremo sao variana ianao  
'Zao tontolo izao ho levons avokoa  
Raha ny eto an-tany, sns...

3. Mbola ho entin'Andriamanitra  
hotsaraina  
'Zaho sy ianao, ka tsy ho afa-maina  
Fa Jesoa Mpanjaka no hitsara  
Ka hanavaka ny tsara sy ny ratsy  
Raha ny eto an-tany, sns...

### **FF 24 - Mahereza ! Ny Tompo momba anao**

1. Miainga, mazotoa,  
Mikeleza aina koa  
Mivavaha, mivavaha,  
Ho an'izao tontolo izao  
Mijoroa, mitoria,  
Mamafaza Teny Soa  
Fa ny Tompo be fitia  
No manohana anao  
Saroitra ny lalanao  
Kaneffa matokia tokoa  
Andrandrao ny masonao  
Fa mbola ao ny Tompo soa  
Izy no aminao  
Ka hampandresy izao  
O! mahereza fa ny Tompo  
Momba anao

2. Mandrosoa, miasà,  
Tano ny finoanao  
Aza mba matahotra  
Na manahinahy izao  
Miadia, mitafia  
Ny firaisan-tsaina soa  
Fa ny fahavalonao  
Dia handositra tokoa



Aza kivikivy foana  
Fa ny Tomponao dia ao  
Mampahery lalandava  
Ary koa tsy mba mandao  
Izy no aminao  
Ka hampandresy anao  
O ! mahereza fa ny Tompo  
Momba anao

## **FF 25 - Ny voadiko**

Ny ondry mania no maneho anio  
,Zao fanekena sy voady ;zao  
Nandinika ny zava-bita, Jesoa  
Tsy mendrika hanatona Anao  
Kane fa tsaroako ny fitiavanao  
Hamonjy ity mpanomponao  
'Lay Teny mahery mananatra  
Nampiova ny foko torovana  
'Lay Fanahy Masina inoako  
Hampianatra sy hanadio  
Ny ho aviko apetrako eo Aminao  
Izany no voadiko izao

## **FF 26 - Jesosy reharethako**

1- Tsy misy reharethako  
Afa-tsy Ianao, Jesosy ô !  
Anao ny hery, Anao ny haja  
Sy voninahitra  
Ny fasana sy ny fiainan-tsy hita  
Indro efa resinao  
Izao tontolo izao dia nahita  
Fa efa nitsangana Ianao

Sambatra aho, Jeso ô,  
Manana Anao izay Tompon'ny hery.  
Sambatra aho, Jeso ô,  
Miankina eo an-tratranao  
Ampy ahy ny fitiavanao  
Ampy ahy ny finoako Anao.  
Raketiko ao am-po lalandava  
Fa reharethako Ianao

2- Tsy misy nahitam-pamonjena  
Afa-tsy taminao.  
Nanaiky Ianao tsy mba noterena  
Hitondra aina vao.  
Ny tananao mahery natsotranao  
Mba hitantana  
Hahaizako mandeha sy mizotra  
Ny làla-marina.

3- Nasehonao ilay fahefana  
Manda sy aroko,  
Ka niala maina teo ilay satana  
Ilay fahavaloko  
Tsy misy maharombaka akory  
Izay eo an-tananao  
Izany indrindra no ilazako  
Fa reharethako Ianao

## **FF 27 - 'Lay alim-pamonjena**

1. 'Lay alim-pamonjena (famonjena)  
Tsarovana eto izao  
Fa Tompo be harena  
no teraka tamin'io  
He ! Mahagaga ilay fitia  
Nasehon' Andriamanitra

Fiv : He ! Ravo ny fo  
He!mirana koa  
Mifaly (falifaly), sambatra doria  
Miventy ny hiran'ny lanitra  
HALELOIA !

2. 'Lay alim-pamonjena (famonjena)  
Tsarovana eto izao  
Fa vita fanekena  
Izaho sy ny Tompo soa  
Ny tenako atolotro  
Ny tenany ho avotro  
He ! Ravo ny fo, sns...

3. 'Lay alim-pamonjena  
Tsarovana eto izao

Mpanota sesehena  
Mandova fiainan-tsoa  
'Lay alim-pihavanana  
Nitondra fiadanana  
He ! Ravo ny fo, sns...

4. 'Lay alim-pamonjena  
Tsarovana eto izao  
Nitondra fietrena  
Tsy mba manam-paharoa  
Fitiava-mampitovy zo  
Ny miadana sy ory fo

### **FF 28 - Efa voadinikao Andriamanitra ô**

1. Efa voadinikao Andriamanitra ô!  
Ny fiainanay zanak'olombelona  
Tsy misy ?zay miafina amiko tsy  
hitanao  
Ianao no manendry izany  
Andriamanitra ô!

2. Indro ny fikasako voalahatrao  
Ny fiainako rehetra dia Aminao  
Ny fahotana vitako taminao  
Mangataka famelana Andriamanitra ô!

3. Aza avela aho hangaihay  
Fa ampioreno mafy ny finoako  
Ka na mamely ahy ny fakam-panahy  
Dia matoky Anao ny fanahiko.

4. Ny nofoko anie malemy no sady kely  
Torovana tsy ampy hery ka manahy  
Meteza Ianao anio Andriamanitra o!  
Ho hery sy toky ho ahy mandrakizay.

5. Ianao no vatolampy sy fiarovako  
Ny herinao no indro izorako  
Ny foko ao anatiko ao efa fantatrao  
Dia raiso aho ho zanakao  
Andriamanitra ô!

### **FF 29 - Tsy mba hisy reharehako**

1. Tsy mba hisy reharehako  
Toy ny hazo nijalianao Jeso (Jesosy ô !)  
Eo amin'izay rehetra halehako  
Izany no voadiko Aminao  
He! izao rehetra izao ekeko (ry Jeso)  
Mora lo sy tsy maharitra tokoa (kanefa  
Jeso)  
Fa ny fitiavana jereko  
Ry Jeso tsy niala tamiko

2. Tsy mba hisy fanorenako  
Raha ny eto an-tany eto Raiko ô  
Fa ny lanitrao no ho fonenako  
Izany no mba faniriako  
He! izao tontolo izao tazaniko  
(tazaniko)  
Rendrarendr'izay mamitaka avokoa  
(kanefa Ray ô !)  
Fa ny eo anilanao no mamiko ry Raiko  
Raiso aho ho Anao .

### **FF 30 - Fo mitambatra ho iray**

1. Fo mitambatra ho iray  
No entina eto izao  
Mitroto ny fitia  
Hohamasinin' Andriamanitra  
Hitombo hery sy  
Hamerovero koa  
Ka hifanaiky ireo olon-droa  
Fa hiombom-piainana  
Na inona miseho eto an-tany  
Dia vonona hifampitantana

Fiv : Fitiavana toy ny an'llay Jesoa  
Fitiavana manolotra ny aina  
Fitiavana mandresy fahotana  
Fitiavana ho mandrakizay doria

2. Toy 'zao androany izao  
'Lay nofinofy izay

Niainanay taloha  
Ka indro fa miara-belona,  
Miara-tsambatra  
Anivon' ny fitia  
'Lay dina izay  
Niarahana nikolo  
No hamafisina ho doria  
Hotehirizina ho vaovao  
Handrobona, hitombo hasina  
Fitiavana toy ny an'Ilay Jesoa, sns...

### **FF 31 - Mihirà ry manampofonaina**

1. Mihirà ry manampofonaina  
Mikaloa sy mitsikia  
Tapaka ny gadra nolonjena  
Afak'i Jesosy be fitia  
'Lay Edena nihidy tany aloha (nihidy aloha)  
Noho ny ota ratsin-drazantsika  
He midanadana sy mivoha  
Ka idiro itondray mozika

2. 'Lay satana tena fahavalo  
Resy teo ka voakodia  
Koa herezo aza mimalo  
Tokinao anio Ilay Mesia  
Ry voahosotra hitondrana famonjena  
(Ry voahosotra famonjena)  
'Ndreto ento ho anao 'zahay  
Dia izahay izay miferin'aina  
Noho ny ota izay mpahazo anay

3. Afaka izahay ankehitriny  
Tonga ny Mpanavotra anay  
Ka ilay gehenanay fahiny  
Voasolo paradisa indray  
Koa isaoranay tokoa tokoa (Koa isaoranay tokoa)  
Ianao ry Rainay be fitia  
Dia Hianao Jehovah Ray tsitoha  
Nanome anay ilay Mesia

### **FF 32 - Aza avela hahalala**

1. Aza avela hahalala  
Ny antony nanaovanao  
Ny hariva mamana  
Na ireo maraina vao

Fiv : Tsy ho takatry ny saiko  
'Zay rehetra lahatrao  
Ny angatahako, ry Raiko  
Aoka aho hatoky Anao

2. Aza avela hanontany  
Ny hafaliana atolotao  
Na ny anton'ny tomany  
Efa hitako hatrizao  
Tsy ho takatry ny saiko, sns...

3. Aza avelanao hanefy  
Ny ampitso 'zay anao  
Aza avelanao handrefy  
'Zay ho fitantananao  
Tsy ho takatry ny saiko, sns...

### **FF 33 - Inty aho Jesoa !**

1. Inty aho Jesoa !  
Miantso ahy Hianao  
Na dia tsy mendrika e  
Manolo-tena izao  
Hianao no nifidy  
Tsy haiko ny handà  
'Ty antso sarobidy  
Ry Tompo, mamela  
Ny heloko rehetra  
Diovy aho, havaozy  
Ho olom-baovao  
Hanao ny sitrakao  
Ho mendrika tokoa  
Ny antsonao Jesoa.

2. Inty aho Jeso miantso ahy Hianao  
Ny fahalemeko anie  
Ry Tompo fantatrao

Hianao no nifidy  
Sy maniraka ahy  
Avy Aminao Jesoa  
Ny herin'ny fanahy  
Ho entiko manao  
Ny asa atolotrao  
Fa sarotra e ny dia  
Ry Tompo manampia  
Ho mendrika tokoa  
Ny antsonao Jesoa

3. Inty aho Jesoa  
Miantso ahy Hianao  
Mba ho fahazavan'  
Izao tontolo izao  
Hianao no nifidy ahy  
Ho fanasina  
Hanefa ny adidy  
Lehibe sy masina  
Koa hamasino, Tompo  
Fa vonona aho hanompo  
Hombay ny herinao  
Hitondra aim-baovao  
Ho mendrika tokoa  
Ny antsonao Jesoa

### **FF 34 - Tompo Malala ô !**

1. Tompo Malala ô ! Mpanjakako Ianao  
Tamy aho fa resy lahatra  
Noho ny famonjena vitanao  
Eny, ry Tompo, tsy ho haiko adinoina  
intsy re  
Ny fitiavana nasehonao

Fiv : Ka anio no hanavaozako ny  
fanompoko Anao  
Fa tsy ho voavaliko, izay natolotrao  
Ny fitiavana natolotrao,  
Ka raiso, Tompo, ekeo re sy anjakao  
Ny fiainako ho voninahitrao.

2. Tompo Malala ô 'lay hazo fijaliana  
Niaretanao tao Kalvary,

Niaretanao Mpamonjiko  
No nanehoanao fa tianao ity mpanota  
izay  
Tsy mendrika Anao akory ity  
Ka anio no anavaozako, sns...

3. Tompo Malala ô ! tsy ho adinoiko  
intsy  
Ny fitiavana natolotrao  
Ny fitiavana natolotrao  
Eny, ry Tompo, ity izaho izay  
voababonao  
Fa vonona hanao ny sitrakao  
Ka anio no anavaozako, sns...

### **FF 35 - Ry Tomponay ô avia**

1. Ry Mpamonjiko Ray Malalako ou ou  
ou  
Mifona Aminao ty zanakao mitalaho  
Tompo ô  
Fa diso taminao izahay ka mangataka  
ou ou ou  
Famelana sy famindrampo avy Aminao  
Ray ô !

Fiv : Ry Tomponay ô avia omeo Anay  
izao anio izao  
Ny fo madio sy Masina Anananao  
Dia tsy ho very na hoe mbola ho diso  
ihany indray  
Ny tena sy Fanahy izay anananay

2. Ry Mpamonjiko Ray Malala ou ou ou  
Be tokoa ireo ota efa vita sy nambabo  
anay  
Ka angatahinay Aminao sy irinay koa  
ou ou ou  
Famelana sy famindrampo avy Aminao  
Ray ô !

### **FF 36 - Mifalia**

1. Vahoaka sesehena  
No miara-paly izao  
Miventy ny Antema  
Dia hira vaovao  
Injao ny fiderana  
Manakoako ery  
Maneho fanajana  
Ho an'ilay Mesia

Fiv : Iza àry no tsy hifaly (Mifalia,  
mihobia)  
Hisaotra ao am-po  
(Misaora ao am-po)  
Fa afa-doza, afa-jaly  
(Afaka ianao)  
He! famonjena tokoa  
(0!) Mihirà, mihobia  
Afaka ianao  
Teraka ny Tompo Tia  
Resy ny rafinao

2. Tsy ireo Anjely ihany  
No faly ao am-po  
Ny mpino eto an-tany  
Miravo avokoa  
Fa indro ny Mpamonjy  
Mpanjaka be fitia  
Nietry an-tranon'omby  
Hamonjy ny mania

### **FF 37 - Fa tsy misy fahoriana**

1. Fa tsy misy fahoriana  
'Zay natolotrao anay  
Ka nitarika hakiviana  
Satria efa zakanay  
Noho'lay vesatra indrindra Mafy,  
sy manonja koa  
Izay nentinao namindra  
Raha novonoina lanao Jesoa !

Fiv : Ny faniriam-panahy  
Hiaraka Aminao

Hamelona ahy ho sahy  
Hiasa ho Anao  
Ny Famonjena soa  
'Zay nomenao ry Ray  
No anton'ny fiainanay

2. Fa tsy misy hafaliana  
Tena mampifaly anay  
Raha tsy ilay fitahiana  
Avy Aminao ry Ray  
Fa tsy misy koa fitia  
Hahasambatra anay  
Raha tsy lanao ry Tompo tia  
No mitoetra anatinay

3. Ny fisainanay 'zay kely  
Tsy mahatakatr'indraindray  
Fa lanao, lanao irery  
No toky iankinanay  
Ny finoana mila hivaha  
Tsy mahasedra sarotra  
Ampijoroy tsy hanahy  
Ho finoana matotra

### **FF 38 - Mba todihonao ny lasa**

1. Mba todihonao ny lasa  
Dia ho hitanao ny asa  
Nandaniana ny fotoana  
Fa dia vita mora foana

Fiv : Mitsangàna, sahia ! (sahia !)  
Mijoroa, mitoria (mitoria !)  
Aza kivy, sanatria  
Fa aminao Kristy.

2. Eny, tsara ho tsaroana  
'Reo adidy nokoloina  
Maro koa no tsy tontosa  
Nampitsoaka ny kanosa  
Mitsangàna, sahia ! sns...

3. Aoka hiezaka hatrany  
Mba hanarina izany

Fa hipetraka ho tantara  
Ho an'ny zanak'amam-para  
Mitsangàna, sahia ! sns...

### **FF 39 - Faniriako**

1. Ray o! mba faniriako,  
Raha toa ka sitrakao  
Ny handova lanitra  
Dieny ety an-tany  
Kaneva tsy izaho irery  
F'ireo izay mino Anao  
Hiaraka amiko  
Hatrany hatrany.

Fiv : Endrey ny fiainanay anilan-dRay  
Ny Tompo iray, Fanahy iray  
Iraisana avokoa ?reo asa soa  
Iray ny fo, iray ny loha  
Ray o! nahoana moa e!  
Raha atomboka anio?

2. Ray ô! mba faniriako  
Raha toa ka sitrakao  
Ny ho zanaka manoa  
Feno fahendrena  
Hilofo hatrany koa  
Hamita ireo asanao  
Ka tsy hirehareha  
Fa hanetry tena.  
Endrey ny fiainanay anilan-dRay sns...

### **FF 40 - La Nuit du Salut**

1. C'était La Nuit du Salut  
On s'en souvient à présent  
Car le Seigneur très riche  
Naquit en ce moment-là  
C'est un Amour fort étonnant  
Que Dieu a bel et bien montré

Fiv : Le coeur est rempli d'immense  
gaité  
De joie, de bonheur éternels

On clame tout haut  
La Chanson du Ciel : Haleluia !

2. C'était La Nuit du Salut  
On s'en souvient à présent  
J'ai conclu avec Le Seigneur  
Le pacte de rédemption  
A lui j'ai donné tout mon corps  
Pour moi, son sang est mon rachat

3. C'était la Nuit du Salut  
On s'en souvient à présent  
Des pécheurs innombrables  
Héritent la belle vie  
Cette nuit réconciliante  
Etait porteuse de la Paix

4. C'était La Nuit du Salut  
On s'en souvient à présent  
Mon Jésus s'est rabaissé  
Par sa suprême pitié  
O ! bel Amour rendant égaux  
Les riches et les malheureux

### **FF 41 - Jesoa no Mpanavotra**

O! iza, iza?  
Iza no hamonjy ahy  
Iza, iza no hamonjy ahy re ?  
Fa rerak'aho e  
Fa dia reraka  
Milonjy entam-pahotana  
Fahotana be

O! manatona  
Manatona an'i Jesoa  
Fa Izy ihany  
Izy no hamonjy anao  
Fa noreseny  
Efa noreseny na  
Ny fasan'aza dia  
Ny fahafatesana ! Ny fasan'aza !  
Efa noreseny izao  
Ny fahafatesana 'lay fahavalonao

Ka mba mifalia !  
Mifalia ianao  
Fa Jesoa Tompo no  
Mpanavotra anao

Ry Jesoa Tompo ô !  
Ry Jesosy Tompo ô !  
Mba raiso re ny foko  
Ho anao izao !  
Fa famonjena fanavotan-dehibe  
Sy avotr'aina koa  
No he atolotrao Fa novonoina !  
Novonoina Ianao  
Hisolo voina  
Mba hisolo voina anay

Fa noresenao  
Efa noresenao na  
Ny fasan'aza dia  
Ny fahafatesana  
Ny fasan'aza !  
Efa noreseny izao  
Ny fahafatesana 'lay fahavalonao  
Ka mifaly re !  
Ka mifaly izahay  
Fa Jesoa Tompo no  
Mpanavotra anay !

### **FF 42 - Moa misy va?**

1. Moa misy va ety, iriko toa Anao ?  
Ry Tompo be fitia, Mpanao izao  
rehetra izao  
Ny foko lasanao, ry Ray Malala ô !  
Jereo ty zanakao izao miantoraka  
Aminao

2. Moa misy va ety, iriko toa Anao ?  
Jeso sakaiza, avia Hianao hiara-dia izao  
Ny foko tia Anao, oneno, anjakao  
Tsy hatakaloko Hianao, "Ry fiainako  
vaovao"

3. Moa misy va ety, iriko toa Anao ?

Fanahy hendry ery, Mpanoro izay  
rehetra atao  
Ny foko, he ! Anao, Fanahy Masina ô !  
Ny fiainako ovay ho vao, ka  
hamasinonao

4. Moa misy va ety, iriko noho Ilay  
Nesoina tany Kalvary, 'Lay  
Indrafon'ny Ray  
Jeso Malala ô ! Endrey 'ty vitanao  
Hianao no hetahetako sy hasambarako

### **FF 43 - Aiza moa ianao ?**

1. Jesosy Tompo miantso anao  
Manontany izao :  
"Aiza moa ianao?"  
Ny ondrikeliko noana indreo  
Miandry anao re ireo  
"Aiza moa ianao ?"

Fiv : 'Ty aho, Jeso, (ekeo mba) ho  
irakao  
Raiso hanao ny sitrakao tokoa  
Jesosy ô ! (omeko) mba ho Anao  
Ny foko, tenako sy fanahiko

2. E! làlan-tsarotra ilàna anao  
Ady mafy no ao :  
"Aiza moa ianao ?"  
Reseona'zao tontolo izao  
Mba ho Ahy re izao  
"Aiza moa ianao ?"  
'Ty aho, Jeso, sns...

3. Ny hery, aina sy fanananao  
No ilaiko izao :  
"Aiza moa ianao"  
Ny tenanao sy ny fanahinao  
No takiako izao  
"Aiza moa ianao" ?  
'Ty aho, Jeso, sns...

4. Ny sandriko no hiaro anao



Hisakambina anao  
"Aiza moa ianao ?"  
Raha ny Fanahy no hitantana anao  
Vonona ve ianao ?  
"Aiza moa ianao ?"  
'Ty aho, Jeso, sns...

#### **FF 44 - Ry Madagasikara soa**

1. Ry Madagasikara soa  
Natolo-Janahary anay  
Nosimboahangy manirery  
Fa nahasoana ny razanay,  
He ! Sarobidy tsara loatra,  
Tsy sandana, tsy atakalo  
Feno ny fo ka toa mangina  
Heriny mivavaka hoe :

Fiv : Andriamanitra ô !  
Tondrahy andon'ny lanitra  
Vontosy ny tsiron'ny tany  
I Madagasikara !

2. Ry Firenena Malagasy  
Antsoin'ny Nosy hianao  
Andeha malaky, mitsangàna  
Alao hery, mandrosoa !  
'Zay maha olona anao re  
Atolory, asorony  
Aza mandevina talenta  
Fa anondroty Firenena e !  
Andriamanitra ô ! sns...

3. Andriamanitra ambony,  
Fenoy ny fiahianao  
Ny mponina rehetra eto  
Ary izay asa mahasoana  
Ireo nantsoinao hitondra  
Mba tsidiho, mba tariho  
Ho sambatra tokoa ny Nosy  
Raha Hianao no azy e !  
Andriamanitra ô ! sns...

#### **FF 45 - Hira fiderana**

1. Hira fiderana ho Anao ry Ray  
Tsy afaka ato am-bavako mandrakizay  
Hira mampifaly, mampitony jaly  
Mampiravoravo fo

2. Ny talenta izay efa nomenao ahy  
Hiderako Anao n'aiza misy ahy  
Mba hamelon'aina, hampitony saina  
Hampiray ny miaina

3. Hira tsotra ihany, nefa na dia izany  
Ho Anao tokoa no hikaloako  
Raiso re, ry Tompo,  
F'io no porofom-pitiavako Anao

4; Hira avy ato am-poko, indro fa  
vetsoiko  
Ho Anao ry Raiko izay antsoiko  
Hira tena mamy, manambara hatrany  
Fa tena tiako Ianao

#### **FF 46 - Mba tantanonao, ry Raiko!**

1. Mba tantanonao, ry Raiko  
Izato àlan-janakao  
Ny mifidy toa tsy haiko  
Fa maniry indrindra Anao  
Hitanao ny adi-saina  
Mitambesatra ao an-doha  
'Zany tsikin'ny maraina  
Toa ela vao hifoha

2. Moa diso ny safidiko  
Raha mandroso ka mankao  
Sa 'ty làla-nofinidiko  
Dia tsy ilay voasoritrao  
Tanteraho ny faniriako  
O ! ry Tompo tena tia  
Fa ity zavatra iriko  
Masina amiko doria

3. Nefa, raha tsy izay no didy  
Namboarinao ho ahy  
Amboary ny safidy  
Sy ny ratrako am-panahy  
Atolorinao ny hery  
Hampijoro izay nikoa  
Ka sitranonao ny fery  
Sy ny ratrako ao am-po

#### **FF 47 - Fiadanana**

1. Ianao 'zay mitady ny fiadanan-tsoa  
Amin'izao fiainana izao  
Ka mandeha mankatsy, ary sy aroa  
Mikorana ary koa milalao  
Kanefa tsy mahita izay mahaso  
Fa vizana foana ny nofo  
Inty misy Fiainana atoroko anao  
Andramo dia hohitanao

Fiv : Jesosy, Jesosy,  
(Jesosy Tompo sy Mpamonjy tia)  
No Fiainana atoroko Anao (Jeso)  
Jesosy, Jesosy,  
(Jesosy Tompo sy Mpamonjy tia)  
No hany hampiadana anao  
Koa raiso Jesosy ho Tompo Mpamonjy  
Hanapaka ny fiainanao  
Dia hohitanao'Lay Fiadanana  
Haharitra ho mandrakizay

2. Ianao ianjadian-pahoria-marobe  
Amin'izao fiainana izao  
Tsy misy hazavana fo toa haizim-be  
No mandrakotra ny fiainanao  
Ka mila ho kivy sy hamoy fo  
Noho 'reo adim-piainana maro  
Inty misy fiainana atoroko anao  
Andramo dia hohitanao  
Jesosy, Jesosy, sns...

#### **FF 48 - Andriamanitra, Fitiavana Ianao**

1. Andriamanitra, Fitiavana Ianao  
Ka mihevitra ny momba anay ety  
Raha mifoha maraina izahay  
Dia tsy afaka am-bavanay ny hoe  
Ampy ho anay ny Fahasoavanao

Fiv : Raha maraina mibaliaka ny  
andronay ety  
Ianao no masoandro niaviany  
Raha ny alin'ny ririnina no handalo ety  
Ianao no kintana hitantana ny dia  
Ka ny vavaka atao  
Izay mipololotra am-ponay ao hoe:  
Izahay anie hatoky Anao

2. Andriamanitra, Fitiavana Ianao  
Ka mitantana ny dianay ety  
Raha mandimby ny andro ny alina  
Mbola tokana ny Deranay hoe :  
Ampy ho anay ny Fahasoavanao  
Raha maraina mibaliaka ny andronay  
ety, sns...

#### **FF 49 - Mifona re ry Ray**

1. Mifona re ry Ray  
Ireto zanakao  
Fa diso izahay  
Tsy mety ny natao

2. Ny ota sesilany,  
Nandramana avokoa  
Kanefa re izany  
Ifonana tokoa

3. Izay rehetra hita  
Natao fa tsy ho to  
Izao ny ratsy vita  
Nandrotika ny fo

4. Ry Jeso ô anio  
Indreto izahay  
Manaiky, ka fidio  
Ho zanakao, ry Ray

5. Tsy tsapanay tokoa  
Ny antranao ry Ray  
Fa hay, ny zava-tsoa  
Dia takona aminay !

6. Maniry fahafahana  
Izao 'ty fo madio  
Ekeo ny fibebahana  
Atolotray anio !

### **FF 50 - Ianao izay miasa fatratra**

1. Ianao izay miasa fatratra  
Fa mikendry mba hanefa zava-tsarotra  
Moa tsy tsapanao ho mahasambatra  
Ny asa izay atao am-pitiavana  
Mihamaivana, mora entina  
Ny fahasahiranana toa mitambesatra  
Raha ao ny fo manaiky marina  
Ho tia sy handala ny asa rehetra

2. Hoy ny hafatry ny Tompo aminao  
Manatona Ahy raha toa sahirana  
Fa Izaho tsy manary na mandao  
Izay miezaka ka hita reraka  
Nefa moa ve, vonon'ianao  
Handà ny tenanao, hamoy izao tontolo  
izao  
Dia hanaiky koa mba ho tarihina  
Fa sarotra ny làlana sy asa atao

3. Mitsangàna, mandrosoa hiasa e !  
Fa malalaka ny Saha izay omena anao  
Dia meteza koa hanaiky hanome  
Harena, herim-po ilaina aminao  
Aza ketraka, matokia izao  
'Lay hery 'zay manohana ny  
fiezahanao  
ka mitondra soa, manova mba ho vao  
ny vokatry ny asa izay nanasatr'anao

### **FF 51 - Ry Mpamonjy olom-bery**

1. Ry Mpamonjy olom-bery  
Sarobidy sy mahery  
Ny fitiavanao ahy  
'Zay mambabo ny fanahy  
Noho ilay fitiavanao  
Babonao ny foko izao  
Ka izao rehetra izao  
Tsy hamoizako Anao

2. Ny fitiavanao, ry Tompo,  
No mambabo ahy hanompo  
Tia ahy hianao  
Ka mba tiako tsotra izao  
Eny, fantatrao fa tiako  
Izao fiainana eto izao  
Tiako izao rehetra izao  
Nefa mbola tiako Hianao

3. Na dia sarotra sy mafy  
Ny hanaraka Anao  
Izaho vonona hihafy  
F'efa tiako Hianao  
'Zao fiainana izao  
Tsy atakaloko Anao  
Na dia mamiko aza eto  
Mbola tiako Hianao

### **FF 52 - Avia! Torio Kristy**

Fiv : Ry tanora ô! Avia  
Mitsangàna, mitoria;  
Ambarao ?lay famonjena  
Ka sahia, avia, avia  
Torio Kristy.

1. Fa vory amintsika izao ny hery  
Ka mendrika hanaovan-tsoa  
Meteza ka ampio ?reo mbola very  
Ho mpino toa antsika koa.  
Ry tanora ô! Avia sns...

2. Anio no miandry antsika ny tontolo  
Hitondra hazavana soa  
Isika izay voataiza sy voakolo

No indro irahin?I Jesoa.  
Ry tanora ô! Avia sns...

3. Ny herin?ny Fanahy no momba  
antsika  
Hahatomombana ny dia  
Andeha amin?ny endrika sariaka  
No hitoriana an?I Kristy.  
Ry tanora ô! Avia sns...

### **FF 53 - Havaoziko ilay voady**

1. Tsy ho toy izao, Jesoa  
Ity mpanomponao  
Raha toa tsy tao tokoa ny fahasoavanao  
?Zay nanohana ?lay hery kely tao am-  
poko  
Nahazoako mba nanao  
Ny asam-panompoako!

Fiv : Indro fa havaoziko ry Jesoa  
?Lay voady miorina ao am-po  
Ny andro ivelomako  
?Zay omenao iainako  
Dia atokako sy mbola hitoriako ilay  
fitiavanao!

2. Ny asa izay natao, Jesoa,  
Dia tsapako ao am-po  
Fa tsy dia toy inona sy bitika tokoa  
Nefa na izany aza dia inoako koa  
Fa ?zay kely vitako hitera-boka-tsoa.  
Indro fa havaoziko ry Jesoa sns...

3. Na ho lava na ho fohy  
Ny androko ety  
?Zaho dia irakao, ry Jesoa Tompo be  
fitia!  
Ka ilay fitiavanao miorim-paka anaty  
No hanafy herim-pitokiana mandra-  
maty!  
Indro fa havaoziko ry Jesoa sns...

### **FF 54 - Finoana, fanantenana,**

### **fitiavana**

1. Mandrosoa hatrany  
Aza kivy foana  
Zava-tsoa tsy lany  
Ao anatin?ny finoana.

Fiv : ?Reto no miray  
Hery lehibe tokoa dia  
Ny finoana,  
Ny fanantenana,  
Ny fitiavana.

2. Tano tsy ho very  
Ny fanantenana  
Fa mitondra hery  
Eny an-dàlana ombana.  
?Reto no miray sns...

3. Aina vaovao  
Herin?ny fanahy  
Ny fitiavanao  
Ka tanako tokoa ho ahy.  
?Reto no miray sns...

### **TS 1 - Jehovah ô, iza no hitoetra ao amin'ny taberna-kelinao**

(Salamo 15)

1. Jehovah ô, iza no hitoetra ao amin'ny  
taberna-kelinao?

Iza no honina an-tendrombohitrao  
marina?

Izay mandeha tsy misy tsiny ary manao  
'zay mahitsy  
Sady misaintsaina ny marina ny fony

2. Tsy manendrikendrika amin'ny  
lelany,  
Sady tsy manisys ratsy ny sakaizany,  
Ary tsy manao izay hahafa-baraka ny  
anarany,  
Tsy manaja ny ratsy fanahy.

3. Fa manome voninahitra ny matahotra an'i Jehovah,  
Tsy mivadika amin'ny fianianany, na dia maningotra ny tenant' aza.  
Sady tsy mampihana ny volany, na mandray kolikoly hana-meloka ny marina,  
Izay mitandrana izany dia tsy mba hangozo-hozo mandraki-zay.

4. Hisaorana anie ny Ray sy ny Zanaka, Ary ny Fanahy Masina;  
Eny, hisaorana sy hankalazaina anie Andriamanitra mandraki-zay. Amen.

### **TS 2 - Jehovah no Mpiandry ahy**

Salamo 23

1. Jehovah no Mpiandry ahy?  
Tsy hana-java-mahory aho.

2. Mampandry ahy amin'ny ahi-maitso Izy;  
Mitondra ahy eo amoron'ny rano fialan-tsasatra Izy

3. Mamelombelona ny fanahiko Izy;  
Mitarika ahy amin'ny lalan'ny fahamarinana no ho ny anarany izy.

4. Eny, nadia mandeha mamaky Io hasaha aloky ny fahafatesana aza aho,  
Dia tsy hataho-tra ny loza aho.

5. Fa Hianao no amiko,  
Ny tsorakazonao sy ny tehinao, ireo no mahafatahotra ahy.

6. Mamelatra latabatra eo anoloako, eo i maso n'ny fahavaloko Hianao;  
Manosotra diloilo ny lohako Hianao;

7. Ny kapoakako feno dia feno.  
Eny, tokoa fahasoavana sy

famindrampo  
No hanaraka ahy amin'ny andro rehetra hiainako,  
Dia hitoetra ao an-tranon'i Jehovah androlava aho.

Hisaorana anie ny Ray sy ny Zanaka, Ary ny Fanahy Masina;  
Eny, hisaorana sy hankalazaina anie Andriamanitra mandraki-zay. Amen.

### **TS 3 - Andriamanitra anie hamindra fo aminay**

Salamo 67

1. Andriamanitra anie hamindra fo aminay sy hitahy anay.  
Hampamirapiratra ny tavany aminay, anie Izy.

2. Mba ho fantatra ety ambonin'ny tany ny lalanao.  
Sy ny famonjenao ny amin'ny jentilisa rehetra.

3. Hidera Anao ny firenena,  
Andriamanitra ô;  
Eny, hidera Anao ny firenena rehetra.

4. Hifaly sy hihoby ny firenen-tsamy hafa, satria mitsara marina ny firenenai Hianao;  
Ny firenen-tsamy hafa ambonin'ny tany dia entinao.

5. Hidera Anao ny firenena,  
Andriamanitra ô;  
Eny, hidera Anao ny firenena rehetra.

6. Ny tany efa nahavokatra;  
Mitahy antsika Andriamanitra, dia Andriamanitsika

7. Mitahy antsika Andriamanitra;

Ary hatahotra Azy'ny vazan-tany rehetra.

Hisaorana anie ny Ray sy ny Zanaka,  
Ary ny Fanahy Masina;  
Eny, hisaorana sy hankalazaina anie  
Andriamanitra mandraki-zay. Amen.

#### **TS 4 - Mihobia ho an'i Jehovah**

Salamo 100

1. Mihobia ho an'i Jehovah,  
Ry tany rehetra.  
Manompoa an'i Jehovah amin'ny  
fifaliana,  
Mankanesa eo anatrehany amin'ny  
fihobiana.

2. Aoka ho fantatrarao  
Fa Jehovah no Andriamanitra,  
Izy no nanan antsika, ary Azy isika,  
Dia olony sy ondry fiandrin'ny

3. Midira eo amin'ny vavahadin'ny  
amin'ny fisaorana.  
Ary eo an-kianjany amin'ny fiderana,  
Misaora Azy  
Mankalazà ny anarany.

4. Fatsara jehovah;  
Mandrakizay'ny famindram  
Ary ny mihatra amin'ny taranaka  
farama- i ndi mby  
Ny fahamarina-ny.

Hisaorana anie ny Ray sy ny Zanaka,  
Ary ny Fanahy Masina;  
Eny, hisaorana sy hankalazaina anie  
Andriamanitra mandraki-zay. Amen.

#### **TS 5 - Misaora an'i Jehovah, ry fanahiko**

(Salamo 103)

1. Misaora an'i Jehovah, ry fanahiko;  
Ary izay rehetra ato anatiko, misaora  
ny Anarany masina  
Misaora an'i Jehovah, ry fanahiko;  
Ary aza misy hadinoinao ny fitahiany  
rehetra

2. Izay mamela ny helokao rehetra,  
Izay manasitrana ny aretinao rehetra,  
Izay manavotra ny ainao tsy hidina any  
an-davaka,  
Izay manarona famindram-po sy  
fiantrana anao,

3. Izay mahavoky soa ny vavanao;  
Ny fahatanoranao mody indray toy ny  
an'ny voromahery  
Jehovah manao fahamarinana  
Sy fitsarana amin'izay rehetra  
ampahorina.

4. Efa nampahafantatra an'i Mosesy ny  
lalan-kalehany Izy;  
Ny Zanak'Isiraely nampahafantariny  
ny asany.  
Mamindra fo sy miantra Jehovah,  
Mahari-po sady be famindram-po.

5. Tsy mandaha-teny mandrakariva Izy,  
Na mitahiry fahatezerana mandrakizay.  
Tsy mba manao amintsika araka ny  
fahotantsika Izy,  
Na mamaly antsika araka ny helotsika.

6. Fa tahaka ny hahavon'ny lanitra  
ambonin'ny tany  
No haben'ny famindram-pony  
amin'izay matahotra Azy.  
Tahaka ny halavitry ny atsinanana  
amin'ny andrefana  
No halavitry ny anesorany ny  
fahotantsika amintsika.

7. Tahaka ny fiantran'ny ray ny zanany

No fiantran'i Jehovah izay matahotra  
Azy;  
Fa Izy mahalala ny toetsika  
Ka mahatsiaro fa vovoka isika.

8. Tahaka ny ahitra ny andron'ny  
zanak'olombelona;  
Tahaka ny vonin-javatra any an-tsaha  
ny famoniny,  
Satria tsofin'ny rivotra izy ka lasa,  
Ary tsy mahalala azy intsony ny  
fitoerany.

9. Fa ny famindram-pon'i Jehovah dia  
hatramin'ny taloha indrindra  
Ka ho mandrakizay amin'izay  
matahotra Azy  
Ary ny fahamarinany mihatra amin'ny  
taranaka.  
Dia amin'izay mitandrana ny faneken-  
sy mahatsiaro hankatò ny didiny.

10. Jehovah efa nampitoetra ny seza  
fiandrianany any an-danitra;  
Ary ny fanjakany manapaka izao  
tontolo izao.  
Misaora an'i Jehovah, ianareo anjeliny,  
dia ianareo izay mahery indrindra  
Sady mankatò ny didiny Ary mihaino ny  
feon'ny teniny.

11. Misaora an'i Jehovah, ny  
miaramilany rehetra,  
Dia ny mpanompony izay manao ny  
sitrapony.  
Misaora an'i Jehovah, ny asany rehetra  
eran'ny fanjakany;  
Misaora an'i Jehovah, ry fanahiko.

Hisaorana anie ny Ray sy ny Zanaka,  
Ary ny Fanahy Masina;  
Eny, hisaorana sy hankalazaina anie  
Andriamanitra mandraki-zay. Amen.

## **TS 6 - Aoka ho tonga amiko ny famindram-ponao**

(Salamo 119 - 41:56)

1. Aoka ho tonga amiko ny famindram-  
ponao, Jehovah ô,  
Dia ny famonjenao, araka ny teninao.  
Dia hamaly izay miteny ratsy ahy aho,  
Satria matoky ny teninao.

2. Ary aza dia esorina amin'ny vavako  
ny teny marina;  
Fa miandry ny fitsaranao aho.  
Dia hitandrana ny lalinao mandrakariva  
aho,  
Dia mandrakizay doria.

3. Ary handeha amin'ny malalaka aho;  
Fa ny didinao no tadiaviko.  
Hilaza ny teni-vavolombelonao eo  
anatrehan'ireo mpanjaka aho  
Ka tsy ho menatra.

4. Ary hiravoravo amin'ny didinao aho  
Satria tiako ireny.  
Hasandratro ny tanako ho amin'ny  
didinao satria tiako ireny:  
Hosaintsainiko ny didinao.

5. Tsarovy ny teny natao tamiko  
mpanomponao  
Izay nampanantenanao ahy  
Izao no mampionona ahy amin'ny  
fahoriako;  
Ny teninao no mamelona ahy.

6. Ny mpirehareha maniratsira ahy:  
Tsy mba mivily miala amin'ny lalànao  
aho.  
Mahatsiaro ny fitsipikao izay  
hatramin'ny taloha aho, Jehovah ô,  
Dia mionona aho.



7. Fahatezerana mirehitra no nahazo ahy maraina.

Noho ny amin'ny ratsy fanahy izay mahafofy ny lalànao.

Ny didinao no ataoko an-kira  
Ao amin'ny trano fivahiniako.

8. Mahatsiaro ny anaranao nony alina aho, Jehovah ô,

Ka mitandrana ny lalànao.

Izao no ahy:

Mitandrana ny didinao aho.

Hisaorana anie ny Ray sy ny Zanaka,  
Ary ny Fanahy Masina;

Eny, hisaorana sy hankalazaina anie  
Andriamanitra mandraki-zay. Amen.

### **TS 7 - Tao amin'ny lalina no niantsoako Anao**

(Salamo 130)

1. Tao amin'ny lalina

No niantsoako Anao, Jehovah ô

2. Tompo ô, henoy ny feoko;

Aoka ny sofinao hihaino tsara ny feon'ny fifonako.

3. Raha mandinika heloka Hianao,  
Jehovah ô,

Iza no hahajanona, Tompo ô?

4. Fa eo aminao no misy ny famelan-  
keloka,

Mba hatahorana Anao.

5. Niandry an'i Jehovah aho; eny,  
niandry Azy ny fanahiko,

Ary ny teniny no nanantenako.

6. Ny fanahiko miandry ny Tompo  
mihoatra noho ny fiandrin'ny

mpiambina ny maraina,

Dia ny fiandrin'ny mpiambina ny

7. Manantenà an'i Jehovah, ry Isiraely;

Fa eo amin'i Jehovah no misy  
famindram-po sy fanavotana be;

8. Ary Izy no hanavotra ny Isiraely

Ho afaka amin'ny helony rehetra.

Hisaorana anie ny Ray sy ny Zanaka,

Ary ny Fanahy Masina;

Eny, hisaorana sy hankalazaina anie

Andriamanitra mandraki-zay. Amen.

### **TS 8 - Miderà an'i Jehovah, fa tsara Izy**

(Salamo 136:1-9 , 24-26)

1. Miderà an'i Jehovah, fa tsara Izy;

Fa mandrakizay ny famindram-pony.

Midera an'Andriamanitra Avo

Indrindra;

Fa mandrakizay ny famindram-pony

2. Miderà ny Tompon'ny tompo;

Fa mandrakizay ny famindram-pony;

Izy irery no Mpanao fahagagan-dehibe

Fa mandrakizay ny famindram-pony,

3. Izay nanao ny lanitra tamin'ny  
fahendrena

Fa mandrakizay ny famindram-pony,

Izay namelatra ny tany ho ambonin'ny  
rano,

Fa mandrakizay ny famindram-pony,

4. Izay nanao ireo fanazavana lehibe

Fa mandrakizay ny famindram-pony,

Dia ny masoandro ho mpanapaka ny  
andro

Fa mandrakizay ny famindram-pony,

5. Ary ny volana sy ny kintana ho

mpanapaka ny alina

Fa mandrakizay ny famindram-pony,  
Izay naneho hery namonjy antsika ho  
afaka tamin'ny fahavalontsika  
Fa mandrakizay ny famindram-pony,

6. Izay manome hanina ny nofo rehetra  
Fa mandrakizay ny famindram-pony;  
Miderà an'Andriamanitry ny lanitra;  
Fa mandrakizay ny famindram-pony.

Hisaorana anie ny Ray sy ny Zanaka,  
Ary ny Fanahy Masina;  
Eny, hisaorana sy hankalazaina anie  
Andriamanitra mandraki-zay. Amen.

### **TS 9 - Haleloia. Miderà an'i Jehovah, ry any an-danitra**

(Salamo 148)

1. Haleloia. Miderà an'i Jehovah, ry any  
an-danitra;  
Miderà Azy any ambony.  
Miderà Azy, ry anjeliny rehetra;  
Miderà Azy, ry miaramilany rehetra.

2. Miderà Azy, ry masoandro amam-  
bolana;  
Miderà Azy, ry kintana mazava rehetra.  
Miderà Azy, ry lanitry ny lanitra,  
Ary ianareo rano ambonin'ny lanitra.

3. Aoka hidera ny anaran'i Jehovah  
ireo;  
Fa Izy no nandidy, dia ary ireo.  
Nampitoetra ireo ho mandrakizay doria  
Izy;  
Nomen-dalàna ireo ka tsy mba mihoatra.

4. Midera an'i Jehovah eto an-tany,  
Hianareo dragona sy ianareo rano lalina  
rehetra,  
Ny afo sy ny havandra, ny oram-panala  
sy ny zavona,

Ny rivotra mahery izay mankatò ny  
teniny,

5. Ny tendrombohitra sy ny havoana  
rehetra,  
Ny hazo fihinam-boa sy ny sedera  
rehetra,  
Ny bibi-dia sy ny biby fiompy rehetra,  
Ny biby mandady na mikisaka ary ny  
voro-manidina,

6. Ny mpanjaka amin'ny tany sy ny  
vahoaka rehetra,  
Ny mpanapaka sy ny mpitsara rehetra  
amin'ny tany,  
Na ny zatovolahy, na ny zatovovavy,  
Na ny antitra, na ny tanora,

7. Samia midera ny anaran'i Jehovah  
avokoa,  
Fa ny anarany ihany no misandratra;  
Ambonin'ny tany sy ny lanitra  
Ny voninahiny.

8. Ary manandratra tandroka ho an'ny  
olony Izy,  
Dia fiderana ho an'ny olony masina  
rehetra,  
Eny, ho an'ny Zanak'Isiraely, firenena  
akaiky Azy.  
Haleloia.

Hisaorana anie ny Ray sy ny Zanaka,  
Ary ny Fanahy Masina;  
Eny, hisaorana sy hankalazaina anie  
Andriamanitra mandraki-zay. Amen.

### **TS 10 - He! Hianareo rehetra izay mangetaheta**

(Isaia 55:1-3 , 6-8)

1. He! Hianareo rehetra izay  
mangetaheta,  
Mankanesa amin'ny rano!

Ary ianareo izay tsy manam-bola,  
Avia, mividia, ka homàna!

2. Eny, avia, mividia divay sy ronono,  
Nefa tsy amim-bola, na amin-karena.  
Nahoana ianareo no mandany vola  
amin'izay tsy hanina,  
Ary ny vokatry ny fisasaranareo  
amin'izay tsy mahavoky?

3. Mihainoa dia mihainoa Ahy, ka hano  
izay tsara,  
Dia aoka hiravoravo amin'ny matavy  
ny fanahinareo  
Atongilano ny sofinareo, ka mankanesa  
aty amiko,  
Mihainoa, dia ho velombelona ny  
fanahinareo;

4. Ary hanao fanekena mandrakizay  
aminareo Aho,  
Dia ny famindram-po mahatoky  
nampanantenaina an'i Davida.  
Mitadiava an'i Jehovah, dieny mbola  
hita Izy,  
Miantsoa Azy, dieny mbola akaiky Izy.

5. Aoka ny ratsy fanahy hahafoy ny  
lalany,  
Ary ny tsy marina hahafoy ny heviny;  
Ary aoka hiverina ho amin'i Jehovah  
ireny,  
Fa hamindra fo aminy Izy.

6. Eny, ho amin'Andriamanitsika,  
Fa hamela heloka dia hamela heloka  
tokoa Izy.  
Fa ny fihevitro tsy fihevitareo  
Ary ny lalanareo kosa tsy mba lalako,  
hoy Jehovah.

Hisaorana anie ny Ray sy ny Zanaka,  
Ary ny Fanahy Masina;  
Eny, hisaorana sy hankalazaina anie

Andriamanitra mandraki-zay. Amen.

## **TS 11 - Midera anao izahay, Andriamanitra ô**

1. Midera anao izahay, Andriamanitra ô,  
Manaiky anao ho Tompo izahay;  
Ny tany rehetra dia mitsaoka Anao,  
Rain'ny mandrakizay.

2. Midera Anao ny anjely rehetra  
Ny lanitra sy ny mahery rehetra ao  
aminy  
Midera Anao, lalandava  
Ny Kerobima sy ny Serafima manao  
hoe:

3. Masina, masina, masina,  
Andriamanitra, Tompon'ny maro  
Manerana ny lanitra sy ny tany  
Ny fiandrianan'ny voninahitrao.

4. Midera Anao,  
Ny apostoly rehetra,  
Midera Anao,  
Ny mpaminany rehetra.

5. Midera Anao,  
Ny maritiora rehetra.  
Ny fiangonana eran'izao tontoloizao  
Manaiky Anao.

6. Ho Ray manam-piandrianana tsy  
hitafetra,  
Sy ny Zanakao-lahy tokana be  
voninahitra  
Ary ny Fanahy Masina,  
Mpampionona ny fo.

7. Hianao no Mpanjakan'ny  
voninahitra,  
Ry Jeso Kristy ô,  
Hianao no Zanaky ny Ray,  
Zanany mandrakizay,

8. Raha nanalo-tena hamonjy ny olona  
Hianao,  
Dia tsy nolavinao ny hateraky ny  
virijina  
Rahefa nandresy ny herin'ny  
fahafatesana Hianao  
Dia novohanao ny fanjakan'ny lanitra  
mba hidiran'ny mino rehetra

9. Mipetraka ao an-tanana an  
kavanan'Andriamanitra Hianao,  
Ao amin'ny voninahitry ny Ray.  
Mino izahay fa ho avy Hianao  
Ho Mpitsara anay.

10. Izany no ifonanay aminao hanampy  
anay mpanomponao,  
Izay navotanao tamin'ny ranao soa  
indrindra.  
Ataovy ho isan'ny olo-nao 'zahay  
Any amin'ny voninahitra mandrakizay.

11. Tompo ô, vonjeo ny olonao,  
Ary tahio ny lovanao.  
Manapaha azy,  
Ary asandrato ho ambony mandrakizay

12. Isan'andro isan'andro  
Dia mankalaza Anao 'zahay,  
Ary mihoby ny Anaranao  
Izahay mandrakizay.

13. Mba miarova anay, Tompo ô,  
Tsy hanota izao anio izao,  
Mamindrà fo aminay, Tompo ô,  
Mamindrà fo aminay.

14. Tompo ô, aoka ho tonga aminay ny  
famindramponao  
Araka izay itokianay Anao.  
Tompo ô, Hianao, no itokiako,  
Aoka tsy ho menatra aho mandrakizay

## TS 12 - Ry Raiko ô! Tariho

1. Ry Raiko ô! Tariho.  
Fa maizina ny alehako.  
Ary be ny rahona sy ny  
kotroka ao ambony:  
Indro, mivezimbezina aho,  
fa variana; Raiko ô  
tariho aho hody re;

Fiv : Raiko ô! Raiko ô!  
Mombà ny zanakao.

2. Ry Raiko ô! Tsy hita  
Ny faran'ny alehako,  
Ary maniry ny fitsaharana  
ny foko 'zay omenao.  
Raha mbola eto aho, sintony  
sao mivily; Raiko ô!  
Mba tano aho ho Anao;  
Raiko ô! sns...

3. Ry Raiko ô! Tariho,  
Fa be ny tsilo sy ny fandrika  
Ao an-dalambe,  
ka ketraka,  
Nefa nantsoinao aho tsara;  
Raiko ô!  
Mba raisonao ny tanako:  
Raiko ô! sns...

4. Ry Raiko ô! Manindry  
Ny hazo-fijaliana  
Mavesatra,  
Izay entiko isan'andro;  
Tohany aho, ry Raiko ô!  
fa reraka aho; Raiko ô!  
Mba manampia ahy 'zao:  
Raiko ô! sns...

## TS 13 - Avia, aoka isika hihoby ho an'i Jehovah

(Salamo 95)

1. Avia, aoka isika hihoby ho an'i Jehovah;  
Aoka isika hanao feo fifaliana ho an'ny Vatolampy famonjena antsika.  
Aoka hankeo anatrehany amin'ny fiderana isika;  
Aoka hanao feo fifaliana ho Azy amin'ny fihirana isika.

2. Fa Andriamanitra lehibe Jehovah,  
Ary Mpanjaka lehibe ambonin'ny andriamanitra rehetra Izy.  
Eo an-tànany ny fitoerana lalina amin'ny tany;  
Ary Azy ny tendrombohitra avo.

3. Azy ny ranomasina, fa Izy no nanao azy,  
Ary ny tany maina dia noforonin'ny tànany.  
Avia, ka aoka hiondrika sy hiankohoka isika;  
Aoka isika handohalika eo anatrehan'i Jehovah, Mpanao antsika;

4. Fa Izy no Andriamanitsika;  
Ary olona fiandriny sy ondry tandremany isika.  
Enga anie ka hohenoinareo anio ny feony manao hoe:  
Aza manamafy ny fonareo tahaka ny tao Meriba,

5. Sy tahaka ny tamin'ny andro tao Masa fony tany an-efitra  
Izay nakan'ny razanareo fanahy Ahy,  
Sy nizahany toetra Ahy,  
Na dia efa hitany aza ny asako.

6. Efa-polo taona no nahamonamonaina Ahy tamin'izany taranaka izany,  
Ka hoy Izaho: Olona maniasia amin'ny fony izy Ka tsy mahalala ny lalako;  
Ka dia nianiana tamin'ny fahatezerako

Aho hoe:  
Tsy hiditra amin'ny fitsaharako mihitsy izy.

Hisaorana anie ny Ray sy ny Zanaka,  
Ary ny Fanahy Masina;  
Eny, hisaorana sy hankalazaina anie Andriamanitra mandraki-zay. Amen.

## **TS 14 - Ny "Amena" fito**

Amena, Amena, Amena, Amena,  
Amena, Amena, Amena.